


K182 383

ფაქონ ბაიქუნთი

ქალღვრანი


ქალი

ფაქირ - ხაიქურთი



ქალღურიანი

ქალი



ბამონციველია
„საბჭოთა აჭარა“
ბათუმი
1980

ფაქირ ბაიქურთი თანამედროვე პროგრესული თურქი მწერალია. მისი შემოქმედება საკმაოდ მდიდარი და მრავალფეროვანია. მის კალამს ეკუთვნის მოთხრობების კრებულები, სქელტანიანი რომანები. სულ დღემდე გამოცემული აქვს 25 წიგნი, რომელთაგან, ორი, რომანები—„გველთა შურისძიება“ და „მეათე სოფელი“ თარგმნილია რუსულ ენაზე.

ფ. ბაიქურთი, ეგრეთწოდებული, სოფლის მწერალია. მისი ნაწარმოებების უმეტესობა მიძღვნილია თანამედროვე თურქული სოფლის, ღარიბი გლეხობის, უმიწაწყლო, ბოვანო ხალხისადმი. ავტორი ზედმიწევნით კარგად იცნობს თურქულ სოფელს, მის წინაშე მდგარ სიძნელებს და თავისი შემოქმედებით ცდილობს, როგორმე მიაქციოს თურქული საზოგადოების ყურადღება ამ მწვავე სოციალური პრობლემისადმი.

ბაიქურთის მოთხრობების კრებული „ქორფლიანი ქალი“ ქართულად პირველად იბეჭდება.

X182,383

თურქულიდან თარგმნა იბრაიმ გორაძემ

საქართველოს
პარლამენტის
ეროვნული
ბიბლიოთეკა

© გამომცემლობა „საბჭოთა აზრის“, 1980

ბ 70302-029
M 621(08)80 28—1980

X U X A

სამხედრო სამსახურში გაიწვიეს და სტამბულში მოხვდა. სამხედრო სამსახურის მოხდის შემდეგ მშობლები ყოველდღე ელოდნენ მის დაბრუნებას, მაგრამ იგი აღარ დაბრუნებულა. კვალსაც ვერსად მიაგნეს. არც თავად გამოჩნდა და აღარც წერილი მოუწერია.

წავიდა და აღარ დაბრუნდა. „სტამბულმა გადაყლაპა იგი“ — თქვეს და ნელ-ნელა მიივიწყეს. მხოლოდ მშობლებს ახსოვდათ და არ ივიწყებდნენ. შვილზე დარდით დაავადმყოფდნენ. სტამბული ძალიან შორს იყო და იქ წამსვლელი და მომძებნელი არავინ აღმოჩნდა. გავიდა რამდენიმე წელიწადი. მშობლებმა მისი დაბრუნების იმედი გადაიწყვიტეს.

და, აი, ერთ დღეს, მოულოდნელად, როცა უკვე აღარავინ მიელოდა, მოვიდა იგი, მოადგა მშობლიური სახლის კარს. ვერც ერთმა მეზობელმა ვეღარ იცნო. ჯარში რომ წავიდა, ცარიელი ძვალი და ტყავი იყო, ახლა კი გასუქებული დაბრუნდა; რომ წავიდა, დაკერებული ტანსაცმელი ეცვა, ახლა ბეგით გამოწყობილი დაბრუნდა: ძვირფასი კოსტიუმი, ფეხსაცმელი, პერანგი, ცილინდრი. ლაპარაკიც სხვანაირი ესწავლა — ქალაქური, სტამბული: „პარდონ“, „ძერსი“, — სულ ამ სიტყვებს ურთავდა საუბრისას. მოკლედ, ყველაფრით შეცვლილიყო, მხოლოდ ეს იყო, სიმაღლე არ მომატებოდა, როგორც ჯუჯაც წავიდა, ისეთივე ჯუჯა დაბრუნდა.

მარტო არ დაბრუნებულა — ცოლი და ორი ქალიშვილი ახლდა. ცოლი ლამაზი ქალი იყო, მაღალი, ამოლტილი, ქერა და ლურჯთვალება. გოგონები დედას ჩამოგავდნენ. ერთი შვიდი წლისა იქნებოდა, მეორე კი ხუთისა. შვილებს, მხოლოდ და მხოლოდ ცხვირი ჰქონდათ მამის, ვეება, უშნო ცხვირი.

მშობლებმა სიხარულისაგან აღარ იცოდნენ რა ექნათ. ხან დიდი ხნის უნახავ შვილს ეხვეოდნენ, ხან რძალს, ხან შვილიშვილებს.

ჯუჯას მამა ალი შეძლებული კაცი იყო, მიწების პატრონი.

საკუთარი წისკვილი ჰქონდა და ცხვრის ფარა ჰყავდა. შვილის
ჩამოსვლა ისე გაუხარდა, ღმერთს სამი წლის აქლემი უმცროსი
რა. მისი დაბრუნების აღსანიშნავად გაყოფილმა ძმებმაც გა-
მოიღეს თავი და თითო-თითო ცხვარი შესწირეს ღმერთს.

პირველ ხანებში სტამბულელი ქალი ჩუმად იყო, მერე კი
აწუწუნდა:

— რა სიბინძურეა აქ, რა წვირია, როგორი მტვერი, ის
დამესვარა, ეს გამიფუჭდა! — ხშირად შესჩიოდა იგი ქმარს.

მისმა წუწუნმა სიცოცხლე გაუმწარა ჯუჯა-მუხამედს.

სტამბულში, მუსტაფა-ფაშას უბანში საკუთარი სახლი ჰქო-
ნიათ. მუხამედს ღურგლობა ესწავლა, კარგადაც დაუფლებია
საქმეს და ფულსაც კარგად აკეთებდა. კარგადაც ცხოვრობდ-
ნენ იქ, იყვნენ წყნარად, თავის ჰკუაზე. მაგრამ ერთხელ მუხა-
მედი ატეხილა: — წავიდეთ, მშობლები ვნახოთო, დაუჩემებია.
ქალს უარი განუცხადებია, მაგრამ მუხამედს ბოლოს თავისი
გაუტანია. სოფელში წამოსულან. რომ მოვიდნენ, კარგი ქნეს,
მაგრამ სტამბულელი ქალი ვერაფრით ვერ შეეგუა სო-
ფელს. ბოლოს შეუჩნდა ქმარს: — ავდგეთ, წავიდეთ სტამ-
ბულში, ხომ მოვედით სოფელში, ხომ მოვინახულეთ შენი
მშობლები? მერე ისევ ჩამოვალთ და მოვინახულებთ, ყოველ
ორ წელიწადში ამოვიდეთ და ვნახოთ, მეტი რა უნდათ?

ჯუჯა-მუხამედს სისხლი გაუშრო ცოლის გაუთავებელმა
წუწუნმა. უკარება და გულჩათხრობილი გახდა. ცოლი უყ-
ვარდა, პატივსა სცემდა, მაგრამ მშობლების მიტოვება და
სტამბულში დაბრუნება ეძნელებოდა.

— მამაჩემს იმდენი მიწები აქვს, ჩემისთანას ბარე ცხრას
ეყოფა. რა დაგრჩენია იმ სტამბულში? თუ იქაურ ვარდა აქა-
ურზე უფრო უკეთესი სუნი აქვს?

— რად მინდა აქაურობა? წინ შეშა, უკან ფიჩხი, ორ
მთას შორის, ხევი! ჩაემწყვდიე აქ და იყავი სიკვდილამდე!..
არა, წავიდეთ სტამბულში!..

კაცმა რომ თქვას, ემინე-ხანუმი არ იყო ცუდი ქალი,
ქმარი უყვარდა, შვილებსაც კარგად უვლიდა. მისი უბედურე-
ბა ის იყო, რომ სოფელს ვერ იტანდა და სტამბულზე დარ-
დობდა. ბოლოს სულ წაუხდა ხასიათი, უკარება და გულჩათ-
ხრობილი გახდა. დასუსტდა, დარდისაგან ჩამოხშა.

— ეს ქალი არ შეგერთო კარგი იქნებოდა! — უთხრა
ერთ დღეს მამამ ჯუჯას, — მაგრამ რახან შეგირთავს, რაღა
უნდა ქნა აწი? ახლა ზედმეტია ლაპარაკი. ვიცი მე, ეს ქალი
აქ ვერ გაჩერდება, მთის ჩიტს მთა უყვარს, ველისას კი ველი!
წაიყვანე შენი ცოლ-შვილი და წადი სტამბულში. ხანდახან
თუ ამოხვალ და მომინახულებ, მაღლობელი ვიქნები.

დედა კი სულ სხვანაირად უკრავდა: — ამ სოფელში



შენი შესაფერისი ქალი არ ინახებოდა ვითომ, ის რომ შენით-
 თე? ენას არ იღებს, არ ლაპარაკობს, უენოა თუ ავადმყოფი,
 ვერ მიხვდება კაცი. დაანებე თავი, სოფლის ბოლომდე მიყვები,
 ერთიც მიბეგვე და გაუშვი. თუ უნდა, წავიდეს თავის სტამ-
 ბულში, შენ კი აქ დარჩი. ჩვენ მოვხუცდით, მარტოდ ვერ გა-
 ვჩერდებით, შენი ძმები ცალკე ცხოვრობენ, თავიანთი ოჯა-
 ზები აქვთ და ჩვენთვის არა სცალიათ... ბავშვებს თუ წაი-
 ყვანს, შენ ნუ იღარდებ, წაიყვანოს. მაგით ფესვი არ გაგისმე-
 ია შენ, დაგაქორწინებთ ავერ და ორ წელიწადში ორი შვილი
 გეყოლება ახალი ცოლისაგან. შენ ოღონდ ბავშვი ინდომე და
 სოფლელი ქალი რამდენიც გინდა იმდენს გაგიჩენს!

ალბათ დედის წაქეზებით იყო და ძმები, ნათესავეები
 და ახლობლები მიესივნენ საწყალ ჯუჯას: — გაუშვი ეს ქალი,
 სადაც უნდა იქ წავიდეს. დედის ხათრი არა გაქვს? ქალი რამე
 დენიც გინდა იმდენი ინახება, დედას კი ვერ ნახავ. ნუ აწყე-
 ნინებ მაგის გამო დედას!... დედაზე უფრო ძვირფასი და სა-
 ნატრელი რა არის ამ ქვეყანაზე?

მუხამედი ითმენდა, ითმენდა, ბოლოს, ამდენი თხოვნით
 თავმოებზრებულმა გადაწყვიტა.

— აბა, გაემზადე, მივდივართ! — უთხრა ცოლს და დე-
 დას ცოლის უჩუმრად თვალთ ანიშნა, ყველაფერი ისე იქნე-
 ბა, როგორც შენა გსურსო.

გზას გაუდგნენ. ემინე-ხანუმი დარწმუნებული იყო ქმარი
 დაეიმორჩილებოდა და გამხიარულდა.

სადგურში ჯუჯამ ბილეთები აიღო, მატარებელი რომ ჩა-
 მოდგა, ცოლ-შვილი კუბეში დააბინავა და ცოლს უთხრა: —
 მატარებელი ჯერ კარგა ხანს არ გავა, ჩავალ, ტკბილეთლობას
 და ხილს ამოვიტან და ამოვალო.

ცოლს საწინააღმდეგო აბა რა უნდა ჰქონოდა და დაე-
 თანხმა.

ჯუჯა წავიდა. დრო გავიდა, მატარებელი დაიძრა, იგი კი
 მაინც არ ჩანდა. სანამ მატარებელი სადგურს კარგა მანძილით
 არ გასცილდა, ქალი ფანჯარას არ მოსცილებია. ეგონა, ქმარი
 მატარებელს ზამორჩაო. მერე კარგა ხანს უცადა სტამბულ-
 შიაც, მაგრამ მუხამედი არ გამოჩენილა. იგი მხოლოდ დიდი
 ზნის მერე მიხვდა, რომ ქმარმა მოატყუა, მიატოვა და თავი-
 დან მოიშორა.

სახლში დაბრუნებულმა ჯუჯამ ყველაფერი მოუყვა მშო-
 ბლებსა და ნათესაებს.

ზოგიერთებმა მოუწონეს საქციელი: — აბა რა, დედა
 სულ სხვა რამეა! კაცი სადაც დაიბადა, იქ უნდა იცხოვროს,
 სტამბული რა შენი საქმეა? იყავი აქ, ხელობა გაქვს, განსენი
 სახელოსნო და იმუშავე!



ზოგიერთებმა გაუმტყუნეს, არ მოუწონეს ცოლ-შვილის მიტოვება და გამოქცევა: — ეს რა საკადრისი საქციელია? დაბალი კაცისა გეშინოდესო, ტყუილად კი არ არის ნათქვამი!..

დედა სიხარულით ფეხზე აღარ იდგა. მიზანს მიაღწია, ქალაქელ ქალს ჩამოაშორა, ახლა, ადგება და ერთ ქვრივ, მასავით დაბალ, ჯუჯა ქალს მიათხოვებს, შებოჭავს ასე და ქე ეგდება ძერე სოფელში. სახელოსნო? რა ჭირად უნდა სახელოსნო! მერედა, მის მიერ დამზადებული ავეჯი ვის რა ჭირად უნდა სოფელში? ვინ იყიდის მას?

დარჩა სოფელში ჯუჯა და დაიწყო ბოსლების, მიწური სახლების კარების შეკეთება და სხვა წვრილმანი საქმე. მალე გასაკეთებელი არაფერი იყო და დარჩა უსაქმოდ და უფულოდ, საკუთარ გულს ასკდებოდა, დარდს გულში იკლავდა, არავის ანდობდა თავის ხეაშიადს. ვერ იქნა და ცოლ-შვილი ვერაფრით დაივიწყა. მათზე დარდი არ აძლევდა მოსვენებას და გასაქანს. ძალიან წუხდა, რომ დედასა და ნათესავებს დაუჭერა, და ცოლ-შვილი მიატოვა.

სოფელში რომ დაებათ და სტამბულში წასვლაზე არ ეფიქრა, ცოლი შერთეს, მაგრამ ახალი ცოლი ისეთი არ გამოდგა, გული რომ გადაეყოლებინა და პირველი ცოლი დაევიწყებინა. ხმელი, ფიცარივით ქალი იყო, უშნოზე უშნო და უხასიათო. სად ის და სად პირველი ცოლი ემინე! ყოველ დამით ხედავდა სიზმარში. რატომ მიგვატოვე, მოდი, გელით, გვიპატრონეო, თითქოსდა ეძახდა, თავისთან უხმობდა ემინე. სიზმრები გასაქანს არ აძლევდა. ბოლო ხანებში უძილობაც დასჩემდა.

მეორე ცოლისაგან ვაჟი შეეძინა. არ განარებია, ზედაც არ დაუხედავს, თითქოსდა მისი არ იყო. გამუდმებით ემინე ედგა თვალწინ, მაგრამ ისიც ვერ გადაეწყვიტა, დაეკრა ფეხი, მიეტოვებინა ყველაფერი, ჩასულიყო სტამბულში და თავის ემინესა და შვილებს დაბრუნებოდა როგორც მეუღლე და როგორც მამა.

ერთ დღეს დამბლა დაეცა. ენაც ჩაუვარდა და კანკალი დააწყებინა. საშინელი სანახავი გახდა, მთელი სხეული ციებაშეყრილივით რომ აუცახცახდებოდა და რაღაცის სათქმელად ბლუკუნს დაიწყებდა, ძნელი იყო მასზე შეხედვა.

— აბა რა ეგონა. ემინე-ხანუმის ცოდვა არ გამოუწევდა? — ჩურჩულებდნენ მეზობლები, — მიატოვა ოქროსავით ცოლ-შვილი, ჩაიდინა ცოდვა და ესეც სასჯელი!

შინაურებს არც ხოჯა დაუტევებიათ და არც ექიმი, რამდენი ნუსხა არ დაუწერეს, ყურანი უკითხეს, წამლები ასვეს, მაინც ვერაფერმა უშველა, ერთიანად დაჩაჩანაკდა, დაჩიავდა

და დაგლახაკდა საწყალი ჯუჯა, ცოლმა შვილი მიუგდო და სხვა-
გან გათხოვდა. ამასობაში მამა მოუქცდა, დედა ლოგინად ჩა-
ვარდა და საწყალი მუხამედი უპატრონოდ, ღვთისანაბარად
მიგდებული დარჩა.

ხანდახან გაყოფილი ძმების ცოლები თუ გადმოუტანდნენ
სამადლოდ საჭმელს, ეს იყო და ეს. საცოდავ ჩაჩანაკს ემინე-
ზე ფიქრი და/დარდი არ ასვენებდა.

როცა რომელიმე მეზობელი ქალი მოვიდოდა და დაე-
ლაპარაკებოდა, ჯუჯა საოცრად იცვლებოდა, ერთ ადგილზე
ვერ ისვენებდა, საშინელი ძაგძაგი აუტყდებოდა და ერთთავად
თვალებში შესცივინებდა მას. რალაცის თქმა სურდა, მაგრამ
არ შეეძლო, ვერ ამბობდა და იტანჯებოდა. გამოთხოვებისას,
როცა ქალი წამოდგებოდა, ჯუჯა როგორღაც მოახერხებდა,
ჩაავლებდა აკანკალებულ ხელს მაჯაში და ზმუილს ასტეხდა:—
ახ...ეს...ო...ნე...ემ...ინეე! — მერე თავს ჩაჰკიდებდა და ცრე-
მლი წასკდებოდა.

* * *

ზოგჯერ ჩემთან შემოივლიდა სკოლაში.

პირველად რომ მოვიდა, გამიკვირდა, ჩემთან რა უნდა-
მეთქი, გავიფიქრე.

ბავშვები მიეშველნენ, ვირიდან ჩამოსვეს და იქვე, კუნძ-
ზე დასვეს. თავზე ძველი, დახეული, სტამბულიდან ჩამოყო-
ლილი ცილინდრი ეხურა.

ერთხანს იჯდა, აქეთ-იქით ქანაობდა და მიცქერდა, მერე
სახე დაეძაბა და დაიწყო: — ჩე...მმი წა...მა...ლი თვი...თონ...მე
გა...ვა...კეთე!

— კი! — ჩავილაპარაკე მე, — თითქოსდა მივხვდი, რი-
სი თქმაც სურდა...

— ყვ...ყვ...ყვ, — წამოიწყო რალაც და ისევ შემხედა.
ვერაფერი გავიგე; ისევ ბავშვები მომეშველნენ.

— ყველს ითხოვს, მასწავლებლო! — ამიხსნეს მათ.

— ოო! — შევწუხდი მე, — ყველი არა მაქვს! სად ჩვენ
და სად ყველი?

სახე მოედრუშა, მწყრალად შემხედა. ეს რა ღარიბი მასწა-
ვლებელი ყოფილაო, გაივლო ალბათ გულში.

მერე ისევ დაიწყო ბოდიალი. ვერაფერი მივხვდი.

ისევ ბავშვებმა ამიხსნეს.

— ჩა...ჩა... ჩაა! — წამოიწყო ისევ.

— რა გინდა? — ვკითხე და მივაცქერდი.



თავი გაიქნია და ისე საწყლად შემომხედა, მისი სეტყვით ვით გული ამიწროილდა.

- ჩა...ჩა... ჩაა! — წამოიწყო ისევ.
- ვერ გავიგე, რა უნდა? — ვკითხე ბავშვებს.
- ჩაი უნდა, მასწავლებლო, ჩაი! — ამიხსნეს.
- ჩაი მაქვს, მაქვს ჩაი! — ვუთხარი ხმამაღლა.

თურმე ყურს არ აკლდა და ყველაფერი გაიგონა. ისე გაუხარდა, თითქოსდა რამდენიმე წელია ჩაი არ დაელიოს. მოულოდნელად ატირდა. ჯერ ვერ მივხვდი, რატომ ტიროდა, მერე გავუხე. ჩაის გახსენებაზე ემინე და შვილები გაახსენდა.

— ააა...აჰ! ...ემ...ინ...ე... აჰ...ემ...ინ...ე! — ტიროდა, ბლუკუნებდა თავისთვის.

საშინელ მდგომარეობაში იყო, თმა და წვერ-ულვაში გაბურძენოდა, დიდხნის დაუბანელი ჩანდა, ჩაკონკილი, ათგან დაკერებული ტანსაცმელი ეცვა. მისი საცოდაობით ვიწვოდი, მაგრამ არაფერი შემეძლო გამეკეთებინა მისთვის, ერთადერთი, რაც შემეძლო, ნუგეში იყო, მაგრამ რას უშველიდა ჩემი ნუგეში იმ საცოდავს, რომელსაც ასეთი ხვედრი არგუნა ბუნებამ თუ ადამიანმა?

ჩაი დავუშაქრე და მივაწოდე. ხელები უკანკალებდა და ძლივს ჩამომართვა. დიდის გაჭირვებით მიიტანა პირთან, მოხვრიპა და უკმაყოფილოდ აბლუკუნდა: — სურნ...სურნ... არ... არ...!

ამას კი მივუხვდი: ჩაის კარგი სურნელი არა აქვსო.

მეორეჯერ მიიტანა პირთან, მოხვრიპა, ხელები აუკანკალდა, ჭიქა ველარ შეიკავა და ხელიდან გაუვარდა. თავი ჩაჰკიდა და ისევ აბლუკუნდა: — ააჰ... ემი...ნეე... ს...ე...მ::: ეს::: ჩა... — ატირდა, თანაც ცდილობდა როგორმე გაეგებინებინა ჩემთვის, რა სურდა, რას მოითხოვდა, რა უნდოდა... ბოლოს, როგორც იქნა, გავიგე რაც უნდოდა: რასაც მოითხოვდა ჩემგან.

— თუკი ცხოვრებაში გსურს რამე კარგის გაკეთება, დამეხმარე, მიმიყვანე ჩემს შვილებთან, ჩემს ემინესთანო, მთხოვდა. და დიდხანს, დიდხანს შემომმცქეროდა ცრემლით სავსე თვალებით.

ვიცოდი, უკვე აღარ იყო ამ ქვეყნის, აღარც სადმე წაყვანა შეიძლებოდა მისი. რომც წაეყვანა ვინმეს, მისი ერთადერთი სიამოვნება ის იქნებოდა, მხოლოდ და მხოლოდ თვალს შეავლებდა მის ემინეს, შეავლებდა და მეტი არაფერი...

ვინ იცის და, იქნება მისი ემინეც მასავით მოთავებულ იყო უკვე?

სამოცდაათი თუ ოთხმოცი წლის, წელში მოხრილი სოფ-
ლელი გლეხი, რომელსაც ზურგზე ხურჯინი მოეგდო, ყავახა-
ნასთან შეჩერდა.

ყავახანა მიტოვებულივით გამოიყურებოდა, კაციშვილი
არ ჭაჭანებდა შიგ. ყავახანის პატრონი — სადიქ-ეფენდი ყა-
ვახანის წინ, ბრტყელ ქვაზე ჩამომჯდარიყო და რალაც ფიქრე-
ბში გართული დინჯად მარცვლავდა კრიალოსანს. გლეხას დაქ-
ნახვაზე სადიქ-ეფენდიმ თავი წამოსწია, კრიალოსნის მარცვ-
ლას თავი ანება და გლეხს მიაჩერდა.

გლეხმა ხურჯინი მოიხსნა, სადიქ-ეფენდის მოწიწებით,
თავის დაკვრით მიესალმა და ხვნეშით ჩამოჯდა ქვაზე.

საუბარი გააბეს, რა არ თქვეს, რა არ გაიხსენეს და მოი-
გონეს, საუბარი ამინდით წამოიწყეს და პოლიტიკით გაათა-
ვეს. კარგა ხნის მერე გლეხი წამოდგა და თქვა: — ეს ხურჯი-
ნი დროებით შენთან რომ დავტოვო რა იქნება, სადიქ-ეფენ-
დი? მე ექიმთან უნდა წავიდე.

სადიქმა მოხუცს ახედა და იკითხა: — რაო, ავად ხარ?

— რა თქმა უნდა ავად ვარ! ექიმთან, აბა, ჯანმრთელი
კაცი მივა?

სადიქმა თავი მოიქექა და ჩაიციხა: — მაგი სწორია, ჯან-
მრთელი ადამიანი ექიმს არ დაავადმყოფებინებს თავს!.. კი
მაგრამ ავად თუ ხარ, ამხელა გზაზე როგორ წამოდი?

— აბა რა უნდა მექნა? — იკითხა მოხუცმა.

— ცხენი ან ჯორი არ გყავდა, რომ შემჯდარიყავ და ისე
წამოსულიყავი? ამხელა გზაზე კარგადმყოფი გახდებოდა ცუ-
დად.

— ცხენსა და ჯორს მე ვინ მომაშავებს, ძიავ? სად მყავს...
ყიშლაყამდე ხის მასალით დატვირთული მანქანით მოვედი,
იქიდან კი სულ ფეხით მოვდივარ. მე აქაურობას არ ვიცნობ,
სადიქ-ეფენდი, შენ კი აქ ცხოვრობ და გეცოდინება ალბათ:
მითხარი, რომელ ექიმთან ჯობია მისვლა? რომელი ექიმი შე-
მხედავს უფრო კარგად?

სადიქ-ეფენდიმ ჩაიციხა და თქვა: — ძმობილო, ამხელა
ქალაქში იმდენი ექიმია, რამდენიც ვარსკვლავია ცაზე. შეხე-
დე, ამ დიდ სახლებში რომელიმე კართან რომ შეჩერდე და
ხარი დარეკო, ან ექიმის მეკარე გაგიღებს კარს, ან ვექილისა.

— მაგ ვექილების ოჯახი ამოავდოს ღმერთმა! — ხმა-
შაღლა ჩაილაპარაკა გლეხმა, — ვექილი რა ჭირად მინდა?
მე ექიმი მჭირდება, ექიმი!

— ვიცი, ისე, სიტყვაზე გითხარი! — დაამშვიდა სადიქ-



ეფენდი. — შენ ის მითხარი, რომელთან გინდა მისწავლა საავადმყოფოს ექიმთან თუ კერძო ექიმთან?

გლები ჩაფიქრდა და მერე ორჭოფულად თქვა: — საავადმყოფოს ექიმთან მირჩევნია, საავადმყოფოს ექიმი უფრო კარგი იქნება, უფრო მცოდნე.

— შენი ნებაა!.. საავადმყოფოს ექიმი სახლში უნდა ინახულო... საავადმყოფოში იმდენი ავადმყოფი დგას რიგში და ექიმი ყველას ხომ ვერ გასინჯავს?.. მიხვალ სახლში და ექიმი კარგად გავსინჯავს, წამალსაც გამოგიწერს.

— საავადმყოფოში კარგად არ გამსინჯავს? — იკითხა გლებმა დაეჭვებით.

— საავადმყოფოში მისულს ექიმი ერთ-ორს დაგიკაკუნებს ზურგზე, დაიხველეო, გეტყვის და თავისუფალი ხარ, ქე გამოგიშვებს უკან.

— სახლში რომ მივალ იმ ექიმთან... გასინჯვა ფულითაა, არა?

— რა თქმა უნდა! აბა უფასოდ ვინ გავსინჯავს?

— რამდენს მომთხოვს, ნეტავ? — შეწუხდა გლები.

— ათ ლირას მაინც მოგთხოვს.

გლებმა თავი დახარა და გაიფიქრა: — „იუსუფჩადან აქამდე ასეთი წვალებით მოვედი... საავადმყოფოში უშედეგო მისვლას, არა სჯობია ათი ლირა გადავიხადო? მივალ სახლში და გამსინჯავს, შედეგიან მკურნალობაში თუ გადაიხდი ფულს, არც დაგენახება“. — თავი ასწია და სადიქ-ეფენდის ჰკითხა: — სად ცხოვრობს ექიმი?

— ვაგზლის ქუჩაზე... მგონი, ახლა სახლში იქნება, თუ იჩქარებ, მიუსწრებ... ამ ქუჩას გაყევი, გახვალ ბოლომდე და გზაჯვარედინთან მიხვალ. იქ პოლიციელი დგას, შეეკითხები და მიგასწავლის. დაიმახსოვრე, იმ ექიმს იექდე-ბეის ეძახიან...

გლებმა მადლობა გადაუხადა და, რომ არ დაეიწყებოდა, ექიმის გასაოცარი სახელის გამეორებით გაუყვა ქუჩას. გზაჯვარედინთან რომ მივიდა, შეჩერდა, მერე მოძრაობის მომწესრიგებელ პოლიციელს მიუახლოვდა და ექიმის სახლი ჰკითხა.

— ამ ქუჩას გაყევი, აქედან მერვე სახლში ცხოვრობს იექდე-ბეი, — ზედაც არ შეხედა, ისე მიუგო პოლიციელმა.

„ჯერჯერობით საქმე კარგად მიდის!“ — გაიფიქრა კმაყოფილმა გლებმა და ქუჩას გაუყვა.

იექდე-ბეი, სიმსუქნისაგან კასრივით დამრგვალებული, ლოყებლაქლაქა და ჭროლათვალემა მწითული კაცი, თავისი სახლის ეზოში ბრძანდებოდა და თავის ორ ქალიშვილს ათამაშებდა, ბავშვებს სათამაშო ნიჩბები და ვედროები ეჭირათ ხელში და სილით ავსებდნენ.

მისი სახლისაკენ მიმავალი მოხუცი სოფელი რომელიც
ნიშნა, იქედ-ბეიმ ბავშვებს თავი ანება, ხუნეშით წამოდგა და
ჭიშკართან მიეგება: — გამარჯობა შენი, მამავ! — მიესალმა.

— გაგიმარჯოს, ჩემო ბატონო! ექიმი თქვენ ბრძანდე-
ბით?

— კი, ვარ... შემობრძანდით, — გლეხი ეზოში შეიყვანა
და პირველი სართულისკენ წაუძღვა. — მობრძანდით, მობრ-
ძანდით!

— მადლობელი ვარ, ბატონო!

ექიმი კაბინეტის კარი შეაღო, გლეხი შეუშვა და უთხრა:
— შენ შედი და დაჯექი, მე ხალათს გადავიცვამ და მოვალ! —
გავიდა და გლეხი მარტო დატოვა ოთახში.

გლეხი ბოძივით დაერჯო შუა ოთახში და გამტერებული
მიაჩერდა კედელზე გაკრულ სურათებს: — „ო, ალაპ, შენ
შემიბრალე! — გაივლო გულში, — რამდენი ბღერისანის სურ-
ათებია, აგერ, კიდევ, როგორ გაშიშვლებულან ეს უნამუსოე-
ბი! შიშველი ქალების სურათები რაში ესაჭიროება ნეტა ამ
ექიმს? ქალებზე გადაყოლილი კაცია ალბათ. შეხედულებაც რო-
გორი აქვს, ღორივითაა გასუქებული!“ — სურათების თვალ-
თვალს თავი ანება, იატაკს დააჩერდა და ამჯერად იმაზე დაიწყო
ფიქრი, თუ რა უნდა ეთქვა ექიმისათვის, არცერთი ავადმყოფ-
ობა და სატკივარი არ უნდა გამორჩენოდა: — მარცხენა ფე-
ხი რომ მაქვს გასივებული და მტკივა, არ უნდა დამავიწყდეს;
წელის ტკივილები რომ მკლავს, ისიც უნდა გამახსენდეს;
კბილის ძირები რომ მაქვს ჩარჩენილი პირში და მტკივა, ისიც
უნდა ვთქვა; საშარდე ბუშტი რომ მეწვის და მოშარდვა მი-
ჭირს, ისიც!“ — ფიქრობდა იგი.

ექიმი შემოვიდა და ფიქრი გააწყვეტინა.

ექიმი გლეხი სკამზე დასვა, თავად სავარძელში ჩაეფლო
და ჰკითხა: — შენ სადაური ხარ, მამავ? რომელი სოფლიდან
ჩამოხვედი?

— მე იუსუფხადან ვარ, ექიმ-ბეი!

— იუსუფხა, იუსუფხა, — ჩაფიქრდა ექიმი, — რომელ
რაიონს ეკუთვნის ეს სოფელი?

— თეფწლის რაიონს, ბატონო!

— ხო... დიახ, დიახ, ვიცი, გამიგონია! სოფლის სახე-
ლებს ვერ ვიმახსოვრებ, მამავ, ერთიმეორეში მერევა ყოველ-
თვის!

გლეხმა გაიხმორა და მიუგო: — ადვილი არაა იქედ-
ბეი, მილიონობით სოფელია ამ ქვეყანაზე და ყველას სახელს
ხომ ვერ დამახსოვრებ?

— კი, მართალია... ეგ თქვენი სოფელი ლამაზია?

— დიახ, მამავ, მართალი ხარ! — დამეოწმა ექიმი და
შაათს შეხედა, — შენ რომელი პარტიის წევრი ხარ? — ჰკითხა
ბოლოს.

გლეხმა მიუგო, რომელ პარტიასაც ეკუთვნოდა.

მერე ცოტა პარტიების გარშემო წაიკამათეს, ბოლოს ექიმ-
მა მაგიდის უკრა გამოაღო, სიგარეტი ამოიღო, მოუკილა და
თქვა: — შენთან საუბარი ჩემთვის სასიამოვნოა, მამავ! ჰკვიანი
კაცი ყოფილხარ, ზოგიერთ სოფლელს კი არ გავხარ აბა, ერთ
სიტყვასაც რომ ვერ ამოქაჩიავ და რას ბლუკუნებს, ევრასდი-
დებით რომ ვერ მიხვდება ადამიანი... ახლა შენ ერთი ესეც
მითხარი: რა ვაწუხებს, რა გტკივა?

— ყველაფერი მტკივა, ბატონო, ყველაფერი!

— მაინც?

გლეხი მოუყვა რაც სტკიოდა, რაც აწუხებდა, ექიმი უსმე-
ნდა და დროდადრო თავს აქნევდა.

— ყველაზე უფრო მაინც რა გტკივა? — ჰკითხა ბოლოს.
გლეხმა აუხსნა.

— მდაა! საავადმყოფოში უნდა დაწვე, მამავ, საავადმყო-
ფოში! მე შენ წერილს დაგიწერ. საავადმყოფოში მიიტან,
შთავარ ექთანს ნახავ, იგი საცვლებს გამოგიცვლის, დაგაწ-
ვენს და მოგივლის; ხვალ მე მოვალ და ოპერაციას გაგიკეთებ.

— მოვრჩები, ბატონო?

— მორჩები, აბა რას იზამ? — ქალაღზე რაღაც წაუწე-
რა და გადასცა: — აჰა, ეს ქალაღი მიიტანე საავადმყოფოში.

გლეხმა წელზე შემოკრული ფართე სარტყელი მოიხსნა,
იქიდან გაქონილი საფულე ამოიღო, ქალაღი საფულეში ჩადო
და იკითხა: — ვალი რამდენი მაქვს, ბატონო?

— რისი ვალი? აა! გასინჯვისა არა? მხოლოდ ათი ლირა!

გლეხმა ფული გაუწოდა და ჰკითხა: — გაჭრა და გაკერვა
რამდენი ეღირება?

— რომ გაჭრი და გაკერავ, მაგაზე მერე ვილაპარაკოთ,
— გაეცინა ექიმს, — გასაგებია?

— გავიგე, აბა არა? გაუგებარი რა არის, ბატონო?

— ჰოდა, მასე, მიდი ახლა საავადმყოფოში.

გლეხი წავიდა. ექიმი ეზოში გავიდა და თამაშში გართულ
ზავმვებთან შეჩერდა: — თქვე ჭიანჭველებო, თქვენა, აბა მანა-
ხეთ ერთი, რა გააკეთეთ?

„არა, ნაღდად ბედი მქონია! — ფიქრობდა საავადმყო-
ფოსაკენ მიმავალი გლეხი, — ჯერჯერობით საქმე კარგად მიდის,
ბოლოს კი ვნახოთ რა იქნება“.



მახმუდ-უსტა თოფებისა და დამბაჩების შემკეთებელ ოსტატად ითვლებოდა იმ არემარეში. მისთვის ეს ხელობა არავის უსწავლებია, იარაღების შეკეთებას იგი ბავშვობიდანვე იყო შეჩვეული. მიყვა, მიყვა ნელ-ნელა, თანდათანობით დაოსტატდა და შეიყვარა თავისი საქმე. ვინ მოსთვლის რამდენჯერ დაუშნადებია თოფისა და დამბაჩის ესა თუ ის ნაწილი, მაგრამ მაინც არ მოსწონებია და ისევ ხელახლა, მერამდენეჯერ გაუკეთებია. იგი საქმესა და გასაკეთებელს მანამდე არ მოეშვებოდა, სანამ არ დარწმუნდებოდა, რომ ნამუშევარი ნამდვილად კარგი იყო და უკეთესის გაკეთება უკვე აღარ შეიძლებოდა.

ასე თანდათანობით მახმუდ-უსტა ამ საქმის დიდი ოსტატი გახდა და სახელიც გაითქვა.

მერე სხვა საქმესაც მიჰყო ხელი. რაც არ უნდა მოეტანათ მისთვის, იგი ერთს ახედ-დახედავდა, ჩაფიქრდებოდა და მერე დინჯად ეტყოდა მუშტარს, ორ-სამ დღეში გამოიარეო. მაგრამ, თუ რაიმე ნივთისა ან ხელსაწყოს შეკეთება შეუძლებელი იყო, შუბლს შეჰმუხნიდა და ცალყბად იტყოდა: — დატოვე და ვნახოთ, თუ გავაკეთე, შემოგივლი! — იტყოდა და საქმეს შეუდგებოდა. შეუდგებოდა და როგორღაც, რაღაც მანქანებით მაინც გააკეთებდა.


მაინც რა არ მოჰქონდათ მასთან შესაკეთებლად: პრიმუსები, რადიო, პატეფონი, სანთებელა, ბოქლომები და სხვა მრავალი ხარახურა. მოჰქონდათ და მახმუდ-უსტა ყველაფერს კეთილსინდისიერად აკეთებდა. ერთადერთი, რისი გაკეთებაც მას არ შეეძლო, ეს იყო ჯიბის საათები.

სახელოსნო მოაწყო, მაგრამ ჯერჯერობით ბევრი რამ აკლდა. არ ჰქონდა სახარატო ჩარხი და სხვა ხელსაწყოები. ამიტომაც იყო, რომ რაიმე ნივთის შეკეთებაზე უზარმაზარ ღროს ხარჯავდა. მახმუდ-უსტას ერთი ნაკლიც გააჩნდა — გადაყლურწვა უყვარდა ძალიან.

— დიდი შემოსავალი აქვს, მარა რად გინდა მერე, რასაც ღებულობს სულ სასმელში ხარჯავს! — ამბობდნენ მასზე სოფლელები, — მაგისი მოგებული ფული ერთ ღრმა ხევს ამოავსებდა.

ხალხს ერთი რამ არ მოსწონდა კიდევ მისი — ხოჯებისა და მოღების არაფერი სწამდა და სულ მათ დასცინოდა. ხოჯის ქადაგება ზღაპარიო, იტყოდა ხოლმე. არც ცრუმორწმუნე სოფლელებს ინდობდა.

ერთხელ, ამ ორიოდე წლის წინ, სოფელში ვიღაც სამხე-

დრო პირი ამოსულა, და სოფლელებთან განუცხადებდა, ადამიანი ძუძუმწოვარი ცხოველიდან წარმოიშვაო. 

მახმულ-უსტა იმ სამხედროს შეკამათებია: — კი მაგრამ, ის ძუძუმწოვარი ცხოველები ამოწყდნენ თუ რაშია საქმე? მაიმუნიც ქე წააგავს ადამიანს, მაგრამ ის მაინც პირუტყვია და ადამიანივით ვერასდროს ვერ განვითარდება.

ხალხი იმით აფასებდა მახმულ-უსტას, რომ ჭკვიანური ქცევა ჰქონდა.

მახმულ-უსტა რაიმეზე რომ იტყვის შეცდომააო, ის მართლაც მთლიანად თუ არა, სანახევროდ მაინც იქნება შეცდომა, — ამბობდნენ მასზე, — ჭკვიანი კაცია, თუ რამეს კარგად არ მოიფიქრებს, ისე არ იტყვისო.

ერთ დღეს დამიძახა მახმულ-უსტამ, სახელოსნოში შემიყვანა, დამბაჩის ლულა მანახა და მითხრა: — ეს მე გავაკეთე, როგორ მოგწონს?

გამიკვირდა, ჯერ არ დავიჯერე, ქარხნის მიერ დამზადებული მეგონა, მაგრამ მერე დავრწმუნდი, მახმულ-უსტას რომ ტყუილის თქმა არ ჩვეოდა.

— როგორია? — მკითხა მან.

— ეს კარგი რაბაა, ისიც კარგია, რომ ასეთი ოსტატის ხარ და ყველაფრის გაკეთება გეხერხება, მაგრამ ის კი არ მომწონს, იარაღებს რომ აკეთებ, ეს ყველაფერი ხომ ადამიანის საზიანოდ კეთდება?

სწორედ ამ დროს სახელოსნოში ოცი-ოცდაორი წლის ახალგაზრდა შემოვიდა. ტანზე სანახევროდ სამხედრო ტანსაცმელი ეცვა, სანახევროდ კი სამოქალაქო, ეტყობოდა ჯარიდან ახალდაბრუნებული იყო. ანდა კიდევ შეგებულებით ჩამოსული. წინ წამოყრილი თვალები ჰქონდა, სახე მზისაგან გარუჯოდა და წვერიც საკმაოდ მოეშვა. მან ქამარში გარჭობილი, საკმაოდ შექანგული გრძელლულიანი რევოლვერი ამოიღო, მახმულ-უსტას გაუწოდა და უთხრა: — აბა, მოხედე, ერთი შემინხედ ამას! არ მუშაობს, არ ისვრის ტყვიას! შემიკეთე!

მახმულმა რევოლვერი ჩამოართვა, ახედ-დახედა, მერე სხვა შესაკეთებელ იარაღებთან დასდო და დინჯად მიუგო: — კარგი, შეგიკეთებ!

— როდის იქნება მზად?

— სამი დღის შემდეგ წაიღე!

ახალგაზრდა შეიშმუშნა: — არა! სასწრაფოდ მჭირდება და დღესვე უნდა შემიკეთო როგორმე! დღესვე უნდა წავიღო!

— ესე იგი, რამენაირად ცინეში შესვლას ჩქარობ, არა? — ჰკითხა მახმულმა.



— ციხეში არ წავალ ღმერთის ნებით! — ჩაილაპარაკა ახალგაზრდამ.

მახმულმა ცეცხლს ნახშირი დაუმატა და საბერველი მოსწია: — ღმერთმა ნუ ჩაგაგდოს ციხეში, მაგრამ რევოლვერს რომ იხმარ, წახვალ! ეს ისევე ცხადია, როგორც ორს დამატებული ორი, ოთხია!

ახალგაზრდა აქვე, კუნძზე ჩამოჯდა და ჩაილაპარაკა: — ის საქმე კარგად დამთავრდება თუ ცუდად, წინასწარ არ ვიგება! შენ მართალი ხარ, უსტა, შეიძლება ციხეშიაც წავიდეს კაცი!

— მიწის გამო ხომ არა გაქვთ დავა ვინმესთან? — დავეკითხე მე კუნძზე ჩამომჯდარ ახალგაზრდას.

— არა! — თქვა მან და მხრები შეათამაშა, — ქალის ამბავი მაქვს სადაო და ვნახოთ, როგორ დაბოლოვდება ეს საქმე!

ახალგაზრდა დაღლილი ჩანდა, ეტყობოდა დიდხანს იყო გზაში, ოფლის სუნით ქოთდა.

— ქალის გამო აღამიანმა სისხლში არ უნდა გაისვაროს ხელი, არ ღირს მაგი ერთი ქალის გამო! — ვუთხარი მე.

— ჩემი ბრალი არაა! — ჩაილაპარაკა მან, — ბევრი ვითმინე, იმათ არ დამანებეს... იმ ჩემს შეყვარებულ გოგოს სხვა იყვარებს... ხვალ ღამით უნდა გავაქციო, ძალით იქნება თუ ნებით, სულ ერთია ეს ჩემთვის.

მახმულ-უსტა მუშაობდა და თან ყურს გვიგდებდა.

— იმ შენს მოწინააღმდეგეს, ან ქალის მამას, იარაღი არა აქვს თუ რაშია საქმე? ასე ადვილად გაგატანებენ გოგოს? რომ მოგკლან, ანდა შენ შემოგაკვდეს ვინმე?

— იარაღი იმათაც აქვთ, რა თქმა უნდა, მაგრამ იმათი ნასროლი ტყვია ჩემზე არ იმოქმედებს! — არხეინად მომიგო ახალგაზრდამ.

— როგორ არ იმოქმედებს? ფოლადისა ხარ თუ რა?

— არ იმოქმედებს! მორჩა და გათავდა!


— ეს როგორ, კაცო, ტყვია არ გაგხვრიტავს თუ რაშია საქმე?

— მე ფოლადზე მაგარი ვარ ამ შემთხვევაში და ტყვიაც ვერაფერს მავნებს, — ღარწმუნებით თქვა ახალგაზრდამ და ფეხი ფეხზე გადაიღო.

— როგორ, კაცო?

მახმულ-უსტა საქიანობდა, გვისმენდა და თავისთვის ჩუმად იღიმებოდა.

ახალგაზრდა ჩემსკენ შემობრუნდა და დაიწყო: — როგორ და... ჩვენს სოფელში ერთი ხალხი მოვიდა დიდად განთქ-





მული ხოჯა, იმან მე ისეთი ნუსხა დამიწერა რომ, აგნაწიწი, რომ მესროლონ, ვერაფერს დამაკლებენ. იმ ნუსხას ტყვია ვერაფრით ვერ გაეკარება! გაიგე ახლა?

— გაიგე... სად გაქვს ის ნუსხა?

— აგერ მაქვს, — თქვა, უბეში ხელი ჩაიყო, ამოიღო ჭუჭყიან, გასანთლულ ტილოს ნაჭერში გახვეული ვაშლის ფოთლისოდენა, სამკუთხედად დაკეცილი ნუსხა. — ამ ნუსხას წელზე თუ დაიმაგრებ, სადაც გინდა იქ წადი და ნურაფრის ნუ გეშინია! ისეთი ძალა აქვს, ტყვია რას მიეკარება ახლოს! — მომიგო ამაყად და დარწმუნებით.

მანმუდ-უსტამ თავი გაიქნია და საუბარში ჩაერია: — ეეჰ, ახალგაზრდავ, ნუ გჯერავს შენ ასეთი სისულელეების! ნუ დაილუპავ თავს. ხოჯის ნუსხას რომ ასეთი ძალა ჰქონდეს, შენ კი არ მოგცემდნენ, თავისთვის დაიტოვებდნენ.

ახალგაზრდა გაბრაზდა და სახე წამოუფითრდა, — რავა გეკადრება, უსტა, განთქმული ხოჯის მიერ დაწერილ ნუსხაზე ასეთი რამე ითქმება? რომ იცოდე, დიდად განთქმულია ის ხოჯა, მთელს თურქეთში მეორე არაა იმისთანა.

— დაანებე თავი მაგ ზღაპრებს, მეგობარო! ახალგაზრდა კაცი ხარ და მებრალები. მაგ ნუსხას ენდობი შენ, დაავლებ ხელს იმ გოგოს და წაიყვან, დაგახლის ვინმე ტყვიას და გააწვენს მიწაზე. არ მჯერა მე მასეთი ნუსხების და გირჩევ, ხურც შენ დაიჯერებ... შენ იცი მუ ვინა ვარ?

— შენ ვინაც გინდა ის იყავი, იმ ხოჯის ნუსხისა ყველას სჯერა!

მანმუდ-უსტა მომიბრუნდა და მკითხა: — შენ გჯერა ნუსხისა?

— არა, არა მჯერა! ვერავითარი ნუსხა ვერ შეუცვლის მიმართულებას ტყვიას. ამასაც განვრიტავს და ამის ნუსხასაც...

— რავა გეკადრება? — არ დამეთანხმა ახალგაზრდა, — სამხედრო პირებიც ატარებენ ნუსხას. ეს ისეთი რამაა, თქვენ არ იცით!

მანმუდ-უსტამ თავი გააქნია, მიუახლოვდა, მხარზე ჩამოადო ხელი და უთხრა: — გინდა მაგ შენი ნუსხა ახლავე, აქვე გავსინჯოთ?

— როგორ უნდა გავსინჯოთ? — იკითხა ახალგაზრდამ და თვალები აახამხამა.

— ეს მე ვიცი, როგორ უნდა გავსინჯოთ! შენ ის მითხარი, გასინჯვაზე თუ ხარ თანახმა?

ახალგაზრდამ მაინც ვერაფერი გაიგო, სახეზე შეშფოთება დაეტყო, რა ეთქვა აღარ იცოდა. წარმოდგენაც არ ჰქონდა, თუ როგორ უნდა გავსინჯათ ნუსხა. — „ის ნუსხა წელზე

უნდა შემაბან, ბოძთან დამაყენონ და თოფი მესროლონ ფიქრობდა იგი, — მერე რაა? თუნდაც მასე იყოს, ნუსხა ხომ შექნება წილზე ჩამობმული? ჰოდა, სულ ერთია, ტყვია მაინც ვერ იმოქმედებს!..“

მახმუდ-უსტამ, თითქოსდა განათქვამს მიუხედავად, უთხრა: — შენ ნუ გეშინია! ცდას შენზე არ მოვასდენ. ჩვენ ხომ ვიცით, რომ მაგ ნუსხას არავითარი ძალა არ გააჩნია და როგორ მოვასდენთ შენზე ცდას?

— მერე რა, თუ გინდათ ჩემზე მოახდინეთ ეს ცდა, მე იმდენად ვენდობი მაგ ნუსხას, არაფრის არ მეშინია! — არხეინად მიუგო ახალგაზრდამ.

— შეგეშინდება, შეგეშინდება! — დაუინებით გაიმეორა მახმუდ-უსტამ, — შენ ის მითხარი, ხარ თუ არა თანახმა და მოდიხარ თუ არა ნაძლევის?

ახალგაზრდა, მუხლებზე ხელისგულებდაყრდნობით წამოიზღაზნა და თქვა: — ყოველგვარ ცდაზე თანახმა ვარ მე!

— მამ კარგი, ახლავე განახებ, მაგ ნუსხას რა ძალაცა აქვს! — ჩაილაპარაკა მახმუდ-უსტამ, მეორე ოთახში გავიდა, თეფშით ქერის მარცვალი გამოიტანა.

ეზოში რაც კი ქათმები იყო, ყველა ქერის მარცვალს მიესია. მახმუდ-უსტამ ქათმებთან მივიდა, მამალი დაიჭირა და ახალგაზრდას მიუბრუნდა: — ცდა შენზე კი არა, ამ მამალზე უნდა ჩავატაროთ! მოიტა შენი ნუსხა!

ახალგაზრდამ უბეში ხელი ჩაიყო, ნუსხა ამოიღო და გაუწოდა. მახმუდ-უსტამ ნუსხა აკრიახებულ მამალს ორდენივით ჩამოჰკიდა მკერდზე და ახალგაზრდას უთხრა: — ახლა მოდი და მამლის საფასური ამოიღე ჯიბიდან.

გადახდაზე რომ მიდგა საქმე, ახალგაზრდა გაჯიუტდა: — არა, არ იქნება ასეთი რამე! ფული მე რატომ უნდა გადავიხადო? შენ მოიგონე ეს ნაძლევი და მაგ მამლის ფულიც შენვე გადაიხადე!

— მამალი ხომ ჩემია?

— კი, შენია!

— აბა, მე რატომ უნდა გადავიხადო ამ მამლის საფასური? ჩემია და რასაც ვუზამ ეს ჩემი საქმეა!

— ჰოდა, უქენი მერე!

დავა ალბათ დიდხანს გაგრძელდებოდა, არც ერთი და არც მეორე არ აპირებდა დათმობას. ჯიბიდან მამლის საფასური ამოვიღე და მახმუდ-უსტამს გაუწოდე — აჰა, მე ვიხდი მამლის საფასურს!

ახალგაზრდა დაწყნარდა და არხეინად განაცხადა: — ნახვით ახლა თუ რაიმე დაემართება იმ ხოჯის დაწერილ ნუსხას,



ტყვია ახლოს ვერ მომეკარება!.. თქვენ მართლაც ანტიკვნიანი საქმიანობის სამსახურში რათ ამ ნუსხისა?

— ცოტაც მაკალე და ნახავ, შენი ნუსხა იქნება მართალი თუ მე! — დაცინვით მიუგო მახმუდმა, მამალი მოშორებით, ხეზე მიაბა, ქერი დაუყარა, მერე სახლიდან თოფი გამოიტანა და დატენა.

ახალგაზრდამ ურწმუნოდ გაიქნია თავი: — რა თქმა უნდა, დატენილი თოფი ისვრის, მაგრამ მაგ მამალს მაინც ვერ მოკლავთ, ათჯერაც რომ ესროლოთ, მაინც ვერ მოკლავთ! ისროლეთ და იყავით, თქვენ იცით ეს როგორი ხოჯის დაწერილი ნუსხაა?

ხმაში აღელვება დაეტყო, შემეშინდა, ჩხუბი არ ატეხოს-მეთქი, და მახმუდ-უსტას ვუთხარი: — მახმუდ-უსტა, მოდი, ადრე მოვრჩეთ მაგ საქმეს!

— ყველაფერი მზადაა და მეც მზად გახლავართ! — მომიგო მახმუდმა. ჩაიმუხლა, ცალი თვალი მოჭუტა, მამალს დაუმიზნა და გაისროლა, თოფის ქუხილმა იქაურობა გააყრუა. თოფის წამლის სუნი და კვამლი დადგა ირგვლივ... ბოლი რომ გაიფანტა, ხესთან მივედი. სადათვე უაკანს მამალი ნაფლეთებად ექცია. ბუნტყლი და ნაფლეთები მთელს ეზოში მიმოფანტულიყო. დიდი ძებნის მერე ძლივს მივაგენი ნუსხის ნაფლეთს.


მახმუდ-უსტამ თოფი შეინახა და ახალგაზრდას გამარჯვებული კაცის იერით მიუბრუნდა: — დარწმუნდი ახლა რა ძალაც ჰქონია მაგ შენი ხოჯის დაწერილ ნუსხას?

ახალგაზრდა გაშტერებული და ენაჩავარდნილი იდვა. მერე გონს მოეგო და ჩაილაპარაკა: — მამალი, მართალია მოკლა, მაგრამ ნუსხას მაინც ვერ მიეკარებოდა!

მახმუდ-უსტამ გაიცინა, ნუსხის ნაფლეთი გამომართვა და გაუწოდა: — აი, ნახე, თუ ვერ მიეკარა ტყვია შენს ნუსხას, ნახე!

ახალგაზრდამ ერთი კი გადახედა ნუსხის ნაფლეთს და მაშინვე ენა ჩაივდო. ის-ის იყო მყუდროება ჩამოვარდა, რომ ამ დროს აქოშინებული მოვარდა მახმუდ-უსტას ცოლი. მკერდზე ბავშვი მიეხუტებინა. მეზობელთან ყოფილიყო გადასული, თოფის ხმა გაეგონა და ახლა იმის გასაკებად მოვიდა, რა მოხდაო. მამლის აქეთ-იქით გაფანტულ ნაფლეთებს რომ მოკრა თვალი, ქმარს დაეტაკა: — უჭკუო კაცი, უტვინო ადამიანი! ნორმალური ხარ შენ ამის შემდეგ? ასეთი რა ცოდო ედო მაგ მამალს, ტყვია რომ ესროლეთ? გიყი არა ხარ ამის მერე შენ?

მიდგა, მიდგა და იმდენი ლანძღა და თათხა, არ გარია არაფერში.



მახმუდ-უსტას ხმა არ ამოუღია, იჯდა თავისთვის, ილიძე ბოლა და თავს აქნევდა. მერე, როცა გაკაპასებული ოდნავ ჩაცხრა, მიუბრუნდა ხელისგულებში თავჩარგულ ახალგაზრდას და უთხრა: — შევეცდი და რაღაი ახლა, ის შენი ნუსხა მამალზე კი არა, ამ ქალზე უნდა გამომეცადა, უნდა ჩამომეკიდა ამის კისერზე და მესროლა თოფი!.. რომ ვიცოდე არ დამიჭერენ, ხელმეორედ ჩავატარებ ცდას, შევაბამ მაგ ნუსხის ნაფლეთს და დავუბრაახუნებ თოფს... მარა არ გამოვა ასე, არ მინდა ხათაბალა ავუტეხო თავს. ქალის გულისათვის ჭკვიანი კაცი ციხეში ჩაჯდება? ილაპარაკოს რამდენიც უნდა, არ დავუგდებ ყურს და ის იქნება!.. შენს ადგილზე რომ ვიყო; იმ შენს გოგოს სხვანაირად მოვიწვებ. ჯერ მის მშობლებს სთხოვე, თუ კარგობით არ გამოვა საქმე, ქე დაანებე თავი, მონახე სხვა ქალი და ის შეიყვარე. ქალი გამოიღია ამ ქვეყანაზე თუ რა?

ახალგაზრდამ თავი ასწია, შეხედა და თქვა: — ის გოგო მე მეკუთვნის!

— შენ რატომ გეკუთვნის, ძმობილო? — დაეკითხა მახმუდ-უსტა.

— პირველად მე შევიყვარე და მიტომ!

— რა იცი, რომ შენ შეგიყვარდა პირველად? იქნება მას, იმ ბიჭს, იმ შენს მოწინააღმდეგეს შეუყვარდა?.. რას გეტყვი, იცი? თავი დაანებე იმ გოგოს, მიატოვე და სხვა შეიყვარე. არა სჯობია ამ ხათაბალას დააღწიო თავი?

ახალგაზრდამ მხრები აიჩეჩა და დაფიქრებით, ორჭოფულად თქვა: — არ ვიცი, რა ვქნა, როგორ მოვიქცე!

მ უ ტ რ უ კ ი

ჩვენს ავტობუსს ლამაზი, კუთხვილი შრიფტით აწერია „ბელედეი“. ეს ავტობუსი ქალაქის საბჭოს ეკუთვნის და ამიტომაც აქვს მას ასეთი სახელწოდება. „ბელედეი“, ასე თუ ისე, კომფორტაბელური ავტობუსია და ხალხი სიამაყით, დიდის ამბით ამბობს — ბელედეით გიმგზავრეთო.

თქვენი არ ვიცი და, მე რომ ავტობუსით მგზავრობა მაინცდამაინც ვერაფრად მეპიტნავენა, ცხადზე ცხადია. მოდი აბა და ნუ აგეშლება ნერვები — წამდაუწუმ იღება კარი, ამოდიან და ჩადიან მგზავრები, ამოაქვთ ბარგი, ყაყანებენ, ხმაურობენ; თანაც, ისეთი სივიწროვეა, მეტი რომ არ შეიძლება; კასრში ჩაყრილი დამარილებული თევზებივითა ვართ ერთმანეთზე მიტმასხილი. სკამები ისეა დაძონტაყებული,



ვერ გაინძრევი, ფეხს ფეხზე ვერ გადაიდებ, ვერ მიბრუნდები... ახლა წარმოიდგინეთ ისიც, რომ წინ დიდი გზა გაქვს გასავლელი... მოკლედ, ბევრი რომ არ გავაგრძელო, ნამდვილი ჯოჯოხეთია ასეთი მგზავრობა.

ამჯერად ჩემს გვერდით ერთი კასრივით მრგვალი კაცი იჯდა, სიმსუქნისაგან თავბოლოვასწორებული. როგორც გავიგე, მაღაროში მუშაობს თურმე, ინჟინერი უნდა იყოს.

— მუშების ბატონიცა ვარ და ინჟინრის მოვალეობასაც ვასრულებო! — ამაყად, დიდის ამბით მითხრა ინდაურივით გაფუყულმა.

ეს რომ თქვა, მაშინვე დამეკარგა მასზე წარმოდგენა, მაშინვე მივხვდი, რა სულის პატრონიც იყო. ზრდილობისა და კულტურის ნასახიც არ გააჩნდა. ეტყობოდა, სკოლის მერხზე ცხოვრებაში არ მჭდარა და არავითარი განათლება არ მიუღია, მაგრამ, ემჩნეოდა, ფული ბლომად ედო ჯიბეში და ამით მოსწონდა თავი ახალშემოსული კიტრივით. სიმსუქნისაგან თავის სკამზე ვერ ეტეოდა და ჩემი კუთვნილი სკამის ნახევარიც მას ეკავა. არ ვიცი, რაზე ნერვულობდა, ზედიზედ ეწეოდა გრძელტარიან პაპიროსს, ერთს რომ მოწევდა, ნამწვს ფანჯრიდან გზაზე გაისვრიდა და მაშინვე მეორეს უკიდებდა, არავის არ ერიდებოდა, ყველანი ფეხზე ვეკიდეთ. ხანდახან პირდაპირ ცხვირ-პირში მახოლებდა მოურიდებლად. პაემანზე დაგვიანებულივით ნერვულობდა და წამდაუწუმ გასაძახოდა მძლოლს: — რას მიზოზინობ? მოუმატე სიჩქარეს, საჩქარო საქმე მაქვს!

ძარცხნივ მაღაროს მმართველი მეჯდა, ისიც თავისი თანამშრომელივით სქელი, ზონზროხა. მათ შორის მორში გარჭობილი სოლივით ვიჭყლიტებოდი. ისედაც სუსტი, კაფანდარა და ძვალტყავა ლამის ყავარივით არ გამაბრტყელეს.

ისე ჩამოცხა და ჩამოიხუთა, ავტობუსში მოცდა აუტანელი შეიქმნა. ლამის იყო ოფლად დავმდნარიყავი. აკრძალული რომ არ ყოფილიყო, სიამოვნებით ავიდოდი სახურავზე და ისე ვიმგზავრებდი, მაგრამ ვიცოდი, არავინ მომცემდა ამის ნებას — ავტონისპექცია სასტიკად კრძალავდა ასეთ რამეს. ჯარიმას კი მძლოლი არაფრის დიდებით არ გადაიხდის, ჯარიმა კი არა და, ისეთი ფულის მოყვარული ჩანს, თვალებიდან ბეწვს ამოვიღებს.

ავტობუსი ისე გაიძეძვა მგზავრებით, ნემსიც კი არ ჩაემატებოდა სადმე, მაგრამ მძლოლი მაინც აჩერებდა გზადაგზა, ამოყავდა ახალ-ახალი მგზავრები და ისევ განაგრძობდა გზას. ვერაფრისდიდებით ვერ მივმხვდარიყავი, როგორ, რა ჯადოქრობის მოშველიებით ახერხებდა ამას... მას რა ენაღლებოდა, ახლოს მიმავალნიც იმდენს იხდიდნენ, რამდენსაც

შორს მიმავალნი. მძლოლი ხმას არ იღებდა, იჯდა კაბინაში, ატრიალებდა საჭეს და დაძაბული გამოძეტყველებით გასწავლილი როდა გზას. მხოლოდ მაშინ თუ ამოიღებდა ხმას და აჯაჯლანდებოდა, როცა რომელიმე მგზავრი ნაკლებს შეაძლევდა: — ეს რაა? ასე ცოტა? ეს რომ მცოდნოდა, საერთოდ არ გაგიჩერებდი ავტობუსს! შემდეგ გაჩერებაზე მგზავრს წინასწარ ევაჭრებოდა, ამდენს და ამდენს თუ მომცემთ, წაგიყვანთ, არადა, უკან მომავალ ავტობუსს დაელოდეთო. მგზავრებმა გამოცდილებით იცოდნენ, თუ დაახლოებით რამდენ საათში მოვიდოდა ეს „უკან მომავალი“ ავტობუსი და წინასწარ ბედს შერიგებულები ეხვეწებოდნენ მძლოლს — ოღონდ წაგვიყვანე და ყველაფერზე თანახმა ვართო.

გზა ისარივით გატყორცნილიყო უწყლო, გადახრუკულ დაბლობში. ავტობუსი ჩქარა მიდიოდა, თანდათანობით კეცავდა გზას, უკან იტოვებდა დაბალ, მიწურ სახლებს, რომლებიც კოლოფებივით იდგნენ გზიდან მოშორებით. საერთოდ, სოფლები იშვიათად გვხვდებოდა გზაზე. ამ კუთხეში სოფლების მომრავლების საკითხი უკვე კარგა ხანია იდგა დღის წესრიგში, მაგრამ თუ როგორ უნდა გაზრდილიყო, კონკრეტულად, ეს არავინ არ იცოდა. ჩემის აზრით, მომრავლება კი არაა, რაც არის, მალე ისიც არ იქნება. ამ მხარეში უწყლო, უნაყოფო და მწირი ნიადაგია, მოსავალი მცირეა, უმნიშვნელო, ჰოდა, აქაურები ქალაქში გარბიან, რათა სამუშაო იშონონ სადმე და თავი გაიტანონ როგორმე.

გამახსენდა, სოფლის მეურნეობის სამინისტროს პრობაგანდის სამმართველოში ერთი ჩემი ნაცნობი, ალი-ბეი მუშაობს. სქელი, ღიპიანი კაცია, უღვაშები გაცვეთილი ცოცხის ბოლოებივით ჰკიდია. ერთი შტერი, გამოთაყვანებული, ლაქლაქა და ქაჯი ტიპია. ხანდახან ისეთ რამეს გამოიგონებს, გოცებისაგან შტერივით დააღებ პირს და ენას ვერ ამოიღებ. ჰოდა, ერთხელ, მახსოვს, იმ ჭკუის კოლოფმა ალი-ბეიმ, ჩემთან საუბრისას ასეთი რამ განაცხადა: — მაგ პრობლემას, კაციშვილს რომ ვერ გადაუჭრია აქამდე, ჩემთვის რომ ეკითხა ვინმეს, ერთ წუთში დადებითად გადავჭრიდიო! როგორ-მეთქი, რომ ვკითხე, აგდებულად ჩაიციხა და, თითქოსდა დიდ, სახელმწიფოებრივ საიდუმლოს მანდობდა, ჩურჩულივით წყნარი ხმით მითხრა: — რას ვიზამდი და მაგ სოფლებს სტამბულის მიერ გამოშვებული ბანქოთი ავაუსებდიო! ვერაფერს მივხვდი და პიოი. დავალე, ეს კაცი ასეთ მნიშვნელოვან პრობლემას ბანქოთი როგორ გადაჭრის-მეთქი, გავიფიქრე. ჩემი ეჭვი ხმამაღლა რომ გამოვთქვი, გაეცინა და ყველაფერი ამიხსნა:

— სოფლელებს, ჩემო კარგო, მოგეხსენება, ბანქოს თამაში უყვართ, საშუალება რომ მისცე, დაჯდებიან და დღე და

ლაშე ბანქოს თამაშის მეტს არაფერს არ გააკეთებენ, არც სა-
ქმე ახსოვთ და არც სმა-ჭამა... ჰოდა, ავიღებდი დასაწყისს
უკანა მხარეს სოფლის მეურნეობის ამსახველ სხვადასხვა
სურათებს დავებჭდავდი. ავწევდი და მერე ასეთ ბანქოს
ფუთობით შევზიდავდი სოფლებში...

— მერე მაგით რა გაკეთდება? — ეჭვი გამოვთქვი მე, —
მაგათ როგორ გაიზდება სოფლები და მოსავლიანობა?

— შენ რა გესმის, — დამცინა მან, — სოფლებები ხომ
შეხედავენ ბანქოს უკანა მხარეს? დაინტერესდებიან თუ რა
ხატია მასზე, მიყოფენ საქმეს ხელს და მდგომარეობაც ასე
გამოსწორდება!

ახლა სულ რეწივით დავაღე პირი. თურმე რა შორს ვი-
ხედებით, ამდენი პრობლემის წინაშე ვდგებით, სულ ძირფეს-
ვიან რეფორმებზე ვლაპარაკობთ, თურმე დახეთ რა იოლად გა-
დასაწყვეტი საქმე ყოფილა. ეს კი ალი-ბეის მეტმა კაციშვილ-
მა ვეო ძოიფიქრა! არა, ალი-ბეი ნაღდად მართალია, არ გვაბია
თავი და ეგაა!

ფულს დახარბებული მძლოლი წამდაუწუმ აჩერებს ავ-
ტობუსს და ახალ-ახალ მგზავრებს კრებს გზაზე. იტენება და
იტენება „ბელედეი“. ზოგს ხურჯინი ამოაქვს, ზოგს აბგა,
ზოგს კალათი, ზოგს ავადმყოფი მიყავს ქალაქში ექიმთან,
ზოგიც ბაზარში მიეშურება... ერთ-ერთი სოფლის დასაწყის-
ში, ხიდის თავში მჯდომი პირატივით წვერმომშვებული, თმა-
აბურძენილი, გამხდარი კაცი წამოდგა და ხელი აუწია ჩვენს
ავტობუსს: — გააჩერე, გააჩერე!

მძლოლმა ავტობუსი გააჩერა. შევნიშნე, კაცს თვალები
ცრემლით ჰქონდა სავსე, მუხლებზე ხელს ისეთი გამეტებითა
და გამწარებით იცემდა, გავიფიქრე, ამ კაცს მთელი თავისი
ქონება ან ბანქოში წაუგია, ანდა ცოლ-შვილი დახოცვია-
მეთქი!

— ავადმყოფი მყავს წასაყვანი, წამიყვანე და რაც გინდა
გადამხდევინე!.. ღმერთი თუ გწამს, წამიყვანე! — შეეხვეწა
იგი მძლოლს.

მძლოლი სდუმდა, შესცქეროდა და საჭეზე აკაკუნებდა
თითს.

ღმერთის ხსენებაზე მალაროს ბღენძმა მოხელემ თავი ას-
წია და ჰკითხა: — ავადმყოფი სად ვყავს?

— აი, ავერ, ხის ჩრდილში!

— სადაური ხარ, მოხუცო? — დაინტერესდა მალაროს
მოხელე.

გლებმა ხელი გაიშვირა: — ეგერ, ვაღმა, მთა რომ მო-
ჩანს, იმ მთაზე რომ სოფელი მოჩანს, იმ სოფლიდანა ვარ!



მღაროს მოხელემ გლესს თვალი ააჩიდა და მძლიერად უსიტყვოდ მიაჩერდა თვალებში. მძლოლმა ინტერესით ვალ-ჩაათვალიერა გლესი და ჰკითხა:

— ავადმყოფი ცუდადაა?

— ძალიან! პირდაპირ სიკვდილის პირზეა მისული, ძვირფასო შოფერო!

თითქოს ძალიან ებრალებათ, მღაროს მოხელემ, მგზავრებზე შთაბეჭდილება რომ მოეხდინა, ხმამაღლა უთხრა შოფერს: — წაიყვანე. მუსლიმან კაცს გაჭირვებია, უნუგე მოდ დარჩენილა გზაზე!

— შენ იცოცხლე, შენს თვალებს ვენაცვალე, ღმერთმა გაგახაროს! — გლესმა ხელები მაღლა აღაპყრო და მღაროს მოხელე დალოცა.

მძლოლმა თავი შეიფხანა და გლესს ჰკითხა: — რამდენს მომცემ?

— რასაც მომთხოვ, მომცემი ვარ! — უყოყმანოდ თქვა გლესმა.

ფულისმოყვარულ სინდისგარეცხილ მძლოლს ხელსაყრელი შემთხვევა მიეცა.

— კარგი, დაჯექი! — დაეთანხმა როგორც იქნა.

— შენ აშენდი! — გახარებული გლესი ავადმყოფის მოსაყვანად ეუნძულით გაიქცა.

ავადმყოფი ძვალ-ტყავად იყო ქცეული, მჭლე სახეზე ზაფრანის ფერი ედო, წვივებზე სიხსლი მიხმობოდა და ბუზები ეხვია.

მღაროს მოხელე ავადმყოფს მიაჩერდა, მერე გლესს გადახედა და დაინტერესებულმა იკითხა:

— ეს ქალი შენი ცოლია?

— დიას, ჩემი ცოლია! — მიუგო გლესმა თავის ენერგიული დაქნევით.

გლესს ათიოდე წლის ბიჭი ახლდა: მაღალი, დიდრონთვალეა. შიშველი ფეხები ერთიანად ტალახში ამოსვროდა, დახეულ-ჩამოკონკილი შარვალ-ხალათი ეცვა, აბურძენილ, გაზანგულ თმას შუბლი და ყურები დაეფარა. ბიჭი მჯიღს ისვამდა თვალებში და გაუჩერებლად ღრიალებდა: — დედა, დედიკო!

— აბა, შვილო! — მიუბრუნდა გლესი ბიჭს, — წადი ახლა სასლში და სახედარი წაიყვანე. შენს დას, დუდუს უთხარი, რაც დავაბარე არ დაივიწყოს, დაჯდეს შინ და იყოს წესიერად. საღამოს ძროხა და სახედარი ბოსელში შერეკოს და კარები მაგრად ჩაკეტოს. დაწოლის წინ ცეცხლი არ დარჩეს ჩაუქრობელი.

ბიჭმა სახედარს შოლტი მოუქნია, წინ გაიგდო და ზღაზღვნივით დაადგა მზისაგან გავარვარებულ მტვრიან გზას.



ავტობუსში სამი მგზავრი წამოდგა ფეხზე და დიდხულოდ ვნად დაუთმო ადგილი გლენს და ავადმყოფს. ქალს არ შეეძლო. გლენი დაჯდა და ქალი ბავშვივით მიიხუტა მკერდზე. ავადმყოფს თანდათანობით ეკარგებოდა ფერი სახეზე, თანდათანობით ემსგავსებოდა მიცვალებულს, თვალს ვერ ახელდა და წყნარად კვნესოდა.

ავადმყოფისა და გლენის საცოდაობით ვიწოდი. რა იქნებოდა, ღმერთს ისეთი ძალა მოეცა ჩემთვის, რომ ამ ავადმყოფისათვის მეშველა, ამეყვანა და პირდაპირ საავადმყოფოში დამესვა.

— რა აწუხებს ავადმყოფს? — არ აჩერებდა ენას მალაროს მოხელე.

— რა ვიცი მე, რა აწუხებს?! — მხრების აჩეჩვით, ხმადაბლა ჩაილაპარაკა გლენმა, — ხელიდან კი მეცლება და... ორი დღეა სისხლი სდის...

მალაროს მოხელემ გადმოფლამულ ტუჩებზე გაისვა გაოფლილი, დონდლო ხელი და ისევ იკითხა: — კი მაგრამ, მაგ ავადმყოფობას სახელი არა აქვს?

გლენი მოულოდნელად გაბრაზდა და ხმისაწევით მიუგო: — რაში გაინტერესებს მაგი, ბატონო! ბავშვი მოწყდა, გაიგე!.. სისხლის დენა აქვს!

— აა! — როგორც იქნა დაიკმაყოფილა ცნობისმოყვარეობა მალაროს მოხელემ, — თვითონ, არა?..

— რაში გაინტერესებს, ბატონო? — ისევ გაიმეორა გლენმა, მაგრამ ახლა უკვე დაღლილი, გასავათებული ხმით. ქალს გადახედა, ამოჩაჩული კაბა გაუსწორა და განაგრძო: — შვიდი შვილი გვყავს... მერვე უკვე გამზადებული იყო... ცხოვრება ისედაც გვიჭირს და ახლა კიდევ მერვე... მოვიშორებო, იფიქრა საცოდავმა და... ღმერთის ნაჩუქარი იყო და ალბათ გაგვირისხდა ღმერთი!

ავტობუსში ვილაცებმა გაიცინეს, ავადმყოფმა წამით გაახილა მიღულული თვალი, გახედა მათ და ისევ მიღულა.

— თქვენ რა გითხრათ მე! — ხელი ჩაიქნია მალაროს მოძულემ, — ეს რა შტერულად მოქცეულხართ. მაგ საქმეს ქალაქელებიც ვერ ახერხებენ ხეირიანად... თქვენ კი...

— რაც არის, არის! — ბედშერივით გაიხილა მალაროვმა, — ქემაინც გადავარჩენდე და მეტი არაფერი მიწადა. მაგას თუ რამე დაემართა, დამელუპა ოჯახი და ისაა!

ავტობუსში ისევ გაიცინეს ვილაცებმა.

— ნუ გეშინია, ღმერთი მოწყალეა, არ მოკლავს შენს ცოლს! — გაამხნევეს აქეთ-იქიდან.

— ცოტა ჩქარა წადი! — გაეძახე მძღოლს, — დროზე უნდა მივიყვანოთ ავადმყოფი საავადმყოფოში.



გლახი ერთხანს თავჩაქინდრული სდუმდა მწარე ფიქრებში წასული, მერე თავი ასწია, შეხედა მალაროს მოხელეს და იკითხა: — ღმერთს შევთხოვე შეველა, თუ მომისმენს ნეტავი?

— როგორ არა! უნდა ილოცო და ილოცო! თუ შეძლება გაქვს, ორი-სამი ცხვარიც უნდა შეწირო! — გაამხნევა და დაარიგა მალაროს მოხელემ.

— მაგას გადამირჩენდეს ღმერთი და სამი რაა, ხუთ ცხვარს არ შევპირდები და არ შევწირავ? — ჩაილაპარაკა მოხუცმა ოდნავ იმედიანი ხმით.

— შეპირდი, უოჟოდ შეპირდი! — ისევ გაუმეორა მალაროს მოხელემ.

მძლოლმა სიჩქარეს უმატა. ავტობუსი მტვრიან გზაზე ზუზუნით მიქროდა, მალაროს მოხელე ერთხანს თავჩაქინდრული დუმდა და თვლემდა. თავი მორყეულივით უყანყალებდა აქეთ-იქით. მერე, ეტყობოდა დუმილს ველარ გაუძლო, გაახილა თვალები, მომიბრუნდა და ლაყბობის მადაზე მოსულმა ისეთი საშინელი ამბები მოშიყვა, რომ არ გამეგონა, იძულებული გავხდი ყურებზე ამეფარებინა ხელი.

ავტობუსი თავის გზას განაგრძობდა. გზაზე ინტენსიური მოძრაობა იყო. ხან საბარგო მანქანები ჩაგვიქროლებდნენ, ხანაც მსუბუქი, ხანდახან ცხვრის ფარა გადაგვიჭრიდა გზას და მძლოლი იძულებული იყო სიჩქარე შეენელებინა. როგორც კი მძლოლი სიჩქარეს უკლებდა, მალაროს მოხელეს მაშინვე ხერვები აეშლებოდა და დაუყვირებდა: — გასწი ჩქარა, ავადმყოფი საავადმყოფოში უნდა მივიყვანოთ.

მაგრამ მძლოლი დროდადრო მაინც შეანელებდა სიჩქარეს: გზაზე გახირული საქონელი, სახედრები, ძაღლები, აინუნშიაც არ აგდებდნენ მანქანას. ერთგან სამი ქათამი გავწყლიტეთ, ერთგან კიდევ ფინია ძაღლი.

ახარტში შესული მალაროს მოხელე შეუჩერებლად უყვიროდა მძლოლს:

— ჩქარა, ჩქარა!

— მაცალეთ! — ამწვიდებდა მას მძლოლი, — მეც ამ სოფლის შვილი ვარ, საქონელი რომ გავსრისო, ხალხი ქვას მესვრის და ზარალს გადამახდევინებს.

— ეს გლახები კაი გვარიანი შტერები არიან! — ბრაზი ახრჩობდა მალაროს მოხელეს, — ეს დეგენერატები არავითარ ყურადღებას არ აქცევენ პირუტყვს და ღვთის ანაბარად ყავთ მიძვებული. პირუტყვს კი მეტი ჭკუა არ მისცა ღმერთმა, პირდაპირ შუა გზაზე წვებიან და მანქანებს არ ეპუებიან.

— შეჩვეულები არიან მანქანებს! — აუხსნა მძლოლმა.

— შეჩვეულები არიან თუ შეუჩვევლები, მაგი რაში გვა-

რგია ჩვენ? ხომ ხედავ, საავადმყოფოში აგვიანდება ავადმყოფები!

ავტობუსი გზას განაგრძობდა. წინ წამდაუწუმ დაბრკოლებები გველობებოდა — ქათმები, ძაღლები, იხვები, სახედრები.

იორუკების¹ ერთ-ერთი სოფლიდან გავდიოდით, მიწური ქოხმახები, ფიჩხით შემოღობილი ბოსლები... ერთმანეთში ირეოდნენ, ცხვრები, ბატკნები, ძაღლები, ლეკვები, სახედრები, ქათმები, ფეხშიშველი, ტიტველი ბავშვები, ფეხმძიმე ქალები... ჩამოკონკილი მამაკაცები ჩრდილში ისხდნენ, ფეხები გაეჩაჩხათ და ძაფს რთავდნენ... ირგვლივ გაუსაძლისი სიბინძურე იყო, იქაურობა ფეხსალაგვივით ქოთდა.

— იჩქარე, სვლა არ შეანელო! — ისევ აფრთხილებდა მძღოლს მალაროს მოხელე.

სოფელი უკან მოვიტოვეთ. ავტობუსი უხუილით მიჰქროდა გზაზე და გზიდან ამდგარ მტვრის ბუღს იტოვებდა უკან.

წინ, შუა გზაზე სიცხისაგან გათანგული, ყურებჩამოყრილი და ფილოსოფოსივით ჩაფიქრებული მუტრუკი იწვა და არ ინძრეოდა. მზე შუბის ტარზე იდგა და მთელი ძალით აცხუნებდა.

მძღოლმა მუტრუკი შენიშნა და სვლა შეანელა.

მალაროს მოხელემ შეუტია: — ჩქარა, ბიჭო! სვლას ნუ ანელებ!

თუ ავტობუსი არ გაჩერდებოდა, მუტრუკის სისხლით მოირწყვებოდა გზა. ალბათ ავად იყო საცოდავი. თანვი ჩაეჭინდრა და დასჩერებოდა მტვერს.

მალაროს მოხელემ მუტრუკის მისამართით შეიგინა და მჯილი დაირტყა მუხლზე.

ავტობუსი მუტრუკს უახლოვდებოდა.

— გააჩერე, გააჩერე! — ილრიალეს მგზავრებმა.

— გასწი, ბიჭო! — შეუძახა მალაროს მოხელემ, — ნუ გეშინია! რა დარჩა ასეთი ეს ერთი გაძვალტყავებული და მტერი მუტრუკი? მაგის პატრონს, შარვალჩამოკონკილ გლენს მე გადავუხდი ჯარიმას!

— გააჩერე ავტობუსი! — სთხოვა მძღოლს ავადმყოფის პატრონმა, მაგრამ უკვე გვიან იყო. „ბელედემი“ გადაუარა მუტრუკს, ძვალი და რბილი გაუერთიანა, გასრისა და არხინად განაგრძო გზა.

— გავჩერებულიყავით კარგი იყო! — თქვა მგზავრებიდან ვიღაცამ.

1 იორუკები — თურქეთში მცხოვრები მომთაბარე ტომი

— საყვირი რომ მიგვეცა, შეიძლება ამდგარიყო! — მეორემ.

— სოფლის მუტრუკისათვის საყვირს რა მნიშვნელობა აქვს? — ჩაიცინა მალაროს მოხელემ, — გინდა მიგიცია და გინდა არა! კაცმა რომ თქვას, იმ ერთი მუტრუკისათვის საყვირის მიცემა არც კი ღირდა.

„ჰმ! თურმე სოფლელი მუტრუკისათვის საყვირის მიცემა არ ღირდა!“ — გავიფიქრე და ვკითხე: — რატომ არ ღირდა ვითომ?

მალაროს მოხელემ პასუხის გაცემის ღირსადაც არ გამხადა.

— თუ გვინდოდა რომ ღმერთის წინაშე მართალი ვყოფილიყავით, საყვირი უნდა მიგვეცა! — ჩაილაპარაკა რომელიღაც მორწმუნემ.

— უნდა მიგვეცა საყვირი! — ძლივს თქვა ავადმყოფის მეუღლემ.

— შენ ჰკუა არ გაგაჩნია! — დაუყვირა მას მალაროს მოხელემ. — ცოლი გიკვდება, შენ კი მუტრუკზე დარდობ! დროს დაკარგვა როგორ შეიძლებოდა რომელიღაც მუტრუკი გლეხის მუტრუკის გამო? — მძლოლს მიუბრუნდა და ისევ შეახსენა: — ჩქარა!

ავტობუსი ლამის გაფრინდა. წამით სიჩუმე ჩამოვარდა, რომელიც მაშინვე დაარღვია რომელიღაც მგზავრმა: — იმ მუტრუკის პატრონმა თუ იჩივლა, მაშინ ნახე სერიი შენ. მოწმედ დამასახელებენ და მიდი მერე, ირბინე ენაგადმოგდებულმა სასამართლოში!

— აბა, აბა! — დაეთანხმნენ სხვები.

— ნეტა ჰაკი იყო თუ... — დაინტერესდა ვიღაცა მუტრუკის სქესით.

— ჰაკი რომ ყოფილიყო, ასე თავისუფლად ასეირნებდნენ სოფლელები მაგას? მაშინ გზაზე კი არ დაწვებოდა! — აუხსნა ვიღაც ჰკუის კოლოფმა.

— ვირების მეტი რა ყავთ სოფლელებს? ერთი მუტრუკის სიკვდილ რაა? — გაიცინა ვიღაცამ.

— ქემანც მოზრდილი სახედარი ყოფილიყო! — დარდობდა ვიღაცა, — თორემ მუტრუკი...

გასრესილი, ძვალრბილგასწორებული, სისხლსა და მტვერში გასვრილი მუტრუკი თვალს მოეფარა.

„ბელედეი“ მიჰქროდა...

მთელი წლის, თორმეტი თვის განმავლობაში, დიდიდან საღამომდე ფადიმ-ალას ორი მსახური მის ეზოს ვერ შორდებოან. ყოველდღე, დაახლოებით ექვსჯერ თუ შვიდჯერ დღეში, ისინი ჯეზვეს შეაცურებენ ცეცხლში, ყავას მოადულებენ, შაქარსა და რძეს გაურევენ და მოწიწებით მიართმევენ ფადიმ-ალას: — მიირთვით, ბატონო!

ფადიმ-ალა თვალებს მოწყურავს, ყავას ჩამოართმევს, მოწრუპავს და სიამოვნებისაგან ხვად კატასავით კრუტუნებს.

ბატონის ტყაყებზე მიწოლილი ფადიმ-ალა ყავის მირთმევის მერე დიდის ამბით ამოიღებს ძვირფას სიგარეტს „ვენჯიკს“ ვერცხლის პორტსიგარიდან.. ვერცხლისავე მუნდშტუკში ჩადებს და დიდი სიამოვნებით გააბოლებს. ეწევა და რომ არ იცის, უსაქმურობისაგან დრო როგორ მოკლას, უცქერის როგორ მიიწევს მალლა-მალლა თამბაქოს კვამლი და როგორ ქრება თანდათანობით უსასრულობაში.

როცა ბატონის ტყაყებზე კოტირალი მოწყინდება, როცა გამომლაპარაკებელი მოუნდება, ფადიმ-ალა მაშინვე მსახურს გააქცევს სოფელში, ვინაც მას სურს, იმ კაცს მოაყვანინებს და საუბარს წამოუწყებს. მოსაუბრესთან ფადიმ-ალა მხოლოდ თავის თავზე და თავის მტრებზე ლაპარაკობს. თუ ვინმე სძულს, წასულია იმისი საქმე, ისე გალანძღავს, ისე გათათხავს, არ გარევეს არაფერში.

როდესაც სოფლის სიმყუდროვე და უსაქმურობა ყელში ამოუვა, ფადიმ-ალა ბრძანებას გასცემს, მსახურებს ეტლში ფიცხ ცხენებს შეაბმევიანებს და ქალაქ დენიზლისაკენ გასწევს.

ბედნიერი კაცია ფადიმ-ალა, მდიდარზე მდიდარია, უამრავი უძრავი და მოძრავი ქონების პატრონი. პირში რომ ოქროს კბილები აქვს, ერთ გაჭირვებულ კაცს მართო ის ეყოფა სულის მოსათქმელად... ხორციითაც მდიდარი კაცია, ასთვრამეტ კილოგრამს იწონის, დღითიდღე ემატება ხორცი და ქონი. სიმსუქნისაგან ძლივს სუნთქავს და თავის აქეთ-იქით მობრუნება უჭირს. ღიბი კი იმოდენა აქვს, ღმერთმა დაიფაროს, საკუთარ ფეხებს ძლივს ხედავს...

ფადიმ-ალას უყვარს თავის თავზე საუბარი. ზის, ქშინავს და უყვება მსმენელს, თუ როგორ ჩავიდა ერთ დღეს დენიზლიში და იქ მცხოვრებ ერთ ცნობილ ექიმს მიაკითხა სიმსუქნისაგან შეწუხებულმა.

...— იმ ექიმს ჰამიდი-ბეის ეძახიან, — ყველა ფადიმ-ალა, — კარგად მიმიღო, გამესაუბრა. ჯერ ამინდზე ჩამომიგდო სა-



უბარი, მერე მოსავალზე, მოყვა, მოყვა და მკითხა ბოლოს ზე გარჯილხართო. გამიკვირდა, მისვლის მიზეზს, თუ კარგი ექიმა, რატომ ვერ მიმიხვდა-მეთქი, ავუსხენი, რისთვისაც მივედი: — ავად ვარ და იმიტომ გაწუხებ, ექიმო! — ვუთხარი მე.

დაკვირვებით ამხედ-დამხედა, თავი გააქნია და მშვიდად თქვა: — ავად ხარ? რას ამბობ? არა, შენ ავად არა ხარ!

— არა, ავად ვარ, ბატონო! — დავიყინე, მე, — ავად რომ არ ვიყო, რისთვის შეგაწუხებდი, აბა?!

ისევ ამხედ-დამხედა, ამათვალ-ჩამათვალა, ჩაიციხა და თქვა: — შენ ავად არა ხარ, მაგრამ რაკი დავიჩემებია, იყოს როგორც შენა გსურს! მითხარი აბა, რა გაწუხებს?

— ტკივილით არაფერი, ბატონო, შეწუხებით კი მაწუხებს...

— რა?

— სიმსუქნემ შემაწუხა, ბატონო, სიმსუქნემ!

— მერე?

— რა მერე? მინდა ისეთი წამალი გამომიწეროთ, სიმსუქნემ დამიკლოს, თორემ მეტი აღარ შემიძლია, გავთავდი კაცი! ექიმმა ჩაიციხა და მხარზე ხელი დამიტყაპუნა: — რა გქვიათ? ჰო, ფადიმ-აღა! შენ ნუ გჯერა მაგი, მასეთი წამალი არ არსებობს და არც ოდესმე იარსებებს აღბათ. მე შენ შეიძლება გამოგიწერო რამე, მაგრამ ის წამალი შენ ვერ გიშველის...

— აბა, უნდა ვიყო ასე?

— არა, მისმინე და კარგად დაიმახსოვრე, რასაც გეტყვი: — სიმსუქნისაგან თავის დაღწევის უებარი საშუალებაა დიეტის დაცვა! გაიგე? დიეტა უნდა დაიცვა!

— კი, მაგრამ, ეს დიეტა რაღაა?

— დიეტა დიეტა!

— მერე რას ითვალისწინებს მაგ დიეტა თუ ჩემი ფეხებია?

— რას ითვალისწინებს და... ტკბილეული არ უნდა ჭამო, ცხიმიანს არ უნდა გავკარო, წვნიანს უნდა ერიდო, საერთოდ, ცოტა უნდა ჭამო, იმიმშილო უნდა, დღეში ხუთ-ექვსჯერ წავარჯიშო, ცოტა ფიზიკურად იშრომო და...

— რაც შენ ჩამოთვალე, ყველაფერი რომ შევასრულო, წონაში დავიკლებ?

— კი, აუცილებლად დაიკლებ წონაში! — დამამედა ექიმმა.

მოვედი სახლში და ცოლებს ვუთხარი: — გადაწყვეტილი მაქვს წონაში დავიკლო, ექიმთან ვიყავი და მასწავლა, თუ რა უნდა გავაკეთო ამისათვის. ერთი კვირის განმავლობაში უცხი-

მო ბრინჯის წვნიანი უნდა მაჭამოთ. ტკბილეულობა გამაჯაროთ...

როგორც ვთქვი, ცოლებიც ისე მოიქცნენ, მომიხარშეს ბრინჯის უცხიმო წვნიანი და მაჭამეს, ერთი დღე, ორი დღე, სამი და მეტად ველარ გავუძელი. აბა როგორ უნდა გამეძლო, როცა უხცემო წვნიანს არავითარი გემო არ გააჩნია, გინდა თბილი წყალი დაგილევია და გინდა ისა. არც ვარჯიშით მომიკლავს თავი. ორი დღის განმავლობაში ერთი-ორჯერ წავივარჯიშე და ქე მივანებე თავი. ფიზიკური მუშაობა აბა სად შემეძლო და დავრჩი ასე, წონაში ერთი გრამიც არ დამიკლია... მას მერე, იმ ექიმს არ გავკარებივარ, შემრცხვა, რომ ძვითხავდა, დიეტა თუ დაიცავიო, რა უნდა მეპასუხა?

ფადიმ-ალას სამი ცოლი ჰყავს, სამივენი მსუქნები, ხორცილა და ქონით გაზიზზილებული. იმ სამიდან რომელია კანონიერი ცოლი, ეშმაკმა უწყის. ქალები ერთმანეთს ჭამაში და სიმსუქნეში ეჯიბრებიან, კიდევ ერთ რამეზე აქვთ მეტოქეობა — ფადიმ-ალას დანარჩუნებაზე. ყოველი მათგანი ცდილობს რაც კი შეიძლება ფადიმ-ალა დიდხანს იყოლოს თავისთან. მაგრამ ფადიმ-ალა ამ მხრივ სამართლიანი კაცია, კანონიერი! ცდილობს არც ერთს არ დასწყვიტოს გული, არც ერთს არ მიაკუთვნოს უპირატესობა, მისთვის სამივენი ერთნაირადაა ძვირფასი და სასურველი და ერთ ღამეს ერთს რომ შეუწევება ლოგინში, მეორე ღამეს მეორეს ეხუტება, მესამე ღამეს კი მესამეს იკრავს გულში.

როგორც უკვე მოვიხსენიეთ, ფადიმ-ალა მდიდარზე მდიდარი კაცია, სხვა ქონებასთან ერთად მის განკარგულებაშია რვა წისქვილი, რომლებშიაც მეწისქვილედ მუსტაფა მუშაობს, იგი სოფელ ჰაიდარიდანაა. რვა შვილის მამას ხელისგულისოდენა მიწა ჰქონდა, რომლითაც მრავალსულიანი ოჯახის რჩენა არ შეეძლო, ამიტომაც შეიქნა იძულებული თავისი სოფელი, ოჯახი მიეტოვებინა და ფადიმ-ალას ერთ-ერთი მოსამსახურეთაგანი გამხდარიყო.

მუსტაფას ხანდახან ისე მოენატრებოდა შვილები და ოჯახი, ზოლმით იტენებოდა და მაშინ იყო, რომ ღმერთის უკანონობაზე ჩამოუგდებდა საუბარს წისქვილში თავშეყრილ გლეხებს.

— ამდენს ვლოცულობთ, ამდენს ვევედრებით ღმერთს, მას კი ჩვენთვის აღარ სცალია, ყველაფერი—წისქვილები, საყანე და საბოსტნე მიწები ფადიმ-ალასათვის მიუცია და ჩვენთვის აღარაფერი დარჩენია მოსაცემი... სამართლიანია ამის მერე ეს ღმერთი?..

მორწმუნე გლეხები, რომელსაც ღმერთის ძაგება მომაკვ-



დინებელ ცოდვად მიაჩნდათ, მაშინვე შეაწყვეტინებდნენ მის ტაფას:

— რომ აფრენ, გეტყობა, რას მიედ-მოედები თუ იცი შენ? ვინ მოგცა ღმერთის გმობის უფლება?

— მე არაფერსაც არ ვაფრენ, მეზობლებო! — მშვიდად იტყოდა მუსტაფა, — მე სიმართლეს ვლაპარაკობ, ფადიმ-ალა წურბელაა, სისხლსა გვწოვს და თვითონ სუქდება, ღმერთი კი მის მხარეზეა, ხელს უწყობს მას, ეხმარება. ფადიმ-ალამ რომ მოინდომოს, არმიას შეადგენს და არც მისი რჩენა გაუჭირდება...

— კი, ეს მართალია, ფადიმ-ალა რომ მდიდარი კაცია და მას რომ ყველაფერი აქვს, ეს სიმართლეა! — ამბობდნენ გლეხები, — მაგრამ ღმერთს ნუ ახსენებ, ნუ გმობ ღმერთს, მან უკეთესად იცის, რა ქნას და რა მოიმოქმედოს. რომ ნდომებოდა, შენ მოგცემდა სიმდიდრეს, ჩვენ მოგვცემდა აგერ, მაგრამ მან ფადიმ-ალას მისცა, ალბათ ასე იყო საჭირო და ასეც მოიქცა...

— აბა მე რას ვამბობ? ღმერთმა რომ ყველაფერი ფადიმ-ალას მისცა და ჩვენთვის მოსაშავებელი აღარაფერი დარჩა, ამას ვლაპარაკობ მეც.

— ღმერთის გმობა მაინც არ შეიძლება.

ეს წისკვილები ფადიმ-ალასათვის ერთ-ერთი ყველაზე უფრო მნიშვნელოვანი შემოსავლის წყარო იყო. იმ რაიონის ორმოცდარვა სოფლის მცხოვრებს აქ მოჰქონდათ საფქვავი, ასე რომ, დიდძალი მუშტარი ეხვეოდა ამ წისკვილებს. ხალხი რიგში იდგა და იცდიდა, როდის დადგებოდა მისი ჯერი. ხშირად მთიანი სოფლებიდან ჩამოსულ გლეხებს ოთხი დღე აგვიანდებოდათ, სანამ თავიანთი რიგი დადგებოდა, გადაჰკიდებდნენ თავიანთ გაძვალტყავებულ სახედრებს პურისა და ქერის მარცვლით დატვირთულ ვეება ტომრებს გლეხები და საცოდავი სახედრები, რომელთაც არც ნაღი და არც კეზი გააჩნდათ, ძლივს-ძლივობით ადგამდნენ ნაბიჯებს ქვიზა და ლორღით მოფენილ ფერდობზე.

* * *

სოფელ იეღმეს მცხოვრებლებმა, როცა მარცვალი გალენეს და დააბინავეს, ახალი მუხტარი აირჩიეს. ახალი მუხტარი — ალი თავიანი კაცი იყო, ენერგიული და საქმიანი. ერთ დღეს მან შეკრიბა სოფლის მამაკაცები და გამოუცხადა:

— ასე არ შეიძლება, მეზობლებო, სანამდე უნდა გაგრძელდეს ასე? წისკვილი არ გაგვაჩნია, საფქვავი რომ დაფქვათ, ოთხი-ხუთი დღე უნდა გავაცდინოთ, უნდა გავიტანჯოთ, დავიქანცოთ, სახედრებზე გავაწვალოთ და უნდა ვიაროთ ამ საშინელ გზებზე...

— აბა რა ვქნათ? არ დავაფქვიოთ აბა ხორბალი? — იქნებ
თხა ერთმა, — წისქვილი რომ გვქონდეს, კარგია, მაგრამ
წისქვილი არა გვაქვს, ისევ სხვის წისქვილზე უნდა ავიტანოთ
საფქვაავი, შორსაა თუ ახლოს, უნდა გავიჭიროვოთ, აბა დაუფ-
ქვავს ხომ არ მივირთმევთ?..

— მართალია, უნდა გავიჭიროვოთ!

— აბა რა ვქნათ, როცა სხვა გამოსავალი არაა? — აყაყან-
დნენ გლეხები.

— მოიცათ! — შეაჩერა ისინი ახალმა მუხტარმა, — ერთი
რალაცა მოვიფიქრე და მინდა ჩემი ფიქრი თქვენაც გავიზიარო-
თ, დაფიქრდეთ, კარგად ავწონ-დავწონოთ, გავზომოთ და
თუ მოგეწონებათ ჩემი აზრი, ისე მოვიქცეო!

— თქვი, თქვი!

— გავვაგებინე ერთი, რა მოიფიქრე!

— თუ კარგია და მისაღები, რატომ არ მივიღებთ? — აყა-
ყანდნენ ისევ გლეხები.

— აი, რა, მეზობლებო სოფელში ოთხმოცდაათი მოსახლე
ვართ, თითოეულმა მოსახლემ რომ თითო-თითო კოდი პური
გავილოთ და გავყიდოთ, ეს ხუთიათას ლირას შეადგენს, ზოგიე-
რთებმა, ვისაც ყველაზე უფრო უჭირთ, შეუძლიათ ერთი კოდის
მაგიერ ნახევარი კოდი პური გაიღოს...

— მერე და რად გვინდა ეს ფული? — იკითხა ერთ-ერთმა
გლეხმა.

— რად გვინდა და ამ ფულით შეგვიძლია მოტორი ვიყი-
დოთ და აქ, ჩვენს სოფელში მოტორიანი წისქვილი გავმართოთ,
უკეთესი არ იქნება განა? ფადიმ-ალას წისქვილში მისვლას გა-
დავრჩებით და არც მინდი გვექნება გასაღები...

— ეს კარგია, მაგრამ... წყალი რომ არ გავვაჩნია?

— რით ავამუშავებთ წისქვილს?

— ეს როგორ იქნება? — ისევ აჩოჩოლდნენ გლეხები.

— რითი ავამუშავებთ და მოტორით! — აუხსნა მუხტარმა
მათ, — აბა რისთვის გვინდა ის მოტორი?

— მერედა, მაგ მოტორი აამუშავებს წისქვილს? — დაექ-
ვებით იკითხა რომელიღაც გლეხმა.

— წისქვილი წყლის გარეშე... — წამოიწყა მეორემ, მაგ-
რამ მუხტარმა შეაწყვეტინა:

— რადგანაც გეუბნებით, იმუშავებს ალბათ! ჩემი თვალით
ვნახე, წყლის წისქვილზე უკეთესად მუშაობდა და ფქვავდა...
ოთხი ათასი ლირა თუ შევაგროვე, წავალ და ხუთ დღეში მო-
ტორს და წისქვილისათვის განკუთვნილ სხვა მოწყობილობას
ამოვიტან.

მუხტარმა იმდენი ილაპარაკა, იმდენი მაგალითი მოიყვანა,
რომ ბოლოს და ბოლოს გლეხები თანდათანობით დააინტერესა.

და მცირე ყოყმანის შემდეგ მათ ერთობლივი გადაწყვეტილება გამოიტანეს.

— მუხტარი მართალია. სათესლე პურიც რომ გავყიდოთ, ეს საქმე მაინც უნდა გავაკეთოთ. ხეირიანი საქმე ჩანს, ჩვენთვის სასარგებლო!

და აი, ერთ დღეს, შუადღისას მუხტარმა თავისი სიტყვა შეასრულა — სოფელში მოტორი და წისქვილისათვის საჭირო სხვა მოწყობილობანი ამოიტანა.

ქალების გარდა მთელმა სოფელმა მოიყარა თავი სასაფლოს გვერდით, სადაც წისქვილის აგება გადაწყვიტეს.

სოფლელების უმრავლესობას მოტორი თავისი სიცოცხლეში არ ენახა. გლეხებმა დიდი ინტერესით დაათვალიერეს იგი.

— მაგარია, არა? — იკითხა ერთმა გლეხმა.

— მაგარია და მეტი არა? — დაეთანხმა მეორე, — მოტორით მომუშავე წისქვილი წყლის წისქვილზე ოცჯერ უფრო ჩქარი ყოფილა.

— უყურე შენ!

— ვინ გააკეთა, ნეტა?

— ვის უნდა გაეკეთებინა? გიაურმა გააკეთა თურმე!

— გიაურმა?

— კი, კი, გიაურმა!

— მოდი და გიაური უძახე შენ! ჭკვიანი ხალხი ყოფილა.

— ამის გაკეთებას აბა ჭკუა არ უნდა?

— ვენაცვალე თქვენში იმ გიაურებს, რომლებმაც ეს მოტორი და ტილის მოსასპობი წამალი გამოიგონა!

— თოფის და ზარბაზნის კეთებას არ სჯობია ასეთი სახეირო რამერუმეები გააკეთონ?

— ჯობია და მეტი არა! რა ხეირია ზარბაზანში? ხალხის დახოცვის მეტი არაფერი შეუძლია!..

— არა, არა, მაგარი რამ კია და...

— მაგარია და მეტი არა?

— ბიჭო, ეს ნამდვილად გიაურის გაკეთებულია?

— გიაურისაა, აბა ვისი იქნება?

— ჩვენს მუსლიმანს არ გაუკეთებია აგი?

— მუსლიმანს კი არა, ის არ გინდა შენ?

— ჩვენი მუსლიმანის გაკეთებული რა ნახე და რა გაიგონე შენ?

— არაფერი! მუსლიმანს აქამე, ასვი, ქალი დაუჯინე მუხლებზე!

— ანდა ლოგინში დაუწვინე! მორჩა, ესაა სულ მუსლიმანის საქმე!



— სწორია მაგი! მუსლიმანს მოტორის გაკეთება სადღეობაა?
 ძლია?

— რომელი გიურის გამოშვებულია თუ იცით, ბიჭებო, ა?

— გერმანიის, გერმანიის!

— თვალეში ვენაცვალე იმ მოხელეს, თვალეში!

— კარგია, მაგრამ, ეს მოტორი პურს დაფქვავს?

— ა, მოდი და კითხე ამას ჭკუა! პური რაა, ქვას არ დაფქვავს?

— ქვის დაფქვა რაში მჭირდება, კაცო?

...მერე წისქვილის აგებას შეუდგნენ. მუხტარის ცოლის ძმა ნური, რომელსაც ჯარში ყოფნისას მძღოლის კურსები დაემთავრებინა და გენერლის მანქანაზეც ემუშავა, მოტორის აწყობას შეუდგა. წისქვილი გამართეს, მოტორი ჩართეს და საცდელად გაუშვეს.

წისქვილი საუკეთესოდ მუშაობდა.

სოფლელები სიხარულისაგან ფეხზე აღარ იდგნენ.

— ეს რა კარგი საქმე გავვიკეთა მუხტარმა, ჰა?

— აბა, კაცო!

— ოქრო კაცია, ოქრო! ეს როგორ მოიგონა?

— აღარ დაგვჭირდება აწი ფადიმ-ალას წისქვილზე სიარული, იმხელა გზის გავლა.

— ოთხი დღე გვჭირდებოდა, ოთხი დღე! ეხუმრებით თქვენ?

— ახლა კი ა, ბატონო, აგერ გვაქვს ცხვირწინ და დაფქვი როდესაც მოგესურვება.

წისქვილი შეუფერხებლად მუშაობდა. მალე ახლო-მახლო სოფლებიდანაც დაიწყეს საფქვავის მოზიდვა.

მერე სხვა სოფლელებმაც შეიძინეს მოტორი და საკუთარი წისქვილი გამართეს. ფადიმ-ალას წისქვილებს თანდათანობით დაეკარგა მახანდა, შემოსავალმა იკლო და ფადიმ-ალამ ყურები ჩამოყარა.

მის წისქვილებთან უკვე აღარ იდგა სხვადასხვა, შორეული, სოფლებიდან ჩამოსულთა რიგი. მდგომარეობა რომ გამოესწორებინა, ფადიმ-ალა ერთგვარ რისკზე წავიდა. თუ უწინ ერთი სახედრის ძლივს მოტანილ საფქვავზე მიხდად რვა ოყა ფქვილს იღებდა ქირად, ახლა ეს ქირა ორ ოყაზე ჩამოიყვანა, მაგრამ წამხდარ საქმეს ამით არაფერი ეშველა.

ფადიმ-ალა საათობით იდგა თავისი სახლის ფანჯარასთან და გზას გასცქეროდა. იქნება ვინმემ საფქვავე მოიტანოსო, მაგრამ მომსვლელი არავინ ჩანდა.

და აი, ერთ დღეს სოფლის ყავახანაში ამბავი მოიტანეს
ფადიმ-ალა ერთ-ერთი ცოლის ოთახში უნახავთო მკვლაცხა.

ჯერ არ დაიჯერეს, მერე კი, როცა შეამოწმეს, მართალი
აღმოჩნდა.

— ალბათ წისქვილების დარღმა თუ მოკლა! — დაასკვნეს
სოფელლებმა.

თ ა ვ ა შ ი

ყავახანის მეპატრონეს — მუხართემს მაგიდა და სკამები
ჯამეს წინ, ჩრდილში გამოეტანა და იქ მოეკალათებინა. ჩრდი-
ლში საკმაოდ გრილოდა. ყავახანის მოთამაშეები ერთთავად აქ,
ამ ჩრდილში იყრიდნენ თავს და თამაშობდნენ, რადგანაც ყავა-
ხანის ჩახუთულ ჰაერსა და ბუზების შემოტევას ვერ იტანდნენ.

მუხართემს ზაფხულობით მაგიდები გარეთ გამოჰქონდა
ხოლმე. მუშტარი გამოუღვევლი ჰყავდა და ისიც, რალა თქმა
უნდა, თავისი ბედით კმაყოფილი იყო. იგი მაგიდის გადასაწ-
მენდ ჩვარს მედიდურად გადაიგდებდა მხარზე და ამაყად იტ-
ყოდა ხოლმე: — ომიც რომ დაიწყოს და ქვეყანა იქცეოდეს,
ჩემი ყავახანა მაინც არ დაცარიელდება. სხვა ყავახანების მეპა-
ტროსებმა იკითხონ თორემ, ჩემს ყავახანაში, ამ ჯამეს ჩრდილ-
ში ვინ არ მოვა?.. ჩრდილში მობრძანდით, ბატონებო, ჩრდილ-
ში! — მხიარულად ეპატიჟებოდა იგი ყავახანის მუშტარებს.

აი, დღესაც... ოციოდე მუდმივ მუშტარს მოეყარა თავი.
ნარდისა და დომინოს თამაშით იქცევდნენ თავს. ხმამალლა ლა-
პარაკობდნენ, იკინოდნენ და ლაყბობდნენ. მათი ხმაური შორს
ისმოდა.

— რადიო ჩართე, კაცო! — დაუყვარა ერთმა, — ისმეთ-
ფაშას ხომ არ ელოდები, ელექტროფონოგრაფებს რომ უფრთხი-
ლდები?.. თუნდაც ისიც მოვიდეს, ჩვენსავით ერთ სკამზე და-
ჯდება მაინც.. ჩართე რადიო, ჩვენც ადამიანები ვართ!

— თქვენი ნებაა, ბატონო! — ბოხი ხმით გაეპასუხა მუხა-
რთემი, — ფაშა რას მიქვია, თქვენა ხართ ჩემი ფაშაცა და გე-
ნერალიც, ოღონდ თქვენ ბრძანეთ და.. ისმეთ-ფაშას მოსვლა
მე რას მეხება? — რადიო ჩართო, იქაურობა მაშინვე ქალის
ხმამ გააყრუა. მომღერალ ქალს ისეთი თბილი, წკრიალა ხმა
ჰქონდა, ეტყობა ჯერ შიმშილი არ განეცადა.

„შენ ამიერიდან წახვალ, წახვალ, ამან“... — მღეროდა
ჰამიეთ სესი.

— შენ გენაცვალე, ჰამიეთ! — დაიყვარა აზარტში შესულ-



მა მუხართემმა, — შენ გენაცვალე... ჩემი მუშტრებიც გენაცვალოს!

— შენ ჩვენი მოურავი ხომ არა ხარ... სხვებსაც ვჭირდებით, — გაეპასუხა ერთი.

— ვენაცვალე, თქვენც ენაცვალეთ, თუნდაც შეგვეჭამოს!

— ერთი ამას დამიხედეთ?!. იმ ქალმა ჩვენ რა უნდა შეგვიჭამოს, ბიჭო?

— რაც უნდა, ის შეგვიჭამოს, ჰალალი იყოს მასზე!

ჯამეს თეთრწვერა ხოჯამ, ოთხმოცს გადაცილებულმა ბერიკაცმა, მინარეთიდან ჩაბრინწული ხმით წამოიწყა „ეზანი“. ამ სიტყვების მნიშვნელობა კაცისშვილმა არ იცოდა. მხოლოდ ანკრად ხვდებოდნენ, რომ „ეზანის“ გადმოძახილზე ქეშმარიტი მუსლიმანები ჯამეში უნდა შესულიყვნენ და ელოცათ.

ბებერი ხოჯის ისედაც სუსტ მოძახილს რადიოს ხმა ახშობდა. ხოჯის მოძახილზე, ჯამეში სულ ხუთიოდე მოხუცებული შევიდა შუადღის ლოცვაზე.

ამ დროს ერთ-ერთი მუშტარი ფეხზე წამოდგა და თქვა: — ბიჭო, მუხართემ, ხომ არ გაგიყდი შენ? გამორთე ახლავე რადიო!

მუხართემმა მხრები აიჩეჩა, ხმა არ ამოუღია და არც რადიო გამოუერთავს.

— სირცხვილი თქვენი! — გაბრაზდა მეორე მუშტარი, — სინდის-ნამუსი არ გაგაჩნიათ და ესაა! არც დილის ლოცვა იცით თქვენ, არც საღამოს და, საერთოდ, აღარაფერი აღარ გწამთ... ქემაინც „ეზანის“ დროს მაინც გამორთეთ ეგ ოხერი რადიო.

— გვაპატიე, ჰაჯი ბიძია! — წამოიძახა მუხართემმა, — ყველაფერს გეფიცები! „ეზანის“ ხმა არ გამიგონთა, თორემ შენი ხათრისათვის მაინც როგორ არ გამოვრთავდი? — რადიოსთან მივიდა და გამორთო. — აჰა, ხომ ხედავ, გამოვრთე!

ჰაჯი ამბაქი ბარბაცით ჯამესაკენ გაემართა და თან გაუჩერებლად იმეორებდა ერთი და იგივეს: — სირცხვილი, სირცხვილი!..

მელორე შევქეთს გვარიანად წაეგო ნარდში და გვარიანად დაბოლმილი, მიზეზს ეძებდა, რათა აყალმაყალი აეტეხა და გული მოეოხებინა.

— ჩართე, ბიჭო, მაი! — დაუყვირა მან მუხართემს, — ვიდრე სამი-ოთხი ბერიკაცი ილოცებდეს, ჩვენ პირღია უნდა ვიცადოთ? რომელ დროში ვცხოვრობთ თუ იცი? ჩვენ ვართ მეტი თუ ისინი? ვინაც მეტია, ხმაც მას ეკუთვნის, ჩართე!

— არა, არა, ვერ ჩავრთავ! — ხელები გაასავსავა მუხართემმა, — დაამთავრონ ლოცვა და მერე დიდი სიამოვნებით.



დაბოლოილი მელორე არ ცხრებოდა: — არ გამაბრაზო ბიჭო, თორემ... შენ და შენი ყვავახანა... მეტს აღარ მოვალ აქ! მუხართემი მის დამშვიდებას შეეცადა: — კი, ბატონო, ჩავრთავ! შენი ხათრისათვის ყველაფერს გავაკეთებ! მეითულა ხოჯიდან რა სარგებელი მაქვს აბა?! — გაბრუნდა და რადიო ჩართო.

მელორე დაწყნარდა: — აი, ასე! — ჩაილაპარაკა უკვე დამშვიდებულმა, — ცოტა გონებას წიხლი უნდა დააჭირო და უნდა გაიგო ბრუნდი და მართალი. ვისგანაც მეტი სარგებელი მაქვს, მეტი პატივიც მას უნდა სცე!

— გასაგებია, გასაგები! — ჩაილაპარაკა მუხართემმა.

— ბიჭო, — მაინც არ დაცხრა მელორე, — შენ მეტი პატივი უნდა გვცე. ამ აგვისტოს გავანია სიცხეში ჩვენს საქმეზე არ წავსულვართ და აქ ვსხედვართ. არ უნდა გიხაროდეს შენ ეს? ცოლები უკმაყოფილო გვყავს, კალოს ლეწვაზე რომ არ ვეხმარებით... შენ კი... მაინც დაგვიჯერე ცოტა...

— კი, ბატონო, თქვენი ნებაა! — ჩაილაპარაკა მუხართემმა.

— ჩვენ უნდა დაგვიჯერო, აბა რავა გგონია შენ!

მუხართემი მოულოდნელად გაბრაზდა: — რა მოხდა ასეთი?! შენ გინდა მოსულხარ და გინდა არა, ფეხებზე არ მკიდია? რა საჭიროა ამდენი საყვედურები? ჩემს ყავახანას მუშტარი მაინც არ მოაკლდება, ორ-სამ დღეში სოქეში ბამბის ასაღებად წასულები მობრუნდებიან და... შეხედე ერთი, ეგერ მოდიან...

მელორე შევქეთმა ქუჩისაკენ მიიხედა და მოულოდნელად წამოიყვირა: — მოდის, მოდის! კარა მემიში მოდის!.. ახალი კოსტიუმი შეუყერავს, ცილინდრი უყიდია, სათვალე უკეთაა, კრიალოსანს მოათამაშებს...

ყველა იქ მყოფნი შეთანხმებულებივით მობრუნდნენ და კარა მემიშს მიაჩერდნენ.

მელორე ზღაზვნით წამოდგა და იკითხა: — როდის დაბრუნდა ნეტა?

— წუხელ! — თქვა ერთმა, — წუხელ თითქმის ნახევარი ხალხი დაბრუნდა... მანქანა ვერ უნახავთ და ფეხით წამოსულან.

— ვერ მოითმინეს, უქალობა გაუჭირდათ!

ქუჩაში ცხვრის ფარა გამოჩვენდა. გზაზე მტვერი აიხლაზნა და მტვრის ბული ნისლივით ჩამოწვა. კარა მემიში გზიდან გადადგა, დაიხარა, შარვლის ტოტზე მტვერი დაიფერთხა, მერე ისევ გაიჯგომა წელში და ვიდრე ფარა თვალს არ მიეფარა, ადგილიდან არ დაძრულა.

მელორე კარა მემიშს შესცქეროდა.

— მოდის! — ჩაილაპარაკა თავისთვის, — ახალ ამბებს

მოჰყვება! — წამით იყუჩა და მერე ხმამაღლა, ყველას გასაგონად
გონად დასძინა: — ვალები აჩრჩობს და ახალი კოსტიუმი შე-
უკერავს. რად უნდა ნეტა? უსინდისო!

მუხართემმა ველარ მოითმინა: — შენ რაო, კარგად რო-
მაა ჩაცმული, გშურს, არა?!

მაგრამ მელორე შევქეთს მისი სიტყვები აღარ გაუგონია. რა-
მდენიმე წამს რაღაცაზე ფიქრობდა, მერე უცებ წამოიძახა: —
შეხედეთ, შეხედეთ!.. მუხართემ-ეფენდი, შენაც მოდი აქ. მო-
დით ერთი და გავამასხარაოთ ეს შტერი! მე რომ დავიძახებ
„სწორდით“, თქვენ ყველამ ფეხზე აღექით, ქუდები მოიხა-
დეთ!..

მყუდროება ჩამოწვა. რადიო გამორთეს, თამაშიც კი
შეწყვიტეს და ყველანი კარა მემიშს მიაცქერდნენ. კარა
მემიში თავმომწონედ, თავაწეული მოდიოდა. ჯამეს ჩრდილ-
ში აჩოჩქოლებული ხალხი ადრევე შენიშნა, მერე, ხალხი
რომ მიწყნარდა, ეს რომ შემთხვევით არ მომხდარა, მიხვდა,
წამით შეცბა, შეფიქრიანდა, მაგრამ არ შეიშინია და არხეი-
ნად ზურგზე ხელებდაწყობილმა განაგრძო გზა... ხალხს რომ
დაუახლოვდა, ყველამ გაიგონა მისი ახალი ფეხსაცმელების
კრაჭუნი. ყველა გატრუნული, გაოცებული მისჩერებოდა. კა-
რა მემიშის ჩამომხმარ, ჩხირივით ტანზე ასეთი კოსტიუმი,
ასეთი ფეხსაცმელი, ცილინდრი.. საოცრად სასაცილო ჩანდა
ხალხის თვალებში. შეკრებილთ რომ დაუახლოვდა, მელორემ
დაიყვირა:

— სწორდით!.. კაიმაკამ-ბეი მოდის! ფეხზე, ფეხზე აღე-
ქით!

ყავახანის მუშტრები წამოდგნენ, ქუდები მოიხადეს და
გაინაზნენ. პირველად მელორე მიუახლოვდა მემიშს, მერე მუ-
ხართემი, მერე კი დანარჩენები.

— კეთილი იყოს თქვენი მობრძანება!

კარა მემიშს ნებისყოფამ არ უღალატა, ბრაზი შეიკავა და
არხეინად თქვა: — თქვენც კეთილად შენახეთ, ხალხნო! რო-
გორა ხართ?

— ვცოცხლობთ, ბატონო! — უპასუხეს ერთხმად.

— მეზობლები ყველანი აქ არიან, მუხტარ?

— ზოგი კი, ზოგი სადღაც მიმოიფანტა, ზოგიც მუშაობს!

— ძალიან გამახარეთ, ძალიან! კარგია, რომ მუშაობენ.
იმუშავეთ, შვილებო, ბევრი იმუშავეთ! უცხოელებმა შრომით
ააყვავეს თავიანთი ქვეყნები და ბევრად გაგვისწრეს კიდევ.
ჩვენც, თუკი ვიმუშავეთ, ყველაფერი გვექნება...

— ხალხო, კარგად მოისმინეთ! — შეაწყვიტინა მელორემ,
— გაიგეთ, რაში ყოფილა საქმე!

— იმუშავეთ, შვილებო, იმუშავეთ! — გაიმეორა კარა მეომარი მიმამა.

— განა ჩვენ უსაქმურები ვართ?!. — წამოიძახა ერთმა, — დღე ნამგალს ვატრიალებთ ყანაში, ღამით კი დევ, ლოგინი... სულ ვმუშაობთ და ეგაა, სულის მოსათქმელი დრო რომ მოგვცა, ავდგებით და ზურნას ავაჭყიპინებთ... ახლა რომ აქ ვზივართ, მაგი ნუ შეგაწუხებთ, ორ-სამ დღეში ისეთი საქმეები დაგვეწყება, ისე დავიღლებით, აქ ვერ მოვალთ...

— აფერუმ, შვილებო! იმუშავეთ, მუშა კაცი ღმერთსაც უყვარს და მთავრობასაც!.. მეც მიყვარს!.. ყავახანაში ნუ დადინხართ. ეს ყავახანები ჩვენს ქვეყანაში ობობას ქსელივითაა მოდებული.. აქ სიარულს, ჯობია იმუშაოთ, ბაღჩაში, ბოსტანში იმუშავეთ!..

— კი, ბატონო!

— სუფთად ჩაიცივით!

— კი, ბატონო!

— გულიც წმინდა გქონდეთ!

— ღმერთი გაცოცხლებთ, კაიმაკამ-ბეი!

— ქუჩაში სისუფთავე დაიცავით. დაავალეთ თქვენს ცოლებს, ქუჩები დაგავონ! მიწმინდ-მოწმინდონ აქაურობა!

— რა უნდა დაწმინდონ? — იკითხა მელორე შევქეთმა.

კარა მემიში ჩაფიქრდა და ნამდვილ კაიმაკამ-ბეივით მიმოიხედა: — აქ, ახლოს სიბინძურე არ არის? — იკითხა ბოლოს.

— არის ბატონო, ბოსლები არის!

— ჰოდა, აიღეთ! ეგ ბოსლები ბუზებს ავრცელებენ, სოფელს გარეთ გაიტანეთ! ეს ბოსელი ვისია, აგერ, გზის პირას რომ არის?

— უქიზის, ბატონო!

— უთხარით, დაუყოვნებლივ აიღოს!

— ბევრჯერ უთხარით, მაგრამ მაინც არ იღებს. ჩვენ კი ბუზები გვეჭამს მაგის ბოსლის გამო.

— უთხარით, დაგაჯარიმებთ-თქო!

— ესეც უთხარით...

— მერე?

— არ აიღო! ასე თქვა, კარგი საცხვარეა, სოფელს ბედნიერებს მოუტანსო.

— ჰმ! ხედავთ? არ დაიჯეროთ მაგი! თქვენ ჩემთან განცხადება შემოიტანეთ. დაწერეთ, რომ... „ჩვენს სოფელში, ამა და ამ კაცმა ჯამეს ახლოს ბოსელი დადგა, რაც იქაურობას აბინძურებს, რამდენჯერმე ვთხოვეთ, ბოსელი აეღო, მაგრამ ჩვენი თხოვნა არ შეასრულა“.. დაწერეთ, რომ ჯამესთან ბოსე-



ლი უხერხულიცაა და, თანაც, ბუზებსაც ავრცელებს... სჯელებს ამაზე და ზომებსაც მივიღებ.

— ღმერთმა აგაშენოს, კაიძაკამ-ბეი!

— კიდეც რა გსურს, მუხტარ?

— თქვენი კარგად ყოფნა და სიცოცხლე, ბეი!

— საყანე მიწებს თუ ვინმე საძოვრად იყენებს, ან ტყეს თუ ანადგურებს ვინმე?.. დღურმიშ ფეჭმეზმა გზის პირას სიმინდი რომ დათესა და მე ავუკრძალე, შეასრულა თუ არა ჩემი ბრძანება?

— არა!..

— არა?! კარგი, ზომებს ახლავე მივიღებთ, დავაპატიმრებ, მე მაგისი!.. კარგად მომისმინეთ: ტყე ჩვენი სიმდიდრეა, იმედია ჩვენი, დედა, მამა, ქონება, სილამაზე და ყველაფერი ჩვენი! ტყეს რომ ჩეხავენ და სიმინდს თესავენ, აქედან რა ბარაქა იქნება? ყველამ რომ მიდგეს და ტყე ჩეხოს, აქაურობას ქარი და ნიაღვარი წალეკავს, ქვეყანა ქვეების გროვად იქცევა, ასე არ არის, შვილებო?

— ჩვენ ამდენი რა ვიცით, ბატონო?! — ჩაილაპარაკა მუხტარმა, — ჩვენ უსწავლელები ვართ, საიდან გვეცოდინება მაგდენი!

— ისწავლეთ, სკოლაში იარეთ!

— სკოლა სადა გვაქვს, ბატონო!

— ვინაც მცოდნეა, არამცოდნეს ასწავლოს... მივწერ მე ანკარაში და გამოგვიგზავნიან მასწავლებელს. ახლა ბევრგან იხსნება მოძრავი სკოლები. სამი დღის განმავლობაში მსურველები ჩამოწერეთ, ქალებიც ჩაწერეთ და განცხადება ჩემთან მოიტანეთ.

— იცოცხლეთ, ბატონო, იცოცხლეთ!

მუხტარმა გვერდით მდგომ ჩილ იშიმს მკლავში ჩაავლო ხელი, გვერდზე გაიყვანა და კარა მემიშის გასაგონად უთხრა:

— აბა, გასწი ახლავე და ჩემს მეუღლეს უთხარი: თუ ყავა არა აქვს, მოხალოს, სადილიც მოამზადოს, ერთი ბატკანიც დაკლას, ჭურჭელი სუფთად ჰქონდეს, დარეცხოს.

ჩილ იშიმი ათიოდე ნაბიჯზე თავმოყრილ ხალხს შეუერთდა.

კარა მემიში კი თავისას განაგრძობდა: — აქეთ მოიხედე, შვილო მუხტარ! სოფელში საპირფარეშოები გააკეთეთ თუ არა? საპირფარეშოს გარეშე არც ერთი სახლი არ უნდა დარჩეს. მეორეჯერ რომ მოვალ, ყველგან საპირფარეშო იყოს. ამჯერად გეგმაში არა მაქვს საპირფარეშოების დათვალიერება. ამ საქმეს შენ მიხედე, მუხტარ! ქალაქელები დაგვცინიან ამის გამო... კაცმა რომ თქვას, თითო ოჯახს თითო საპირფარეშო ქე უნდა ჰქონდეს.

- უთუოდ, ბატონო!..
- ჰოდა, იზრუნეთ ამაზე!..
- კარგი, ბატონო!

— არხები შეაკეთეთ? მეორეჯერ რომ მოვალ, მაჩვენეთ!
ქები გაწმინდეთ, შიგ ქათმები და კატები არ იყოს ჩამხრჩვა-
ლი!

- ვეცდებით, ბატონო!

— სოფელში კანონი წესიერად განახორციელეთ... ერთი
კანონი კიდე უნდა დავამუშავოთ — სოფლის გაზრდა!

- იცოცხლეთ, იხარეთ, ბატონო!
- ეე, ახლა თქვენაც მითხარით რამე!

— ჩვენ სათხოვარი არაფერი გვაქვს. ღმერთმა შენ გად-
ღეგრძელოს. შემდეგისათვის ყველაფერი რიგზე იქნება,
ოღონდ, აი ის კაცო საპირფარეშოს არ აკეთებს, კაიმაკამ-ბეი!

- რატომ?

— გიჟია და იმიტომ! საპირფარეშო მაქვს თუ არა მაქვს,
ეს ვისი რა საქმეაო. ვისაც როგორ უნდა, ისე გააკეთებს, სა-
ქმეში სრული დემოკრატია უნდა იყოსო...

— ვაი და უი მის თავს! ესაა დემოკრატია? აქეთ მოიხე-
დე, იცოდეთ, დემოკრატია სხვაა, საპირფარეშო კიდე —
სხვა! ჰო, სამსახურში მისვლისთანავე სოფლის კანონებში ჩა-
ვიხედავ...

- იცოცხლე, ბეი!

კარა მემიში უცებ გახელდა: — აღარ მინდა მე ასეთი
რამერუმეები!

- გვესმის, ბატონო!

- სხვა საკითხებზე თუ გსურთ მკითხოთ რამე?

— კი... აქეთ ერთი კაცია, რომელიც შეწერილ ცხვრის
ტყავს არ აბარებს წითელი ნახევარმთვარის საზოგადოებას.
ვერასგზით ვერ დავიყოლიეთ.

— წითელი ნახევარმთვარისა და ნებაყოფლობით საპა-
ერო საზოგადოებას ვინც არ დაეხმარება და ტყავს არ ჩააბა-
რებს, ეს ქვეყნის ღალატია. იცოდეთ, ცხვრის ტყავი საპაერო
ძაღვების გაძლიერებისათვისაა საჭირო და აუცილებელი... ოჰ,
დავიღალე, სათვალეც გამიჭუჭყიანდა, ეს სოფლის მტვერის
ბრალია! — სათვალე მოიხსნა, გაწმინდა და ისევ გაიკეთა.

— ჩემო ბატონო, — უთხრა მეორე შევქეთმა, — აქეთ
მობრძანდით, ცოტა დავისვენოთ, დაღლილი ბრძანდებით, ფი-
ნჯანი ყავა დავლიოთ!

- აქედან შორს ცხოვრობ, მუხტარ?

- არა, ბატონო, აქვე, ჯამესთან...

- კარგი, წავიდეთ.

— თუ ინებებთ, ჯერ ჯამე დავათვალიეროთ. ჩვენი წესი

ასეთია, საპატიო სტუმარს ჯერ ჯამე უნდა დაათვალიერებინოთ.

— ძალიან კარგი, ვნახოთ!

— ჯერ იმაში მოვნახოთ, ბატონო, გასაღები იმასა აქვს, — მუხტარმა რომელიღაც გლეხს მკლავში ჩააგლო ხელი, გაიხმო და დაავალა: — საჩქაროდ ხოჯას დაუძახე, გასაღები მოიტანოს, უთხარი, კაიმაკამმა ჯამე უნდა ნახოს-თქო!

გლეხი სირბილით წავიდა ხოჯის დასაძახებლად.

შუადღის ლოცვით დაღლილი, ის-ის იყო შინ ახლად მისული ხოჯა ცოტახნის შემდეგ ჯამეს მიაღვა. ერთი ჩამომხმარი ბერიკაცი იყო, თვალები და ლოყები ჩაცვენოდა, ყბებს ძლივს, სასაცილოდ ამოძრავებდა. მას დიდის პატივისცემით მოიხადა ქუდი და კარა მემიშს მიესალმა: — კეთილი იყოს თქვენი მობრძანება კაიმაკამ-ბეი! ჯამეს დათვალიერება გნებავთ ალბათ.

— დიახ, ხოჯა-ეფენდი, თუ არ შეწუხდებით...

— როგორ გეკადრებათ, ბატონო, რა შეწუხებაა. მობრძანდით კაიმაკამ-ბეი!

— გმადლობთ, ხოჯა-ეფენდი!

ჯამეს კართან, პირველი მეღორე შეეჭეთი მივიდა და ბებერ ხოჯას უთხრა: — ხოჯა-ეფენდი, იჩქარეთ, ბატონ კაიმაკამს ბევრი საშური საქმე აქვს. უნდა წავიდეს. ჩვენსავით მოცლილი კი არ არის.

ხოჯამ თავი დაუქნია. ჯამეს კარების გაღებისას ხელები უკანკალებდა. — მობრძანდით, ბატონო, მობრძანდით!

ფეხზე გაიხადეს და ყველანი ჯამეში შელაგდნენ. ზოგ-ზოგნი ჩუმ-ჩუმად ქირქილებდნენ.

— ძალიან კარგია, ღმერთმა ხელი მოგიმართოთ! — თქვა კარა მემიშმა, როცა ჯამე დაათვალიერა, — როდის გააკეთეთ ასეთი ლამაზი ჯამე?

სოფელში ამოსული ყოველი საპატივცემულო სტუმარი პირველად ჯამეს დაათვალიერებდა და მყისვე ასეთ შეკითხვას დასვამდა.

ხოჯა ჩაფიქრდებოდა და მერე მიუგებდა: — ასე, ორმოცი წელი იქნება. კაისერედან მოვიყვანეთ ოსტატი. მემედილამ ააშენა... ახლა აბა ვინ გააკეთებს ასეთს? ქვეები სახედრებით მოვზიდეთ სოფელ კურნიდან. ოთხი დღის სავალია აქედან. ჯამეს შესაღებავად კი ჩინელი ოსტატები მოვიწვიეთ!

— ძალიან კარგი! — იტყოდა ხოლმე ესა თუ ის სტუმარი. — კარგი ოსტატები ყოფილან. წარწერები კარგი ნამუშევარია.. არა, უპ, რა ნამუშევარია, რა ხელობაა, სად არ მივლია, მაგრამ ასეთი ჯამე ჯერ არსად მინახავს.. წმინდა მუჰამე-



დის სახელიც რა ლამაზადაა წარწერილი... მოგილოცავთ, მართლად და ბედნიერად გელოცოთ.

ახლა ეს სიტყვები გაიმეორა კარა მემიშმაც და ხოჯას მიუბრუნდა: — ღმერთმა დიდხანს გაცოცხლოს, ბატონო! თქვენ სარწმუნოების დედაბოძი ხართ, ღმერთმა ნუ მოგაკლოთ ზრუნვა და ყურადღება!

კარა მემიში თითოეულ წარწერასთან ჩერდებოდა, აკვირდებოდა, კითხულობდა და, თან გულისყურით უსმენდა ხოჯის ჩიფჩიფსაც. ბოლოს, ხოჯა ჯამეს ერთ-ერთ კუთხეში გაიხმომო და ჰკითხა: — როგორაა საქმე, ხალხი გემსახურებათ?

— სადაა, ბატონო, ძველბეური პატვისცემა და სამსახური! — ნაღვლიანად უპასუხა ხოჯამ: — წინათ ასე როდი იყო. ვიღუპებით, ბატონო, ეს ხალხი ისეა ატეხილი, ღმერთი კარგს არაფერს გვიზამს. ჯამესთან რადიოს უკრავენ და კახპა ქალებს აკივლებენ. გადაგვარდა სოფელი, თუ თქვენ ჩააგონებთ რამეს, იქნება გამოსწორდეს საქმე!

— ვეტყვი ხოჯა-ეფენდი, ვეტყვი! საღმოსო სოფელში კრებას მოვიწვევ და ვეტყვი... ურწმუნოს სახეში მივაფურთხებ! თქვენაც უთხარით ზოგჯერ...

— არ მიჯერებენ, ბატონო!

— არ დაგიჯერებენ, ხოჯა-ეფენდი, მაგრამ მე რომ ვეტყვი და გავაფრთხილებ, დაგიჯერებენ კი არადა... სულ სირბილით მოვლენ, როცა შენს წკრიალა „ეზანს“ გაიგონებენ. ისე შეეჯივრებიან, რომ დღეში ბარე ხუთჯერ ილოცებენ. ყოველ შემთხვევისათვის, თუ მაინც არ მოვლენ, მაცნობე, ერთ დღეს შეჯექი სახეღარზე და მეწვიე... ახლა კი წავიდეთ, ყავა დავლიოთ და ცოტაც წავისაუბროთ.

— არა, ბატონო! ნება მომეცით წავიდე! ყურადღებისა და ზურუნვისათვის კი დიდ მადლობას მოგახსენებთ.

კარა მემიში ჯამეს კარებთან ერთხელ კიდევ მიუბრუნდა ხოჯას: — ერთხელ კიდევ მოგახსენებთ მადლობას, ხოჯა-ეფენდი! ძალიან მასიამოვნეთ. კარგი ჯამე გქონიათ!

ხოჯა საპატიო სტუმრის ქებით დიდად იყო გახარებული. — ბედნიერი მგზავრობა, ბატონო!

...კარა მემიშის კაიმაკამობა მუხტარის სახლში დამთავრდა. იქ მას არც ყავა დაუღვევია და არც საჭმელი მიუბრუნებია რამე. რაღა თქმა უნდა, არც ბატკანი დაუჭლავთ მისთვის. კარა მემიში ცოტა არ იყოს გაბრაზდა და მელორე შეეჭქეთს მთელი ყავახანის ბინადართა წინაშე შეაგინა. ბოლოს ცილინდრი მობინადა, ხალხს გამოეთხოვა და წავიდა.

ქვირფას ტანსაცმელში გამოწყობილი, გაძვალტყავებული და მზისგან გარუჯული, ძალზე სასაცილოდ გამოიყურებოდა.

მანქანამ რახრახით, გამაყრუებელი ხმაურითა და თუხ-
თუხით ძლივძლივობით აიარა სოფლის აღმართი და დამწვარი
ბენზინის მძაფრი სუნით ააქოთა იქაურობა.

მანქანის ხმაურსა და მოტორის ზუზუნზე შევეკრთი, თავი
ავწიე და გავხედე, რომც არ გამეხედა, ისედაც ცნობილი იყო,
თუ ვისი მანქანა ქოთქოთებდა ასე.

დედაჩემი სადილის სამზადისში იყო, ახალ ლობიოს არ-
ჩევდა და რალაცაზე ჩაფიქრებული ჯიუტად სდუმდა. ხმაურ-
ზე მანაც წამოსწია თავი, მანქანას გახედა, მერე მე მომიბრუნ-
და და მითხრა: — გახედე ერთი, მოვიდა შენი ძმაკაცი! — თავი
გაიქნია, მწარედ ჩაიციხა და ისევ საქმე განაგრძო.

„რატომ ჩემი ძმაკაცი?“ — გავიფიქრე მე. მასთან
არასდროს არაფერი მქონია საერთო. ხანდახან, თუ მასზე რაი-
მე ცუდს იტყოდნენ, ანდა მეზობლები დაცინვით გაკრავდნენ
ქბილს, გამოვექომაგებოდი. ეს იყო და ეს. საოცრად არ წყა-
ლობდა ბედი და მებრალებოდა. განა ამიტომ იყო ჩემი ძმაკა-
ცი?

მინდოდა რალაც მეთქვა, შეესიტყვებოდი, მაგრამ დამე-
ხარა, ხელი ჩავიქნე, გარეთ გავედი, აივნის დაბალ მოაჯირს
ხელისგულით დავეყრდენი და მოწყენილი, დაბინდული მზე-
რით გავხედე სოფელს... მანქანას ყოყინით აედევნენ სანახევ-
როდ ტიტველი, ფეხშიშველი, ტალახში ამოსვრილი, ჩამოძო-
ნძილ-ჩამოკონკილი ბავშვები. მანქანის გამონაბოლქვი, მტვე-
რი და მსუთავი გაზი ახრჩობდათ, ახველებდნენ, თვალები
ცრემლით ჰქონდათ სავსე, მაგრამ მაინც არ ებუებოდნენ. ამ
სოფელში მანქანა იშვიათი ხილი იყო და უკეთეს გასართობს
აბა რას ნახავდნენ.

ერთხანს მანქანასა და ბავშვებს გავცქეროდი. უსაქმურო-
ბისაგან მოწყენილსა და სულშეწუხებულს ვერ გადაამეწყვიტა
რა გამეკეთებინა, როგორ გამეყვანა დრო, სად წავსულიყავი,
ვინ მომენახულებინა. მერე უცებ გადავწყვიტე. კიბეზე და-
ვეშვი და ზანტად, ზოზინით გავემართე სელით გადახურულ,
ქოხისმაგვარ სოფლის ყავახანისაკენ, რომელიც ერთადერთი
თავშესაყარი და გასართობი ადგილი იყო ამ წყეულ სოფელ-
ში.

ძველ, დაფხავებულ „მაჰანს“ მოსახვევში მობრუნება
აუჭირდა და გამაყრუებლად ათუხთუხდა, მოტორი აზმუვლ-
და და ყურთასმენა წაიღო. ბავშვებმა თავი გამოიდეს, იქნება
ცოტა წავეხმაროთო და ერთსულოვნად, ერთუზიანით, ბავშ-
ვური ალტყინებით წაესივნენ, გაიჭაჭნენ, ოფლში გაიღვარ-



ნენ, მაგრამ ვირივით გაჯიუტებულ მანქანას ძვრაც ვერ უყვეს. მისი გალუულ-გაცვეთილი საბურავები ნელ-ნელა, თანდათან, სულ უფრო და უფრო ღრმად ეფლობოდა. პირდაპირ, შუა გზაზე მდგარ მუხლამდე ტლაპოში. მოტორი განწირულად ღმუოდა, ბავშვები ყვიროდნენ, ყიჟინებდნენ და ვერ მიხვდებოდნენ, ერთმანეთს ამხნევენდნენ თუ ოფლში გაღვარულ საცოდავ მძღოლს.

მწარედ გაღიმებულმა თვალი ავარიდევ გაწვალბულ მანქანასა და ბავშვებს და ნაბიჯს ავუჩქარე.

ყავახანასთან მივედი. გარეთ კაციშვილი არ ჭაჭანებდა. ჩამოფხავებული საბურავით, დახეთქილი, წვიმისაგან ჩამორეცხილი კედლებით იგი ჭაობში მდგარ ფრთამოტეხილ ყანჩას ჩამოგავდა როგორღაც. შიგნიდან ხმაური, ყაყანი მოისმოდა. ყავახანაში შევედი. ოფლისა და შმორის სუნი მეტაქა მაშინვე, თამბაქოს კვამლში ძლივს მოჩანდა ხალხი. რადიოში მეჭლისის თავმჯდომარისა და პრეშიერის სახელზე გაგზავნილი დებემის ტექსტს გადმოსცემდნენ. დიქტორს ლოთივით ჩახრინწული ხმა ჰქონდა და დროდადრო ასთმაშეყრილივით ხიხინებდა. ყავახანაში თავშეყრილ უსაქმურებს ჩვეული საქმიანობა — ნარდისა და დომინოს თამაში შეეწყვიტათ და გამოთაყვანებული, დასიცხული სიფათებით მისჩერებოდნენ მოლაპარაკე რკინის ყუთს.

მერე რადიოში ჩვენი რაიონის პარტიის ლიდერი გამოვიდა სიტყვით. როცა მან სიტყვა დაამთავრა, კუთხეში მჯდომმა, ზურგით კედელს მიყრდნობილმა, ჩათვლემილივით გალურსულმა, წვერმოშვებულმა, თავგაბურძენილმა და წვრილკისერა ბერძენ-ოღლიმ თავი ჩამოსწია და წვრილი, ქალური ხმით, მიძინებულ კატასავით დაიკნავლა: — რაც იქნება, ერთი წერილი მეც უნდა გავაშანშალო, იქნება ჩემი სახელი და გვარიც ახსენონ რადიოში.

მის წათქვანზე ზოგმა ჩაიცინა, ზოგმა ჩაახველა, ზოგმაც დამცინავად გადახედა მას. როგორც იქნა ადგილი გათავისუფლდა. დაჯექი და ყავახანის პატრონს — ჩავოდრებულ ოსმანს ვთხოვე, ჩი მომიტანე-მეთქი.

მან თავი დამიქნია, ჩი მომიტანა და უსიტყვოდ გაბრუნდა.

რადიო ახრიალდა, მერე სულ ჩაუწყდა ხმა. ყავახანაში წამიერმა მყუდროებამ დაისადგურა. მერე ისევ ატყდა ყაყანი. ნაღდი დომხალი იყო, ვინ რას ამბობდა, ვერ მიხვდებოდნენ. ვინ საერთო ჩამორჩენილობაზე, გაუნათლებლობაზე და სოფლის მეურნეობაზე მსჯელობდა. ზოგიც სიძვირესა და პროდუქტების ნაკლებობაზე, მერე კორეაში გაგზავნილ ჯარისკაცებზე ჩამოვარდა საუბარი. მოკამათეები ლამის შეასკდნენ ერთმა-



ნეთს, მაგრამ მაინც ვერაფრით შეთანხმდნენ ერთ ამბავში იყო თუ არა მთავრობის გადაწყვეტილება სწორი.

— ჩვენ ისიც კი არ ვიცით, თუ სად მდებარეობს კორეია! — ყვიროდა ერთი, თავმოტყლეპილი, გამოქეჩილი მოკამათე, — ანდა ჩვენი პრემიერი, ჯარს რომ აგზავნიდა კორეიაში, საინტერესოა, რას ფიქრობდა? თუ უნახავს მას ოდესმე თუნდაც ერთი კორეელიც კი?

მას სხვები არ დაეთანხმნენ, ატყდა ისევ ყაყანი, მაგიდაზე მუშტების ცემა, ყვირილი, გინება და მიწევ-მოწევა. ცინ ვისზე მიიწევდა, ვინ ვის უკურობებდა, უკვე ვეღარ გაარჩევდა კაცი. ბოლოს და ბოლოს, მათი ყაყანიდან ის აზრი გამოვიტანე, რომ ყავახანაში თავმოყრილ უსაქმურთა უმეტესობას კორეიაში ჯარის გაგზავნა პრემიერის ძეცდარ ნაბიჯად მი-აჩნდათ.

მათი ყაყანით დაღლილმა და თავასივებულმა სოფლის გზას ვავხედე. ტლაპოში ჩაფლული „შაჰანი“ ისევ საცოდავად ქოთქოთებდა და ვერაფრით ვერ დაეღწია თავი-ტლაპოდან. მოყიფინე ბავშვები ისე უტრიალებდნენ გარს, როგორც მკვდარ სახედარს.

ამ მანქანის პატრონი, კალენდერ ისმაილი ერთი ბედოვ-ლათი ტიპი იყო. სანამ მანქანას შეიძინდა, იყო თავისთვის, ცხოვრობდა ისე, როგორც სხვები, მაგრამ ერთხელ საოცარი აზრი მოუვიდა თავში. დაიჭინა, მანქანა უნდა ვიყიდოო. რომ დაიჩემა, ვერაფრით გადაათქმევინეს. მან მსხვილფეხა რქოსა-ნი საქონელი, სახედარი და ყანა გაყიდა, კისრამდე ვალებში ჩაეფლო და ეს ჯართი შეიძინა. მანქანის ღირებულების ნახევარი ხელზე გადაიხადა, დარჩენილი ნახევარი კი ნელ-ნელა უნდა ეხადა და განსაზღვრულ დროში დაეფარა. ეს განვაღებ-ბა მაინც ვერაფერი შეღავათი აღმოჩნდა კალენდერ ისმაილი-სათვის — დრო თვალსა და ხელს შუა გარბოდა, და მას კი ფული არ ჰქონდა.

მანქანა პირველად რომ შემოიყვანეს სოფელში, ახალშე-ლებილი იყო. ახალივით პრიალებდა და სიძველე სრულებით არ ეტყობოდა. ჩვენი თანასოფლელი მეჭირ-ოლლი, რომელსაც მანქანის ტარება ჯარში ყოფნისას ესწავლა, საჭეს მიუჯდა, მა-ნქანა ააშუშავა და სოფლელების თვალწინ, მათდა გასაკვი-რად, სადაც მას სურდა იქ მოაბრუნა, იქ მიიყვანა, მიუხვ-მოუხვია და გაჩერდა. მერე საყვირს მიდგა და იმდენი აყვირა, ხალხს თავი მოაბეზრა.

მახსოვს, როცა მანქანის შესაძენად კალენდერ ისმაილ-მაც საყანე მიწის ნაკვეთის გაყიდვა დააპირა, ცოლმა, — ჯე-რიემ სასტიკი წინააღმდეგობა გაუწია, ქვა ააგდო და თავი შე-

უმვირა, საწყალ კალენდერს სულ გიჟი და გამოტვინებული ხარო, უძახხა.

მაგრამ ახლა, როცა კალენდერის ცოლი შოფრის გვერდით ქალბატონივით გამოიჭიმა კაბინაში და გაისეირნ-გამოისეირნა კიდეც, იფიქრა, მანქანა მართლაც კარგი რამე ყოფილაო და ქმარს მიწის გაყიდვაზე დასთანხმდა.

მერე კი ჯეგრიემ, აქაოდა, ჩემს მანქანას ავი თვალი არ ეცესო, კაბინა გათვალვის საწინააღმდეგო მძივებით, ნუსხებითა და არაბული წარწერებით მორთო. მაგალითად ერთი არაბული წარწერა ლაღადებდა: — „მაღალო ღმერთო, მშვიდობიანი გზა მიეცე „შაჰანს“!

უსაქმურმა მეჯირ-ოღლიმ, ეტყობა თავის შესაფერის საქმეს შიაგნო, კალენდერი დაითანხმა და მიუჯდა მანქანის საჭეს. პირველ ხანებში მანქანა შორეულ რეისებშიც დადიოდა. იზმირსა და აიღინში გადაჰქონდა სხვადასხვა ტვირთი, გადაჰყავდა მგზავრები, ხანდახან თვე ისე გავიდოდა, ერთხელაც არ იზამდა სოფლისაკენ პირს. როგორც ამბობენ, კალენდერ ისმაილისათვის „შაჰანს“ ზარალის მეტი არაფერი მოუტანია. მანქანა ორთქმის ყოველ სამ დღეში შესაგეთებელი იყო, ხან რა გაუფუჭდებოდა და ხან რა. ნაწილები არ იშოვებოდა, ოსტატი მამასისხლად აფასებდა თავის შრომას. ასე რომ, ყიდვიდან რამდენიმე თვის შემდეგ უკვე „შაჰანის“ შეკეთებაზე უფრო მეტი თანხა დაეხარჯა კალენდერ ისმაილს, ვიდრე მანქანა ღირდა საერთოდ. მანქანა ავარიებსაც გვარიანად ახდენდა. ერთხელ იზმირის ერთ-ერთ ქუჩაზე მეჯირ-ოღლიმ მაღაზია შეანგრია, მეორედ, გზაზე სახედარს დაეჯახა და სული გააფრთხობინა, მესამედ ერთდროულად სამ ცხვარს ამოხადა სული. საცოდავი კალენდერ ისმაილი იხდიდა და იხდიდა ჯარიმებს. ასე რომ, კაციშვილი ვერ მიხვდებოდა, თავად „შაჰანი“ იყო ასეთი ავბედითი მანქანა, თუ ამაში მეჯირ-ოღლის მიუძღვოდა ბრალი.

— მაგის მძღოლობა ვინ თქვა! — დასცინოდნენ მეჯირ-ოღლის ყავახანაში თავშეყრილი სხვისი გაკილვის მოყვარულები, — შტერია, ნამდვილი შტერი!

კალენდერ ისმაილი კი იხდიდა და იხდიდა ჯარიმებს; ერთხელ მანქანამ გზიდან გადაუხვია და ჯარიმა, მერე, მანქანაზე ზედმეტი ტვირთი დაუდეს და... ჯარიმა! მესამედ, მგზავრები გადაიყვანა და... ისევ ჯარიმა.

კალენდერ ისმაილი გაოცებული იყო. ვერასდიდებით ვერ მიხვდარიყო, თუ რატომ, რისთვის იხდიდა ამდენ ჯარიმებს: — ეს მანქანა ხომ ჩემია, ჩემი საკუთრება! ჰოდა, როგორც



მინდა. ისე გამოვიყენებ და მოვიხმარ. ტვირთს რამდენად მინდა
 და იმდენს დავუდებ, სადაც მინდა იქ წავიყვან, გინდა მარჯ-
 ვნივ მოვუხვევ და გინდაც მარცხნივ, ჩემი ნება არაა? ამ
 ავტონისპიქციას ვერაფერი გავუგე. რა შარიანი ხალხია, მექრ-
 თამეები! სულ ხელებში შემოგყურებენ, რას მოგვცემსო!..
 არა, არავის არ უნდა, მე რომ მოგება ვნახო, ფული დავაგრო-
 ვო! — სინანულით აქნევდა თავს კალენდერ ისმაილი.

როცა დარდი შემოაწვებოდა გულზე კალენდერ ისმაილს,
 ცდილობდა არაფერზე ეფიქრა, ყველაფერზე ჩაეჭნია ხელი და
 თავდავიწყებას მისცემოდა. ჰოდა, დაკრავდა ფეხს და ქალაქ
 დენიხლიში მიდიოდა. იქ, რესტორან „ილდიზში“ ეგულე-
 ბოდა კალენდერს თავდავიწყების წამალი. კარგი მუსიკა, არა-
 ყი და სანახევროდ შიშველი მოცეკვავე ქალები!.. მოიკალათე-
 ბდა კალენდერი რესტორანში, წრუპავდა არაყს და მოჭუტუ-
 ლი თვალებით შესცქეროდა მომხიბვლელ ქალებს, რომელთაც
 გამჭვირვალე კაბები ეცვათ... და ყველაფერი ავიწყდებოდა ამ
 ქვეყანაზე — ვალებიც, ჯარიმებიც და დაფხავებული „შაჰა-
 ნიც!“

ბოლო დროს დარდით შეპყრობილ კალენდერს სულ ეშ-
 მაკი შეუძვრა სულში, თავის „შაჰანივით“ მოიშალა.

ერთხელ, მახსოვს, ეს დაახლოებით ამ ორი თვის წინათ
 იყო, შეზარხოშებული და თვალებამღვრეული კალენდერ
 ისმაილი სოფლის ყავახანაში შემობანცალდა, ერთი მუჰა
 მარილი, სამი თუ ოთხი ცალი კიტრი და პამიდორი შემოიტა-
 ნა. ჯიბეებში ორი ნახევარლიტრიანი არაყი ედო. კალენდერ-
 მა ყავახანაში მსხდომთ ამღვრეული მზერა ესროლა, თავი და-
 უქნია, მიბანცალდა კუთხეში, ჩამოჯდა თავისუფალ მაგიდას-
 თან, ჯიბიდან ბოთლები ამოიღო, პამიდორი გახლიჩა, მარილ-
 ში ამოაწო, პირში ჩაიტენა, მერე ბოთლი გახსნა, პირზე მოი-
 ყუდა და ყურყურით დალია.

ყავახანის პატრონმა ერთხანს ითმინა, ითმინა, მერე კი
 ველარ მოითმინა და გასძახა: — ეი შენ, ჩვენი ძმა! ეს ჩვენი
 ყავახანა რესტორანი „ილდიზი“ ხომ არ გგონია შენ? წესიე-
 რად მოიქეცი ცოტა!.. მუსლიმანი კაცი ხარ და...

კალენდერ ისმაილმა ამღვრეული, გამოთაყვანებული
 თვალები მიაპყრო ყავახანის გაბერილ პატრონს, წადა, შენი დე-
 დედაცო, შეაგინა წყნარად, შეაქცია ზურგი და სმა განაგრძო.

ყავახანის პატრონმა ბრაზი გულში ჩაიკლა და გაჩუმდა.
 სამაგიეროდ სხვებმა შენიშნეს: — წყალი მაინც მიუტანეთ მაგ
 ცალტვინას, რაც არ უნდა იყოს, მუსლიმანია მაინც. ცოდვას,
 გულღვიძლს დასწავს არაყი.

ვიღაცამ სურით მოიტანა წყალი. კალენდერ ისმაილმა ახლა სურა მოიყუდა, არაყს წყალი დააყოლა, სველი, დადობილი ტუჩები მოიწმინდა და მოულოდნელად ამეტყველდა: — მე ვარ დაწყევლილი! უსამართლო ქვეყნის, ამ დამპალი და აშმორებული სოფლის დედა ვატირე!.. იმ მაღალი მთების მე... იცით თქვენ მე ვინა ვარ?.. არ იცით.. მე იმ მაღალი მთების დედა ვატირე! — რას როშავდა, უკვე მანაც არ იცოდა, თან თვალებს გიჟივით აბრიალებდა, გაბრაზებულ ბულასავით ბოდვინავდა, მომჯილულ ხელს იქნევდა, ჩავარდნილი მკედი წინ გადმოეგდო და გაჯგიმული, თითქოსდა კრებაზე ხალხის წინ მოხსენებით გამოდისო, ისე გაჰყვიროდა მთელი ხმით! — ამისთანა დამპალი ქვეყანა არ მინახია მე! ერთი ხელოსანი რომ ზელოსანია, იმასაც ვერ ნახავ... მანქანის ოსტატი ხომ... მანქანის მოტორი ვერ შემიკეთებია!.. ხომ ხედავთ, ჩვენს ქვეყანაში ერთი მკოდნე კაციც კი არაა, თუ ვინმეს რამე გაეგება, მანქანას ერთს გადახედავს და იტყვის — შენი მოტორი არ ვარგაო! მიდგება მერე, დაშლის, რაღაც ნაწილს თავს წაუქლიბავს, ისევ დააყენებს... მაგრამ ვაი, ასეთ შეკეთებას, ორ ნაბიჯს გაივლი და ფაფუ! გაფუჭდება მაშინვე!.. რამდენი მუშტარი, რამდენი ფული დაგკარგე მაგის გამო!.. მე იმ ფინაჩი ოსტატების დედა ვატირე! მე იმ მაღალი მთების დედა ვატირე!.. არც ერთმა არაფერი არ იცის... ყველაზე დიდი უბედურება რა არის იცით, თქვენ? არ იცით... ვერც გაიგებთ... მიდინხარ საღლაც, მთებში, დაკლავილი გზაა, ოღრო-ჩოღრო, უბედურის ერთი... ამ დროს გაფუჭდება მანქანა და რჩები შუა გზაზე, კაციშვილი არ ჰაჭანებს არსად, ტურის კივილის მეტი არაფერი არ ისმის... რა უნდა ქნა? ეცემი აქეთ-იქით, თუ ტაქს იშოვი, წახვიდე უნდა ქალაქში, ეძებო უნდა ოსტატი და დიდი ხვეწნის მერე წამოგყვეს იქნებ... წამოგყვება, ერთს შეხედ-შემოხედავს მანქანას, კაპოტს ახდის, ჩახედავს მოტორში და დიდი გამოცდილივით გეტყვის — მანქანა ცუდად შეგიკეთებიაო, მერე თავს შეიფხანს და ისეთ ნაწილს დაგისახელებს, უნდა იშოვრო, ჩვენს ქვეყანაში ჯერ კაციშვილს რომ არ გაუგონია და, რა თქმა უნდა, ჰიზზედაც რომ გასკდე, ვერსად იშოვი!.. არა, არ გეყავს ჩვენ ოსტატები! — მეორე ბოთლი გახსნა, მოსგა და განაგრძო: — წადით ერთი დიდ ქალაქებში და ნახეთ გარაყები. სანაგვეები სულ ასეთი შეკეთებული მანქანებითაა სავსე... ხან მძღოლები აფუჭებენ მანქანებს, ხანაც მისი შემკეთებლები! დენიზლიში ერთ კაცს მოველაპარაკე, „მაჰანი“ უნდა გავყიდო და იმ ფულით მანქანის შესაკეთებელი სახელოსნო გავხსნა ქალაქის შესასვლელში. ხომ იცით, დიდი ჭადარი რომაა, სწორედ იქა! რაო, იმ ფინაჩი ოსტატების ოდენს ვერ შევძლებ ვითომ? მაგაზე აღვილი რა-



ლაა? რასაც სხვები უფუჭებენ, იმაზე მეტს არც მე გავუჭუჭუჭებ მანქანას... ამას წინათ ერთი საბარგო მანქანა ამოვიღებ მეზობელ სოფლიდან. ისე საშინლად რახრახებდა, მაშინვე მივხვდი რაც სჭირდა და მძლოლს ვუთხარი: — „ჩემო მუსლიმანო ძმაო! კარბურატორში ბენზინი კარგად არ გადის!“ გაშტერებული მომაჩერდა, როგორ მიხვდიო, გაუკვირდა, მაგაზე მეტი რა ვიცი-მეთქი, მოვაწონე თავი. მერე იმ მძლოლმა მანქანა ერთ გამოცდილ ოსტატს აჩვენა... მე მართალი აღმოვიჩინდი... გესმით თქვენ? გენიოსის თავი მაქვს, ნამდვილი გენიოსის თავი!.. მე იმ მაღალი მთების... თქვენ გაგიმარჯოთ! — ბოთლი მოიყუდა და არაყს დაეწაფა.

თვალეებში ვეღარ იხედებოდა, ისეთი მთვრალი იყო. რას ლაპარაკობდა, რას როშავდა, კაციშვილი ვერ მიხვდებოდა უკვე. ბოლოს მაგიდაზე ჩაეძინა და ისეთი ხვრინვა ამოუშვა, ყავახანის მოლაყბეთა ყაყანიც კი ჩაახშო.

ხელი ჩავკიდეთ, ავაყენეთ და როგორც იქნა სახლში მივიყვანეთ... იმ მანქანის ჯავრმა გამოათაყვანა საცოდავი..

მანქანის ფულის გადახდის დროც დადგა, საწყალ კალენდერ ისმაილს კი კაპიკი არ გააჩნდა. აქეთ ეცა, იქით ეცა და მეტი ვერაფერი რომ ვერ მოახერხა, იძულებული გახდა სახლის წინ მდებარე მიწის ნაკვეთი გაეყიდა. მიწაში აღებული ფულით ვალი გაისტუმრა და ერთი ცალი საბურავიც შეიძინა.

უკუღმა დაწყებული საქმე უკუღმა წაუვიდა ისმაილს. ერთხელ სოფლისაკენ მიმავალი „შაჰანი“ ფაშის ნავენახართან ქალაქიდან მომავალი ოლქის მმართველის მანქანას დაეგახა. საჭესთან მჯდომი მეჯირ-ოლლი ციხეში ჩააყუდეს, კალენდერ ისმაილს კი ზარალის ანაზღაურება და ჯარიმა დააკისრეს.

ეს შემთხვევა პირველი როდი იყო მეჯირ-ოლლის ცხოვრებაში. მას შემდეგ, რაც იგი „შაჰანის“ საჭეს მიუჯდა, სხვადასხვა ფათერაკების გამო ხშირად იჯდა ციხეში, მაგრამ იქ დიდხანს როდი რჩებოდა. კალენდერ ისმაილის მეუღლე — ჯევრიე შველოდა ყოველთვის. მივიდოდა ჯევრიე ოლქის პროკურორთან, რაღაცას დაუთმობდა, რაღაცას შეპირდებოდა და მეჯირ-ოლლი ისევ „შაჰანის“ საჭეს მიუჯდებოდა.

ბოლოს და ბოლოს ჯევრიესაც ყელში ამოუვიდა მეჯირ-ოლლის ვაუთავებელი ფათერაკები და მის ციხიდან დახსნაზე ერთხელ და სამუდამოდ ჩაიქნია ხელი: — აწი თავში ქვა უხლია და მუცელში სამართებელი მაგ შტერს!.. მაგის გამო პროკურორთან წაწვალში ძვალ-ტყავად ვიქეცი მთვარესავით ქალი! იჯდეს ახლა ციხეში და გამოცადოს ერთი, როგორია პროკურორთან და მოსამართლესთან რომ დაგირჩება საქმე!

ერთხელ მეჯირ-ოლლიმ ყველაზე დიდი ცოდვა ჩაიდინა — ბიჭი შემოაკვდა, მაგრამ მაშინ იგი ჯევრიეს წყალობით გაამა-

როლეს და ციხეს გადაურჩა, თუმცა, კაცმა რომ თქვას, მისი ბრალი არ იყო. ბიჭი ძარაზე ეჯდა, გზაზე ქარმა ქული გადაუგდო. თავიდან. ბიჭს ერთადერთი ქული დაენანა, მანქანადან გადახტა, ქვაზე დაარტყა თავი და იქვე დალია სული.

როცა მეჯირ-ოლლი ციხეში იჯდა, მანქანას კალენდერ ისმაილი მართავდა. ისმაილი მანქანასთან ტრიალის მეტს არაფერს აკეთებდა. მობტორს თითქმის ყოველდღე შლიდა, წმენდდა, აწყობდა, როგორც კი მანქანა ამუშავდებოდა, სოფლის ბავშვები სანაგვეზე მისეული ბუხებივით შემოეხვეოდნენ გარს და იყვნენ ერთ ამბავში.

ბოლო ხანებში „შაჰანს“ სულ უკუღმა წაუვიდა საქმე. სულ მოიშალა და დაფხავდა. შორეულ რეისებში უკვე აღარ დადიოდა. კალენდერ ისმაილმა ისე ჩაიქანა მასზე ხელი, როგორც უიმედო ავადმყოფზე. ერთხელ მუშტარი მიადგა თხოვნით — სასწრაფოდ ხორბალი მაქვს გადასაზიდი ქალაქში და უნდა მიშველოო. კალენდერ ისმაილს ფულის გაკეთება როგორ არ უნდოდა, მაგრამ, იცოდა რა თავისი ჯაბახანას ამბავი, მთხოვნელი უარით გაისტუმრა: — მაგას ტვირთს როგორ დავუდებ, ისედაც დავარდნილი ვირივით დაფავს სულს!.. ხეირი მაინც ვერაფერი ვნახე მაგ ქირით, უმჯობესია ისევ ჩემს თავს ვემსახურო!

ერთხელ ისევ გაუჩერდა ოჩან ვირივით შუა გზაზე „შაჰანი“ კალენდერ ისმაილს.

ვილაც გულშემჭირნემ ასწავლა: — ვერ ხედავ, მაგ შენი მანქანა რომ გათვალულია? ხოჯა მოიყვანე, შეალოცინე, ნუსხა დააწერიან და ამუშავდებო.

კალენდერ ისმაილს ნერვები აეშალა, ცოფიანი ძაღლივით დაკრიჭა კბილები და დედ-მამის სული, მკვდარი და ცოცხალი არ დაუტოვა ხოჯას და მოლას, მოჰყვა მერე და თუ სადმე კაბინაში მძივები და არაბულად დაწერილი ნუსხები ნახა, ყველა გადაყარა, მერე მთვარის დამნახავ მშიერ მგელივით ააღირა თავი და ცას ბოღმიანად მიაფურთხა.

ერთ დღეს ჩემმა ბიძაშვილმა ურიკით, რომელშიაც ბერეკა, ძვალტყავა ცხენი იყო შებმული, ვილაცას ტვირთი გადაუტანა ქალაქში და ქირა აიღო, კალენდერმა ოცი ლირა ამოიღო ჯიბიდან და ჩემს ბიძაშვილს შეეხვეწა, უკან რომ ამობრუნდები, ამით ორი ფუთი ბენზინი ამოიტანეო.

ჩემი ბიძაშვილი გაბრაზდა და უარი სტკიცა: — ერთხელ რომ მანქანაზე არ დამსვი, რომ გამაწბილე, ახლა მაგას როგორ მთხოვ, შენი მოსამსახურე ხომ არ გგონივარო. ისევ მე ჩავერიე და როგორც იყო ბიძაშვილი დავითანხმე.

ორი დღის შემდეგ ბიძაშვილმა ბენზინი ამოუტანა. ვახარებული კალენდერ ისმაილი ლამის არ გადაეხვია ჩემს ბიძა-



შვილს და უთხრა: — რაკი ასეთი პატივი დამდე, აწი მე გვიცოდე და ჩემმა მანქანამ, თუ სადმე წასვლა დაგჭირდება, აგერ მე და აგერ ჩემი „შაჰანი“.

...ყავახანიდან გამოვედი. მზე ჩადიოდა. სოფლის გზაზე ზოზინით მიდიოდა საძოვრიდან დაბრუნებული ნახირი... ნახირს უკან, ბავშვების დახმარებით „შაჰანს“ სახლისაკენ მიავგორებდა ოფლში გაღვრილი კალენდერ ისმაილი. მოტორი სდუმდა და უკვე აღარ ხრიალებდა.

ერთმანეთზე მიჯრილ მიწური სახლების წინ მდგარი ქალები დასევდიანებულიები გასცქეროდნენ „შაჰანს“ და დროდადრო ვიშვიშით ამბობდნენ:

— დაატლექებს საცოდავ ისმაილს მაგაზე დარდი, დაატლექებს! საცოდავი ისმაილი, საცოდავი „შაჰანი“.

ხოზიკიანი ყანა

შუადღის პაპანაქება იყო. თაკარა მზე ისე გვაცხუნებდა თავზე, თითქოსდა ჯოჯოხეთში ვიმყოფებოდით და ღმერთი ჩვენს მიერ ცხოვრებაში ჩადენილი სხვადასხვა ცოდვებისათვის უმოწყალოდ გვსჯიდა. ერთიანად ოფლში ვიყავით გაღვარულნი, ჩვენ სისხლიან ყანაში ვიმყოფებოდით და პურის მოსავალს ვიღებდით.

ჩვენი მიწა უვარგისი იყო, მწირი, უწყლო, გვალვიანი და გამოფიტული. ასე იყო თუ ისე, ვარგისი მიწა ცოტა იყო, ლამის ერთი მტკაველი, დანარჩენი კი კირქვიანი, გამოუსადეგარი... ასეთი მიწა ნათესს არ ახარებს, წვავს და ყოველგვარ კარგ მოსავალზე ლაპარაკი ამაოა.

ჩვენი პურის ყანა ერთიანად ეკლიანი ხოზიკით იყო დაფარული. ერთ მესამედზე სამი მესამედი ხოზიკას ეჭირა. გამოფიტულ მიწაზე პური ძლივს ხარობდა, სულ რაღაც ორიოდ მტკაველს თუ აღწევდა სიმაღლეში. სარეველა ბალახებს შორის ხოზიკა ყველაზე უფრო საშინელი. იგი მძლავრად, ღრმად იკიდებს ფესვებს მიწაში, მთელი საზრდო მას მიაქვს და საშუალებას არ აძლევს პურს ნორმალურად გაიზარდოს. ნაკვეთის გაწმენდა ხოზიკისაგან, შეიძლება ითქვას, შეუძლებელი საქმეა.

პური რომ მოგემკო, ჯერ ხოზიკისაგან უნდა დაგეხსნა თავი. ხელები გასისხლიანებული და ეკლისაგან დაჩხვლექილი გვქონდა, საშინელი სამუშაო იყო თაკარა მზეში, ტანსაცმელი სულ დაგვისველდა ოფლისაგან და ტანზე მოგვეკრო. სუნთქვა

გვიჭირდა. მუხლები გვიკანკალებდა და წაქცევას აღარაფერი გვაკლდა.

— ღმერთო, ო, ღმერთო! — წუწუნებდა დროდადრო სიცხისაგან გათანგული დედა. — მოგეკალი ბარემ, დალოცვილო, და ის იქნებოდა. რაღას გვათრევ, გვაწვალე და გვაჩალიჩებ ასე? შენ ხომ ყოვლისშემძლე ხარ და რა იქნებოდა ერთხელ მაინც გადმოგეხედა ჩვენთვის მოწყალე თვალებით?

დედაჩემის ხასიათი ვიცოდი, როგორც კი დაიღლებოდა და არაქათი გამოეცლებოდა, მაშინვე აწუწუნდებოდა... ახლა მაინც ძალიან გატანჯული და გამოფიტული გამოიყურებოდა. კოჭებამდე ჩაშვებული, სხვადასხვა ფერის ნაჭრებით აჭრელებული, რეცხვისაგან გამოზუნებული კაბა ერთიანად ხოზიკას დაეფარა, ფეხშიშველი იყო. ფეხები და გრძელი, შრომისაგან დაძარღვული ხელები გასისხლიანებოდა. ისეთი სუსტი, საცოდავი და გასაავათებელი გამოიყურებოდა, მის შემხედვარეს ლამის იყო ტირილი დამეწყო.

— მთლიანად დავიფარეთ ამ საძაგელი ხოზიკით! — ბუზლუნებდა ჩემი ძმა რამაზანიც და დროდადრო გავარვარებული სახიდან ოფლს იწმენდდა, — ისე ვართ ამ ხოზიკით გარშემორტყმული, რომ დაიჩოქო და ილოცო, იმისი ადგილიც კი არ არის.

მისი გაუთავებელი ბუზლუნით თავმობეზრებული, ვერ ვიკავებ თავს და გაბრაზებული ვეუბნები: — საფიქრალ-სადარდებელი არაფერი დაგრჩა? ყველაფერი მოითავე და ახლა მარტო ლოცვები დაგრჩა საფიქრალი, რამაზან?

ჩემს სიტყვებზე ჩვენი უმცროსი ძმა ველი სიცილს ვერ იკავებს. წელში იხრება, მუცელზე იჭერს ხელებს, ხარხარებს და გესლიანი სიტყვებით დასცინის რამაზანს:

— საჭმელ-სასმელი, ჩასაცმელ-დასახურავი როგორ ვიშოვოთო, იმაზე კი არ ფიქრობს და წუწუნებს ვაჟბატონი, არამედ სულ ლოცვებზე ფიქრობს და ამაზე ფიქრით იცხელებს ისედაც გახურებულ თავს. რას იზამ, მორწმუნე ბიჭია, ჩვენი წინაპრების ანდერძს ასრულებს. რაც მათ დაიბარეს — ილოცეთო, ღმერთი იწამეთო, ღმერთს შესთხოვეთო შველა, იმას აკეთებს.

მისი სიცილი და ნათქვამი, ნერვებზე შლის რამაზანს და აწყება მერე გაუთავებელი კამათი და შენლა-შემოხლა მათ შორის. ცოტა ხნის მერე კამათი ჩხუბში გადადის, ისე არიან შემართულნი, თუ არ ჩაერიე, დაერევიან ერთმანეთს. სიბრაზისაგან აცახცახებული ველი ქვას იღებს ხელში, რამაზანიც ქვით იარაღდება, დაუნდობლად აკრაჭუნებენ კბილებს და ერთმანეთზე მიიწევენ. მათ შორის ვდგები, ვცდილობ დავაწყნარო ისინი, სინდის-ნამუსში ჩავაგდო.

— შენ ველიზე დიდი ხარ, რამაზან, მასზე უფროსი ხარ და უფრო მეტი ჭკუა მოგეთხოვება. შეგეკამათა, არა? შეეკამათე, სიტყვებით აჯობე და დაამარცხე, ცემა რა საკადრისია?

რამაზანმა დამიჯერა, ქვა შორს გადაისროლა და თავისებურად აჯუჯღღურდა: — რატომ არ უნდა ვიფიქრო ლოცვებზე? ვალდებული ვართ და უნდა ვილოცოთ კიდევ, დღე და ღამე უნდა ვილოცოთ, რომ ღმერთის წინაშე ჩვენი ვალი მოვიხადოთ! მითხარი ერთი, რატომ არ უნდა ვიფიქრო ღმერთზე? თქვენსავით კი არა ვარ აბა!

ველიმ ავდებულად ჩაიქნია ხელი და დამცინავად ჩაიცივნა: — ის შენი ღმერთი რომ ჩვენზე არასდროს არ ფიქრობს, ჩვენ რატომ უნდა ვიფიქროთ მასზე? რატომ უნდა გავიცხელოთ თავი ასეთ სისულელეებზე?

— სისულელეებს მოგცემ შენ! — თვალები დაუბრიალა რამაზანმა, — რა იცი შენ, რომ არ ფიქრობს?

— კი, კი, ჩვენზე ფიქრში აღამებს და ათენებს ეგ შენი ღმერთი! — გაეცინა ველის, — ჩვენზე რომ ეფიქრა, ცოტა შეღავათს მაინც მოგვცემდა, ასე საცოდავები, საწყლები და ღარიბები აღარ ვიქნებოდით!


— ღმერთს ნუ სცოდავ, შე ვირო! — დაუყვირა რამაზანმა, — ნუ სცოდავ-მეთქი, ღმერთს! იცი შენ რამდენი ადამიანი ცხოვრობს ამ დედამიწის ზურგზე? უამრავი! ჰოდა, იცი შენ რამდენია იმათში ჩვენზე უფრო გაჭირვებული?.. შენ რა, ადვილი გგონია ღმერთობა? შეიძლება იმათზე, ჩვენზე უფრო გაჭირვებულებზე ფიქრობს ღმერთი და ჩვენთვის ვეღარ მოიცილა, ერთხელ იქნება ჩვენზედაც მოიცილის და...

— კი, კი! უცადე შენ როდის მოიცილის! რომ ამბობ, ჩვენზე უფრო გაჭირვებულებს გადახედა და ჩვენთვის ვერ მოიცილაო, თუ ისინი გაჭირვებულები დარჩნენ ისევ, აღარაფერი შეძლებია მაგ შენს ღმერთს და ისაა...

— ენა ჩაიგდე! შენ ნამეტარი ბევრი იცი, აი!.. გამოჩნდა ჭკუის კოლოფი!

მაგრამ ველის გაჩერება ადვილი აღარ იყო. მომართული პატეფონით განაგრძობდა: — ღმერთი რომ ღარიბებზე და გაჭირვებულებზე ფიქრობდეს, ამ შენს ყანაში ამდენ ეკლიან ხოზიკას არ გააჩენდა, ამდენს არ გაგვაწვალებდა. ჩვენ მისი დახმარების იმედით ვერ ვიქნებით, მოხმარების მაგიერ ხელს გვიშლის შენი ღმერთი!

მორწმუნე რამაზანი ღმერთის აუგად ხსენებაზე წუნწუბასავით ენთება, ქვას ხელს ავლებს და ველისაკენ მიიწევს. იწყება ისევ დავიდარაბა.



იძულებული ვხვდები ისევ ჩავერიო, ისევ დავაწყნარებო
 რამაზანი: — გაჩერდი რამაზან, ყურს ნუ უგდებ მაგის ლაშქარს.
 რაქს. ის ხომ სულ ბავშვია ჯერ და რას ამბობს, მანაც არ იცის!

რამაზანი ამჯერადაც მიჯერის, აგდებს ქვას და გაბრაზებული ბურტყუნით უბრუნდება საქმეს.

ვენუშაობთ. რამაზანი დროდადრო წელში იმართება და წუწუნით ამბობს:— ვაი წელი, წელი, მომწყდა წელი და ეგაა!

— მე შენზე უფრო მიჭირს და მტკივა წელი, მაგრამ შენსავით არ ვწუწუნებ, — ამბობს ველი, — ეს სოფელი საშინელია, აუტანელია აქ მუშაობა, ჩვენი საქმე უკუღმაა წასული. ეს ოხერი ღმერთიც სულ ჩვენ გვიდგას კრიჭაში.

აქამდე გაჩუმებული, საქმით გართული დედა წამით ჩერდება, წელში სწორდება და გაბრაზებული უყვირის ველის: — ღმერთს ნუ სცოდავ, შე სასიკვდილევ! გაჩუმდი, ისედაც განრისხებულია ღმერთი ჩვენზე, ძველებური ხერი ალარა გვაქვს.

— ეს იმიტომ, რომ ღმერთი გადაკიდებულია ჩვენზე, — აკვიატებული სიჯიუტით ამბობს ველი, — თავს იქნევს, ჩემთან მოდის და განაგრძობს: — ჩვენ ახლა ცელი უნდა გვეჭიროს ხელში და როგორც სხვები, შეძლებული სოფლელები მკიან, ისე უნდა ვმკიდეთ... ჩვენ კი... ასე, ნამგლით, თითო-ორიოდ, თავთავის რჩევა-რჩევით, როდის მოვრჩებით საქმეს?

— შენ მართალი ხარ! — ვეთანხმები ველის, — ასეთი პრიმიტიული წესით მართლაც ძნელია მუშაობა, ცელი უნდა ყანას, ცელი!

— ამ მიწაზე ცელით ვერაფერს გახდები, — საუბარში ერევა რამაზანი, — ცარიელი ქვა და ღორღია. მერე კიდევ, ამ დაწყევლილი ხოზიკისაგან პურის თავთავების გამოჩევა არ გინდა? თუ გინდა ცელით იმუშავო, ჯერ ეს დაწყევლილი მიწა ქვებისაგან უნდა გაათავისუფლო.

— სწორია! — ვეთანხმები მე, — შენ, რამაზან, ამდენი ძალა თუ გაქვს, მფიხმარე იგი და ეს ყანა ქვებისაგან გაწმინდე.

რამაზანი არაფერს მეუბნება, თავისთვის ბურტყუნებს რაღაცას და მუშაობას განაგრძობს.

ველი თავს ხრის, დასცქერის მიწას და სღუმს.

— არა, აუცილებლად უნდა გავიქცე აქედან! — ამბობს ბოლოს, — სადაც ყანაში ამდენი ქვა და ღორღი არ იქნება, ისეთ სოფელში უნდა წავიდე... ანდა კიდევ, სულ ქალაქში უნდა გავიქცე სასწავლებლად.

დედა თავს აქნევს და გაბრაზებული, ხმამაღლა ეუბნება შვილს: — წადი, წადი!.. ყველანი წადით, ყველანი! თუ გინდა

სულ გიაურების ქვეყანაში წასულხარ... გინდა მამაშენის სოფელი, მისი კუთხე მიატოვო? ვიცი, შენთვის სულ გინდამც ბუეზსაც დაუბუდებია აქ.

დალლილი და გასავათებული ველი წესსა და ზრდილობას ივიწყებს და დედასაც არ ებუება: — მამაჩემის კუთხე... თორემ დიდ რამეს წარმოადგენს ეს კუთხე, ორი მტკაველი, ხოზიკითა და ქვებით დაფარული მიწა! ესაა სულ ეგ შენი კუთხე!..

— თესვისას რამდენ პურის მარცვალს დათესავ, იმდენ მარცვალს მოიწევ, — დავსძენ მე, — ქვებით ავსებულ მიწაზე ხეირიანი მოსავალი მოვა? თანაც წყალი ჩვენ არ გავვაჩნია, რომ მოვრწყოთ, ცხენი არა გვყავს, რომ ვამუშაოთ...

— ამ მიწისათვის სისხლია დაღვრილი, ეს მამათქვენის მიწაა! — გვახსენებს დედა.

— რა ვქნა მერე, მამაჩემის მიწა რომაა? რა ვუყო მერე სისხლი თუა დაქცეული ამ მიწისათვის? — არ ცხრება ველი.

— ხათაბალა ნუ მოაკლოს ღმერთმა შენისთანა ბავშვს! — ქოქოლას აყრის გაბრაზებული დედა, — ცხრა თვე მუცლით გატარე მთასა და ბარში, აღმართში და დაღმართში, შენს გაზრდას გადაყვევი და ახლა, როცა გაიზარდე და მოვირდი, ასე ლაპარაკობ, არა? უფროსი შენ არ იცი და უმცროსი! ამ მიწაზე მამაშენის ოფლი და სისხლია დაღვრილი და შენ ასე უნდა ილაპარაკო? ღმერთი ათასნაირ ბელას მოგცემს მაგ სიტყვებისათვის! — გაბრაზებულ დედას სურს გადააფურთხოს, მაგრამ სიცხისაგან პირი გამშრალი აქვს.

— კარგი ახლა, დაწყნარდი, ნუ ბრაზობ დედა! — შევეცადე გაბრაზებული დედაჩემის დაწყნარებას, — ველი თუ სადმე წავა, დაე წავიდეს. მე ხომ ვრჩები შენთან? მე ხომ არსად არ მივდივარ? მე შევინარჩუნებ მამაჩემის ამ უვარგის მიწას. დავჯდები და დავიცავ.

ჩემს სიტყვებზე ველი დამცინავად ახითხითდა: — მაგ შენს ჭკუას რა ვუთხარი მე! ამ ხოზიკიან მიწას რა დაცვა სჭირდება? ვინ წავაგრომევს მას?

— მალე მაგ ხოზიკის საწინააღმდეგო საშუალებასაც გამოვნახავ! — ვუბნები თავის მართლებით.

— აქამდე იმდენს ეცადენ და ვერ გამოვნახეს და შენ უნდა გამოვნახო? — ამჯერად დედას არ სჯერა ჩემი ნათქვამი. — ეს ხოზიკაც ღმერთის გაჩენილია. ალბათ საჭიროა და იმიტომაც გააჩინა.

— არა, მე გამოვნახავ მაგის საშუალებას! — ჯიუტად ვიმეორებ.

— კი, კი. კარგად ეძიე, კარგად, — დამცინის ველი და ნამგლის პირით ცდილობს ხოზიკის მოშორებას მატყლის წინ-

დებიდან, რომელზეც იმდენი ხოზიკა აკვრია, რა ფერისაა ვინ
ნდა, ვერ მიხვდები. ხოზიკა ასე ადვილად არ სცილდება, ველი
ბინძურად, უწმარად იგინება და მერე, ოდნავ რომ წყნარ-
დება, ოცნებაში წასულივით ამბობს: — აქ ჩქემები უნდა გე-
ცვას, მაღალყელიანი ჩქემები და არა ეს უქუსლო, ვირის ტყა-
ვისაგან შეკერილი ქალამნები.

— ეს კარგი იქნება, მაგრამ... ხელებს რას უშვრები?

— ხელებს? ხელებზე რა, რეზინის ხელთათმანები უნდა
გქონდეს!

— არა, მაგი არ ივარგებს! — არ ვეთანხმები მე, — არ
ვარგებს რეზინის ხელთათმანები... ამ სიცხეში...

— აბა რა უნდა ვქნათ? — მეკითხება იგი.

— არ ვიცი, ველი! ვიწვები სიცხით. პირი საშინლად
გამიშრა, ერთი მხრივ ეს სიცხე, მერე კიდევ ეს მტვერი... ხე-
დავ, ხელები როგორ დამისისხლიანდა?

— ეშმაკსა და მეწყერს წაუღია აქაურობა! — იწყევლება
ველი.

მერე კარგა ხანს უხმოდ ვშრომობთ. მზე თანდათანობით
აჭერს და აუტანელი ხდება სიცხე.

მოულოდნელად დედა ნამგალს აგდებს ხელიდან: — მე-
ტი აღარ შემიძლია! ძალ-ღონე აღარ შემრჩა! თქვენ გააკეთეთ,
რასაც გააკეთებთ, მე კი აღარ შემიძლია!

— ჩრდილში წაგიყვანთ! — ეუბნება რამაზანი და მისკენ
მიიწევს, მაგრამ დედა აჩერებს: — არ მინდა, მე თვითონ წა-
ვალ! — მიდის წელში მოხრილი, ლასლასით, ეკლების შიშით
შიშველ ფეხებს ფრთხილად ადგამს და ძლივს იკავებს თავს,
რომ ბოლმისაგან არ ატირდეს.

ყანის ბოლოს ერთადერთი ხე დგას. ესაა ჩვენი საჩრდი-
ლობელი და თავშესაფარი. ყველაფერი ამ ხის ქვეშ გვაქვს და-
ლაგებული — საგზალი, წყლიანი კოკა... იქვე აბია გაძვალ-
ტყავებული ბებერი სხედარი, მას სიცხე აწუხებს და დროდა-
დრო ნაღვლიანად დაიჭროყინებს ხოლმე!

დედა ხის ძირას მიდის, ჯდება და კარგა ხნის დუმილის
მერე ვეცახის: — თქვენც მოდიეთ, რომ არ გინდათ სულ დაი-
წვათ სიცხეში?

— არა, ჩვენ ცოტას კიდევ წავიმუშავებთ, — ვამბობ მე
და ჩემს დას — აიშეს ვეცახი.

აიშე რატომღაც დილიდანვე გამოგვეყო და ყანის ბოლო-
ში, განცალკევებულად შრომობს. რადგანაც დედა დასასვენე-
ბლად წავიდა, მისი ადგილი ახლა აიშემ უნდა დაიკავოს.

ჩემს ძახილზე აიშე მოვიდა, გვერდში ამოგვიდგა და მუ-
შაობა განაგრძო. აიშე ჩვენსავით გატანჯულია სიცხისა და



დალილობისაგან. შიშველი ფეხები ხის ქოშებში წაუყრია და წვივები და ხელები დასისხლიანებული აქვს.

— გააუბრებს დარჩეს ასეთი ყანა! — ბრაზობს იგა.

— ეს რა თქვი? — ვეკითხები მე. — დედამ არ გაგიგონოს, თორემ...

— გამიგონოს მერე! — აღარ შემიძლია მეტი. დავიღალე, გესმის? დავიღალე!

მე ყელიანი ფეხსაცმელი მაცვია და, ასე თუ ისე, ოდნავ მაინც მიცავს ხოზიკისაგან... ჩვენი ყანა დიდი-დიდი სულ ხუთიოდე ქცევადა თუ იქნება, პურის მკის მომთავრებას საშველი არ ადგას, ეს ოხერი ჩვენი მოსამკალია მაინც, და ვცდილობთ, რაც შეიძლება ადრე დავამთავროთ.

— ამ შენს ხოზიკაზე ერთი შენი მოწონებული ლექსი უნდა გამოვთქვა! — დიდის ამბით ამბობს ველი.

— დასწყევლოს ღმერთმა ეს ხოზიკა! — ამბობს აიშე.

— ჯერ ორიოდე კონაც არ მოგიმკია, შე ზარმაცო, და ლექსი დამიწყე, ახლა? რა დროს ლექსია? — ვუყვირი მე.

— არა, უნდა გამოვთქვა! — ამბობს მაინც ჭიუტად და მართლაც, ცოტახნის მერე ახლაფორთებს რალაცას:

ეკლით ავივსე მუხლამდე,
ფერი არ შემრჩა სახეზე,
აშოსაგდებო. ხოზიკავ!
რამ გაგაჩინა ჩემს ბედზე?

ველის ლექსზე ხის ძირას ჩათვლემილივით მჯდარი დედა აყვირდა: — უხ, შენ პოეტო, დასაბრმავებლო მასხარავ! ჩემდა ჭირად ხარ შენ გაჩენილი, ჩემდა ჭირად!

— ა, რა უნდა ახლა ჩემთან? — ხელებს შლის გაოცებული ველი.

— აბა, მოდით, მოდით, დაისვენეთ ახლა! — გვეძახის დედა.

— არა, ცოტას კიდევ მოვმკით და მერე დავისვენებთ! — გამბობ ყველას მაგიერ.

— აბა, რადგანაც მასეა, მე მოვალ თქვენთან! — დედა ძლივს, მუხლებზე ხელებდაბჯენით დგება, ლასლასით მოდის და მაშინვე შენიშვნას გვაძლევს: — თავთავები მიწაზე დაგიყრიათ. ასე როგორ შეიძლება? — იხრება, სათითაოდ ჰკრებს თავთავებს და გვარიგებს: — ფრთხილად უნდა იმუშაოთ, დაკვირვებულად, ისედაც არაა არაფერი და ამდენი თუ დატოვებთ, რალა დარჩება მაშინ?

— არაფერი! — ამბობს ველი და ქილიკით განაგრძობს

დედის გასაბრაზებლად: — კი, ბატონო, რასაც თქვენ განიხილეთ, ისე გავაკეთებთ.

— ახლა მიფრთხილდი, ცხვირ-პირში არ მოგარტყა ერთი, შტერო, გათანსირებულო და ტუტუცო მოშაირევ! — ემუჭრება დედა, მერე ისევ ჩვენ გვიბრუნდება და დამშვიდებული განაგრძობს: — აბა, ერთი მითხარით: ვთქვათ, სახედარზე ზინხართ და სადღაც მიდიხართ: ვთქვათ, გზაზე ხუთი ყურუში დაინახეთ, რას იზამთ, ჩამოხვალთ სახედრიდან და იმ ფულს აიღებთ, თუ...

— ავიღებთ, რა თქმა უნდა! — ყველას გვასწრებს რამაზანი. — ხუთი რაა, ერთი ყურუშისთვის არ ჩამოვალ, თუ?

დედას ელიმება: — რადგანაც ასეა, ფრთხილად იმუშავეთ და მაგ თავთაგებს დაბლა ნუ დაყრით. ერთი თავთავი, იცოდეთ, ერთ ყურუშზე მეტი ღირს.

— ამ ყანის მომკა, კალოზე მიზიდვა და გალევვა ძალიან ძვირი ჯდება! — დაფიქრებით ამბობს ველი და შუბლზე დაცვარულ ოფლს იწმენდს.

— აბა, როგორ გგონია, შენ? — ეპასუხება დედა, — ცხოვრება არაა ადვილი, განსაკუთრებით სოფელში ცხოვრებაა ძნელი!

— აბა, ცოტა დაგვრჩა და მოვათაოთ ბარემ, — ვამხნევენ ყველას, — ვიჩქაროთ, ვიჩქაროთ!

აიშე წელში სწორდება და ტუჩებს იბზუებს, — „ვიჩქაროთ“, ვიჩქაროთ“, თქმა იოლია. შენსავით ფენსაცმელები მეცვას, ნუ გეშინია, შენზე უკეთ ვიმუშავებდი და მეც ვიტყოდი მასე.

— გაჩუმდი, აიშე! — ვუწყრები მე, — ფენსაცმელი თუა მთავარი, ხვალვე მოგცემ, ჩაიცვი და ვნახავთ ერთი, რამდენსაც იმუშავენ.

მოსამკელი ცოტა იყო დარჩენილი, ერთი იერიში, კიდევ ცოტა მონდომება და მორჩა. მაგრამ აუტანელი სიცხე და ხოზიკა არ გვაძლევდა ჩქარი მუშაობის საშუალებას.

დედა ცდილობს არ ჩამოგვრჩეს, გამალებით უსვამს ნამგალს და დროდადრო, როცა ხოზიკა ნამეტნავად გააწვალებს, ახვნეწდება და იწყებს წუწუნს: — აჰ, გიაურების საფლავეზე განახე ამოსული, ხოზიკავ, გიაურების სასაფლაოზე!

ველის ეცინება დედის სიტყვებზე, წელში სწორდება და ეკითხება: — დედა, შენ რომ ღმერთი იყო. მუსლიმანების გარდა სხვა ხალხს აცხოვრებდი ამ ქვეყანაზე?

— არა, არ ვაცხოვრებდი! — მტკიცედ, უყოყმანოდ ეუბნება დედა.

ველი ტაშს უკრავს და ყვირის: — აფერუმ შენსთანა ღმერთს, აფერუმ!



მე ფრთხილად ვადგამ ნაბიჯს, ველისთან მივ-
 დივარ, მხარზე ვუცაცუნებ ხელს და ვეუბნებ
 იცოცხლე შენ, ჩემო საზრიანო და ჭკვიანო ძმაო, იცო-
 ცხლე!.. წადი აქედან, ძმაო, წადი! სადაც გინდოდეს იქ წადი,
 ისწავლე და დიდი კაცი გამოდი! შენ კეთილი გული გაქვს, სა-
 ზრიანიცა ხარ. ჩვენი რაიონის კაიმაკამად რომ დაგნიშნონ,
 შეძლებ, მერე, ვინ იცის, ანკარაშიც გადახვიდე უფრო მაღალ
 თანამდებობაზე, მერე გაერთიანებული ერების ორგანიზაცი-
 ის გენერალური მდივანი გახლე ქნებ...

— გადი ერთი იქით! — მიმიხვდა ველი და ნამგალი წამკ-
 რა: — მამასხარავებ, არა?!

— დახე, ესეც მიმიხვდი! აკი გეუბნები, ჭკვიანი ხარ-
 მეთქი! — ვართმევ ხელს და ვეკითხები: — არ დავისვენოთ,
 ველი?

— ჰო, გეყოფათ აწი! — ამბობს დედა, — შუადღეა უკვე,
 შუადღე!

— აბა, ჩრდილში! — ვაცხადებ ყველას გასაგონად.

მუშაობას თავს ვანებებთ და მივღიმართებით იმ ერთად-
 ერთი ხისაკენ.

ველი მაშინვე წყლით სავსე კოკასთან მირბის და პირზე
 იყუდებს.

— გეყოფა, ბიჭო! — უყვირის რამაზანი, — წყალი ლო-
 ცვისწინა ხელ-პირის დასაბანად მჭირდება.

— ლოცვისათვის ხელ-პირის გაწმენდა მიწით არ შეიძ-
 ლება? — ირონიულად ეკითხება ველი.

— როცა ახლო-მახლო წყალია, მაშინ ხელ-პირის მიწით
 გაწმენდა ცოდვია! — უხსნის რამაზანი.

— ცოდვია და იყოს მერე ცოდვა, ფეხებზე არ მკილია? —
 ეს წყალი სასმელად არ გვეყოფა! მიდი და მიწით გაიწმინდე!

— არ შეიძლება მიწით, კაცო, — ყვირის რამაზანი.

— არ შეიძლება და ნუ გაიწმინდ! — მშვიდად ეუბნება
 ველი. ვარჯობ, თავიდან უნდა ატყდეს დავიდარაბა. ისევ რა-
 მაზანს ვაწყნარებ: — თავი დაანებე მაგ ჩიტირეკიას! ჯერ კუჭი
 გამოგვიდლოთ გემოზე, ლოცვაზე მერე ვიფიქროთ! — ხანვი და
 ცივი მჭადი ამომაქვს ხურჯინიდან.

რამაზანი გაბრაზებულია და არაფერს არ აკარებს პირს.

მოულოდნელად დედა ატირდა: — დილიდან სიცხემ და
 ხოზიკამ გაგვამწარა, ახლა შენ დაიწყე, არა? გრცხვენოდეს,
 შვილო! — საყვედურობს რამაზანს.

რამაზანი მაინც ჯიუტობს. ზის თავისთვის და დაბოდმილი
 სდუმს.

— ეს ერთი ნატეხი ცივი მჭადი მაინც შეგვარგე, შვილო.
 — მულარით სთხოვს დედა და ცრემლს ცანოცის კილით

იწმენდს. როგორც იქნა, რამაზანმა მოიჭამა ჟინი და შემო-
გვიერთდა.

ვილუკმებით, ირგვლივ მყუდროებაა, რომელსაც დროდა-
დრო სახედრის ყროყინი არღვევს. სახედარი წყლიან კოკას
შტქერის.

— წყალი წყურია მაგ სახედარს! — ვამბობ, ვღვები,
დიდ საინზე ვასხამ წყალს და სახედართან მიმაქვს.

— ამდენი წყალი რომ მაგ სახედარს შეასვი, ჩვენ რა
გქნათ სალამომდე?

— რაც დარჩა, თქვენ გეყოფათ, მე არ მინდა. ჩემი წილი
შევასვი სახედარს! — ვეუბნები და ჭამას განვაგრძობ.

რამაზანი მიბღვერის. ყურადღებას არ ვაქცევ. იბღვიროს
და იყოს რამდენიც უნდა.

ვაუსაძლისი ხვატი დვას. ჩრდილში ვზივართ და მაინც
სიცხისაგან ვიწვით.

მოსუცი მკვება

იგი ქალაქიდან ამოვიდა ჩვენს სოფელში და ველის სა-
ხლში დაბინავდა. სახლი სოფლის ბოლოს, მალლობზე იდგა
და კარგა მოზრდილი ეზოც გააჩნდა, სადაც მეკეხის დაბინა-
ვების შემდეგ უწესრიგოდ ეყარა ხის მასალა, თხის ტყავები,
ქეჩა და სხვა წვრილმანი ხარახურა, რაც კეხის დასამზადებ-
ლად და შესაკეთებლად საჭირო. იჭდა მეკეხე და სოფლელე-
ბის დაკვეთას ასრულებდა — აკეთებდა ახალ კეხებს, არემონ-
ტებდა ძველებს.

მეკეხე ლაპარაკის მოყვარული კაცი აღმოჩნდა, სწორედ
ამის გამო იყო, რომ მასთან გამუდმებით იყრიდნენ თავს სო-
ფლელეები და მის საუბარს უსმენდნენ. ისინი ისეთი გატაცე-
ბითა და გულისყურით უგდებდნენ ყურს მეკეხეს, იფიქრებ-
დით სტუდენტები საყვარელი პროფესორის საინტერესო ლე-
ქციას ისმენსო.

მოსუცი მეკეხეს, რალა თქმა უნდა, ცოდნით თავი არ
უსკდებოდა. რაც გაეგო და მოესმინა, მხოლოდ იმას ყვებოდა
და ამბობდა. დროთა განმავლობაში ბევრი რამ დავიწყებო-
და. და ახლაც მხოლოდ იმასვე იმეორებდა გაუთავებლად, რაც
მის შესხიერებას შემოენახა:

— აი, ასე, ასეთია ეს საქმე, ძმაო! ეს ყველაფერი კარ-
გად უნდა იცოდეთ. უცოდინარობა სირცხვილი არაა,
მაგრამ ცოდნა უნდა შეიძინოთ, უნდა იცოდეთ... ღმერთმა
ჩვენ წიგნები გამოგვიგზავნა, რომელიც ჩვენს წმინდანებს



ჩააბარა. ჰოდა, თქვენ ბევრი რამე უნდა იცოდეთ იმ წიგნების
 დან. ღმერთს თვალი, ყური და გონება იმისათვის მოუჭი
 თქვენთვის, რომ უნდა ისწავლოთ, აკეთოთ ის, რაც ღმერთს
 გაუხარდება და მოეწონება! — ეუბნებოდა იგი სოფელ
 გლეხებს.

მოხუცი მეკეხე ისეთ რამეს უყვებოდა მათ, რაც არასო-
 დეს არაფერში არ გამოადგებოდათ, მაგრამ, მიუხედავად ამი-
 სა. ისინი მაინც მთელი გულისყურით უსმენდნენ.

როგორც წესი, ქალაქელები სოფელში ჩვეულებრივად
 შემოდგომაზე ამოდირდნენ ხოლმე. ყოველ შემოდგომაზე
 მკალაეი, მეკეხე და ხარაზი ესტუმრებოდა სოფელს, დარჩე-
 ბოდა ერთ ათ დღეს, გლეხებს ხელს წამოახმარდნენ, გასაკე-
 თებელს ვააკეთებდნენ და მერე ისევ აიკრავდნენ გულა-ნა-
 ბადს. სოფელი თავისი ცხოვრებით ცხოვრობდა. დაყრუებუ-
 ლივით იყო. ქალაქიდან სოფელში ამსვლელი და სოფლიდან
 ქალაქში წამსვლელი იშვიათად თუ მოინახებოდა ვინმე. ქა-
 ლაქში მხოლოდ ჟანდარმერიაში ან კიდევ სასამართლოში გა-
 მოძახებული თუ წავიდოდა ხოლმე. სოფელში სულ ორიოდ
 შეძლებულ ოჯახს თუ გააჩნდა რადიო, ისინიც მხოლოდ და
 მხოლოდ სიმღერებს თუ მოისმენდნენ, დანარჩენი კი მათ
 აღარაფერი აინტერესებდათ. ზოგჯერ ჯარში წასული ახალ-
 გაზრდების უინტერესო, ყოვლად უშინაარსო წერილები თუ
 ამოაღწევდა სოფელში... სოფლელები კვირაში ერთხელ, პა-
 რასკეობით მეჩეთში შეიკრიბებოდნენ და ფანატიკოსი ხოჯის
 ქადაგებას ისმენდნენ. სხვა დღეებში ხალხი მეჩეთს სათოფეზე
 აღარ ეკარებოდა. სხვა დღეებში ისინი რომელიმე მეზობელ-
 თან მოიყრიდნენ თავს და საუბრობდნენ, ყვებოდნენ სხვადა-
 სხვა ამბებს. ვინაც ჯარში იყო ნამყოფი, იქ, ჯარში გატარე-
 ბულ წლებს მისტიროდნენ, ნატრობდნენ ჯარისკაცულ შინე-
 ლებს და ჩექმებს.

ზოგიერთები, კალოობასა და რთველობის შემდეგ, რო-
 ცა. სოფელში გასაკეთებელი აღარაფერი აღარ იყო, შორეული
 მხარეებისაკენ წასვლაზე ოცნებობდნენ — იქნება იქიდან მო-
 ძველებული პალტო, შარვალი ან კოსტიუმი ჩამოვიტანოთო,
 მაგრამ როცა იმ მოძველებული ტანსაცმლის საყიდელ ფულ-
 საც ვეღარ მოაგროვებდნენ, ისევ მეორე წლისათვის გადადებ-
 დნენ იქ გამგზავრებას.

მაგრამ დროა ისევ მეკეხეს დავუბრუნდეთ...

— დიახ, უსტავ! — ეთანხმებოდნენ გლეხები მეკეხეს, —
 ღმერთის წინაშე ბევრი ცოდვა გვაქვს ჩადენილი!

— დღემდე რაც ცოდვები გაქვთ ჩადენილი, იმაზე ნუ-
 ლარ იფიქრებთ, — ამშვიდებდა მათ მეკეხე, — ღმერთი მოწ-
 ყალეა. პატიება შეუძლია და ძველ ცოდვებს გაბატეზო.

თქვენ მხოლოდ ეცადეთ ახალი ცოდვები არ ჩაიდინოთ, ახალ ცოდვებს ერიდეთ. ღმერთს თხოვეთ წყალობა. ასე უთხარით მას: — ხომ ხედავ, ღმერთო, სწორ გზას ვადგავართ უკვე, აჰა, ჩაიხედე ჩვენს გულებში, ნახე, როგორ გავსუფთავდით! — ასე თქვით, ასე მიმართეთ ღმერთს.

ვლენები გულისყურით უსმენდნენ და თანხმობის ნიშნად თავს უქნევდნენ. მოხუცი ოსტატი კი თავის გზით მიდიოდა: — მთები, კლდეები, დედაძიფა თუ ცა, ფრინველი, ცხოველი, ადამიანი და მცენარე, ყველა და ყველაფერი ღმერთის გაჩენილია. ამიტომ უნდა დავემორჩილოთ ღმერთს. ყოველთვის დიდი რადიკალი და პატივისცემით მოვიხსენიოთ იგი... დედ-მამას პატივი უნდა სცეთ, უმცროს-უფროსობა უნდა იცოდეთ, ვინმეს ცუდად ნუ მოიხსენიებთ. ჭორიკნობას ნუ დაიწყებთ, კვირაში ერთხელ მაინც ტანი უნდა დაიბანოთ. ცოლიანებმა უფრო ხშირად უნდა დაიბანოთ. შარდზე გასვლა რომ დაგჭირდებათ, რაიმეს უნდა მოეფაროთ და ისე მოშარდოთ. შარდი ტანსაცმელზე და სხეულზე არ გადაიშხეფოთ, ცოლებს და თქვენს რძლებს უთხარით, ბავშვებისათვის ძუძუს აოწოვებისას ძუძუს ნუ გამოაჩენენ... ქალებისათვის მერე დასამალი ძუძუებია, პირველი კი...

კების შემკეთებელი წამით ჩაფიქრდებოდა და შერე ისევ განავრძობდა: — შერე კიდევ, ჩვენ ღარიბები ვართ, საწყლები ვართო. ნუ იტყვიოთ, ნუ წუხართ ამაზე, ვიყოთ რაც ვართ, დავრჩეთ ასე ღარიბად, სიღარიბე სირცხვილი არაა. ღარიბი და გაჭირვებული თუ კი მოითმენს და არ აწუწუნდება, იმ ქვეყანაში ღმერთი იმის მიმართ მოწყალე იქნება და კარგად აცხოვრებს... ღმერთს ზოგი მდიდარი გაუჩივია და ზოგიც ღარიბი. ამაში რაღაც მიზეზია ალბათ. ყველა მდიდარი რომ გაეჩინა, ხალხი ერთმანეთს დაჭამდა. ყველანი ღარიბები რომ გაეჩინა, არც ეს ვარაოდა. არა, ღმერთმა ყველაფერი იცის, ადამიანის საზრდო მას წინასწარ აქვს განსაზღვრული და განაწილებული.

„ჩვენი ხოჯაც ზუსტად ასე არ დაპარაკობს? ეს მოხუცი მეკვხეც ნამდვილად ზოჯის ნათქვამს გვიმეორებს. — ფიქრობდნენ ვლენები. — ნეტავი ჩვენ ხოჯასავით მცოდნეა? მაგრამ ნასწავლი რომ იყოს, აქ რა მოიყვანდა? კეხებს რა გააკეთებინებდა? ჩვენი ხოჯა კი მდიდარია, ოქრო ბევრი აქვს, ცხენებიც ბევრი ჰყავს... ჩვენს სოფელში მოსვლამდე ძალიან ღარიბი იყო, ახლა კი აღასავით მდიდარია. სოფელში რაც კარგი და საარწყავი მიწაა, სულ მაგი ყიდულობს, ისე, ქადაგებაში კაციშვილი ვერ აჯობებს. ნუსხებსაც მაგრად სწერს“.

— შენ ნამდვილად ჩვენს ხოჯასავით ქადაგებ. — უთხრა

ერთ-ერთმა გლეხმა მეკეხეს, — ჩვენი ხოჯაც იმას გვეუბნება, რასაც შენ გვეუბნები ახლა.

მოხუცი მეკეხე ზურგით მიეყრდნო იქვე მიგდებულ კენს და ახალი, რაიმე საინტერესო ამბის მოსაყოლად ჩაფიქრდა.

სწორედ ამ დროს გზაზე ხმაურით ჩაიარა საბარგო მანქანამ, რომელმაც მტვრის ბული დააყენა. მანქანას სოფლის ფეხშიშველა ბავშვები მისდევდნენ ხმაურითა და ყიჟინით.

მეკეხეს გარშემო შემოკრებილმა სოფლელებმა თვალი გააყოლეს მანქანას.

— ეს სასოფლო-სამეურნეო მომსახურების მანქანაა! — თქვა ერთ-ერთმა მათგანმა, — თავგების მოსაწამლავი წამალი დააქვს. აი, ეს კაცი მუშაობს ამ მანქანაზე. უკვე ათი დღეა, რაც ჩვენი რაიონის სოფლებში დადის, მიდიან მინდვრებში, პურის ყანებში და სადაც კი თავგების სოროებს წააწყდებიან, შიგ ამ წამალს ყრიან. როცა თავვი ამ წამალს შეჭამს, თურმე მამინვე ვააცხებს ფეხებს.

დაინტერესებულმა მეკეხემ ლოყაზე ჩამოისვა ხელი და იკითხა: — ის წამალი ნამდვილად კლავს თავგებს?

— ჩვენ არ გვინახავს, მაგრამ კლავსო, ასე ამბობენ კლავს თუ არ კლავს, მაგას ერთი წლის შემდეგ გაიგებ კაცი. შარშან დაბლა, სოფელ მეჩაჯირებში თავგებისათვის სოროებში საწამლავი ჩაუყრიათ. იქაურებს რომ შევეკითხე, თავგები თუ დაწყდა-მეთქი, მიპასუხეს:

— არა კაცო! ის საწამლავი სულ არ მოქმედებს, თავგებს პირიქით, ამრავლებსო, ასე თქვეს...

მეკეხემ თავი მალლა ასწია: — დიახ, დიახ, რა თქმა უნდა, უფრო გამრავლდებიან! — თქვა მან, — ვინ გააჩინა ის თავგები? ღმერთმა! ღმერთის გაჩენილს რომ ადამიანი კლავს, სწორად ეს? მერედა, რას აუხვალ იმდენ თავგებსა და მწერებს? ისინი ღმერთმა მილიონობით გააჩინა და ამ მანქანით მოტანილი საწამლავით აბა რამდენი უნდა დახოცონ? — თავი გააქნია და განაგრძო: — ყველაფერი ეს, თავგები, მწერები და სხვა უბედურებები ღმერთს ჩვენს დასასჯელად აქვს გამოგზავნილი... ჩვენ, ადამიანები ისე ვიქცევით ღმერთის წინაშე, რომ მაგი კი არა, ძალიან მიკვირს, სახლები რატომ არ გვენგრევა თავზე. უმცროსისა და უფროსის ცნობა აღარ არის. მეჩეთში შესვლა და ლოცვა აღარ უნდათ. ღმერთს აღარავინ ახსენებს. ასეა ეს და ღმერთმა ხომ უნდა გადაგვიხადოს სამაგიერო? რაღაცით ხომ უნდა გვაწვალოს? ავიღოთ ასეთი მაგალითი, ვთქვათ, რომ ჩვენს შორის არის მდიდარი კაცი, ალა, რომელსაც უამრავი საქონელი და მოსამსახურეები ჰყავს. ვთქვათ, ამ მოსამსახურეებიდან ერთ-ერთმა, ვთქვათ, საქონლის მწყემსმა. არ დაუჯერა აღას, არაფერი გაუგონა. რას იხამს

აღა?! ხომ უნდა დასაჯოს ჯიუტი მოსამსახურე? ჰოდა, ღმერთი
თავ ასეა. ისეც გვსჯის ჯიუტობისათვის... ღმერთი მართალია,
გაირყვნა ხალხი, ქვეყანა.. ამას წინათ ყური მოვკარი, რადიო-
ში გაძოლუცხადებიათ, ვილაკას ღვიძლი ქალიშვილი გაუუპატო-
ურებია. ვინ იცის, რამდენი გარყვნილება და მხეცობა ხდება
ჩვენს ქვეყანაში?

სოფლელებმა თავი გააქნიეს და დაუმოწმეს:

— გარყვნილებების მეტი რა ხდება ჩვენს ქვეყანაში?
შენ, ჰეკებუ, ყველაფერს მართალს ამბობ, ჩვენ გვჯერა
შენი!

მეკებემ კმაყოფილად გაიღიმა, ჩაფიქრდა და კარგა ხნის
მერე ისევ წამოიწყო: — ერთხელ თურმე სულთან-სულეიმა-
ნის ბალ-ბოსტანს უამრავი კალია შეესია. კალიებმა ყველაფე-
რი დაფარეს და არაფერი არ დარჩენიათ გაუხრავ-გაუოხრე-
ბელი — ხეხილი, ბუჩქი, ვარდი, ბოსტანი... სულეიმანის მება-
ღემ კალიებთან ვერაფერი რომ ვერ გააწყო, ბატონთან მოვი-
და და ყველაფერი მოახსენა: ასეა და ასე საქმე, კალიებმა ყვე-
ლაფერი გაანადგურეს და აღარ ვიცი, რა ვქნაო. სულეიმანიც
წასულა და მებაღის ნათქვამში დარწმუნებულა — კალიებს მა-
რთლაც ყველაფერი გაეოხრებინათ...

საწამლავის დამტარებელი მანქანა უკან დაბრუნდა, რახ-
რახით მიეფარა თვალს და სოფელში მტვერი და ბენზინის
სუნი დატოვა.

მეკებემ თვალი გააყოლა მანქანას და როცა იგი თვალს მიე-
ფარა, განაგრძო: — სულთან-სულეიმანი წმინდანი იყო, ყვე-
ლა ცხოველის, ფრინველისა თუ მწერის ენა იცოდა. სულთანს
კალიებისათვის უთქვამს: — ჰეი, კალიებო, კეთილ იყოს
თქვენი ჩემს ბაღსა და ბოსტანში მოსვლა!

მის სიტყვებზე კალიებმა თაყვანი სცეს მას — თავი მიწა-
მდე დახარეს და ისე მიესალმნენ სულთანს (თავის დახრით
მისალმება სწორედ იქიდან მოდის ჩვენში).

— მე ყველა მწერი და მკენარე მიყვარს: თქვენ აქ, ჩემს
ბაღში არაფერი გააფუჭოთ, თქვენი უფროსი გამოგზავნეთ
ჩემთან, უნდა მოველაპარაკო!

კალიების უფროსი სულთანთან გამოცხადებულა, თაყვა-
ნის ცემით მისალმებია.

— აქ საიდან მოსულხართ და სად მიდიხართ? — უკით-
ხავს მისთვის სულთანს.

— ჩვენ არაბეთის მხრიდან მოვფრინავთ და ნილდეს მხა-
რეს მივემგზავრებით. თქვენს ბაღსა და ბოსტანში ღამის ვასა-
თევად შევჩერდით. დილაადრიან, მზის ამოსვლამდე წავალთ
აქედან. — უპასუხნია კალიების უფროსს.



— რატომ მიდიხართ ნილდეში? — უკითხავს სულთანს.
 — თურმე ნილდელები ძალიან გათავხედებულან, ღმერთს ეურჩებიან, მის ბრძანებას არ ემორჩილებიან, ჰოდა, ღმერთმა მათი დასჯა გადაწყვიტა, დასასჯელად კი ჩვენ გვაგზავნის.

— რამდენ ხანს უნდა დარჩეო იქ? — უკითხავს სულთანს.

— ერთი წელიწადი!..

— აბა კარგი, წადით და ნება გეძლევათ ღამე ჩემს ბაღში ვაათით! — ნება დართო სულთანმა.

მეორე დღით კალიები გაფრენილან. ერთი წელი გავიდა, სულთანი კალიების დაბრუნებას ელოდა, მაგრამ ისინი არ გამოჩენილან. გავიდა ორი, სამი, ოთხი, ხუთი წელი... ისინი მხოლოდ შვიდი წლის შემდეგ დაბრუნდნენ, და რალა თქმა უნდა, ღამის გასათევად ისევ სულთან-სულეიმანის ბაღში მოიკალათეს. სულთანს დაუძახნია კალიების უფროსისათვის და უკითხავს: — ერთი წლის შემდეგ უნდა დაბრუნებულიყავით, თქვენ კი შვიდი წელი დაგავიანდათ, ამდენხანს სად იყავითო...

— ბატონო ჩემო, — უპასუხნია კალიების მეთაურს, — მართალია, ჩვენ იქ ერთი წლით ვიყავით გაგზავნილი, მაგრამ მათ, იქაურ მცხოვრებლებს იმდენი ცოდვა ჰქონდათ ჩადენილი, ერთი წელი არ გვეყო და შვიდი წელი დაგვჭირდაო.

— ახლა როგორ არის საქმე? — უკითხავს სულთანს.

— ახლა ყველაფერი რიგზეა, ყველა ცოდვილი გამოვასწორეთ, ღმერთი შევაცვარეთ, ჯამეში სიარული და ლოცვა ვასწავლეთ...


— აი, სულ ესაა ამბავი, — დაამთავრა მეკეხემ, — ხომ კარგი ამბავია? ხომ მოგეწონათ?

ასეთი რამ სოფლელებს ჯერ განაგონი არ ჰქონდათ.

— იცოცხლე და იბედნიერე! — ახმაურდნენ ერთხმად, — შეს ისეთი მოყოლა იცი, უკეთესს ვერც ინატრებს კაცი.

ქოხლცი მეკეხე ჩაფიქრდა, სახეზე ჩამოისვა ხელი და განაგრძო: — იმ კალიების ამბავი ტყუილად კი არ მოგიყევით მე თქვენ, დაფიქრება უნდა მაგას, აზრის გამოტანა უნდა მაქედან... ახლა ჩვენს ხალხს რომ ვუცქვრი, მეშინია, ჩვენაც არ დაგვსაჯოს ღმერთმა ამდენი ბოროტებისა და ცოდვებისათვის და კალიები არ მოგვასიოს ჩვენაც...

მსმენელებმა შიშით გადახედეს ერთმანეთს, მერე დანა-ნებით გააქნიეს თავი.



— მართალი ხარ, მამავ შენ! — თქვა ერთ-ერთმა მათგანმა.
 — ჩვენი ხალხის საქციელი მართლაც არაა მოსაწონი,
 ამის შესახებ ჩვენ ჩვენი ჯამეს იმამიც გვიქადაგებს ყოველ-
 დღე, მაგრამ შენ უფრო საინტერესოდ ყვები...

* * *

ასე გრძელდებოდა ყოველდღე. სამუშაოდან დაბრუნე-
 ბული, დალილ-დაქანცული სოფლელები მაშინვე კელის
 სხლს მიაშურებდნენ, შემოეხვეოდნენ შეკეხეს და უსმენდნენ
 მის გაუთავებელ ლაპარაკსა და მსჯელობებს ღმერთზე, მორ-
 წმუნეებზე, გარყვნილებასა და სხვა მისთანებზე.

მეკეხეს ლაპარაკი არ ეზარებოდა, შეეძლო გაუთავებლად
 ილაქლაქა ყველაფერზე. ფანტაზია გააჩნდა, გამოგონების უნა-
 რით იყო დაჯილდოებული. მაგრამ, ბოლოს და ბოლოს, მეკე-
 ხეს სათქმელი შემოეღია და უკვე აღარ იცოდა, რა ეთქვა, რა
 მოეყოლა, რითი დაეკმაყოფილებინა მისი ლაპარაკით დაინტე-
 რესებული მსმენელები.

— ახლა თქვენ მოყევით რამე, — უთხრა მან ერთ დღეს
 გლეხებს, — სულ მე ხომ არ ვილაპარაკებ?

— რა უნდა ვთქვათ? ჩვენ რა ვიცით? — მხრებს იჩეჩავ-
 დნენ გლეხები და შეცბუნებულები გადახედავდნენ ერთმან-
 ეთს.

— მოსაყოლის მეტი რა არის?

— კი, არის, მაგრამ...

— ჰოდა, მოყევით... მაგალითად, ყანები თუ გაქვთ კარ-
 გი? ხარი და კამეჩი თუ გყავთ? კარგად თუ უვლით საქო-
 ნელს?

— კი, ყანები გვაქვს, საქონელიც გვყავს, მაგრამ მოვლით
 ისე ვერ უვვლით, როგორც საჭიროა!

ეს იყო და ეს, ამის მეტი გლეხებს არაფერი ჰქონდათ სა-
 თქმელი, ერთს ამოიხორებდნენ, ერთმანეთს გადახედავდნენ,
 დააჩერდებოდნენ მერე მიწას და სდუმდნენ კარგა ხანს.

— რა უცნაური ხალხი ხართ! — ვერ მოითმენდა დუმი-
 ლსაგან თავმოებურებული მეკეხე, — ნუთუ სალაპარაკო
 არაფერი გაქვთ? ნუთუ ყველაფერი რიგზეა თქვენთან?

— რიგზე რა ამყოფებს, უსტავ? — ამოიხორებდა ერთი,
 — რომელ ადგილზეა ყველაფერი რიგზე, ჩვენთან რომ იყოს?

— მერე? თქვით, მაგაზე თქვით, რა არ არის რიგზე?

— მაგი არ ვიცით, უსტავ! — ყველას მაგიერ იტყოდა
 ერთი, გაუბედავად, თავის შეფხანით.

— ჰმ! — ჩაიცინებდა მეკეხე. — თქვენი ვერაფერი გავი-
 გე. უცნაური ხალხი ხართ სწორედ.



— ჰო, კი, უცნაურები ვართ, უცნაურები! — ყვილიდ ეთანხმებოდა ყველას მაგიერ რომელიმე და დამნაშავესავით აარიდებდა თვალს.

მერე ერთხანს ისევ ჩამოწვებოდა ღუმილი, რომელსაც ამჯერად რომელიმე გლეხთაგანი დაარღვევდა. — ჩვენ შენი საუბრის მოსასმენად ვართ აქ მოსული, მოგვიყვი რამე, უსტავ!

მეკეხე უხერხულ მდგომარეობაში ვარდებოდა, არც გლეხების გაწბილება სურდა, სათქმელი კი უკვე თქვა, სალა-პარაკო ამოწურა, იმის ფანტაზია კი არ ჰქონდა, სახელდა-ხელოდ მოეფიქრებინა რაიმე.

— რა მოგიყვით, რა გნებავთ? — იტყოდა ფიქრის მერე.

— რაც იცი, ის მოგიყვი, უსტავ, ჩვენთვის სულ ერთია, ოღონდ კი მოყვი და...

მეკეხე ჩაფიქრდებოდა, მერე რაღაცას მოისაზრებდა და იტყოდა: — საქონელს კარგად უნდა მოუაროთ!

— კარგი, მოგუვლით, უსტავ! — ჰპირდებოდნენ სოფლე-ლები.

— შენ ის, სულთან-სულეიმანისა და კალიების ამბავი მოგიყვი, უსტავ! — თხოვდა ერთ-ერთი მსმენელთაგანი.

— ეს ხომ მოგიყვივით?

— კიდევ მოგიყვი, უსტავ, კიდევ! კარგად ვერ გავიგეთ შავი!

— კარგი აბა! — იტყოდა მეკეხე და ვინ იცის უკვე მერამდენედ სოყვებოდა კალიებისა და სულთნის ამბავს. სა-თქმელს რომ დაასრულებდა, დასძენდა: — სულ ესაა და ეს.

— იცოცხლე დიდხანს, იცოცხლე, უსტავ! — ერთხმად აყაყანდებოდნენ გლეხები, — ძალიახ კარგად ყვები, უსტავ, ძალიან კარგად, ახლა კიდევ მოგიყვი რამე.

— რა მოგიყვით კიდევ? — იტყოდა გულში ნასიამოვნე-ბი მეკეხე.

— რაც გინდა ის მოგიყვი. მდიდრისა და ღარიბის ამ-ბავი მოგიყვი. ღარიბს რა უთქვამს და მდიდარს კიდევ რა, ის ამბავი მოგიყვი.

— კარგით, მოგიყვებით, — იტყოდა მეკეხე და მართლაც მოყვებოდა: — ჩვენ ყველანი რომ უნდა მოვკვდეთ და შავ მი-წაში უნდა ჩავწვით, ეს ყველამ კარგად იცით თქვენ. იმ ქვე-ყანაში ყველაფერი სხვანაირად, შებრუნებით ხდება...

— როგორ, უსტავ? — იკითხავენ ერთხმად.

— როგორ და, იმ ქვეყანაში ყველანი, ვინაც აქ ღარიბად ცხოვრობენ, მდიდრად იცხოვრებენ, აქ რომ მდიდრად ცხოვ-რობენ, იქ ძალიან ღარიბები იქნებიან... ასე შავალითად, ის ალა-ბეგები, რომლებსაც ახლა თქვენ ემსახურებით, საიქიოში

თქვენ მოგემსახურებიან. თუკი თქვენ ამ ქვეყანაში პატიოს-
ნად მოიქცევით, ღმერთს გაუგონებთ, იმარხულებთ და ჯამე-
ში ილოცებთ, იქ, საიქიოს, ბუმბულის საწოლებში ინებივრებთ
ლამაზ, ლოყაწითელ, ქორფა ქალიშვილებთან, რომლებსაც
ეცმევით გამჭვირვალე აბრეშუმის კაბები, მათ ისეთი სასია-
მოვნო სუნი ექნებათ, როგორც ვარდს, თქვენი აქაური ცო-
ლებივით კი არ იქნებიან აბა, ჩაქანგულ-ჩამურულები,
ისე რომ არიან აქოთებულები, ერთ ვერსზე ვერ
მიეკარება კაცი... რასაც თქვენ აქ, ამ ცხოვრებაში ნატრობთ,
იქ უნატრებლად გექნებათ. გექნებათ ბალი, ბაღია, სარწყავი
წყალი, რადიო, იქ არავითარი გაჭირვება და სადარდებელი არ
გექნებათ... აქ რომ თქვენ ორსულ ცოლებს სცემთ, რატომ
დაორსულდი, ამდენი ბავშვი როგორ უნდა ვარჩინოო, იქ პი-
რიქით მოიქცევით, ვინაც ტყუპს შობს, დააჯილდოებთ,
სულ აბრეშუმსა და ფარჩეულში გამოაწყობთ... მოკლედ, თუ
წესიერად იქნებით, რომ მოკვდებით, იქ იმ ქვეყანაში რაც აქ
გენატრებათ, ყველაფერი თავზესაყრელად გექნებათ...

მეკეხე ყვებოდა და თან თავის საქმეს განაგრძობდა. გლე-
ხები სულგანაბულნი უგდებდნენ ყურს და რასაც იგი ყვე-
ბოდა, ყველაფერი სჯეროდათ.

— ძალიან კმაყოფილი ვართ შენი, უსტავ! — ეუბნებოდ-
ნენ, როცა მეკეხე საუბარს დაამთავრებდა, — ძალიან კარგი
მოსასმენი იყო შენი ნაამბობი, ყველაფერი სიმართლე გვი-
თხარით და მადლობელი ვართ... ჩვენი სოფლიდან რომ წახ-
ვალ, აღარ ვიცი, რა გვეშველება, როგორ გავძლებთ უშე-
ნოდ.

* * *

მეკეხეს გამგზავრების დღეც დადგა. იმ დღეს არც ერთი
გლენი სამუშაოდ არ გასულა. ყველამ რაღაც-რაღაცა მოზი-
და, ველის სახლში მოიყარეს თავი და გამოსათხოვარი სადი-
ლი გაუმართეს.

სადილობის მერე მეკეხის მთელი ავლადიდება სახედარს
აჭკიდეს, მეკეხე სოფლის ბოლომდე გააცილეს და თვალცრე-
მლიაყები გამოეთხოვნენ: — როგორი კმაყოფილი ვიყავით შე-
ნით. გვიჭირს, რომ მიდიხარ, ძნელი იქნება უშენოდ გაძლე-
ბა... ბევრს ნუ დაავიანებ, გაისად ისევ ჩამოდი, გელით, შენს
მოლოდინში ვიქნებით ყოველთვის!

დავბრუნდებო, დაპირდა მეკეხე და გზას გაუდგა. გლე-
ხები იდგნენ და მას გასცქეროდნენ. მხოლოდ მაშინ, როცა
მეკეხე გორაკს მოეფარა, სახლისაკენ გაბრუნდნენ მეკეხეზე
საუბარ-საუბრით. საღამომდე მეკეხეზე ილაპარაკეს, ყველა

აქებდა და ადიდებდა მას, უკვიანეს, მცოდნე კაცის მიაჩნდათ:

— ქალაქში ჩასვლამდე ბევრი აღარ ეკლება ახლა, მზის ჩასვლამდე მიაღწევს... რა ღმერთის დალოცვილი კაცი იყო, რა პატიოსანი. ღმერთის მოშიში.

ცხელი ზაფხულის დღეებში სამუშაოდან დაბრუნებულ გლეხებს გული არ უდგებოდათ სახლში, ველის სახლში იყრიდნენ თავს და ისევ მეკეხეზე ჩამოაგდებდნენ საუბარს.

* * *

იმ სოფლიდან თუკი ვინმე ქალაქში წავიდოდა, ანდა, კიდევ, სასამართლოში ან უანდარმერიაში ექნებოდა საქმე, დიდის ამბით აბარებდნენ, ქალაქში რომ ჩახვალ, აუცილებლად მეკეხე მოძებნე, ჩვენი მოკითხვა გადაეცი და უთხარი, გზებზე თოვლი გადნა, უკვე დათბა, ველით და გაიგე როდის ამოვაო.

მერე დიდის ამბით უსმენდნენ ქალაქიდან დაბრუნებულს, ისმენდნენ მეკეხეს დანაბარებს.

აჲ, მეკეხეს ლოდინში ვადიოდა დრო, ასე მისდევდა წელიწადი წელიწადს, მეკეხე კი არა და არ ჩანდა, დილით, საშუალოზე წასვლისას და საღამოს, სამუშაოდან დაბრუნებისას, სულ გზისაკენ ეჭირათ თვალი. იქნება ვინმე გამოჩნდეს გზაზე. იქნება მეკეხეზე გვითხრასო რამე.

ბაღნიერი სიკვდილი

ღმერთის დალოცვილი ეს მარხულობის თვე... ყოველწლიურად მაინცადამაინც გაგანია მუშაობის დროს ემთხვევა იგი. ზური მოსამკელია, ულო შესაკრავი, მოსამკვრევი... მერე კალოზე უნდა მიზიდოს გლეხკაცმა თავისი ნაჯაფი და უნდა გაღეწოს. ჰოდა, ამ დროს მარხვა? რომელი დელიყანი გაუძლებს ასეთ დატვირთვას? ჰოდა, არავის არ სცალია ასეთ დროს სალოცავად და სამარხულოდ.

— ჯერ ჩვენს პირსა და კუჭზე უნდა ვიფიქროთ! — თქვენს გლეხებმა და იმ წელიწადს მარხულობას თავი დაანებეს.

ეს გლეხები, ცოდვა გამხელილი სჯობს, არც მაინცდამაინც სხვა დროს იკლავდნენ თავს მარხვის შენახვაზე. ვინ მოსთვლის, რამდენი ლოცვა და რამდენი დავალიანება დარჩენიათ ღმერთის წინაშე. კიდევ კარგი, ღმერთის ვალი ბანკის

ვალს არ გავდა, რომელიც, მეტი გამოსავალი არ იყო, გინდოდა თუ არ გინდოდა, ქვა უნდა გავგებეთქა, გეშოვნა და გადაგხადა. ღმერთი გლენებს იმ შეღავათს აძლევდა რომ, შეეძლოთ ზაფხულის დავალიანება ზამთარში ლოცვითა და ძარხულობით აენაზლაურებინათ.

მაგრამ, რამაზანის მარხვა, მაინც სულ სხვა რამ იყო. აქ არ შეეძლებოდა რაიმე შეღავათის დაშვება და დავალიანება, შარიათში არ ეწერა. ეს მარხვა თავის დროზე უხდა აღსრულებულიყო, სოფლელები ამის გამო ძალიან სწუხდნენ:— ზაფხულში ძაან საქაე გვაქვს, ზამთარში კი მოცლოლები ყართ, ჰოდა, არ გაითვალისწინებს ნეტავი ღმერთი ამას? რა იქნებოდა იმ დალოცვილს ზამთარში გადაეტანა რამაზანი? ხომ უკეთესი იქნებოდა? ყველანი ვიმარხულებდით და დავალიანებაც არავის არ დარჩებოდა?

მეჩეთში ლოცვებზე მისული ხალხი ამის გამო ჯემალ-ხოჯამ ისეთი დღეში ჩააგდო, საცოდავებს რაც სილბო ჰქონდათ შერჩენილი, ისიც ღიმონივით გამოუწურა.

— საქმე-მაქმე არ ვიცი მე! — მთელი ხმით გაჰყვიროდა ხოჯა, — წესია ასეთი და ვინც ამ წესს არ დაემორჩილება, უღძერთოა, ღმერთის ურჩი. ღმერთის ურჩს კი რა დღე ელის, ეს კარგად იცით თქვენ!

აბა, ერთი მითხარით თქვე უსირცხვილოებო, თქვე შტერებო და გათახსირებულებო, ამაზე უკეთესი და საჩქარი რა საქმე გავიჩნდათ ასეთი? აბა მითხარით, ამის შეგდევ, იმქვეყნად რა პირით და რომელი სინდისით უნდა წახვიდეთ?

ხოჯის ქადაგებაზე ხალხმა მორჩილად ჩაჰკიდა თავი. მიხვდნენ თავიანთ დანაშაულს. სირცხვილისაგან ატანილებმა ლოცვები როგორ ჩაატარეს, არც გაუგიათ.

ლოცვის გათავების შემდეგ ყველანი გარეთ გაცვივდნენ და ჯაშეს წინ მოიყარეს თავი. საქმეზე წასვლა არც ერთს არ უფიქრია. არადა, დრო არ ითმენდა, კალოზე ხორბალი და ქერი ჰქონდათ მოტანილი გასალეწად. ამაზე უკეთეს დროს კი სად იშოვიდნენ. ქარი ქროდა და ხამდვილი ლეწვის დარი იდგა. ისინი კი იდგნენ და ელოდნენ, რას ელოდნენ, მათაც აღარ იცოდნენ. ხოჯის იმ სასტიკი ქადაგების შემდეგ არც ერთს არ მიუწევდა საქმეზე გული.

ხალხს ისეთი განწყობილება დაუფლებოდა, ღმერთი რომ ხილული პიროვნება ყოფილიყო, რომ სცოდნოდათ, სად, რა ადგილას უნდა ეპოვხათ იგი, ყველანი ერთად, შეთანხმებულეობით წავიდოდნენ მასთან, ფეხებს დაუკოცნიდნენ და პატიებას შესთხოვდნენ.

ჯამესთან თავმოყრილმა ხალხმა მათკენ მიმავალი მხელა-



რი შენიშნა. ალბათ ლოცვაზე დაგვიანებული რომელიმე გონიერი
 ხიო, გაიფიქრეს ზოგიერთებმა.

კარგად რომ დაუახლოვდა ჯამეს, მხოლოდ მაშინ იცნეს
 იგი, მეორე სოფელში მცხოვრებია, დაქირავებული მწყემსის—
 აზიმეს შვილი ალი აღმოჩნდა. იგი ამაყად გაჩვიული იჯდა სა-
 ხედარზე და არაფერს და არავის არ აქცევდა ყურადღებას.

— რატომ მოდი ლოცვაზე ასე გვიან? — ჰკითხეს მას,
 როცა ჯამეს მიუახლოვდა.

— გვიანი რომაა, მაგი მე ვიცი! — თქვა მან, სახედრიდან
 ჩამოხტა და განაგრძო: — მე სალოცავად არ მოვსულვარ. სა-
 ლოცავად მე ვინ გამომგზავნიდა აქ? მთელი სოფლის ნახირს
 მე მარტო ვმწყემსავ, იმდენი ხბო და ძროხა მე შემომყურებს
 და მაგისტვის მეცალა?

ალი ჰკუთხე ცოტა აფრაკად იყო, არეულ-დარეული ლა-
 პარაკი უყვარდა, რომ ჩართავდა, აღარ იყო მერე მისი გაჩე-
 რების საშველი.

— აბა, რისთვის მოდი? — შეაწყვეტინეს გლეხებმა.

— რისთვის მოვედი და გამომგზავნეს!.. აბა, აქ მოსასვ-
 ლელად სად მეცალა? იმდენი ხბოები, და ძროხები...

— რისთვის გამოგგზავნეს? — ისევ შეაწყვეტინეს გლე-
 ხებმა.

— თემელ-ხასანი მოკვდა და იმისთვის გამომგზავნეს.

— აა?! — ხალხმა გაოცებისაგან პირი დაალო, — რა
 თქვი? ხასანი მოკვდა? ეს როგორ?!

— როგორ და ჩვეულებრივად, ადგა და ქე გაწვავდა პო-
 ჭოკი! — გაიღრიჭა ალი.

— — აა? მაშ მოკვდა?! ეს როგორ?! — მაინც არ სჯე-
 როდა ზოგიერთებს.

იმ რაიონში ოცდაოთხი სოფელი შედიოდა. ჰოდა, მთელს
 ამ ოცდაოთხ სოფელში ყველაზე მდიდარი კაცი თემელ-ხასა-
 ნი იყო. უამრავი მიწა, ცხენების რემა, საქონელი, ცხვარი,
 აქლემები... თემელ-ხასანს სამი ცოლი ჰყავდა. დიდ მორწმუ-
 ნედ არ ითვლებოდა, არც მარხულობდა, არც ლოცულობდა,
 საშინელი ლოთი იყო და სოფელში, ხალხის დასანახავად გალე-
 შილი სიარული არ ერცხვინებოდა. სახელგანთქმული კაცი
 იყო და ჩინებული მხედარი. ის რომ ამხედრდებოდა და ცხენს
 დარდიმანდულად გააჭენებდა, ერთ რამედა ღირდა მისი შეხე-
 ღვა.

ყველაზე უფრო, რატომღაც ჩვენი სოფელი უყვარდა
 თემელ-ხასანს. ხშირი სტუმარი იყო და ბევრი მეგობარიც
 ჰყავდა აქ, მასავით გადაყლურწვის მოყვარული და ლოთი.
 ჩამოვივლიდა სოფელში, შეკრებდა თავისი ჰკუთხის ხალხს და

დაიწყებდა ქეიფს. ფული ჩეჩქივით ჰქონდა და ყოველთვის ის
ინდიდა.

თავისი ლოთი ძმაბიჭების გარდა არავის არ უყვარდა
თემელ-ხასანი და პირს უკან ხშირადაც ავინებდნენ კიდეც:
— ეს რა უსინდისო და ნამუსგარეცხილი ვინმეა, ა? რა-
ტომ ჩიწა არ უსკდება სირცხვილით მაინც?

ბოლო ხანებში თემელ-ხასანი რატომღაც დაავადმყოფდა.
ალბათ გაუთავებელმა ლოთობამ თუ უყო. ანდა, ვინ იცის,
ღმერთმაც დასაჯა კიდეც.

სად არ იყო სამკურნალოდ. არ დაუტოვებია არც სტამ-
ბული, არც ანკარა, არც იზმირი. სადაც კი ცნობილი ექიმი
ეგულეობდა, ყველა მოინახულა, მაგრამ არაფერმა უშველა.

ბოლოს ლოგინს მიეჯაჭვა. იწვა, იწვა, ელოდა სიკვდილს
და აი, ბაირამზე მოკვდა! ამ დღეს სიკვდილი ხომ დიდად სა-
სიხარულოა! ასეთი ბედნიერი სიკვდილი ცოტა ვინმეს თუ
ღირსებია!

— როგორ მოხდა ეს? — უკვირდა გაოგნებულ ხალხს, —
ღმერთი არ სწამდა, არ ლოცულობდა, არ მარხულობდა, ლო-
თი იყო და გარყვნილი! ჰოდა, ასეთ დღეს მოკვდა? როგორ
დაუშვა ღმერთმა ასეთ გარყვნილზე ასეთი სიკეთე? მაგრამ
ღმერთი ხომ ჩვენზე უკეთესად ხედავს, მას ხომ არაფერი
შეეშლება? იქნება ჩვენ ვერ ვამჩნევდით და ღირსი იყო ასე-
თი სიკვდილისა?

გაოგნებული ხალხი თანდათან ალაპარაკდა.

— თემელ-ხასანს შეხედე ერთი, — ჩაილაპარაკა ერთმა
გლეხმა და ხელები გაშალა, — ჩვენ იგი უღმერთო გვეგონა
და დახეთ... როგორც ჩანს, ღმერთი მდიდრებისკენაა და მათ
ყოველგვარ ცოდვას აბატეებს.

— კი, კი, ასეა, აბა?! — დაეთანხმნენ ზოგიერთები.

— აბა, წავიდეთ, ხალხო, და ჭირისუფალს მივუსამძი-
მროთ! — წამოაყენა წინადადება ოსმანმა, ტანმორჩილმა
გლეხმა.

— წავიდეთ!

— ყველანი ერთად წავიდეთ!

— აბა, სახედრებზე შეჯექით!

— ყველანი წავიდეთ, ყველანი! — აყაყანდა ხალხი.

ხუთი წუთის შემდეგ სოფელში მარტო ბავშვები და ქა-
ლები დარჩნენ, დანარჩენები თემელ-ხასანისას წავიდნენ.

მიდიოდნენ მტკრიან შარაზე, ზოგი ფეხით, ზოგიც სახე-
დარზე გადამჯდარი. ზემოდან მზე აცხუნებდათ, ქროდა ქარი
და გაუსაძლისი ხვატი იდგა.

სანამ სოფელი უკან არ მოიტოვეს და არ გაიმინდვრეს, არც ერთს არ ამოუღია ხმა. მიდიოდნენ მღუმარედ, დაუბრებულელებივით, თავთავიანთ ფიქრებში წასულები.

რომ გაიმინდვრეს, თითქოსდა ახლა გამოფხიზლდნენო, აყაყანდნენ, ჯერ ერთმა დაარღვია ღუმელი და მორჩა, ადიდებულ მდინარესავით იქუხა და ჯებირიც გადმოანგრია.

— ხომ ხედავთ, ამდენ სოფელში, ამდენ ხალხში მხოლოდ იგი, თემელ-ხასანს მოკვდა ამ წმინდა ღღეს, — დაიწყო იმ ერთმა.

— აბა, კაცო! — გაუკვირდა მეორეს, — მოდი და ცოდვილი უწოდე ამის მერე!

— ჩვენ კი ცოდვილი გვეგონა!

— რა ცოდვილი, რის ცოდვილი!

— მაგისთანა ცოდვილი ნეტავი ჩვენაც ვიყავით!

— წმინდანი ყოფილა!

— კი, კი, ნამდვილი წმინდანი ყოფილა!

— დაილოცა შენი სამართალი, ღმერთო!

— არა, რომ ვიცოდე, ამ ღღეს მოკვდები, დაიწყებ ლოთობას. იმდენს ვილოთებ, იმდენ გარყვნილებას ჩავიდენ, თემელ-ხასანს არ დაესიზმრება.

— მაგი რომ ვიცოდე, იმდენ ცოდვას ჩავიდენ, თემელ-ხასანის ცოდვა ჩემს ცოდვასთან ისე გამოჩნდება, როგორც ჭიანჭველა აქლემთან.

— არ დაიჯეროთ მაგი თქვენ, — ეჭვი გამოთქვა რომელიღაცამ, — არ მიიღებს ღმერთი ასეთ მოწყალებას, არ მოგკლავს იმ ღღეს და ქე შეგარჩება ეს ცოდვები ზურგზე აკიდული. ჰოდა, ჩვენი ხოჯისა არ იყოს, რას იხამ მერე იქ, საიქაოში? რა პასუხს გასცემ ღმერთს? ხომ ვერ ეტყვი, მაპატიე, ღმერთო, მეგონა, იმ წმინდა ღღეს მომკლავდი და ამდენი გარყვნილება იმისთვის ჩავიდინეო?

— ვერ ვეტყვი, რა თქმა უნდა!

— რას გაბედავ მაგას!..

— სწორია! არ შეცდება ღმერთი, ყოველთვის და არ მოგკლავს ყურბან-ბაირამზე, არა!

— შეცდება? რას ამბობ კაცო, შენ? მაგისი თქმა როგორ შეიძლება? ღმერთი როდის იყო ცდებოდა?

— ღმერთი კი არ ცდება, ხანდახან რაღაც შეღავათს დაუშვებს ალბათ!

— არავითარი შეღავათი!

— აბა?

— რა, აბა?

— რა და, შენი აზრით, აბა რას უნდა მივაწეროთ თემელ-
ხასანს მაინცადამაინც ამ დღეს სიკვდილი?
— ჰო, მაგისი რა მოგახსენო!
— წმინდანი იყო?
— ვინა?
— ვინა და თემელ-ხასანი!
— კარგი ერთი, რისი წმინდანი!
— ლოთი ხომ იყო?
— მერედა როგორი...
— ესე იგი, იყო ლოთი!
— იყო!
— გარყვნილი იყო?
— საშინელი!
— ესე იგი, იყო გარყვნილი!.. ლოცულობდა? მარხულობ-
და?

— არა, მეტი საქმე არ ჰქონდა!
— აბა, შენი აზრით, როგორ მოკვდა ამ დღეს?
— არ ვიცი მაგი მე!..
— მაგი ღმერთმა იცის!
— ჰო, ღმერთს უკეთესად მოეხსენება...

სოფლელები ხმაურით, ყაყანითა და ხმამალალი მსჯე-
ლობით განავრძობდნენ გზას. ასორმოცი, ასორმოცდაათი სუ-
ლი მაინც იქნებოდა. ზოზინით მიდიოდნენ მტკრიან გზაზე და
შორიდან ისე მოჩანდა, კაცი იფიქრებდა ქვეითებისა
და კავალერისტების შერეული პოლკი მტრის საიერიშოდ
მიდისო.

აყაყანებული ხალხი ერთხანს ჩაცხრა და მყუდროება ჩა-
მოწვა, რომელიც კარგა ხნის მერე ისევ დაარღვია ვილაცამ.

— თემელ-ხასანს ამდენი ცოდვა ჰქონდა ჩადენილი და
ღმერთმა მაინც ამ დღეს რომ მოკლა, ჩვენ ხომ იმის მეათასე-
ლი არ გვაქვს ჩადენილი?

— არა, რა თქმა უნდა!
— ჩვენ რას ვაკეთებთ იმდენს? ხანდახან ლოცვა ჩაგვი-
ვარდება, ხანდახან ვერ ვიმარხულებთ, ესაა და ეს...
— ვინ იცის, იქნება ჩვენაც გადმოგვხედოს ღმერთმა?
— ვინ იცის...

— ჩვენ წმინდანები არა ვართ...
— არა, წმინდანები არა!
— ხომ ხედავდით, რა დღე წაგვკიდა ჟემალ-ხოჯამ.
— აბა, კაცო?..
— რეები არ ილაპარაკა!
— რა გემოზე გვლანძღა, არა?

— ი, კი, მოვიცადო!

გლეხები სხვა სოფლების გლეხებს შეუერთდნენ, ჩრდილოეთით მოძებნეს და საუბარი განაგრძეს.

— არაყის მსმელი კაცი შვიდსულიანი იქნება და ასე ადვილად არ მოკვდება! — ეჭვი გამოთქვა ერთმა. — ერთი სული რომ ამოხადოს ღმერთმა, იმ დარჩენილი ექვსი სულით კიდევ ექვს თვეს გასტანს! სამხედროში არ გინახავთ მაინც სპირტს წამლად რომ ხმარობდნენ ეჭიმები?

— ჯი, კი, მაგი სწორია!

— ჰოდა, ექვს თვეს ხომ არ მოვიცდით აქ?

— რას ამბობ, კაცო?

— არა, იქნება ადრე მოკვდეს.

ზოგი სულის ამომრთმევე ანგელოზს, ეზრაილს აგინებდა, ზოგი თემელ-ხასანზე ბრაზობდა, რაკი კვდება, რატომ აქამდე არ მოკვდაო, ზოგი ისევ აზიმეს შვილს ალის უწიწმატებდა დედ-მამის სულს.

— არა, მაინც რატომ მოგვატყუა ასე? — ამბობდნენ ისინი, — რაში დასჭირდა იმ შტერსა და ჭკუიდან გადასულს ჩვენი გასულელება?

— დღეს თუ არ მოკვდა, მერე გინდა მომკვდარა და გინდა არა, სულ ერთია ჩვენთვის!

— რას ამბობ შენ? დღეს უნდა მოკვდეს, დღეს!

— კარგია, მაგრამ...

— მოკვდება კი ასე გამოწერილად?

— ვინ იცის...

— ერთხელ ვიფიქრეთ ცხოვრებაში ცოდვებისაგან გავწმენდილიყავით და ესეც ხელის შემშლა...

— აბა კაცო!..

მახმულმა ორიოდე ამფსონი გამოძებნა, აყაყანებული თანასოფლელები მიატოვა და ავადმყოფის სანახავად წავიდა.

* * *

მახმუდის მოლოდინში ხალხი ოდნავ მიწყნარდა, დაშოშმინდა. გადაწყვიტეს, ეს დღე მაინც გაგვიცდა, თუ თემელ-ხასანი არ მოკვდა, წამხდარ საქმეზე დასვენება მაინც შეგვრჩებაო.

მერე თემელ-ხასანის ცოლების ბედზე დაიწყეს მსჯელობა. თემელ-ხასანი უშვილძირო კაცი იყო. არც ძმა ჰყავდა და არც და. ასე რომ, ამოდენა ქონება ისევ იმ სამ ცოლს შორის უნდა განაწილებულიყო. რომელიც კანონიერ ცოლად ესვა თემელ-ხასანს, ყველაფერი მისი იქნებოდა. დანაოჩენ ორს კი ოასაც კანონიერი ცოლი არგუნებდა, ის შერჩებოდა.



შეიძლება ისეც მომხდარიყო, რომ რომელიმე მემამულე თაეს დასზმოდა, ქალები დაენარჩუნებინა და მთელი ქონება ხელში ჩაეგდო.

- სულ ერთია, ეს ქალები მაინც ვერ გაძლებენ უკაცოდ!
- ასკვნიდნენ სოფლელები.
- გაძლებენ არა, ის არ გინდათ?
- ვინ იცის, აქამდე კი ძლებდნენ?
- ჰო, ვინ იცის? თემელ-ხასანი ხომ ამდენი ხანია დავარდნილია და მაგის თავი სად ჰქონდა?...
- გაჩერდით ერთი...

* * *

დაღამებამდე ორიოდ საათი იქნებოდა დარჩენილი, როცა თემელ-ხასანის სახლიდან ხმაური მოისმა. სოფლელებმა სული გაკმინდეს და ყური მიუგდეს.

- ნამდვილად რაღაცა მოხდა! — დაასკვნა ერთმა.
- ნამდვილად! — დაეთანხმა მეორე.
- ეგერ, მახმუდიც მოდის!
- ჰო, მოდის და გვეტყვის...

მახმუდი თანასოფლელებთან მივიდა, მიწას დააჩერდა და ძლივგასაგონად ჩაილაპარაკა: — მოკვდა თემელ-ხასანი!

სოფლელებმა ძლივს დამალეს სიხარული. რომ არ შერცხვენოდათ, ხმამალალი ყიჟინით გამოხატავდნენ აღტაცებას.

- სიკვდილიც ამას ქვია! — ჩაილაპარაკა ერთმა.
- აბა! აბა!
- ბედნიერი სიკვდილია, ბედნიერი!

— აბა, გაემზადეთ! — ხმამალლა მოუწოდა თავის ხალხს ჯემალ-ხოჯამ, რომელიც ის-ის იყო მოვიდა, — ეს უბრალო მიცვალებული არ გეგონოთ, წმინდანია ცხონებული, წმინდანი!.. ახლა მთავარია მადლი არ დავკარგოთ, მადლი! მიდით ახლა, ხელ-პირი და ფეხები დაიბანეთ, გასუფთავდით და შეუდექით ცოდვების გამოსყიდვას!

სოფლელები უსიტყვოდ გაეშურნენ პატარა ღელისაკენ, რომელშიაც ისვები და ბატები ირეოდნენ.

ქორვლიანი ქალი

ქალაქიდან ჩვენს სოფელში ვბრუნდებოდ. ბილიკივით ვიწრო გზა ისეთი უფსკრულების გასწვრივ მიიკლავებოდა, საკმარისი იყო ერთი გადაგეხედა და. გათავდა — მაშინვე ში-

შისაგან ოფლით დაგეცვარებოდა შუბლი. ღამდებოდა, სოფელში მდებარე კი დიდი გზა მედო წინ. ღამით მგზავრობა ამ მხარეში დასრულდა. სახიფათო და მოუხერხებელია. აღარ ვიცოდი, რა მექნა. რა მედონა, არც უკან გაბრუნება ღირდა. მერე გამახსენდა, რომ იქ, მახლობელ სოფელში მამაჩემის მეგობარი ქადირ-ალა ცხოვრობდა. ქადირ-ალა ღარიბი გლეხი იყო. ძლივს, დიდი ვაინა-ჩრობით გაჰქონდა თავი წლიდან-წლამდე. მასთან ერთხელ ვიყავი ნაძყოფი, ისიც ბავშვობაში. გადავწყვიტე მივსულიყავი და მის ოჯახში გაშეთია ღამე. სახედარი მოვებრუნე და სოფლის გზას დავადექი.

ეკალ-ბარდებში გაფანტული ნახირის მოგროვებას ცდილობდნენ მწყემსი ბიჭები და იყო ერთი გადაძახილ-გადმოძახილი, ყვირილი, ყიჟინა.

— ქადირ ბიძია სად ცხოვრობს? — ვკითხე ერთ-ერთ მათგანს, ფეხშიშველ, ჩამოკონკილ ბიჭს.

— აგერაა, ე! ხელი გაიშვირა წინ, — სახლის წინ ბევრი შეშა რომ ყრია, იქაა!

თუ არ ვცდები, ამ სოფელს კარა კალას ეძახიან. სულ ათიოდე კომლი თუ ცხოვრობს. სოფელს რომ მივუახლოვდი, ახლა სხვას ვკითხე: ამა და ამ კაცის სახლი მასწავლე-მეთქი.

მიმასწავლა. გზა განვაგრძე. ორღობეში წყლის ჭურჭლებით ხელში მიმავალი ერთი მაღალი, მსხვილნაწნავებიანი ქალი შეჩერდა და უქერა დამიწყო. მაღალი, სავსე გულმკერდი ჰქონდა, დახეული კაბა ეცვა და თეთრი ბარძაყი მოუჩანდა, ფეხშიშველი იყო.

— ქადირის სახლში მიბრძანდებით, არა? — ვკითხე მან. — მე იმ სახლიდან ვარ, წამობრძანდით! — გაბრუნდა და წინ წამოძღვა.

ორღობეში ისეთი გაუვალი ტლაპო იდგა, სახედრიდან რომ ჩამოვსულიყავი, ტალახში მუხლამდე ჩავეფლობოდი. საცოდავი ვირი მუცლამდე ჩაეფლო ტალახში და ძლივს, ბორძიკით აღვამდა ნაბიჯებს.

ერთ ეზოსთან შევჩერდი. ეზოს კუთხეში ბიჭი ნაჯახით შეშას აპობდა, ახალგაზრდა, ფეხმძიმე ქალს კი შეშა მეორე სართულზე აჰქონდა.

ეზოში შევედით. ჭაბუკმა შეშის პობას თავი ანება, მომიანსლოვდა, მომესალმა და მკითხა: — სადაური ხართ?

— სოფელ ეფკარიდან ვარ, — ვუთხარი მე და ავათვალიერ-ჩავათვალიერე, — ამაღამ ქადირ ბიძიას სტუმარი ვიქნები! — დავურთე ბოლოს.

— კეთილი იყოს თქვენი მობრძანება! მამაჩემი ზევითაა, ჩამობრძანდით სახედრიდან!

— ახლავე გავაგებინებ მამას! — ჩაილაპარაკა ჭორფლი ანმა ქალმა, წყლით სავსე ჭურჭელი აიღო და მძიმედ შეუყვავა კიბეს.

მალე მეორე სართულზე ჭრიალით გაიღო კარი და წელში მოხრილი, ძონძებით შემოსილი კაცი მოადგა ზღურბლს: მაშინვე ვიცანი — ქადირ ბიძია იყო, მანაც მაშინვე მიცნო და წაძოძახა: — ოო, ჩვენი ველის შვილი მოსულა! მოდი, მოდი! რა კარგი ქენი, რომ გვესტუმრე!

სახედარი იქვე დავტოვე და კიბეს ავუყევი.

ქადირ ბიძიამ გადაძკოცხა, შემომცინა, მხარზე მომიცაცუნა ხელი, დაკვირვებით შემათვალისწინებდა და მერე მკითხა: — აქ საიდან გაჩნდი, ბიჭო, ჰა?!

— სასამართლოში ვიყავი დაბარებული, დამაგვიანდა, ღამე გზაში ვრჩებოდი და ისევ აქეთ გამოვლა და თქვენი შეწუხება გადავწყვიტე.

— კარგი გიქნია, ძალიან გამახარე! — მითხრა, ისევ შემომცინა, ისევ მომითათუნა მხარზე ხელი: — კეთილი იყოს შენი მობრძახება! — კართან მწოლ, უცხოს დანახვაზე აღრეხილ ძალს შეუწყრა და სანამ ოთახში შემოიძვებოდა, ერთხელ კიდევ მკითხა: — სასამართლოში ვიყავი და დაბარებული, რომ თქვი, რა დააშავე ასეთი?

— ჩადენით არაფერი, მაგრამ ქვეყანაზე ბოროტ კაცს რა გამოლევს?

— ასეა! — ჩაილაპარაკა და თავი გადააქნია.

შევედით სუსტად განათებულ, ჩაბინძურებულ, ღარიბულად მოწყობილ დიდ ოთახში. ავეჯი, თუ ყოველი ნივთი, ძველი იყო, სანახევროდ დამტვრეული, ბუხარში ძხიარულად გაზვიზვიებდა ცეცხლი: ფარდაგზე წამოგორებული გოგონები გაკვეთილს ამზადებდნენ. ჩემს დანახვაზე ფეხზე წამოიჭრნენ და შორცხვად მომესალმნენ, ოთახის კუთხეში დაგლეჯილ ფარდაგზე მჯდომი ქალები ძაფს ართავდნენ, ოდნავ დამიქნიეს თავი და ისევ თავიანთი საქმე განაგრძეს. მათ შემოხედვაზე მივხვდი, ჩემი დანახვა მაინცდამაინც არ ესიამოვნათ. ვიგრძენი, რაც გაივლეს გულში. კაცმა რომ თქვას, მართალი იყვნენ: როცა სახლში არაფერი გაქვს, სტუმრის მოსვლა პირდაპირ უბედურებაა.

— ამ კუთხეში ჩამოვჯდეთ აგერ! — მანიშნა ქადირ ბიძიამ, — რაც მამაშენი გარდაიცვალა, მას შემდეგ აღარ ვყოფილვარ თქვენთან. ვერ მოვახერხე გამოვლა. როგორ ხარ, დედა და ძმები როგორ არიან?

— არა გვიშავს რა, ვცხოვრობთ... დავეტრევი ბიძია აქეთ-იქით. ქვიდან ქვაზე ვეხეთქებით, ძლივს ვარჩენთ ოჯახს და ქე ვართ ასე!



ქადირმა ლოყაზე ჩამოსვა ხელისგული და ამოვიწყო
 ეჰ, ასეა, ასე! ცხოვრება ყველგან გართულდა და წახდა, ტან-
 ზე ველარ გამოგვიცვლია, აგერ, კონკეები გვაცვია. შემოგვად-
 ნა ტანსაცმელი. ერთ უბედურებას მეორე მოსდევს და ასე,
 კრიალოსნის მარცვლებივითაა გადაბმული ყველაფერი ერთმა-
 ნეთზე. ამ ზაფხულს პურის ყანა სეტყვამ მოგვისპო... ორი შვი-
 ლი ანკარაში გავისტუმრე სამუშაოდ — იქნება, ორი კაპიკი
 იშოვონ და ოჯახს წაადგენენ-მეთქი, ვიფიქრე. მაგრამ სადაა
 ხერიი და ბარაქა, იგენმა რომ ნახონ? წერილი მომწერეს —
 რასაც ვშოულობთ, საკვებად არ გვყოფნის, ნახევრად მშვი-
 რები ვართ დარჩენილი და ჩვენი იმედი ნუ გექნებათო!.. ორი
 ცალი საპონი და ოთხიოდე მეტრი ტილო რომ გამოეგზავნათ,
 წამხდარ საქმეზე ისიც კარგი იყო, მარა, რას იზამ?... ქალი-
 შვილებიდან სამი გავათხოვე, ვაჟებიდან ერთი დავაქორწინე
 და ახლა ორი ვაჟი და ორიც ქალიშვილი დარჩა დასაქორწინე-
 ბელი.. იმ სამი გათხოვილიდან ერთის საქმე ვერ წავიდა კა-
 რგად... — სათქმელი აღარ დაამთავრა, გაჩუმდა და რალაცაზე
 მწარედ ჩაფიქრდა.

დრო ვინელთე და ამჯერად მე წამოვიწყე საუბარი: —
 ახლა ყველანი ანკარაში გარბიან სამუშაოდ და, რა თქმა უნდა,
 ადგილის შოვნა ძნელი გახდა. მაგრამ, როგორც ამბობენ, ადა-
 ნაში უფრო ადვილად ინახება სამუშაო. იქ რომ წასულიყვ-
 ნენ შენი შვილები, იქნება ქე გამართლებოდათ.

— ეჰ, ყველგან ერთი და იგივეა! — ხელი უიმედოდ ჩა-
 იქნია ქადირმა — აქაც ბევრნი დადიან, ნუ გეშინია! ჩვენი სო-
 ფლიდანაც იყვნენ ადნაში, მაგრამ ხუთი ყურუშიც ვერ დააგ-
 როვეს...

დისახლისი სუფრის გაწყობას შეუდგა. სავსე მკერდიან-
 მა, ჭორფლიანმა ქალმა მეორე ოთახიდან ფლავით სავსე ჭურ-
 ჭელი შემოიტანა და მაგიდაზე დადო. ეტყობოდა ის-ის იყო
 გადმოედგათ ცეცხლიდან, ისეთი ოხშივარი ასდიოდა.

— ბოლოკი, წიწმატი, მწვანელი... რაც არის, ყველაფერი
 მოიტანე! — უბრძანა ქადირმა.

— სელვერ, რძალსა და ძმას დაუძახე, შვილო! სუფრა
 მზადაა-თქო, და შემობრძანდნენ! — სთხოვა ქალმა ჭორფ-
 ლიანს.

თურმე სელვერი ჰქვიებია იმ ჭორფლიანს.

— ახლავე, ბატონო! — ჩაილაპარაკა მან და მეორე ოთახ-
 ში გავიდა. მაგრამ მალევე შემობრუნდა და თქვა: — ისინი არ
 შემოდიან, მეორე ოთახში ჰამენ.

ქადირ ბიძიამ თავი გაიქნია, მუხლზე დამადო ხელი და
 თქვა: — აბა, წავატეხოთ ცოტა!

მივუჯექით სუფრას. სელვერი ჩემს გვერდით მოთავსდა.



ქადირ ბიძიამ მკლავზე მომკიდა ხელი და მომიბოდიშა: — შენ ჩვენი სახლიკაცი ხარ, სუფრა ვერაა ისეთი, როგორც შენ გეფერება, მაგრამ, იმედია არ დაგვძრახავ, გვაპატიებ.

— აჰ! როგორ ვეკადრებათ, ეს რა სათქმელია? ყველაფერი არის... ეს ოქროსფერი მჭადი ხომ ყველაფერს უდრის, ღმერთმა ნუ მოგვაკლოს მაგი. ესეც რომ არ გვქონდეს, რაღა გვეშველებოდა მაშინ?

— ყველაფერი ღმერთის ბრძანებით კეთდება, მის განგებას ვენაცვალე მე! — თქვა ქადირმა.

ღმერთის ხსენებაზე იმ ხანდაზმული ქალებიდან ერთ-ერთი აწუწუნდა: — რა მოგვცა ღმერთმა? თორმეტი თვე ვსაქმიანობთ, ვწვალობთ, წელებზე ფეხს ვიდგამთ, ჩვენს წონა თფლს ვღვრივთ...

ქადირ ბიძია გაბრაზდა, ქალს თვალები დაუბრიალა და უთხრა: — სტუმრის წინაშე ამ თეფშს რომ თავზე დაგაფშვნი, მაშინ ჩაიგდებ ენას! მიფრთხილდი! სიკვდილის პირზე ხარ მისული, ძლივს დაფარფატებ და ღმერთის აუგს მაინც არ იშლი? მასეთი ხასიათი რომ გაქვს, მასე რომ ავინებ ღმერთს, იმიტომაცაა, რომ ცხოვრება გაგიძნელდა და ვერ გაიხარე.

შეშინებული ქალი გაჩუმდა. მყუდროება ჩამოწვა, დაუბრებულებივით ვვახშობდით. მოგტეხდით მჭადის ნატეხს ერთ ლუკმას, ჩავიდებდით პირში, ვაყოლებდით ერთ კოვზ ფლავს და წვრილად დაჭრილ ბოლოვს. სელვერი რატომღაც შორცხვობდა და წამდაუწუმ წითლდებოდა, ხელები ოდნავ უთრთოდა. ლურჯი თვალები ჰქონდა, სახეზე წვრილად დაკეცილი წვრილი ჭორფლი ეშხსა და მომხიბვლელობას ჰმატებდა.

— ეს ქალიშვილები სკოლაში დადიან, არა? — ვკითხე ქადირს და გოგონებზე ვანიშნე.

ქადირმა წარბი შეჭმუხნა და ავდებულად აიქნია ხელი: — სკოლაში დადიან მარა, რად გინდა მერე? უნიჭოები არიან, სადაც გამოლაყებულ თავში აოათერი არ შედის. როოს აცდენენ ტყვილად, ამ ჩვენი მთავრობის საქმე პირდაპირ გასაკვირია. სპეციალურად მასწავლებელი გამოგზავნეს ქალაქიდან და ასწავლის ამ სოფლის ბაღებს. ამასწინათ რევიზია ამოვიღო... ჩაძეკა წინ ლაპაოაკობდა ხალხი და ყურო წავკარი: არც ერთი ბავშვი არ მოსწონებიათ, ყველა უცოდინარი და შტერი აღმოჩნდა თურმე. ჩვენს სოფელში ერთ ჭკვიანს ვერ წააწყდები და საიდან ეყოლებათ შტერებს ჭკვიანხი შვილები?!

ორჭოფულად ავიჩეჩე მხრები და ვკითხე: — შენს დაქორწინებულ ბიჭს ისმაილი ქვია, არა? ჯარში თუ იყო?

— კი, იყო. სამხედრო სამსახურის მოხდის შემდეგ დავა-

ქორწინე, ერთი შვილი ყავს, მაგის ქალი მეორეზე მზადაა უკვე და საცაა დასვამს კიდევ. მეტი შვილი არაა საქირი-მეთქი, ვეუბნები, ვნახოთ, დამიჯერებენ თუ არა. მე რომ მყავს აგერ ბევრი შვილი, რა კარგი მჭირს? ესაა საქმე?

სელვერი დამწუხრებული იჯდა, ხანდახან მალულად გამომხედავდა. თვალეში სევდა ედგა, ეტყობოდა რაღაცაზე დარღობდა.

— ბევრი შვილი საერთოდ არ ვარგა, — განაგრძობდა ქადირ ბიძია, — არც ერთზე მეტი ცოლის მოყვანაა კაი საქმე. მე, როგორც იქნა, ორი ცოლი შევირთე... პირველი ავადმყოფი იყო, სულ კრინავდა და მეგონა მოკვდება-მეთქი... ავდექი და მეორე შევირთე. ბედი რომ გაწირავს კაცს ისაა, ეს დასაბრმავებელი არ მოკვდა და ქეა ასე. სურვილის მიხედვით რომ ვერ იცვამს და ჭამს, აუგს შიტომ ამბობს ღმერთზე, აძიტომაა ღმერთი გაბრაზებული ჩემს ოჯახზე.

ქადირის პირველი ცოლი, ეტყობოდა დიდი კაპასი ვინმე იყო. სიტყვა არ შეარჩინა ქმარს და ისევ აწუწუნდა: — მე შენს ზურგზე არ ვცხოვრობ, გაიგე? ჩემი შრომით ვირჩენ თავს და ასეთ აუგს როგორ მეუბნები სტუმრის წინაშე? ასეთ რამეს ქვასაც არ ეტყვიან. თუ გინდა, დავავლებ ხელს ჩემს ქალიშვილს და წავალ ახლავე. შენაც ხომ ძაგი გინდა, ორი მჭამელი მოგაკლდება და დარჩები შენს თვალისჩინთან.

მივხვდი, „თვალისჩინში“ ქადირის მეორე ცოლს გულისხმობდა და გამეღიმა.

მერე ისევ მყუდროება ჩამოწვა, რომელიც მალე ქადირმა დაარღვია:

— სელვერი უნდა წაიყვანონ ამაღამ! — თქვა დინჯად, სხვათა შორის.

შევამჩნიე როგორ შეცბა სელვერი, მხრები აუთრთოლდა და ტუჩები შეარხია.

— წაიყვანონ?... — ვერ მივხვდი მე.

— გავათხოვე, ელაფ-აღას შვილს მივეცი!.. ოჯახს ვერ შეეწყო და ერთი წლის მანძილზე ორჯერ გამოექცა სახლიდან: სულ სცემდნენ თურმე, ბევრი არ ჭამო, პურსა და მჭადს ამაღლიდნენ, დედამთილს არ ემსახურებო, ქმარს არ ემორჩილებო, ჩვენს ოჯახს არ შეეფერებო... ერთ დღეს ტანსაცმელი გაუხდიათ ტანზე, კონკები ჩაუცმევინ და გამოუგდიან გარეთ... ნუთუ ასე ცუდია ჩემი გოგო? ახლა სხვას ვატან... — სოფელ ოლანდიდან მთხოვს ერთი... პირობა მივეცი და ამაღამ უნდა მოვიდნენ მაგის წასაყვანად.

სელვერს გადავხედე, მერე ქადირს მივუბრუნდი და ვთქვი: — უკვე გავძეხი, ბიძია! ღმერთმა ხვალი და ბარაქა ნუ



მოაკლოს უენს ოჯახს... ესე იგი, სელვერის წასაყვანად უნდა მოვიდნენ, არა?

— ჰო, სიტყვა მიცემული მაქვს და უნდა მოვიდნენ... წინასწარ ვაფრთხილებ სელვერს — კარგად შეუხმატკბილდეს, იმ ოჯახს და რასაც ეტყვიან, ყველაფერი დაუჯეროს, სულ „კი ბატონო“ და „კი შეხი ჭირიმე“ უძახოს ყველას! აბა დედამისით თუ იჯიუტა, ისევ გამოაგდებენ გარეთ და ის იქნება. სასიძოსაც უნდა ვუთხრა, არ სცემოს ჩემს გოგოს.

ქალებმა სუფრა აალაგეს. ჩვენ კუთხეში მივჯექით და საუბარი განვაგრძეთ. ქადირი თავის თავზე მიაშობდა: — მე მორწმუნე კაცი ვარ, ჩემო ბიძია, სულ ჯამეში დავდივარ და ვლოცულობ. მხოლოდ დღეს ვერ წავედი ჯამეში, რადგანაც ჩემი ქალიშვილის წასაყვანად უნდა მოვიდნენ... ცხოვრებაში რაღაცას ქე მივალწიე. მამაჩემი რომ მოკვდა, ღვთის ანაბარად დავრჩი, მიშველ-ტიტველი, უსახლკარო, საკუთარი ხელების მეტი არაფერი გამაჩნდა.. მივყევი, მივყევი ნელ-ნელა და ეს სახლი ავაგე, ბაღია, საყანე გავიჩინე, საქონელი მოვაშენე, მაგრამ მაინც არ მყოფნის, არ კმარა... ახლა სელვერი მიდის, ამ ორ წელიწადში ამ გოგოების მთხოვნელიც გამოჩნდება და გავიცლი ხელს... მხოლოდ ისმაილის საქმეა გაურკვეველი. მალე მეორე შვილი გაჩნდება. მერე, დროთა განმავლობაში ვინ იცის კიდევ რამდენი ეყოლება, ჰოდა, რჩენა არ უნდა მაგენს? საკუთარი ერთი ძტკაველი შიწაც არ გააჩნია! სულ მაგაზე ვფიქრობ დღე და ღამე, მაგრამ გამოსავალი ვერ მიპოვნია.

— ანკარაში წასულებზეც ხომ უნდა იფიქრო, ბიძია? იმათ რა უნდა ქნან? — შევასხენე მე.

ქადირ ბიძიამ გაბრაზებით ჩაიქნია ხელი: — იმათმა თავისით გამონახონ რაიმე საშუალება, თავი გაანძრიონ და გამონახონ. მე მეტი აღარ შემიძლია, გამისკდა თავი ამდენი ფიქრითა და დარდით. გიყები და შტერები არიან ორივენი. უენ არ იცი, რა აცვენილები იყვნენ მაგენი. სოფელში ყველას მოაძულეს თავი, ჩხუბისა და ცემა-ტყევის მეტს არაფერს აკეთებდნენ... ვინ იცის, დაბრუნდებიან კი საერთოდ შინ? რომც დაბრუნდნენ, ისე აქვთ სახელი გატეხილი, ქალს არავინ არ მისცემს მათ აქ... აგერ სელვერს ვეუბნები, ხანდახან მამაზედაც იფიქრე-მეთქი! იმ სოფლიდან, სადაც მაგი თხოვდება, ჩვენს სოფლამდე დიდი გზა არ არის, შეჯექი სახედარზე და მულთან და დედამთილთან ერთად ხშირად მეწვიე-მეთქი! ქმართან შეხმატკბილებულად იყავი, შვილებს ბევრს ნუ გააჩენ, თორემ მოვლა-პატრონობა გავიჭრდება-მეთქი, ერთი შვილიც საკმარისია-მეთქი!



სელვერმა სუფრა აალაგა, მერე ტაშტი და დოქით შემოიტახა და მე და ქადირ ბიძიას ხელები დაგვაბანინა. ქადირმა კედელზე მიჭედებული ფიცრის თაროდან თამბაქოთი გატეხილი ჭისა ჩამოიღო, გოგონების რვეულიდან ფურცელი ამოხია, თამბაქო გაახვია და მკითხა: — შენ არ ეწევი?

— კი, ხანდახან...

მან ჭისა გამომიწოდა: — აიღე, შეახვიე თუთუნი. ქალაღლი სქელია, ძაგრამ რა ვქნა, უკეთესი ამ ჩვენს სოფელში არ არის და...

რა საბოდიშოა-მეთქი, ჩავილაპარაკე, თამბაქო გავახვიე და მოვუკიდე. ვეწეოდით და თამბაქოს ბოლში გახვეულები წყნარად ვსაუბრობდით.

სელვერმა საქმე მოათავა, კარის მახლობლად მიჯდა და ერთმახეთზე მიტყუებულ მუხლებზე დაილაგა ხელები.

ველაპარაკებოდი ქადირ ბიძიას და დროდადრო მალულად გადავხედავდი სელვერს. ისიც გადმომხედავდა ხოლმე და მალულად მათვალაიერებდა.

ძალიან მებრალებოდა ეს ახალგაზრდა ქალი, მებრალებოდა ასეთი უბედური რომ იყო, ასეთი კრული ცხოვრება რომ ჰქონდა. ლამაზი ქალი იყო, სანდომიანი და მომხიბვლელი. მას სულ სხვანაირი ცხოვრება უნდა ჰქონოდა, იგი ღირსი იყო სუფთა, ქაიქათა ლოგინში წოლილიყო, რბილ, აფუებულ ბალიშზე დაედო ლამაზი თავი, ყოველდღე საუკეთესო საპნით დაებანა ხელ-პირი და ტანი, ჩაეცვა საუკეთესო ტანსაცმელი და ფეხსაცმელი... აფსუს, როგორი ქალი იქნებოდა მაშინ, რა ბროლივით გამჭვირვალე კანი ექნებოდა... იგი მარტოხელა უნდა ყოფილიყო, და ჩემს გარდა არავინ არ უნდა ჰყოლოდა გვერდით, ყოველ დილით უნდა მენახა, თუ როგორ გაიღვიძებდა იგი, როგორ მომაპყრობდა სელის ყვავილივით ლურჯ თვალებს, როგორ შეატოკებდა გრძელ, მორკალულ ქერა წარბებს და დაათახულებდა გრძელ წამწამებს... ქადირ ბიძიას საუკეთესო ტანსაცმელში გამოწყობილი უნდა ენახა სელვერი, რათა ვაეგო, დარწმუნებულიყო, თუ რა განძის მფლობელი იყო. მან რა იცოდა, თუ რა ქალი იმალენოდა ამ ქუჭყიან, ჩამოკონკილ და ფეხშიშველ გოგონაში...

თანდათანობით მიპყრობდა მწარე ფიქრები, რატომღაც საკუთარი თავიც მეცოდებოდა და სელვერიც. აუტანელი ზიზღი მახრჩობდა ასეთი ცხოვრების, ასეთი ხვედრის გამო. ბურანში წასულივით ვიჯექი გაუნძრევლად და კარგად არც კი მესმოდა, თუ რაზე მელაპარაკებოდა ქადირ ბიძია. დიდხანს, დიდხანს ვდუმდი აღთქმამიცემულივით, მერე კი ახალგაზრდაობის მუხრამით ავწიე თავი, დაბინდული მზერა მივაპყარი ქა-

დირს და წყნარად ვიკითხე: — სულვერის გათხოვება საბო-
ლოდ გადაწყვიტე?

ქადირმა მშვიდად შემომხედა და წყნარად დამიქნია: — კი, საბოლოოდ! ძაგანაც იგემოს თავისი წილი ცხოვ-
რება და სიტკბოება! რა ვქნა, ამხელა ქალს სახლში ვერ გავა-
ჩერებ, ვერ დავიდებ მის ცოდვას. იცი, მე მორწმუნე კაცი
ვარ, ცოდვის ჩადენისა მეშინია. როცა მოვკვდები და საიქიო-
ში, ღმერთის წინაშე წარვდგები, მინდა უცოდველი ვიყო, არა-
ვითარი ცოდვა არ მქონდეს ჩადენილი. თუ აქ, სიცოცხლეში
ვერ ვნახე ბედნიერება, იქ, სამოთხეში მაინც ხომ უნდა იცხო-
ვროს ბედნიერად კაცმა? ხომ არ შეიძლება იქაც სხვების მო-
ნა-მორჩილი იყო, იქაც გმოოდეს, იქაც უფულოდ, უპერან-
გოდ, უფუქვილოდ და უთუთუნოდ დარჩე? აქ თუ არა, იქ, იმ
ქვეყანაში ხომ უნდა იცხოვრო აღამიანურად მაინც?

ვუსმენდი ამ გულუბრყვილო, თავის თავში დარწმუნე-
ბულ კაცს, სახეზე დიდი სევდა მქონდა აღბეჭდილი, ნელ-ნე-
ლა ვუქნევდი თავს, თითქოსდა ყველაფერში ვეთანხმებოდი
და ვფიქრობდი ჩემთვის: „ასეთი სისულეები რომ გჯერავს,
მავითი მაინც ხარ ბედნიერი!“

ქადირი ისევ სამოთხეზე და ცოდვებზე განაგრძობდა საუ-
ბარს. მე კი ჩემს ფიქრებში ვიყავი წასული. დროდადრო ისევ
ვაპარებდი ფარულ მხერას სელვერისაკენ.

— სელვერი დღეს უნდა წაიყვანონ? — ვკითხე ბოლოს,
როცა იგი სამოთხეზე საუბარს მორჩა.

— კი, ამაღამ მოვლენ! — ენერგიულად დააქნია თავი და
მცირე დუმილის მერე, თითქოსდა ახლა გაახსენდაო, განაგრ-
ძო: — შევთანხმდით, ოთხასი ლირა უნდა მომიტანონ, პირო-
ბა ასეა. მომცემენ ოთხას ლირას და გავატან, არ მოიტანებენ
და არ გავატან. თუ ფული არ გაქვთ, ხარი გაყიდეთ, ძროხა
გაყიდეთ, სახედარი გაყიდეთ და ფული მოიტანეთ-მეთქი.

— თუ არ მოიტანეს, ისე ქალს არ გაატან, არა? — ვიკი-
თხე, წყალწაღებული ხავსს რომ მოეჭიდება ისე.

— რა თქმა უნდა! — დამიმოწმა მაშინვე, — უფულოდ
რას მივცემ? ქვა გახეთქონ, იშოვონ და მომიტანონ. ხომ ხე-
დავ, კონკები გვაცვია ყველას, საცვალი არა გვაქვს და გამო-
საცვალი, როგორც კი ფულს მოიტანენ, შევჯდები სახედარზე,
ჩავალ ქალაქში, ვიყიდი ტილოსა და ჩიოს, თამბაქოს, ყავას.
იქნება ბაზარში ჩემთვის ძველ პალტოსაც წავაწყდე, თორემ
ვიყინები ზამთარში, ვარეთ ვერ გავდივარ, ამ ქალებს კალოში
და წულა-მესტები ჭირდებათ, გოგონებს ქალამნები... ყველას
რაღაცა გვჭირდება და არ ვიცი, ეყოფა თუ არა ყველაფერს
ეს ოთხასი ლირა.

ვუსმენდი და ცალი თვალი კარისაკენ მქონდა. უოველ წუთში ველოდი ძაღლის აყფებას, ძახილსა და ფეხის ხმას. ველოდი, როდის მოვიდოდნენ სელვერის წასაყვანად... მერე წარმოვიდგინე, როგორ მოხდებოდა ეს: — ო, ქადირ ბიძია! — გავიგონებდი ძახილს. ძახილზე სახლში ყველანი ფეხზე დადგებოდნენ. სტუმრებს — ერთ კაცსა და ორ ქალს კიბესთან მიეგებებოდნენ, სახედრებს ჩამოართმევდნენ, მაღლა ამოუძღვევოდნენ და სასტუმრო ოთახში საპატიო ადგილს მიუჩინდნენ: საუბარი გაიმართებოდა. სალაპარაკო ბევრი არ ექნებოდათ, მერე სელვერისათვის მოტანილ ბოხჩას გაშლიდნენ შუა ოთახში და ყველას დანახვებდნენ, თუ რა მოუტანეს სარძლოს. მერე საჩუქრებს ჩამოარიგებდნენ — ქადირ ბიძიას ხუთ-ექვს კოლოფ სიგარეტს, ქალებსა და გოგონებს თითო-თითო ლეჩაქს, ისმაილს — ბებუთს, ფეხმძიმე ქალს — ჭრელ პირსახოცს. ბოლოს ჯერი ფულზე მიდგებოდა. სტუმართაგან ერთ-ერთი ქალი დიდისამბით ამოიღებდა ჯიბიდან საფულეს, გახსნიდა, ფულს ამოალაგებდა, გაუწოდებდა ქადირ ბიძიას და მობოდიშებით, შემპარავად იტყოდა: — ორასორმოცდაათი ლირა! ბევრი ვეცადეთ, მაგრამ ოთხასამდე ვერ ავათავეთ, დანარჩენს მომავალ შემოდგომაზე გაახლებთ!..

ქადირ ბიძია ქვას ააგდებდა და თავს შეუშვერდა, აყვირებოდა, არ აიღებდა ფულს, მერე კი, როცა ხვეწნას დაუწყებდნენ, მოღებებოდა და დართავდა ნებას, რათა ქალი წაეყვანათ... სელვერი ცრემლით სავსე თვალებს მომაპყრობდა. დიდი, უსაშველო დარდი იქნებოდა აღბეჭდილი მის ლურჯ თვალებში. მეც მომეძალებოდა ცრემლი, მაგრამ თავს შევიკავებდი, არ ვიტირებდი...

— აბა, შვილო, იყავი ბედნიერი და ნუ დამივიწყებ! — იტყოდა ათრთოლებული ხმით ქადირ ბიძია და თვალებს ააოიღებდა შვილს. სელვერი კი ხმამაღლა აჭკითინებოდა. ატირებდოდნენ დედა და გოგონები. ისმაილი ფეხმძიმე ცოლს მიატოვებდა და დას უღელტეხილამდე გააცილებდა, ჩვენ აივანზე გავიდოდით და მანამდე ვიდგებოდით იქ, სანამ კვარის სინათლე სიბნელეში არ დაინთქმებოდა და უკუნი არ ჩამოწვებოდა ირგვლივ. მერე შევბრუნდებოდით ოთახში და დიდხანს, დიდხანს ვიჯდებოდით მოწყენილი და მღუმარე. ყველაზე მოწყენილი მაინც მე ვიქნებოდი... რამდენიმე საათის შემდეგ კი სელვერი საქმროსთან — ნურისთან ერთად დაკონკილი, ჭუჭყიანი საბნის ქვეშ დაწვებოდა. მერე ყველანი დაიძინებდნენ. მე ალბათ სელვერის დატოვებულ საწოლში ჩამაწვენდნენ და გულზე მოწოლილი სევდა არ მომცემდა. დაძინებინს საშუალებას. თვალები ცრემლით მექნებოდა სავსე და არც შემრცხვებოდა ტირილისა... ოჰ, რა იქნებოდა, სოფელში ერთ-

თი ორმოცი-სამოცი ქცევა მიწა მქონოდა, იქვე, მოსა-
წყავი წყალი. ასე რომ ყოფილიყო, უყოყმანოდ ჩავკიდებდი
ხელს სელვერს, წავიყვანდი სახლში და ვიქნებოდით სულ ერთ-
თად. ზამთრის დიდ და ცივ ღამეში ერთმანეთს ჩახუტებულ-
ები დავიძინებდით. გვეყოლებოდა შვილები, დაგზრდილით,
გზაზე დავაყენებდით... ჩემს ბედს ძალღიჯ არ დაპყევდა, ჩე-
მზე ბედნიერი კაცი არ იქნებოდა ამ ქვეყანაზე.

მე და ქადირ ბიძიამ კიდევ ერთხელ გავახვიეთ თამბაქო
და გავაბოლეთ. ოთახი თანდათან თამბაქოს მყრალი ბოლით
გავივსო. ვიჭეჭით ნახევრად ბნელში. კაცისშვილი არ იღებდა
ხმას და ირგვლივ გაუსაძლისი მღუმარება იდგა. სელვერს
ხელები ერთმანეთზე მიტყუებულ მუხლებზე ეწყო და შეთ-
ქმულივით სდუმდა. დროდადრო მისი ჭორფლიანი სახე ფერს
იცვლიდა.

კარგა ხნის მერე ისევ მე შევეცადე დუმილის დარღვევას,
მივუბრუნდი ქადირს და ვკითხე: — ისმიალი არ შემოვა, ქა-
დირ ბიძია?

— როგორ არ შემოვა, შემოვა!

— რძალს ალბათ მუცლის ტკივილი დაეწყო და მიტომ
არ შემოვიდა ისმიალი! გავალ, დავხედავ ერთს! — თქვა სელ-
ვერის დეიამ, ადგა და მეორე ოთახში გავიდა.

• კარის გაღებისთანავე ოთახში სუფთა ჰაერი შემოიჭრა
და ოდნავ მომეფინა გულზე.

ოთახის ჭერზე ერთგვარი ხმელი ბალახის კონა იყო ჩამო-
კიდებული, რომელსაც საშინელი სუნი ასლიოდა. ამ ბალახს
„ჯამეს ცოცხს“ ეძახდნენ და მას ცრუმორწმუნე სოფლელები
ეშმაკისაგან დასაცავად ხმარობდნენ.

— ამ ბალახის სუნი გსიამოვნებს, ქადირ ბიძია? — ვკი-
თხე ქადირს, რომელიც რაღაცაზე ჩაფიქრებული უღამაძებს
იგრეხდა.

მან თავი გააქნია: — არა, მე უფრო იონჯის სუნი მსიამო-
ვნებს... — კიდევ უნდოდა რაღაც ეთქვა, მაგრამ ამ დროს კა-
ლი გაიღო და ოთახში ისმიალი შემოვიდა.

— ადამიანს სული შეუწუხდება აქ, ამ მთებში, არა? —
ვკითხე მე სხვათა შორის. რაღაცა ხომ უნდა მეთქვა და მეტი
ვერაფერი მოვახერხე.

— კი, სული შეუწუხდება! — დამეთანხმა იგი, — მაგრამ
რას იზან? ისე, კაცმა რომ თქვას, მთაში იცხოვრებ თუ ბარში,
სულ ერთია, სოფელი მაინც სოფელია. თუ გინდა რომ სული
არ შეგიწუხდეს, მაშინ ქალაქში უნდა გაიქცე და იქ იცხოვრო.
ქალაქი მაინც სულ სხვაა.

ქადირ ბიძიამ მაშა აიღო, ნაკვერჩხლები გაჩხრიკა და ჩა-
ფიქრებულმა დაიწყო: — დრო გადის, ადამიანი კი ჯერჯერო-

ბით ზირუტყვისაგან დიდად არ განსხვავდება. მე აქ დავიბადე, აქ ავიდგი ფეხი, აქ გავიზარდე, აქ ვცხოვრობ, აქ მოვეყვები და ჩავლბები ამ მიწაში. ვიცი მე, ბოლოს მაინც სიკვდილია და გერაფერი დამიხსნის სიკვდილისაგან. ეს ყველამ იცის, მაგრამ მაინც ვერ დავვითმია ეს ცხოვრება, მაინც გვინდა სიცოცხლე! იქ, მაღლა რომ მთები მოჩანს, იმ მთების მწვერვალებზე რომ ახვიდე, კიდევ სხვა მთას დაინახავ. ეს ქე ვიცი, იმას დაქით კი რა არის. ეს არ ვიცი, არც ჩემმა ცოლებმა იციან ეს. ისმაილმა აგერ ჩემზე მეტი იცის. მან სტამბულის თითქმის ყველა უზანი იცის, იქ მოიხადა სამხედრო სამსახური, იქაური სასაფლაოები, უნახავს, იქაურ მეჩეთებში ულოცია!.. მეც ბევრს ვლოცულობ, ყველა სავალდებულო ლოცვას ვასრულებ მეჩეთში. როცა ადამიანი ღმერთის წინაშე წარდგება, ლოცვის დანაკლისი არ უნდა ჰქონდეს, ამ ლოცვების მხრივ ძალიან მეშინია! თუ ღმერთი მაინც გამოიჩინახავს რაიმე მიზეზს, ეს მისი საქმეა.

ხმაგაკმენდილი ვუსმენდი. იგი ისე ლაპარაკობდა ღმერთთან ურთიერთობაზე, როგორც რომელიმე სოფლელი გლეხი თავის ნაცნობ ალაზე.

ასეთი მორწმუნე კაცი იყო ქადირ ბიძია.

— ამ საღამოს მეხუთე ლოცვისათვის ეზანი ხომ არ გადმოუძახიათ მინარეთიდან? — ვიკითხე მე.

— ჯერ არა! — თავი გააქნია ქადირმა.

— ჩვენი ხოჯა სხვა სოფელშია წასული. ქერიმჯე ყოფილა ძალიან ცუდად და ლოცვა უნდა წაუკითხოს თურქე! — აგვიხსნა ისმაილმა.

მერე მყუდროება ჩამოვარდა. ვიჯექი ბინძურ, ჩამოხუთულ ოთახში და შეფარვით გავცქეროდი მოლოდინით აღსავსე, დასევდიანებულ და გაჩუმებულ ადამიანებს.

უეცრად ძალი აყეფდა და გამეფებული მყუდროება დაარღვია: თიქოსდა დედამიწა იძრაო, ისე შევეტორტმანდი. ყველანი ფეხზე წამოდგნენ. ავდექი მეც, უკვე ვიცოდი რაც მოხდა — სელვერის წასაყვანად მოვიდნენ...

თითო-თითოდ შავოდით!

მისი ნამდვილი სახელი სულეიმანი იყო, მაგრამ სოფელში ყველა ყვითელას ეძახდა. ცისფერი თვალები, შავი, ჯაგარივით თმა და კომშივით ყვითელი, ხმელი სახე ჰქონდა. ერთთავად დაღვრემილი და ჩაფიქრებული დადიოდა, სიტყვაძუნწი კაცი იყო, იშვიათად თუ დაილაპარაკებდა. ნამდვილი

მევობარი და ამხანაგი არ გააჩნდა, ვინმე თუ დაეღაპარაკებოდა, ერთ-ორ სიტყვას ეტყოდა და გაეცლებოდა. მართლაც რომ უცნაური კაცი იყო ყვითელა. პირველი ცოლი მხოლოდ ერთი მიზეზის გამო გაუშვა — ბევრს ლაპარაკობსო. ლაპარაკისმოყვარულ, ლაქლაქა ქალს ვერ იტანდა, მეორე ცოლი — ჯენეთიც აღარ ეხატებოდა გულზე, მართალია, თევზივით ჩუმი და ფუტკარივით მშრომელი ქალი იყო, მაგრამ ისიც, დროთა განმავლობაში უცხიმო ბურღულის წვნიანივით ამოუვიდა ყელში.

ღამის ლოცვების შემდეგ, მთელი სოფელი ძილს რომ მიეცემოდა, ჩაიწყობდა ყვითელა ჯიბეში ხელს, დახეტილობდა მიჩუმებულ სოფელში და რაღაც ახირებული აზრები უტრიალებდა თავში. საშინელი მუსუსი იყო, თუკი რომელიმე ქალი მოეწონებოდა, თუ საშუალება ექნებოდა, ხელს არ დააკლებდა. თუ ნებით არაფერი გამოუვიდოდა, ძალადობასაც მიმართავდა ხოლმე.

სოფლელების წარმოდგენით ცხოვრება კარგად ჰქონდა აწყობილი ყვითელას: კარგი მოსავლიანი მიწები, საქონელი, კარგად მოვლილი ხარები... მაგრამ მას მაინც ყველაზე ღარიბად მიაჩნდა თავი: — ამ სოფელში თუკი ვინმეა ღარიბი, ეს მე ვარ! — იტყოდა ხოლმე, — მართალია, მშიერი არ ვკვდები, ხორბალს ურმით წავიღებ წისქვილში და დავფქვავ, ზამთრისათვის საყოფ შეშასაც ურმით ჩამოვზიდავ, მაგრამ ესაა საკმარისი? ეს სოფლელები შტერები არიან. მათ რა იციან ჩემი გულისტკივილი?

ყვითელას ოჯახი მრავალსულიანი არ იყო. მისმა მეორე ცოლმა, როცა მიხვდა, გაგვიჭირდებაო, შვილების გაჩენას თავი ანება და საქმეს მიეძალა.

დედა ორი წლის წინათ მოუკვდა ყვითელას. დედამისი — მეჯიბე ამ სოფელში დაიბადა, აქ გაიზარდა, აქ გათხოვდა, აქვე დაზარდა შვილები, აქვე იცხოვრა სამოცდახუთი წელიწადი და ისე მიეზარა მიწას ამ სოფელშივე, რომ ერთხელაც არ გადაულახავს მისი საზღვარი, ერთხელაც არსად არ ყოფილა. ამ სოფლის გარდა ქვეყანაზე თუკი არსებობდა რაიმე, ვერ წარმოედგინა.

ეს ძალიან უკვირდა ყვითელას: — აღამიანს იმდენი საშუალება კი უნდა ჰქონდეს, რომ სამოგზაუროდ წავიდეს, ქვეყანა ნახოს, სოფლები და ქალაქები მოინახულოს — იტყოდა ხოლმე და ხეტილის სურვილით შეპყრობილი ერთ ადგილზე ვეღარ ისვენებდა.

* * *

ერთ დღეს ყანიდან დაბრუნებული ყვითელა სოფლის ცენტრში იდგა. ხელები ჯიბეში ჩაეწყო, ხის ტანს ზურგით მიკრძნობოდა და მდუმარე და მოწყენილი გასცქეროდა შორეთს. სოფელში მდუმარება გამეფებულიყო. მზე დასავლეთისკენ გადახრილიყო. მოულოდნელად ურმის ჭრიალი შეესმა. თავი ასწია და გაიხედა. მტვრიან გზაზე ურემი მიჭრიალებდა. ურემში შებმული ვეება წაბლა ცხენი ჩაქჩაქით ძლევდა მანძილს და უკან მტვრის ბულს ტოვებდა.

ყვითელას თვალები გაუბრწყინდა და ახალგაღვიძებულივით შეიშმუშნა — ურემზე ქალები ისხდნენ, ერთი ხნიერი, ოთხი კი ახალგაზრდა, ლამაზები, ერთმანეთზე უკეთესები. მართალია, თავზე ფეჩე ეხურათ, მაგრამ პირისახე ყველას უჩახდა.

მეურმემ, ახალგაზრდა, ოხუთმეტიოდე წლის ბიჭმა ურემი ხის ძირას, ჩრდილში შეაჩერა, მათრახი დადო, ურმიდან ჩამოხტა, ცხენს ღვედები მოუხალვათა და ჭერით სავესე ტომარა წამოაცვა თავზე. ცხენი ჭამას შეუდგა, ბიჭმა კი აქეთ-იქით მიიხედ-მოიხედა და ქალებს ასძახა:

— რას ელოდებით? ჩამოდით, ჩამოდით! ამაღამ აქ უნდა დავრჩეთ...

ქალებმა ჩამოსვლის მაგიერ ტანსაცმელი შეისწორეს და უფრო საფუძვლიანად მოკალათდნენ.

ყვითელას თავისი ლურჯი თვალები მონუსხულივით მიეპყრო ურმისათვის და ქალებს მზერას ვერ აცილებდა. ოთხივეს კარგად ეცვათ, ლამაზებიც იყვნენ.

„რა დედოფლებივით ლამაზები არიან!“ — ფიქრობდა გუნებაში და დასიცხულივით აცმაცუნებდა ტუჩებს.

ყველაზე უფრო მაინც ერთი მოეწონა ყვითელას. სხვებზე ლამაზიყო ვერ იტყოდით, მაგრამ ისეთი ეშხიანი, ისეთი მოციმციმე თვალები, ვნებიანი ტუჩები, ამობურცული მკერდი და წვრილი წილი ჰქონდა, რომ კაცს ჰკუდიან შეშლიდა.

მერე ქალებმა ურმიდან ჩამოსვლა იკადრეს, ნაძალადევი სიცილ-სიცილით, ერთმანეთის შემველებით ჩამოლაგდნენ, ხის ძირას შეჩერდნენ, თანაც აქეთ-იქით აცეცებდნენ თვალებს და ეშმაკურად ილიმებოდნენ.

„ხეტავი რომელი აღას ქალები არიან ასე მოვლილები? — ფიქრობდა ყვითელა, — ამათ, ეტყობა, ცხოვრებაში არ უმუშავნიათ, ხელი არ გაუხმრევიათ, გაჭირვება და შიმშილი არ გამოუცდიათ... არა, ის ერთი რა არის მაინც, რა ტუჩები, რა მკერდი, რა წილი... მაგის ტუჩები... ოჰ!! — ყვითელამ ერთხელ კიდევ გაილოკა ტუჩები, შებრუნდა და ჯიბეში ხე-

ლებჩაწყობილმა ზღაზვნით გასწია შევქეთის დუქნისაკენ. მი-
დიოდა და დროდადრო მზერას ქალებისაკენ აპარებდა.

დუქანში კაციშვილი არ ჰაჭანებდა. მედუქნე შევქეთი და-
ხლთან იჯდა, წინ დიდი დავთარი დაედო და სოფლებზე
ნისიად გაცემული საქონლის ფასებს აჯამებდა. საცაა კალო-
ობა დაიწყებოდა და უკვე დრო იყო მედუქნე თავის საქმეს
შესდგომოდა — მევალეთა სია შეედგინა, ეზო-ეზო ჩამოე-
ლო და საქონლის მაგიერ ფული თუ ხორბალი ამოეღო.

ხმაურზე მედუქნემ თავი ასწია. ყვითელას წამიერი მზე-
რა ესროლა და მერე ისევ დავთარში ჩარგო თავი.

ყვითელამ იქაურობა მიათვალა — მოათვალა, დახლ-
ზე გადაწვა და ჩაყინებით უთხრა: — მოემზადე, ამხანაგო,
ერთი ურემი სტუმარი მოგადგა კარზე!

მედუქნეს თავი არ აუწევია, ისე ჩაილაპარაკა: — მაგი
წინასწარ ვიცოდი მე.

— იცოდი?

— ჰო, ვიცოდი!

— როგორ?

— როგორ და ისე, წინასწარ ვიგრძენი!

— ერთი შენც! — ხელი ჩაიქნია ყვითელამ და უნდობ-
ლად ჩაიციხა: — იცოდი კი არა, იხვი, არ გინდა?

— შენ თუ გინდა ნუ დაიჯერებ. მე კი, გეუბნები, ვიცო-
დი!.. ასეა, როგორც კი თოვლი გადნება, ამ სტუმრებისაგან
მოსვენება არა მაქვს, იმდენი სტუმარი მოდის, ქაზიმ-ალას
ქარვასლა გეგონება ჩემი სახლი!

— შენ მაგისი ნუ გეშინია! — ჩაიციხა ყვითელამ, — წა-
გებული არ დარჩები, ორმაგად აგინაზღაურებენ ხარჯს... ახლა
ისეთი სტუმრები მოგივიდა რომ...

— როგორი? — დავთრიდან თავი არ წამოუწევია, ისე
იკითხა მედუქნემ.

— არაჩვეულებრივი!.. ისეთი ქალები არიან რომ... —
კიდევ უნდოდა რაღაც ეთქვა, მაგრამ აღარ დასცალდა,
დუქანში მეურმე ბიჭი და ხნიერი ქალი შემოვიდა.

ქალი შევქეთს მიუახლოვდა და მიესალმა: — ღმერთმა
ხეირი და ბარაქა მოგცეს საქმეში, შევქეთ-ალა!

— კეთილი იყოს თქვენი მობრძანება! — შევქეთმა თვა-
ლები ქალს მიაპყრო.

— ჩვენ სოფელ ურჭუთლიდან ვართ, უმეთ-ალამ შენთან
დიდი მოკითხვა დამაბარა. ეს ბიჭი მისი უმცროსი შვილია.
უროემზე ქალები ზიან. მისი უფროსი რძალი უკვე შვიდი
წლის მოყვანილია და შვილი არ ეყოლა. ჰოდა, ჩვენ თქვენს
ჰორონ-ბაბუასთან მოვედით, შველა უნდა ვთხოვოთ, უნდა
ვილოცოთ, შესაწირავი მივუტანოთ. იქნება გვეშველოს და



ჩვენს რძალს შვილი შეეძინოს. ურემზე კიდევ ზიანს ახადებს... როცა, უშვილო ქალები, ისინი უმეთ-აღას ნათესავეები თქვენ გეწვიეთ სტუმრად. მეტი საშველი აღარა გვაქვს, ღამე უნდა გავვათევინოთ.

შევქეთმა დავთარი დახურა და წამოდგა: — კეთილი იყოს თქვენი მობრძანება, სტუმრის მისვლით მასპინძელი არ შეწყუხდება. ცოლი მეზობელთანაა გადასული, მაგრამ მალე დაბრუნდება, სახლში რძალია და ის მიგიღებთ, ავიდეთ მეორე სართულზე. უმეთ-აღა ჩემი მეგობარია, ჯარში ერთად ვმსახურობდით, მის შინაურობას როგორ არ მიგიღებთ?..

დუქნიდან გავიდნენ. შევქეთმა ურემთან თავმოყრილ ქალებს გახედა და ხნიერ ქალს უთხრა: — დაუძახეთ მათ, მანამდე კი ყმაწვილმა ცხენი გამოხსნას და თავლაში შეიყვანოს. ხნიერმა ქალმა ახალგაზრდა ქალები მოიხმო, ბიჭმა ურმიდან ცხენი გამოხსნა.

ყვითელა დუქნის კართან შეჩერდა და ქალებს დააცქერდა: — „მაშ ამათ შვილები არ შეეძინათ, არა? ქმრები არ უვარგათ ალბათ, თორემ როგორ შეიძლება ამათ შვილები არ ეყოლოთ? ღმერთო, როგორი გაბუტკუნებულები არიან, ნამდვილად ქმრები არ უვარგათ, თორემ ესენი და უშვილო? ნამდვილი საბაღნე კომბინატები არიან!.. არა, ის ერთი მაინც“... — პირი გაამწლაქუნა და შუბლზე გაისვა ხელი.

ხნიერმა ქალმა ახალგაზრდა ქალებს მოუხმო.

მედუქნე სათითაოდ მიესალმა ყველას, ქალებმა მოკრძალებით დაუკრეს თავი.

მედუქნემ კატასავით განაბულ ყვითელასაკენ გააპარა მზერა, უწადინოდ ჩაახველა და ქალებს მიუბრუნდა: — ხვალ ჩემი მეუღლე წაგიყვანთ ჰორონ-ბაბუასთან. იგი კეთილია, გულმოწყალე. მასთან ვინც კი მოსულა, ყველას წადილი შესრულებია. ღმერთმა ჩნას და თქვენაც შეგისრულოთ წადილი. ნუ გეშინიაო. ამ საქმეს ეშველება!.. აბა, ავიდეთ ზემოთ!

ქალებმა მადლობა გადაუხადეს და შეწყუხებისათვის მოუბოდიშეს.

მედუქნე ყვითელას მიუბრუნდა და სთხოვა: — ძმარ, თუ შეიძლება, ერთი მაგ ყმაწვილს დაეხმარე და ცხენი თავლაში შეაყვანინე.

— კი, ბატონო! — ჩაილაპარაკა ყვითელამ, მაგრამ ადგილიდან არ დაძრულა. იდგა, მონუსხულივით შესცქეროდა კიბეზე ამავალ ქალებს. მერე კი, როცა ქალებმა კიბე ავლეს და ოთახში შელაგდნენ, ყვითელამ წყნარად ამოიოხრა, ბიჭს მიუბრუნდა და უთხრა: — მოიყვანე ცხენი, თავლა გაჩვენო. რა ეშმაკი გაჩქარებდა, მაგი ქერის ტომარა რომ წამოგიცმია თავზე? ერთი კვირის მშვიერი იყო თუ რაი?

ბიჭმა ჩაიცინა, ცხენი მიიყვანა და თავლისაკენ მიმავალ ყვითელას უხმოდ მიჰყვა.

ცხენი დააბეს, თავზე ჭერის ტომარა ჩამოკიდეს და გამობრუნდნენ. თავლიდან გამოსვლისას ყვითელამ თავი შეიფხანა, ბიჭს მიუბრუნდა და ჰკითხა: — უმეთ-ალას რძალი ის შაქრისფერი, თვალეციმციმა ქალი რომაა, ისაა, არა?

— კი, ისაა! — დაუმოწმა ბიჭმა, — ჩემი უფროსი ძმის ცოლია!

„მე მაგ შენს რძალს ვენაცვალე სულში, ბიჭო! — ვაიფიქრა ყვითელამ, — მე მამაშენის, უმეთ-ალას დედაც ვატირე და მაგ შენი შტერი ძმისაც! მაგისთანა ქალს აქ გამოგზავნის კაცი?!“

— აბა, კარგად იყავი, ბიჭო! — უთხრა ბიჭს, როცა თავლიდან გამოვიდხენ, — შენ მალლა ადი, მე კი სახლში წავალ, საქონელს უნდა მივხედო.

ბიჭი მალლა ავიდა, ყვითელა კი სახლისაკენ გაეშურა.

სოფელში ერთადერთი ყვითელა იყო, რომელსაც ჰორონ-ბაბუას სასწაულმოქმედებისა არაფერი სწამდა, ეს ყველაფერი ჭორი და შოგონილი ამბავიაო, იტყოდა. როცა რომელიმე ცრუმორწმუნე მტკიცებას დაუწყებდა, მაშინ ყვითელა მამისაგან განაგონ ლეგენდას მოუყვებოდა: ერთ შეიხს ერთი მიურიდი ჰყოლია. როცა შეიხს ყველაფერი უსწავლებია მისთვის, მიურიდი თავის მასწავლებელს ხელზე კოცნით გამოთხოვებია და წამოსულა.

იმ ხანებში ასეთი წესი ყოფილა. ყოველი შეიხი, როცა თავის მოსწავლეს მოამზადებდა, ვალდებული ყოფილა, გამოთხოვებისას თავისი შეგირდისათვის საჩუქარი მიერთმია, ჰოდა, ამ შეიხს სახედარი უჩუქებია მიურიდისათვის. გზაში მიურიდს სახედარი მოკვდენია. მას ძალიან წყენია შეიხის ნაჩუქარი სახედარის სიკვდილი. უტირია კიდევ. მერე საფლავი გაუთხრია, სახედარი დაუმარხავს, იქვე თავისთვის ფაცხა აუგია და ლოცვად შემდგარა. მალე მგზავრებს ჩამოუვლიათ, რომ უნახავთ, მიურიდი ლოცულობსო, მათაც დაუწყიათ ლოცვა, მერე მლოცველები ისე მოზღვავებულა, სალოცავი ადგილიც აღარ დარჩენილა და რიგი შექმნილა. მლოცველებს იმდენი საჩუქრები და შესაწირავი მოჰქონდათ, რომ მიურიდი ორ წელიწადში ფაშასავით გამდიდრებულა.

ეს ამბავი შეიხის ყურამდე მისულა. დაინტერესებულა, მისულა და მიურიდისათვის ყველაფერი გამოუკითხავს. მიურიდს ყველაფერი მოუყოლია, შეიხს გასცინებია, მისთვის მხარზე დაუტყაპუნებია ხელი და უთქვამს: — ყოჩაღ, კარგად მოგიფიქრებია მაგი, ჰორონ-ბაბუა ხომ იცი? ჰოდა, ის ჰორონ-ბაბუა მაგ სახედარის დედა იყო...

„ჰორონ-ბაბუა, ჰმ, ჰორონ-ბაბუა! — ფიქრობდა ნახლო საკენ მიმავალი ყვითელა, — მიდიან ეს შტერი უშვილო ქალები ჭაკი ვირის საფლავზე და შვილი გაგვიჩინეო, ევედრებოდნენ. ჰმ, შვილი კი არა და... თუმცა, ამით მე რას ვკარგავ? პირიქით, ჰოდა, ჯობია გავჩუმდე, რა ჩემი საქმეა? პირიქით, მეც უნდა ვიძახო, ჰორონ-ბაბუა ასეთია და ისეთია-მეთქი. უველაფერი შეუძლია-მეთქი! მე ხომ“...

სახლში მივიდა. ცოლი ბოსელში ძროხას წველავდა. ყვითელამ ძროხას ზურგზე მოუთათუნა ხელი, მერე ცოლს მიაჩერდა და ხმის ოდნავი თრთოლვით თქვა: — ქალო, მისმინე! ხვალ ყანაში ვერ მივდივარ სამუშაოდ და ხარები ნახირში გაატანე მწყემსებს. არა უშავს, დაისვენონ ერთი დღე. მე ხვალ ყანას შემოვივლი. სათიბშიაც გავივლი, ვნახავ, მოსათოხნი არის თუ არა ჯერ. სახლში ალბათ გვიანობამდე ვერ დავბრუნდები.

— როგორც გინდა! — თქვა ქალმა, — შენც დაისვენე, გაიარ-გამოიარე, გული გაინზიარულე.

ყვითელა ქალს მიაჩერდა და ნიკაპი მოისრისა: — „მაგან ხომ არ იგრძნო რამე? ხომ არ მიმიხვდა? აბა, როდის იყო ჩემს დასვენებაზე ზრუნავდა? არა, თუმცა რას უნდა მიმიხვდარიყო შტერი დედაკა!“ — გული დაიმშვიდა, ხელები ჯიბეში ჩაილაგა და ბოსლიდან გავიდა.

* * *

შევქეთის ცოლმა სტუმრად მოსული ქალები კარგად მიიღო. ვახშამი გაუმზადა, დაანაყრა. ახალგაზრდა ქალებმა დაიძინეს, შევქეთი ყავახანაში წავიდა. მისი ცოლი და ხნიერი სტუმარი ქალი მეორე ოთახში განმარტოვდნენ.

სტუმარი ქალი ერთხანს სდუმდა, მერე კი თავისი გასაჭირის მოყოლა დაუწყო მასპინძელს: — სად არ მყავდა ეს ჩემი რძალი, მაგრამ საშველი არ დაადგა. შვიდი წელია ავერ, დაქორწინებულია და არ იქნა, ვერ დაორსულდა. ისე ძალიან კარგი ხასიათის ქალია, ნამდვილი ოქრო. ჩემი ქმარი, უმეთ-ალა დიდ პატივს სცემს, ძალიან უყვარს, მაგრამ მოგესვენება, უშვილო ქალი ნამდვილი ბელაა, ჰოდა, მისთვის რომ გვეყურებინა, ამდენხანს ჩამოაშორებდა ჩემს შვილს, მაგრამ ჩემს შვილს, იბრაიმს, ძალიან უყვარს ცოლი და არ უშვებს... ჩვენი სოფლის სასაფლაოზე ერთი წმინდანი კაცი მარხია, იმ წმინდანის საფლავზე მლოცველები მოდიან და ლოცულობენ, უშვილო ქალებიც დადიან. ხანდახან იმ წმინდანის საფლავზე მოსული ქალები ორსულდებიან ხოლმე, რა არ ვქენით, რა არ ვევედრეთ, რამდენი არ ვილოცეთ, მაგრამ არ იქნა და იმ წმინდანმა ჩვენი თხოვნა არ შეისმინა, ჩემი რძალი არ დაორსულდა. მერე ჩვენი სოფლის ახლო-მახლოს, შვიდ წყაროზე შვი-



დი კენჭი ავკრიფეთ, იმ კენჭებზე ვილოცეთ, მერე, ის კენჭები
ლოგინიანიც ჩავუწყვეთ ჩვენს რძალს, მერე კურჭუთელ ხოჯა-
სთან მივიყვანეთ და ვალოცინეთ, მერე ბასმაქელი ხაზიფი
გვასწავლეს, იმასაც ვალოცინეთ, ნუსხებიც დავაწერინეთ.
მაგრამ არა და არ იქნა. არც ნუსხებმა და არც ლოცვებმა არ
გასჭრა... ახლა აგერ ჰორონ-ბაბუასთან მოვიყვანეთ, ესაა
ჩვენი უკანასკნელი იმედი. თუ ამანაც არ უშველა და...

— აი, მაგაში კი ცდები! — შეაწყვეტინა მას მელუქნე
შევქეთის ცოლმა, — ჰორონ-ბაბუა წმინდანზე წმინდანია, მას
ისეთი სასწაულების ჩადენა შეუძლია, რომ მეტი არ შეიძ-
ლება... შესთხოვეთ და აუცილებლად დაგეხმარებათ, შენი
რძალი დაორსულდება.

— ღმერთმა გისმინოთ, ჩემო დაიკო, და რასაც შენ ამ-
ბობ, ვაძართლებულიყოს. უმეთ-აღას გადაწყვეტილი აქვს,
თუ იმანაც არ უშველა ჩვენს რძალს, ჩემი ძვილი ძეორედ და-
აქორწინოს, მოგეხსენება, სოფელში ასეთი წესია, უშვილო
ქალს შვიდ წელიწადს მოუცდიან, მერე კი გაუშვებენ. ჩემი
რძალი კარგი ქალია და ძალიან სენახეაა მისი გაძევება.

— ჰორონ-ბაბუას საფლავს რომ მოინახულებთ, მოწყა-
ლებას რომ შესთხოვთ და ილოცებთ, ღმერთი ძოგისმენთ და
შესი რძალი დაორსულდება! — ისევ დააიმედა დამწუხრებუ-
ლი ქალი მელუქნის ცოლმა.

* * *

ჰორონ-ბაბუას აკლდამა სოფლის გარეთ, სასაფლაოს მა-
ხლობლად, ერთი ყანის განაპირას დგას. აკლდამა გათლილი
ქვითაა ნაშენი, თავზე ბურთივით მრგვალი გუმბათი ადგას.
სოფლის მხრიდან აკლდამას ერთადერთი მრგვალი სარკმელი
გააჩნია, სარკმელი ისე პატარაა, ადამიანის მუშტი თუ შეეტე-
ვა შიგ. აკლდამის მძიმე, სქელი ხის კარი დღენიდაგ მიკე-
ტილია... და ცხადია, როცა კარი მიკეტილია, აკლდამაში დღი-
სითაც ისე ბნელა, როგორც ღამით. აკლდამის მიწური იატაკი
ყოველთვის დაგვილ-დასუფთავებული იყო. მლოცველებს
უაძრავი შესაწირავი მოჰქონდათ აქ და აკლდამაში აწყობდ-
ნენ. უმნიშვნელო შესაწირავი სოფლის ღარიბი მოსახლეობის
საკუთრებას წარმოადგენდა, ძვირფასები კი ჯამესა და ხო-
ჯებისა.

უკვე კარგა ხნის გათენებული იყო, როცა ქალებით სავ-
სე ურემი მელუქნე შევქეთის ეზოდან გავიდა და აკლდამისა-
კენ მიმავალ გზას დაადგა.

მოლოდინით აღსავსე, საკმაოდ შეშინებული ახალგაზრ-
და ქალები განაბულნი უგდებდნენ ყურს მელუქნის ცოლისა

და უმეთ-აღას ცოლის დარიგებებს. ცდილობდნენ
გამორჩენოდით მათი ნათქვამიდან, იმასოვრებდნენ
გორ უნდა ეცათ თაყვანი ჰორონ-ბაბუასათვის, როგორ უნდა
შეპირებოდნენ შესაწირავს, როგორ უნდა გადაეცათ თავიან-
თი თხოვნა.

ბიჭი წამდაუწყუმ მათრახს უტყლოშუნებდა ცხენს და შე-
დახილით ამხნევებდა. ცხენი თოხარიკით გარბოდა, ურემ
ირყეოდა და ქალები აქეთ-იქით ეხლებოდნენ. გზაზე ხანტად
დგებოდა მტერის ბული.

რაც უფრო უახლოვდებოდნენ აკლდამას, უფრო და
უფრო იზრდებოდა იგი და უფრო და უფრო იტანდათ ახალ-
გაზრდა ქალებს შიში და მოლოდინი.

გზიდან გადაუხვიეს, აღმართს შეუყვანენ, აივაკეს და
აკლდამის მახლობლად შეჩერდნენ. ქალები ჟრმიდან ჩამო-
ლაგდნენ, ტანსაცმელი გაისწორეს და ცნობისმოყვარე მზერა
მიაპყრეს აკლდამას. მოულოდნელად აკლდამიდან ყბუ, და-
ხშული ხმა მოესმათ: — თითო-თითოდ, თითო-თითოდ შემო-
დით!

შევქეთის ცოლმა და ხნიერმა ქალმა ხელისგულეები სახე-
ზე ჩამოისვეს და ღმერთს დახმარება და შველა შესთხოვეს.
ახალგაზრდა ქალებს გააკანკალათ.

— თითო-თითოდ შემოდით! — მოესმათ ისევ აკლდა-
მიდან.

ქალები შიშით მიაჩერდნენ შევქეთის ცოლს. მან სტუმრე-
ბი დაამშვიდა: — ნუ გეშინიათ, ჩემო ახლობლებო! ეს ჰო-
რონ-ბაბუას ხმაა, ეს კი კარგის მომასწავებელია, გამოდის,
ჰორონ-ბაბუა ჩადგა თქვენს მდგომარეობაში, მკვდრეთით
აღსდგა, რათა მოგისმინოთ და დაგეხმაროთ, რა ბედნიერები
ხართ, რომ თითო-თითოდ გიბარებთ თავისთან, ალბათ სურს
კარგად მოგისმინოთ და გამოარკვიოს თქვენი უშვილობის მი-
ზეზი, აქამდე ჯერ არასოდეს არ მომხდარა, რომ ვინმეს ხმა
გაეგონოს, ჩვენ კი გავიგონეთ, ესე იგი, თქვენი საქმე წაღმა
წავა.

ახალგაზრდა ქალებს მედუქნის ცოლის სიტყვებზე გულ-
ში იმედი ჩაესახათ და ნაძალადევად გაიღიმეს.

— თითო-თითოდ შემოდით! — მოესმათ ისევ ყრუ ძახი-
ლი.

— აბა მოემზადეთ, გეძახით! — მიუბრუნდა მედუქნის
ცოლს ახალგაზრდა ქალებს, — თითო-თითოდ შედით! კარ-
თან რომ მიხვალთ, თაყვანი ეცით, ილოცეთ, მერე ფეხზე აღე-
ქით და თქვენი თხოვნა გაუმეორეთ. ყველაფერი ამკარად
თქვით და ნურაფერს დამალავთ. ასე უთხარით, შვილი გვინდა

გავაჩინოთ და დაგვეხმარეთ-თქო. ამბობენ, ზოგჯერ თურმე პირობა-ბაბუაც გამოჩნდება. ეს მაშინ ხდება, როცა მასთან კარგი ადამიანი მიდის. თუ თქვენთანაც გამოჩნდა, არ შეგეშინდეთ, ხელები დაუჯოცნეთ და შეეხვეწეთ! — მედუქხის ცოლმა პირველად ლამაზ ქალს მოკიდა მკლავში ხელი, რომელიც ყვითელას ყველაზე უფრო მოეწონა: — აბა, პირველი შენ შედი და შენ იცი!

ქალს შიშისა და მღელვარებისაგან ხელი აუკანკალდა, ძლივს გადადგა ნაბიჯი და ფეხაკრეფით გაეძარტა აკლდამისაკენ. აკლდამის კართან რომ მივიდა, შედგა, ხელები აღაპყრო და ღმერთს შეევედრა.

— შემოდი, ქალბატონო, შემოდი! — მოესმა ძახილი აკლდამიდან.

გული ძალუმად აუძგერდა, ნაბიჯი ვეღარ გადადგა წინ. — მიდი, რას უყურებ? — დაუძახა მედუქხის ცოლმა.

ქალმა აკანკალებული ხელით შეალო აკლდამის კარი და შევიდა. კარი რომ მიხურა, ლამისებრ სიბნელე ჩამოწვა ირგვლივ. შეძინებულმა ქალმა მიწაზე ცხვრის ტყავი გააგო, დაიჩოქა და ლოცვა დაიწყო. ლოცვას რომ მორჩა და სიბნელეს თვალი შეაჩვია, აკლდამის კუთხეში მდგარი თეთრწვერა მოხუცი დაინახა. მოხუცს წვერი წელამდე წვდებოდა, ხელში კრიალოსანი ეჭირა და გაღიმებული შესცქეროდა ქალს.

— აბა, მთხოვე ქალბატონო, რაცა გსურს! — ჩაილაპარაკა მოხუცმა და მისკენ ნაბიჯი გადადგა.

ქალმა ხმა ვერ გაიღო. მოხუცი ისეთი საშინელი სანახავი ეჩვენა, რომ შიშისაგან მთელი სხეული აუკანკალდა. წმინდანები თუ ასეთი შესახედავები იყვნენ, ქალს ვერ წარმოედგინა.

— შვილი არ შეგეძინა არა? — ჰკითხა მოხუცმა.

— დიახ... ძლივს ამოღერდა კრიჭაშეკრულმა ქალმა, ატირდა, დაიჩოქა და მოხუცს მუხლებზე მოეხვია.

— მოხუცმა ქალი გულში ჩაიკრა, მიესიყვარულა, კოცნა დაუწყო და უჩურჩულა: — შვილი გინდა არა? ნუ გემინია, გეყოლება, მე გაგიკეთებ შვილს! — მკლავები მძლავრად მოხვია და მიწაზე წამოაქცია: — ოღონდ იცოდე, ორმოცი დღის შემდეგ ისე უნდა მოხვიდე ჩემთან!

შეძინებული ქალი მიინებდა.

* * *

ნაშუადღევს ქალები ურემზე მოთავსდნენ და სოფლისაკენ გასწიეს.



ლამაზი ქალი ცრემლს იწმენდდა და კითხულობდა: შეგეძინება ნეტავი შვილი?

— შეგეძინება და მეტი არა?! — ამშვიდებდა მეღუჭნის ცოლი, — ხომ მოგისმინა ჰორონ-ბაბუამ?

— კი, მომისმინა!

— მერედა რის გეშინია? ხომ დაგპირდა გეყოლება?

— იამპირდა!

— პოდა, გათავდა, გეყოლება!

— აბა, ორმოცი დღის შემდეგ რატომ დამიბარა? რატომ ესენი არ დაიბარა? რაღა მაინცდამაინც მე დამიბარა?

— ნუ გეშინია! — დაამშვიდა მეღუჭნის ცოლმა. — ასე ხშირად ხდება ხოლმე. ჰორონ-ბაბუა ხშირად იბარებს თავისთან მეორეჯერ მას, ვინაც კი განსაკუთრებით მოეწონება. ალბათ შენაც მოეწონე და იმიტომ დაგიბარა.

— აბა ჩვენ შვილები არ ვეყოლება? — იკითხეს ახალგაზრდა ქალებმა.

— კი, თქვენც გეყოლებათ, თქვენც! — გული არ დასწყვიტა მათ მეღუჭნის ცოლმა.

...როცა ქალებით სავსე ურემი თვალს მიეფარა, აკლდამიდახ ყვითელა გამოდვრა, ხელები ჭიბეში ჩაილაგა და ოიდი-ხიო გაუყვა გზას სოფლის მიმართულებით.

სახლის საშენი ქვა

აზიზ ბიძია სოფელში ყველას უყვარდა. ეს სიყვარული უსაფუძვლო როდი იყო. აზიზი წყნარი, გულკეთილი, მუდამ მოციხარი, ყველასათვის კეთილისმდომელი კაცი იყო. დიდი ხანი არაა რაც ჩვენს სოფელში გადმოსახლდა. შუა სოფელში დაიდო ბინა. რომელიღაც აღას მიწას ამუშავებდა სანახევროდ.

კარგი კარგს შეხვდებო, ნათქვამია. მეუღლეც, ერთი სათნო, გულკეთილი, პატიოსანი და ქმრის მოყვარული ქალი იყო. ქმარს დიდი პატივითა და რიდით ეპყრობოდა. თვალებში შესცივინებდა. ქმრის სიტყვა კანონი იყო მისთვის.

ხელმოკლედ ცხოვრობდნენ, მაგრამ როდი წუწუნებდნენ ამის გამო, აზიზი ღმერთს მადლობას წირავდა: კარვად ვცხოვრობ, ვარ ჩემთვის, არავინ მაწუხებს და არავის ვაწუხებო.

— რა ვქნა, ღმერთს ასე გაუჩენია, ვისაც მიწა გააჩნია იმისი მოზიარე უნდა იყო. ვიცი, ისეთი დროც მოვა, ამ აღე-

ბსა და მდიდრებს ბოლო მოეღება და ჩვენაც, ღარიბებს საკუთარი მიწები გვექნება! — გულს იმშვიდებდა აზიზი.

ერთხელ, ჩვენ ამ ბედნიერი, შშვიდი და უწყინარი კაცის გაბრაზებასაც შევესწარიით. მაშინ აზიზს ისე აეშალა ნერვები, ღმერთიც დაივიწყა და დამნაშავე უშვერი სიტყვებით ავინა.

საქმე კი შემდეგში იყო. რამდენიმე წლის წინათ აზიზმა მისი სახლის წინ, მინდორში ბოძი დაასო და იმ ბოძზე ყარყატს ბუდე გაუკეთა. ყოველ წელს ყარყატი იმ ბუდეში კვერცხებს დებდა და ბარტყებს ჩეკავდა. გვიან შემოდგომასზე ყარყატების გუნდი თბილ ქვეყნებისკენ მიფრინავდნენ. აზიზს ბავშვივით უხაროდა გაზაფხულზე დაბრუნებული ყარყატების ხილვა.

გაზაფხული დადგა და ყარყატები ჩვეულებრივად მოფრინავდნენ თბილი ქვეყნებიდან. დედა ყარყატი ბუდეში ჩაჯდა. მამალი ყარყატი საკვებს უზიდავდა მას. მერე მამალი ჯდებოდა ბუდეში და დედალი მიფრინავდა საკვებისათვის. ეტყობოდა მათ ძალიან უყვარდათ ერთმანეთი.

მაგრამ, აი, ერთ დღეს, აზიზი საშინელ ამბავს შეესწრო. მამალი ყარყატი თავისი გრძელი ნისკარტით კორტინდა დედალ ყარყატს. ამას ისეთი სისასტიკით სჩადიოდა, რომ აზიზი გაოცებული დარჩა. დედალი სრულებითაც არ უწევდა წინააღმდეგობას გაცოფებულ მამალს.

„ეჰ, ეტყობა, მძვიდი და ბედნიერი ცხოვრება მობეზრდა!“, — გაიფიქრა აზიზმა.

მამალი ყარყატი თავის საქმეს განაგრძობდა, სულ ერთიანად დაასისხლიანა დედალი, სადაც კი ნისკარტს დაჰკრავდა, ხორცს ამოგლეჯდა. ბოლოს დაოსებული დედალი ბუდიდან გადმოვარდა. ვაფრენა ვეღარ შეძლო და მიწას დაასკდა. აზიზი ვერ მიმხვდარიყო მათი უთანხმოების მიზეზს. მიუახლოვდა დედალ ყარყატს, დაიხარა, ის იყო მისი ხელში აყვანა დააპირა, რომ ამ დროს მის წინ ბუდიდან გადმოვარდნილი ბარტყი დაეცა.

— ვაი, ეს რა ხდება კაცო, ა? — გაიკვირვა აზიზმა, დედალ ყარყატს თავი ანება, ბარტყი ფრთხილად აიყვანა ხელში და დააკვირდა. დახეთ მის გაოცებას: ის ბარტყი სრულებითაც არ გავდა ყარყატს...

ამასობაში მამალმა ყარყატმა კიდევ ერთი ბარტყი გადმოაგდო ბუდიდან. აზიზი დააკვირდა. არც ის გავდა ყარყატის ბარტყს. აზიზი ვერაფერს მიხვდა. თავი ასწია და ბუდეს ახედდა. ეგონა მამალი ისევ გადმოაგდებდა ბარტყს. მაგრამ მას მეტი აღარ გადმოუგდია. დაცხრა, ბუდეში დარჩენილ ბარტყს ფრთა გადააფარა.

— ვაი, ეს რა ხდება ა?! — მხრები აიჩეჩა აზიზმა.

ამასობაში ცოლი გამოვიდა ეზოში. აზიზმა დაუძახა და
ყველაფერი მოუყვა.

ცოლი ბარტყებს დააკვირდა და თქვა: — ეს ბარტყები
ყარყატისა არ არის, იხვის ჭუკებია!

აზიზი დააკვირდა და მანაც ჩაილაპარაკა: — კი, იხვისაა,
მაგრამ...

— მიზეზიც ესაა, — განაგრძო ცოლმა, — კვერცხებიდან
რომ სხვა ბარტყები გამოიჩეკა, მამალი ყარყატი გაბრაზდა და
იმიტომ მოკლა დედალი, ბარტყებიც იმიტომ გადმოყარა ბუ-
დიდან... ეს რა წესი ჰქონიათ, ნამდვილი „პაჯი“ ყოფილა ეს
ყარყატი...

აზიზი ბაგეს იკვნეტდა და სდუმდა. მაინც ვერაფერს მიმზ-
ვდარიყო.

ცოტა ხნის შემდეგ მეზობლის ქალი, გულიზარი მოვიდა.
ოცდაათს გადაცილებული ქალი იყო, აშარი, ენატარტარა და
ჭორიკანა. მისვლისთანავე აზიზის ცოლს თავი მოაბეზრა შე-
კითხვებით, ყველაფერი დაწვრილებით გაიგო და კაცს არ
მოერიდა, ისე თქვა: — იხვი ყარყატს ვერაფერს დააკლებდა...
ვერ დაუკავშირდებოდა ვერაფრით... ასეც რომ მომხდარიყო,
ის ბარტყები იხვს მაინც არ დაემსგავსებოდნენ ასე...

აზიზი მხოლოდ ახლა მიხვდა, რომ მამალმა ყარყატმა დე-
დალი თავისი უნამუსობისათვის დასაჯა... მაგრამ როგორ მოხ-
და ეს? ვინ იცის, იქნება წაასწრო კიდევ იხვთან მამალმა ყა-
რყატმა დედალს... დახეთ, ღალატი ყარყატებსაც სცოდნიათ.

გულიზარმა ეს ამბავი მთელ სოფელს მოსწო. მერე სოფ-
ლელები სულ ამაზე მსჯელობდნენ, კამათობდნენ, მაგრამ ვერ
იქნა და საერთო აზრი ვერ გამოიტანეს. ვერ დაადგინეს, თუ
რა მოხდა და როგორ.

* * *

ერთ საღამოს ერთად თავმოყრილ ბიჭებს სწორედ ამაზე
ჰქონდათ სჯა-ბაასი. 19-20 წლისანი იქნებოდნენ, უმეტესობა
ცოლშვილიანები.

— არ აპატია მამალმა ყარყატმა, ხედავთ? — თქვა ერთმა
შავტუხამ.

— აბა, რას იზამდა ვითომ? არ დაუკარგავს ვაჟაკობა!
— თქვა მეორემ, ქერა ნურიმ (მის ცოლს ერთ მეხილგსთან
ჰქონდა კავშირი. ეს მთელმა სოფელმა იცოდა, იცოდა ნური-
მაც, მაგრამ ხმას არ იღებდა). — სული სთხოვს, სული, მოთ-
ხოვნილება აწუხებს! — იტყოდა ხოლმე არხეინად. ასეთი რა-
მდენი იყო კიდევ სოფელში.

— იმ ყარყატმა იხვთან დაწოლა ისურვა და თავი ველარ
შეიკავა! — თქვა მესამემ.

— ქალიც ასეთი არაა? თუ მოისურვა, ველარ დააკავებ

მერე. დაკარგავს სინდის-ნამუსს და... ყარყატსაც მოთხოვნა
ლება აქვს თურმე! — გამოთქვა თავისი მოსაზრება მეოთხემ,
ბიჭები კიდეც კარგა ხანს კამათობდნენ ამ საქმის გარშე-
მო.

მხოლოდ ერთი არ ერეოდა კამათში. წითელთმიანი ბიჭი
იყო, თვალეზბრიალა. მიძვდარიყო თავისთვის კუთხეში და ილ-
რიჭებოდა. დიდი გავარდნილისერთი კი იყო, ყველაფერზე
ხელს რომ მოაწერდა, ისეთი.

— გაჩუმდი, ჰაჯელ! — შეუწყრნენ მას, — რა არის აქ
სასაცილო? დაგიღია პირი და ილრიჭები!

— ის... ის... მე გავაკეთე! — სიცილისაგან იჭაჭებოდა ბი-
ჭი, — ღურმამიშხანას საქათმეში შევედი, იხვის ორი ცალი
კვერცხი ავიღე და ყარყატს ბუდეში ჩავუდე... არავის არ და-
უნახავს...

— გაჩუმდი, ნუ იგონებ შენებურად რაღაცეებს, — არ
დაუჯერეს მას.

— გეფიცებით, მე ჩავუწყვე იხვის კვერცხები!
ბოლოს დაუჯერეს როგორც იქნა.

— ვერ მიხვდა ყარყატი? — იკითხა ერთმა.

— აჰა, არაფერი გაუგია!

— ხედავთ? ეს რა უქნია ამ შტერს!

გაბრაზებული ბიჭები ჰაჯელს დაეტაკნენ და ცხვირიდან
სისხლი ადინეს.

ამ ამბავს გულიზარის თორმეტი წლის ბიჭიც შეესწრო.
იგი დედასთან გაიქცა და ყველაფერი მოუყვა. ადრე დილით
ლოგინიდან ახალწამოდგარი, პირდაუბანელი გულიზარი აზი-
ნისას გაიქცა.

— აზიზ ბიძია, აზიზ ბიძია! — ვერ მოითმინა და შორი-
დან დაუძახა.

აზიზმა ჭრიალით გამოაღო სახლის კარი. ახალამდგარი
იყო, პიჯამა ეცვა...

— მობრძანდი!.. რა მოხდა?!

— მე ხომ ვთქვი, აზიზ ბიძია?! შენი ყარყატისათვის რა
გაუკეთებიათ!

— რა?..

— ჭორფლიან ქეზიბანს ბიჭი რომ ჰყავს, ჰაჯელი, ხომ
იცი?

— მერე?

— ჰოდა, იმ ბიჭს კვერცხები შეუცვლია!

— ეს როგორ?

— ო, აზიზ ბიძია, რა არის რომ ვერაფერს ვერ ხვდები?
როგორ და, ბუდიდან ყარყატის კვერცხები აუღია და მის ნა-
ცვლად იხვის კვერცხები ჩაუწყვია.



— რაო? — აზიზი პიუამას ამარა გავარდა ქუჩაში ცოლი და გულიზარი მიჰყვენენ.

ჰაჭელი ეზოში ნაჯახს ლესავდა. აზიზი რომ დაინახა, ნაჯახს დაავლო ხელი და დაოთხილი გაიქცა. მიხვდა, ამ დილა-უთენია რისთვისაც ესტუმრებოდა აზიზი.

აზიზის ცოლმა ხმამაღლა დაუწყო ლანძღვა გაქცეულ ბიჭს: — აი შე ვირის შვილო, აი შე ძაღლის გაგდებულო! — შენი დედა, შენი მამა!.. — მიაყოლა აზიზმაც.

ხმაურზე ხალხი გარეთ გამოეფინა.

ჰაჭელის დედა, ჭორფლიანი ქეზიბანი გარეთ გამოვარდა, ჯერ ითმინა, ითმინა, მერე აზიზის ცოლს დაეტაკა:

— ჩემი შვილი ვირის და ძაღლის შვილი არ არის! რაც პირიდან ამოვივიდა, იგი თვითონ ხარ! ჩვენს სოფელში ერთა ბოზია, რომელიც მუტრუქს შობს და ისიც შენა ხარ! გაიგეთ თუ კიდევ გაგიმეორო?

აზიზის ცოლმა სხვა უთხრა, ქეზიბანმა კიდევ სხვა, მათ აზიზიც აჰყვა და დათათხეს ერთიმეორე.

როგორც იყო მეზობლებმა გააშველეს მოჩხუბრები, აზიზი და მისი ცოლი სახლში წაიყვანეს.

— ნუ აჰყვები, აზიზ ბიძია! — უთხრა ერთმა, — ერთი ყარყატისათვის ფათერაცს ნუ დაიტეხ თავზე. ჭკვიანი კაცი ქეზიბანის შტერ შვილს არ აჰყვება. ის რაც გაიზრდებოდა, პატარაობიდანვე ეტყობოდა. არ გახსოვს, მკვდარი ძაღლი ჩემს ჭაში რომ ჩააგდო იმ ღორისდასმულმა? მამამისიც, ღორმა მოუთხარა სამარე, ასეთივე ოხერი იყო, კატას პირიდან თავეს გამოართმევდა, ნავთს გადაასხამდა, ცეცხლს მოუკიდებდა და გაუშვებდა...

— სწორია! — შეაწყვეტინა მეორემ, — ის ცეცხმოკიდებული თავვი ჩალის ან თივის ზვინში შეძვრებოდა და ცეცხლს აჩენდა.

მეზობლებმა გული მოიოხეს, გაიხსენეს რაც კი ჰაჭელსა და მამამისს საკვიმატო რამ გაუკეთებიათ.

— ბავშვი. რასაც მეზობლებს დაუნახავს, იმასვე გააკეთებს. ხომ გახსოვთ? მაშინ, გაზაფხულზე იმ ღორისგაგდებულმა ჰაჭელმა ყორანი რომ დაიჭირა? ჰოდა, იფიქრა, რა ვქნაო, მერე, ალბათ, მამამისის კვიმატი საქმე გაიხსენა, ჰოდა, ისიც ასე მოიქცა: გადაასხა ნავთი ყორანს და გაუშვა. მიფრინავდა ცეცხლმოდებული ყორანი და ნელ-ნელა იწვოდა.

— ასე იყო, ასე, ყველამ დავინახეთ! — აყაყანდნენ მეზობლები...

— ქორთლიანი ქეზიბანი უზრდელის ერთია და ნაშობი ბიჭი რა იქნება, აბა?

— უზრდელობა და კვიმატი საქმე სისხლში აქვს გამჯდარი მაგ ბიჭს!

* * *

იბის მერე ყველგან, ქუჩაში, სახლში თუ ყაფახანაში. კიდევ დიდხანს ისე ნებდნენ ამ ამბავს. ყარყატის შესახებ რაიონის გაზეთშიაც დაიწერა, მას სტამბულის გაზეთებიც გამოეხმაურნენ. მერე, ის იყო, შინ დაბრუნებულმა მეჯიდ-აღას მვიღმა, რომელიც ევროპაში სწავლობდა, განაცხადა, ყარყატის შესახებ იქაურ ჟურნალშიაც დაიწერაო. ასე რომ, ქეზიბანის ბიჭმა ჰაჯელმა საქვეყნოდ გაიფიქვა სახელი. ამის შემდეგ სოფელში ამოსული ყოფელი სტუმარი იკითხავდა ხოლმე:

- ის ბიჭი, ყარყატს რომ თინი უყო, აქაურია?
- კი, ჩვენი სოფლელია! — ეუბნებოდნენ დარცხვენით.
- რომელია მაინც ასეთი ჭკვიანი? ერთი მენახა მაინც. სოფლელებს სირცხვილისაგან მიწა უსკდებოდათ:
- ჰაჯელი ქვია, ერთი უშნო და შტერი ბიჭია!
- ვაი ასეთ კაცს, ვაი, ჰაჯადაც ნამყოფია? — უკვირდა სტუმარს.

— არა, რისი ჰაჯი, ჰაჯელი ქვია, ბავშვი ჰაჯად ხომ არ იბადება?

— ო, ეს ჰაჯელი!

სოფლელები ვერაფერს უბედავდნენ ჰაჯელს, რაიმე რომ ეთქვათ, იცოდნენ, ისეთ საპასუხო ხურდას მიიღებდნენ, ერთ კვირას ჭკუაზე ვერ მოვიდოდნენ.

— მაგი ბიჭი, ზედმეტი ჭკუა რომ აქვს და რა ქნას რომ არ იცის, იმიტომ იქცევა ასე! — ამბობდა ზოგი, — დედამისს რომ ფული ჰქონდეს, გააგზავნიდა სასწავლებელში. ისწავლიდა იქ და დიდი კაცი გამოვიდოდა, მაგრამ რა ქნას, ღარიბი ქალია, სადა აქვს ფული?

— ეს ბიჭი რომ გიაურების ქვეყანაში ყოფილიყო, იქ ისეთ რანებს შეისწავლიდა, ყველას აალაპარაკებდა. საუკეთესო ოსტატი დადგებოდა, აქ კი...

* * *

ჰაჯელი ჯარში გაიწვიეს და მოისვენა სოფელმა. სამხედრო მოვალეობის მოხდის მერე ერთხანს ჟანდარმერიაში იმუშავა, მერე, რაღაც დააშავა და სამი თვე ციხეში იჯდა. ციხი-

დან გამოსვლის შემდეგ სოფელს დაუბრუნდა. საუკეთესო კოსტიუმი ეცვა, ახალი ფეხსაცმელები, თავზე ცილინდრი, ხელში წითელ კრიალოსანს ათამაშებდა.

ჰაჯელს ცოტა ფულიც დაეგროვებინა. ეს რომ გაიგეს, ბერდი ბიძიამ და ახლობლებმა გვერდით მოისვენეს და ჰაჯელს დარიგება დაუწყეს: — ჰაჯელ, მაგ ფულით ხარები იყიდე, კარგია ხარები, მიწას მოხნავ, გააქირავებ...

ჰაჯელს თავისი გეგმები ჰქონდა და მათ არც კი უსმენდა.

— სულ სამი ქცევა ყანა გამაჩნია და მაგისტვის ვიცილო ხარები? არა, მე სულ სხვა სურვილი და მიზანი მაქვს.

მალე ჰაჯელმა სოფელში ყავახანა გახსნა. წინათ სოფელში ერთი ყავახანა იყო, სადაც სოფლელები დომინოსა და ბანქოს თამაშობდნენ. ახალ ყავახანაში კი ათასნაირი გასართობი მოაწყვეს. მალე მთელმა სოფელმა ჰაჯელის ყავახანაში დაიწყო სიარული. პირველ ხანებში საქმეც კარგად აეწყო. ჩაი და ყავა საკმაოდ საღებოდა. მხოლოდ ერთი რამ არ იყო რიგზე — ყველაფერი ნისიად იყო. თვით მოთამაშეებიც კი ნისიად თამაშობდნენ, კალოობის დროს გავასწორებთო ანგარიშს, — პირდებოდნენ ჰაჯელს.

მოვიდა კალოობის დროც, მაგრამ უმეტესობამ ვალი მაინც ვერ გადაიხადა, სოფელსა თუ რამ შესაძლებელი აქვს, სახელმწიფო ვალს იხდის, ბანკის დავალიანებას ანაღლებს; ოჯახისათვის ცოტა რამეს იძენს და მეტი აღარაა. ყავახანის ვალი და ნისია ვალად და ნისიად რჩებოდა.

ამასობაში ჰაჯელის ბიუჯეტი ერთიანად ამოიწურა, მან გაკოტრება დაიწყო. შემონახული ფული რომ შემოეღია, ჰაჯელმა სხვა უსაქმურებივით იწყო სოფელში უსაქმოდ ხეტიალი. ჯერ იყო, სხვაგან წასვლა გადაწყვიტა საძუშაოს საძებნელად, მაგრამ ცოლ-შვილი ვერ მიატოვა. ეშინოდა, ცოლი და შვილები ხელიდან არ წასულიყვნენ.

დადიოდა ჰაჯელი სოფელში და ერთიანად ოცნებაში იყო წასული: — ვალები რომ ვადეხადათ, იმ ფულით მიწას ვიყიდელი, სიბერეში გავყიდლი და მოვიხმარდი. ჩვენთან ხომ კაცი ისე შვილს ვერ დააქორწინებს, თუ მიწა არ გაყიდა.

დაეხეტებოდა ჰაჯელი სოფელში და უსაქმურობისაგან არ იცოდა რა ექნა, ყველას საქმეში ერეოდა, ხალხს უსმენდა, მის ნათქვამს იმეორებდა. იგი ჰყვებოდა ნახულსა თუ განაგონს, მონაყოლსა თუ წაკითხულს, ჰყვებოდა საბჭოთა კავშირზე, ამერიკელ მენავთობეებზე, სტამბულის სილამაზეზე... მერე მიყვებოდა, მოყვებოდა და ხალხის გამასხარავებას დაიწყებდა. ერთ დღეს სოფელში სტუმრად ჩამოსულ ხოჯას მიდგა, ისე ლაპარაკობდა, იფიქრებდით დიქტორია და რადიოთი ახალ ამბებს ვაძმოსცემსო:

— რამაზანის პირველ დღეს ჩვენს სოფელს ერთი ხოჯა ეწვია, რომელმაც განაცხადა, თუ ქათამსა და ფლავს არ მაცემვით, ამ სოფლიდან წავალო. მაგრამ წელს ქათმები მოსპო, გლეხებს ბრანჯი და ბურღული გამოელია, ტომრები დაიცალა. საძოვრებზე ბალახი გადახმა და მეწველი საქონელი დაშრა. ყველსა და კარაქს არავინ აკეთებს. მთელ ზაფხულს ციდან წვეთი არ ჩამოვარდნილა. ახლა ჩვენი ხოჯა-ეფენდი აიბარგა და სადაც ქათამი და ერბო ეგულება, იმ სოფელს მიაშურებს.

ხოჯა-ეფენდის მაგიდაზე ყურანი გაეშალა და შელანძლულ ფურცლებს კინძავდა. ჰაჯელის ნათქვამზე გაბრაზდა:

— უკაცრავად! — შეუთია მას, — მე აქ არც ქათმის საქმელად ვარ მოსული და არც შენისთანა უსინდისოს მოსასმენად, ვე ჩემი საქმე ვიცი, ღმერთისაგან მაქვს დაჯალბული. თუ ვმუშაობ, ფულსაც ვღებულობ, შემოწირულ არც ერთ კერძს არ ვიწუნებ.

ჰაჯელს ძალიან სიამოვნებდა ხოჯის გაბრაზება:

— ფული თუ არ მოგცეს, მაშინ? — არ მოეშვა გაწიწმამებულ ხოჯას.

იქვე მდგარ ბადრი ბიძიას ხოჯა შეეცოდა და გამოექომაგა:

— ამ კაცს შენსავით უანდარმერიაში არ უმუშავნია, ჰაჯელ, არც ციხეში მჯდარა. არც როგორც შენ ამბობ, ქათმის ჭამასა ჩვეული. ხომ ხედავ, პატიოსანი კაცია, მუშაობს, ამ საქმეს რომ მორჩება, შიხ ორი ცალი ყურახი მაქვს, ერთი მამაჩემის ნაქონია, მეორე კი ბაბუაჩემის, ყდა აქვს მომძვრალი და ის უნდა ამიკინძოს. მერე ერთი ისტორიული წიგნი მაქვს არაბულ ენაზე, ისიც უნდა შემეკინძოს. გარდა მაგისა, ჩვენი მეჩეთი წიგნებითაა სავსე. ახლა კიდევ, ბევრი საღვთო წიგნია მოსახლეობაში, ყველა ისინი უნდა შეიკრიბოს; აიკინძოს და ჯამეს ჩაბარდეს. იმ წიგნების დაკარგვა დიდი ცოდვაა. ასეთი შემთხვევა ყოველთვის არ გვექნება, რაკი პატივცემული ხოჯა, ჯვედეთ-ეფენდი ჩვენთანაა, უნდა გამოვიყენოთ კიდევ.

ჯვედეთ-ეფენდიმ მოწონებით დაუქნია თავი და თქვა: — როგორც საღვთო წიგნების კითხვაა სავალდებულო, ასევე მისი მოვლა-პატრონობაც... ქალაქში საბარდელე ყურნალების კინძვას მირჩევნია სოფლები შემოვიარო და ყურანი და სხვა საღვთო წიგნები ავკინძო. თუ ყურანი არ გვექნა, სარწმუნოების საქმე უკუღმა წავა.

ბადრი ბიძიას ესიამოვნა ხოჯის ნათქვამი და სიტყვა ჩამოართვა: — სარწმუნოება არ უნდა მოკვდეს, ჯვედეთ-ეფენდი! ჩვენი სარწმუნოება ღმერთის შეწევნით წარღვნამდე იარ-



სებებს. შენ კი ჯევდეთ-ეფენდი, ასეთ სამადლო საქმეს აკეთებ, ღმერთის მადლობას იმსახურებ.

ჰაჯელმა კვიმატად ჩაიღიმა და ბადრი ბიძიას მიუბრუნდა: — ბადრი ბიძია, ჯევდეთ-ეფენდის ყურანი წელს ზემოთ უნდა ეჭიროს. ასეა წესი. მას კი წელს ქვემოთ უჭირავს, განა ეს მიღებულია?

ხოჯა უხერხულად შეიშმუშნა: — შვილო, შენ მართალი ხარ! — უთხრა მან, — შენ ასეთ რამეს ნუ მიაქცევ ყურადღებას, მთავარია, გულით იყო მორწმუნე, თორემ წელს ზემოთ დაიჭერ ყურანს თუ წელს ქვემოთ, ამას დიდი მნიშვნელობა არა აქვს.

— როგორ არა აქვს? აქვს!
— არა აქვს!

შეკამათდნენ. ყავახანის ჩრდილში თავმოყრილი მორწმუნენი, რომლებიც უსაქმურობისაგან თვლემდნენ, გამოფხიზლდნენ და კამათში ჩაებხენ. შეკამათდნენ, ატყდა ერთი ვაი-უშველებელი, გინება და ერთმანეთზე მიწევ-მოწევა.

გზაზე დატვირთულმა ურმებმა ჩაიარეს ჭრიალით. ურმებს გვერდით სიცხისაგან დაოსებული გლეხები, დაღლილი ქალები და ფეხშიშველა ბავშვები მოჰყვებოდნენ.

მათ დანახვაზე მოჩხუბრები დაშოშმინდნენ. ამასობაში ჯევდეთ-ეფენდიმ საქმე მოათავა, სალოცავად მზადებას შეუდგა — ხელ-პირის დასაბანად წყალი მოსთხოვა ჰაჯელს.

— გამოდის, შენ უნდა მიმსახურო! — უკმეხად მიუგო ჰაჯელმა, — მეჩეთში მიდიხარ? ჰოდა, წადი და ილოცე, რამდენჯერ უნდა დაიბანო დღეში ხელ-პირი და ფეხები?

ჯევდეთ-ეფენდი უკმაყოფილოდ აბუზღუნდა.

გზაზე აზიზ ბიძიაც გამოჩნდა სალოცავად მომავალი. ეტყობოდა პირდაპირ სამუშაოდან მოდიოდა, თმა გზის მტვერით დაფარვოდა, სიცხისაგან ერთიანად გარუჯულიყო.

ყავახანის კარებთან შედგა. ჰაჯელი რომ დაინახა, პირი მოარიდა. იმ შეხლა-შემოხლის შემდეგ, მართალია დიდი ხანი გავიდა, მაგრამ აზიზს მაინც ყველაფერი ახსოვდა. მიუხედავად ყველაფრისა, ჰაჯელს უყვარდა ბიძია აზიზი, პატივსაც სცემდა. ახლაც დაინახა თუ არა, ყველაფერი დაივიწყა, მიეგება, და უთხრა: — მობრძანდით, აზიზ ბიძია, მობრძანდით!

— წყალი! — მოითხოვა აზიზმა და მხერა აარიდა.

— წყალი რისთვის გინდა, აზიზ ბიძია?

— არ იცი, რისთვის მენდომება წყალი? ჯამეში მივდივარ და ხელ-პირი უნდა დავიბანო.

ჰაჯელმა განგებისად შეიკრა შუბლი: — ვინც სალოცავად მიდის, ყველამ თუ აქ აიღო დასაბანი წყალი, მე ჩაი რითი

უნდა ავადულო? ფული როგორ უნდა ვიშოვნო? თუ ჩაის და-
ლევთ, მოგცემ წყალს, არა და, არ მოგცემთ!

ბიძია აზიზმა მკლავები დაიკარწახა და მიუგო: — ვინ
იცის, ჩაის ვალს რამდენს უმატებ... კარგი, რაც არის, არის,
მოიტა წყალი, სალამოს კი ჩაის დავლევ შენს ყავახანაში!

მოლოცველებმა ხელ-პირი დაიბანეს და ჯამეს მიაშურეს.
ყავახანაში ჰაჭელი და ხუთიოდე ურწმუნო დარჩა.

— ყავახანა უნდა დავხურო! — განაცხადა ჰაჭელმა კარგა
ხნის ფიჭრის შემდეგ, — ამიერიდან მიწას არავის არ მივცემ
საზიაროდ. მე თვითონ დავამუშავებ, ერთ წყვილ ხარსაც ვი-
ყიდი!

— კარგი აზრია! — თქვა ერთმა მთქნარებით.

— კი, კარგია! — დაემოწმა მეორე.

— მოსავლიან მიწებს შევისყიდი, სოფლის ალა უნდა გა-
ვხდე.

— ღმერთმა ქნას! — ორჭოფულად ჩაილაპარაკა ერთ-
ერთმა მათგანმა.

— მაგრამ არა, — მაშინვე დასძინა ჰაჭელმა, — რა თავ-
ში ვიხლი ალობას?

მერე ისევ მყუდროება ჩამოწვა. რომელსაც დროდადრო
რომელიმე მათგანის ხმამალალი მთქნარება არღვევდა.

შუადღის ლოცვიდან ყავახანაში არავინ დაბრუნებულა,
მოულოდნელად სამხრეთის ქარი ამოიჭრა და ყველანი კალო-
საკენ გაეშურნენ პურის გასანიავებლად.

კარგა ხნის მერე ყავახანაში მხოლოდ ჯვედეთ-ეფენდი
შემობადუნდა, მაგიდას მიუჯდა და თავისი საქმე — კინძვა
გზნავრძო.

— ყავახანას ვკეტავ! — უთხრა მას ჰაჭელმა ცოტახნის
მერე. — წაილე მაგ შენი ხელსაწყობები და წადი. არა მცალია,
მეც კალოზე უნდა წავიდე, უნდა ვნახო, ჩემი მოზიარე გლეხე-
ბი რას აკეთებენ, პურს ხომ არ მპარავენ!.. წადი სოფლის მო-
ედანზე და იქ აკინძე მაგ წიგნები!

ჯვედეთ-ეფენდიმ უსიტყვოდ მიმოხვია ყველაფერი და
წავიდა. ჰაჭელმა ყავახანა დაკეტა და კალოს მიაშურა. ხელები
ზურგსუკან ეწყო, დინჯად, აუჩქარებლად ჩამოიარა ყოველი
კალო, მერე ბადრი ბიძიას ეწვია, იქ ცოტახანს იღლაბუცა;
წაიმღერა, ბოლოს კი თქვა: — ხვალ ქალაქიდან ელემენტები
უნდა ამოვიტანო, აქ, კალოზე რადიო უნდა დავდგა, რომ ყვე-
ლამ გაიგონოს მისი ხმა, ხალხმა მოიღზინოს, გაძღეს სიმღე-
რით. მერე ქერიმ-ეფენდის მაგნიტოფონსაც მოვიტან.

კალოდან სალაპოხანს დაბრუნდა ჰაჭელი. ყავახანისაკენ
მიმავალი ფათმას სახლს რომ გაუსწორდა, ახალგამომცხვარი

პურის სუნი ეცა. ესიამოვნა პურის სუნი. რამდენიმე წამს იდგა და ფიქრობდა, მერე კი დაუკითხავად შეალო კარბოქსილი მა მეზობელი სოფლიდან იყო გამოთხოვილი ამ სოფელში. ორი შვილი ჰყავდა—გოგო და ბიჭი. ჰკუადაძღარი ქალი იყო, საქმიანი, მეოჯახე, მთელს სოფელში მხოლოდ მას გააჩნდა თონე. ამ რამდენიმე წლის წინათ თონე ჰაჯელმაც გააკეთა ეზოში, მაგრამ მისმა ცოლმა პური ვერ გამოაცხო. ჰაჯელი გაბრაზდა და თონე საქათმედ გადააკეთა.

ჰაჯელს ფათმა გამოეგება.

— ხელები უნდა დაგიკოცნო, ფათმა! — უთხრა ჰაჯელმა.

— იცოცხლე, ჰაჯელ, კეთილი იყოს შენი მობრძანება!

— მომშივდა, ფათმა!

— მგონი შენ არ მარხულობ.

— არა, არ ვმარხულობ!

— ჰოდა, მაშინ პური მიირთვი.

ჰაჯელმა თონის პური შუაზე გაგლიჯა და მადიანად ჩაეზიხა.

— ესეც შენ მიირთვი! — ფათმამ მეორე პურიც გადაუღო, — წაიღე და თბილი პური აჭამე ბავშვებს.

ჰაჯელმა მადლობა გადაუხადა, მთელი პური ილღიაში ამოიჩარა, ნახევარიც ჩამჯილა, და გზას გაუდგა. რამდენიმე ეზოს რომ ჩაუტარა, ერთგან ძალლი შემოეფეთა, ჰაჯელმა პურის ნატეხი გადაუგდო, მერე მეორე ძალლი შემოხვდა, მასაც წაუტეხა პური. მალე ოცამდე ძალლი შეგროვდა. ყავახანასთან მივიდა. ჰაჯელმა მეორე პურსაც ყუა მოტეხა და ძაღლებს გადაუგდო. იმ ერთი ნატეხისათვის ძაღლები ერთმანეთს წაესია. ჰაჯელისათვის ეს კარგი გასართობი იყო, ყავახანის კარებს ზურვით მიეყრდნო და ახარხარდა.

მახლობელი ეზოებიდან სხვა ძაღლებიც გამოცვივდნენ და ხროვას შეერივნენ. ხმაურზე მათი პატრონებიც მოგროვდნენ და ერთმანეთზე გადაკიდებული ძაღლების გაშველებას შეეცადნენ.

ამ დროს ჯევდეთ-ეფენდი ჯამეს მახლობლად ვახშამს შეექცეოდა, რომელიც მისთვის მუხტარს გამოეგზავნა.

ჰაჯელმა რალაც გაიფიქრა, ჩაიციხა და მისკენ გაემართა, ძაღლების გროვა აედევნა.

ჯევდეთ-ეფენდიმ ეს რომ დაინახა, ჯერ გაუკვირდა, წითელი წვერი შეიფხანა, სიცილის გუნებაზე დადგა, მაგრამ თავი შეიკავა.

„ეს კაცი მგონია გაგიჟდა! — გაიფიქრა მან, — აქეთ მოდის, ძაღლები მოსდევენ, რატომ მოსდევენ ძაღლები, ნეტა?.. ღმერთო, მოთმინება მომეცი!“.

— ოო, ჭვედეთ-ეფენდი! — მიუახლოვდა მას ჰაჯელი სუფრა უკვე გაგიწყვია. ბარაქალა შენს სუფრას!

— დიახ, გავაწყვი! — ცალყბად ჩაილაპარაკა ჭვედეთმა.

— კარგი სუფრაა, ოღონდ ცოტა არაყიც რომ იყოს, უკეთესი იქნება! რას იტყვი, ჭვედეთ-ეფენდი, შაქირას დუქნიდან ერთი ნახევარი ბოთლი არაყი რომ მოვიტანო?

ჭვედეთი შეიშმუნა, შეწუხდა, — წადი აქედან, უსინდისოვ! — დაუყვირა ჰაჯელს, — რას გადამეკიდე დღეს?

— უსინდისოვ?! — წარბი განგებისად შეიკრა ჰაჯელმა, — ეს როგორ თქვი ჭვედეთ-ეფენდი? სირცხვილი შენი! ქალაქელი მაინც არ იყო და ყურანს არ კინძავდე მაინც. არ გეკადრება შენ ასეთი რამეები. ყურანში ეს წერია სტუმარი გააგდეთ?

— მეკადრება თუ არ მეკადრება, მომშორდი ახლა!

— ჭვედეთ-ეფენდი, ასე როგორ შეიძლება! ვახშამზე შემოსწრებულ ადამიანს კაცი განდევნის? დაუფიქრდი მაინც, რას ამბობ!

— მე ვდევნი! — გაბრაზებით გამოსცრა ჭვედეთ-ეფენდი, — ზედმეტი არაფერი მაქვს, რაცა მაქვს, თავად მიიდა.

ჰაჯელმა ჩაიციხა, ნიკაპი შეისრისა, წამით ჩაფიქრდა, უეცრად რაღაც გაახსენდა და თვალები გაუბრწყინდა. — პური არ გეყოფა ჭვედეთ-ეფენდი, და მე მოგცემ აგერ! — ილიაში გაჩრილ პურს საკმაოდ მოზრდილი ნაჭერი მოტეხა და ჭვედეთს სუფრაზე დაუდო.

ჰოდა, მთელი უბედურებაც სწორედ მაშინ დატრიალდა. როგორც კი პურს მოკრეს თვალი, ძაღლების მთელი ხროვა პურს დაეძგერა. საინები გადაყირავდა, სუფრა წაიქცა, ყველაფერი მტვერში აირია. მალე ჭვედეთ-ეფენდის სუფრა ღორების ნამუსრევეს დაემგვანა. ძაღლების ფეხებში მოქცეული ჭვედეთი მტვერში გორავდა და სასოწარკვეთილებით აღსავსე ცდილობდა კერძების გადარჩენას, მაგრამ ყველაფერი ამაო იყო.

ჰაჯელი ჯერ ლამის არ გასკდა სიცილით, შერე კი შებრუნდა და არხეინად წავიდა.

რამდენიმე წუთის შემდეგ სალამოს ლოცვაზე მოსულმა ხალხმა ძლივს მოასულიერეს მტვერში ამოგანგლული, გულშემოყრილი, ძაღლების ბრჭყალებისაგან ხელებ და სახედაკაწრული ჭვედეთ-ეფენდი.

ჰაჯელის ერთმა ნათესავმა, მორწმუნე კაცმა, ჭვედეთ-ეფენდი ასეთ მდგომარეობაში რომ ნახა, ვეღარ მოითმინა და შეივინა. — მისი ცოლი, მისი დედა, ვინაც ამას ეს საქმე წაკიდა!

— ჰაჯელის ნამოქმედარია მაგი! მის მეტი ვინ ჩაიფიქრებდა ასეთ რამეს, აბა? — უთხრეს მას.

ჰაჯელის ნათესავს არ ესიამოვნა, იქაურობას გაშორდა და თავისთვის წაიბუტბუტა: — თავი მოგვეჭრა და ეგაა! ესაა, კაცო, საქმე?

— უსირცხვილო!

— უჯიშო!

— გათახსირებული! — იგინებოდა ხალხი ჰაჯელის მისამართით, გაბრაზებულებმა ყავახანასთან მოიყარეს თავი. კარი დაკეტილი დახვდათ. შეამტვრიეს და ჰაჯელს დაუწყეს ძებნა.

— აქ იქნება, სად წავიდოდა აბა? — ამბობდნენ და ეძებდნენ.

მაგრამ ჰაჯელი ვერსად ნახეს. მაშინ განრისხებულებმა მავიდებს დაუწყეს მტვრევა.

აზიზ ბიძია მაგიდაზე შეხტა და იყვირა: — გაჩერდით, მომისძინეთ, ხალხო! მე თქვენ ახლა ყავახანის ვალებისაგან გაგათავისუფლებთ! — მაგიდიდან ჩამოხტა, სამზარეულოში გავიდა, პირსახოცი დაასველა, კედელზე ცარცით მიწერილი შეცალეების სია წაშალა და თქვა: — მაგიდებისა და კიქების მტვრევას ასე ჯობია! იცოდეთ, არც ერთმა არ გადაიზადოთ ყავახანის ვალი.

— ახლა მეც მომისძინეთ! — დაიძახა ბადრი ბიძიამ, — მევალეთა სია წაშალეთ და საკმარისია. დანარჩენს არაფერს ახლოთ ხელი!

ამ დროს ეზანიც გაისმა, ხოჯა სალამოს ლოცვაზე უხმობდა ხალხს. ყავახანის დაღეწვის მსურველი ხალხი უკლებლივ ჯამესაკენ გაეშურა.

იმამი ჯამეს კარებთან შეეგება ხალხს და გააფრთხილა: — აბა, ყველამ ხელ-პირი და ფეხები დაიბანეთ! იმ ორომტრიალში არამართო დაისვრებოდით, არამედ სარწმუნოებაც დაგავიწყდებოდათ.

ხალხი შეწუხდა: — წადი ახლა და ამ მშიერი მუცლით ხელ-პირი და ფეხები დაიბანე!

— იმამ-ეფენდი! ცოტა მაინც შეგვიბრალე! — წამოიწყეს ზოგიერთებმა, მაგრამ იმამი მტკიცედ იდგა თავის გადაწყვეტილებას და არც ერთს არ მოუსმინა.

რა ექნათ, ყველამ ფეხები და ხელპირი დაიბანა და ჯამეში შელაგდა.

ამ დროს ჰაჯელი თავის ყავახანაში შევიდა. იქაურობა არეულ-დარეული რომ დახვდა, ჩაიკინა: — ყოჩაღ, ხალხო! გასართობი უნახავთ, რაღა. აი ასე უნდა. ხანდახან უნდა გამხიარულდეთ, თორემ ყოველთვის დაღვრემილი ყოფნა როგორ

შეიძლება? — ჩაილაპარაკა, ყავახანა დაკეტა, ხელები ჯიბეში ჩაიწყო და ზღაპრით გაემართა ჯამესაკენ.

სალამოს ლოცვა დამთავრდა. ხალხი გარეთ გამოეფინა. ჰაჯელს რომ მოჰკრეს თვალი, გაიოცეს, ჰაჯელმა კიდევ, ვითომც არაფერი იყო, გაუცინა ხალხს. მათაც გაეცინათ. ჰაჯელი ხალხში გაერია. ყველანი სოფლის ცენტრისაკენ გაემართნენ. მომხდარ ამბავზე არავის კრინტი არ დაუძრავს.

კარგა ხნის შემდეგ ისევ ბიძია აზიზმა ამოიღო ხმა:
— ბიჭო, ჰაჯელ, რატომ ექცევი ხალხს ასე ცუდად? რატომ ჩადიხარ ასეთ სიგიჟეს?

— სიგიჟე-მიგიჟე არ ვიცი მე! — დაიყვირა ჰაჯელმა, — ყველანი ისე ხართ დაღონებულები, თითქოსდა ცხედარი გესვენოთ სახლში, ხანდახან გართობაც ხომაა საჭირო? ვიფიქრე, ვიფიქრე და მეტი ვერაფერი მოვიფიქრე. რა მოხდა მერე? ხომ იცინეთ, ხომ იმხიარულეთ? ქვეყანა ხომ არ დაქცეულა?

გაოცებულებმა შეხედეს, თითქოსდა უცხო, მათთვის გაუგებარ ენაზე ლაპარაკობსო.

მერე ხალხი დაიშალა და ჰაჯელი მარტო დარჩა.
— კარგად. ბენიერად იყავით, ნურაფერზე გამიბრაზდებით! — გასძახა ხალხს ჰაჯელმა, — ხვალაც მობრძანდით ჩემს ყავახანაში!

ზოგიერთებმა უკან მოიხედა. არა, ჰაჯელი სრულებით არ ჰგავდა ცუდ კაცს.

— არა, ცუდი კაცი ნამდვილად არაა, ოღონდ გონებას ვერ იმორჩილებს! — თქვა ერთ-ერთმა მათგანმა, — ეს სისულელები ზედმეტი ჰკუისაგან მოსდის. კარგი მასალაა, მაგრამ ოსტატი არა ჰყავს. ქალაქში რომ დარჩენილიყო, ანთა ქრისტიანების ხელში მოხვედრილიყო. კაცი გახდებოდა, მანქანებს გააკეთებდა, ვინ იცის რას არ გააკეთებდა!..

რეზულიზ საბანი

ჭრელმა მამალმა ყვილი დაიწყო. თენდებოდა. ბოსლის ერთ მხარეს, მომალლოზე საწოლი იყო გამართული, რომელზედაც ხუთ სულს ეძინა. მათი ქშინვა ბოსელში გამეფებულ მყუდროებას არღვევდა. საქონელთან, ზამთრობით საკმაო სითბოა და სოფლელები ამიტომაც ათეგენ ბოსელში ღამეს.

საწოლს დაბლა ცხვრების, მსხვილფეხა საქონლისა და სახედრის საბრძანებელი იყო.

ჭრელმა მამალმა ისევ დაიყვილა. მის ყვილზე თულუქ

იბრაიმმა გაიღვიძა. ერთი მადიანად დაამთქნარა, გვერდებზე დაბრუნდა, ერთხანს იწვა, მერე კი ზოზინით წამოდგა. მძინარე ცოლსა და უფროს ბიჭს გადაახურა და დაბლა ჩავიდა. პატრონის დანახვაზე ცხვრები აფრუტუნდნენ. ჩათვლემილი, ყურებჩამოყრილი, რალაცაზე ჩაფიქრებით მიწას ჩაჩერებული სახედარი შეიშმუშნა და მერე ისევ გაშტერდა. ოთხი თვის სბოს აეშვა, დედა მოედებნა და ახლა გამალეზიდა წოვდა ჩუქუს. თულუქ იბრაიმმა სბო დააბა, ხელში დოქი აიღო, ბოსლას კართან მწოლ სბოს წიხლი ჩასცხო, ზეზე წამოაგდო, ურდული გადასწია, კარი გამოაღო და გარეთ გავიდა.

წვიმა.

— ღმერთო, შენ შეგვიწყალე, კიდევ გაწვიმებულა! — უკმაყოფილოდ ჩაილაპარაკა, — ჰეი, დიდო გამჩენო, ერთი-ორი დღე გეცლია რა იქნებოდა? ყანის დათესვა მაინც მოგვესწრო. დრო მიდის, ჩვენ კი... ნუთუ წელსაც სხვაგან უნდა ვიხეტიალოთ სარჩოს მოსაპოვებლად?

* * *

ქალაქის ერთ-ერთი სასტუმროს მეორე სართულზე მცხოვრები ადვოკატი ადილ-ბეი ადრე დილით ადგომას არ იყო ჩვეულო, მაგრამ იმ დღეს რატომღაც უთენია, ექვსის ნახევარზე გაიღვიძა. ერთი მადიანად დაამთქნარა, წამოსივებული თვალები მოისრისა და ზეზე წამოდგა. ზღაზვნით მივიდა ფანჯარასთან, ფარდა გადასწია, ოთახი ოდნავ განათდა და საგნები გამოიკვეთა. ადილ-ბეი ერთხანს ფანჯარაში იცქირებოდა, მერე მიბრუნდა და საწოლისაკენ გაემართა. საწოლზე გრძელთმიანი ქალი იწვა, წაბლისფერი თმები ლამაზად ეფინათეთორ, ქათქათა ბალიშზე. ქალი პირადმა იწვა, პირი დაეღორია, ხმაშიღლა ხვრინავდა.

ადილ-ბეიმ უკმაყოფილოდ შექმუხნა წარბები, მას არ სიამოვნებდა, ძილში ცოლი რომ ხვრინავდა. ეს მას სიბერის უტყუარ ნიშნად მიაჩნდა.

„არ მომწონს შენი ხვრინვა, აღარც შენ მომწონხარ უკვე. შენ, ჯერით-ალას ერთადერთი, ულამაზესი ქალიშვილი იყავი, შენ ერთ დროს ჩემი საყვარელი მაქბულე იყავი. ახლა კი!“ — გაიფიქრა, ხელი ჩაიქნია, საწოლს მოშორდა, ისევ ფანჯარასთან მივიდა, გამოაღო და გარეთ გადაიხედა. წვიმა, ოდნავი შრიალით მოდიოდა წვიმა.

— ოჰო, კიდევ გაწვიმებულა! — ჩაილაპარაკა, — რალა გვეშველება. ჰა? ამ წვიმაში არსად არ წაისვლება, მაგრამ იქნებულა ვარ წავიდე! — გაბრუნდა, ფლოსტები დაძებნა, მაგრამ კერსად რომ ვერ მიაგნო, ვილაცის მისამართით შეივი-



ნა, ფეხშიშველი გაიარა ნოხზე, სარკესთან მივიდა, კრიტიკულად შეათვალიერა საკუთარი სახე, ლოყებზე თითები ჩამოსვა.

— დღეს არ უნდა გავიპარსო, მომბეზრდა! — გაიფიქრა. მერე საწოლთან მივიდა, მძინარე ქალს წყნარად ჩასძახა: — მაქბულე, მაქბულე! აბა, გაიღვიძე, ჩემო კაკაბო! ნახე ერთი რაღები მომხდარა!

ქალი შეიშმუშნა, ზანტად გაახილა თვალები და საწოლზე დანსრილ ქმარს გაოცებული მიაჩერდა.

— გაიღვიძე, ჩემო კაკაბო? — დაეკითხა ქმარი.
— ვიღვიძებ, ჩემო იხვო! — მიუგო ქალმა წყნარი ხმით და გაიფიქრა: „ეს რა კარგად ვთქვი, იხვს არა ჰგავს მართლაც?“
— გაიხშორა და წამოდგომას შეეცადა.

ადილ-ბეიმ ხელი შეაშველა ცოლს: — უკვე დილაა, მაქბულე! რაც შეიძლება ადრე უხდა წავიდე. საცაა მძლოლი მომაკითხავს და წავალ.

— სალამოს დაბრუნდები? — დაეკითხა ქალი.
— აბა არა?! აუცილებლად, ჩემო შავთვალავ!

* * *

თულუქ იბრაიმმა საქონელს თივა დაუყარა, წყალი დაუსხა, მერე საწოლზე ავიდა და მძინარე ცოლს ფეხი წაჰკრა: — ქალო, ადექი ერთი და გაიხედე გარეთ! კიდევ გაწვიმებულა. გამოდის წელს ყანა დაგვითესავს.

სანამ ცოლი გაიღვიძებდა და ადგებოდა, თულუქ იბრაიმმა ილოცა, მერე საწოლიდან ჩამოვიდა და გამოყეყეჩებულ სახედარს რატომღაც მუშტი უთავაზა.

— კიდევ გაწვიმებულა? — იკითხა ქალმა მთქნარებით.
— კი, გაწვიმებულა!
— რადგანაც ასეა, შენაც დაწექი ამ წვიმაში რა უნდა აკეთო მაინც?

— ამ წოლით და ძილით რა გამოგვივა? — ჩაილაპარაკა თულუქ იბრაიმმა, — შენ არ უნდა ილოცო?

ქალს, თითქოს ვერ გაიგონაო, ხმა არ გაუღია. თულუქ იბრაიმი ისევ დაწვა.

უფროს ბიჭს, სელამეთს ალბათ ძილში ქალამანი და დანა თუ ესიზმრა, ხმამაღლა ბოდავდა.

— ძაღლის შვილი! — თქვა ხმამაღლა იბრაიმმა—ქალამანი კიდევ ჰო, მაგრამ დანა რა ოხრობად გინდა? — ბიჭს მუჭულუგუხი წაჰკრა.

— მამა, მამა!—ჩაილაპარაკა ჯერ კიდევ ბურანში მყოფმა ბიჭმა. ბიჭის ხმის გაგონებაზე იბრაიმს გული მოუღბა, თა-

ვზე გადაუსვა ხელი და უთხრა: — შვილო, მე შენ ქალაქში უნდა გიყიდო, წელზე ჩამოსაკიდი დანაც უნდა გიყიდო, ყველაფერი უნდა გიყიდო!.. გაიღვიძე ახლა!

— გავიღვიძე, მამიკო!

— რადგანაც ვაიღვიძე, აბა გაკვეთილები გავიმეოროთ. მერე ახალი გაკვეთილი უნდა მოვამზადოთ, ყველაფერს რომ შეისწავლი, ხაფიზი გამოხვალ. ხაფიზი რომ იქნები, სოფლის ჯამეში იმამად დადგები და ფულიც ბევრი გექნება. ფული რომ გექნება, მაშინ, მე და შენ იმ მიწებს აბას-ალამ რომ წაგ-
ვართვა, ისევ უკან დავიბრუნებთ. იმ მიწებს რომ დავიბრუნებთ, სხვა მიწებსაც ვიყიდით. ყომარბაზების, ლოთებზასა და უსაქმურების ყანებსაც ვიყიდით. ჩემო ბიჭო, იმამი რომ იქნები, ეცადე ლარიბების მიწა არ იყიდო...

— ლარიბების მიწა რატომ არ უნდა ვიყიდო, მამა? — შეაწყვეტინა ბიჭმა.

— რატომ და, ლარიბი რომ მიწას გაყიდის, მშვიერი მოკვდება. შენ უნდა შეეცადო, მდიდრების მიწები იყიდო. ლარიბებს მაინც ცოტა მიწა აქვთ...

— ლარიბებს რატომ აქვთ ცოტა მიწა? — იკითხა დაინტერესებულმა ბიჭმა.

— იმიტომ, შვილო, რომ დიდი მიწები მდიდრების ხელშია. ლარიბს რომ გაუჭირდება, მდიდარი ღროს უშოვის და იმ მცირე მიწასაც იაფად ართმევს.

— მე როდის გავხდები სოფლის იმამი, მამიკო?

— ჯერ შენ ბევრი უნდა ისწავლო შვილო, ყველაფერი უნდა იცოდე, უნდა გაიზარდო და მერე...

— რაც იმამობამდეა შესასწავლი, ძენ ყველაფერი იცი, მამიკო?

— არა, შვილო! მე იმის მეასედიც არ ვიცი. მე რაც ვიცი, შენ ჯერ ის ისწავლე, მერე კი... ამ მთების იქით ერთი სოფელია, იმ სოფელში ხოჯები შენხელა ბიჭებს ყველაფერს ასწავლიან. წავიყვან იქ და ისწავლი...

— როდის წამიყვან იქ, მამიკო?

— ხუთი წლის შემდეგ, შვილო!.. ახლა გაკვეთილები გავიმეოროთ. მისმინე, მე შენ შეგეკითხები, შენ კი პასუხი გაცე: აბა, მითხარი, „მუმინი“ როგორ აღამიანზე ითქმის?

— მუმინი ნიშნავს ღმერთის მორწმუნეს, წმიდათა წმიდა მუხამედის თაყვანისმცემელს, სისტემატურად რომ ლოცულობს, ისეთ კაცს ეწოდება მუმინი.

— ისწორია! ახლა ეს მითხარი: „მუმინაფიუს“ როგორ კაცს ეძახიან, შვილო?

— რომელსა და, ღმერთისა და წმინდანების მორწმუნე

რომ არ არის და მორწმუნე ვარო, ხალხს რომ ატყუებს, ცუდ სიტყვას რომ იტყვის, სხვის საქონელს რომ მიითვისებს...

— სწორია!

— დედ-მამის მოწინააღმდეგე შეილიც ხომ მუნაჯიყთა წრეს მიეკუთვნება, მამა?

— აო, რა თქმა უნდა!

* * *

ადვოკატი ადილ-ბეი წასვლის წინ ცოლს მოეხვია და დაუძახა:

— სალამოს დავბრუნდები, ჩემო კაკაბო! აბა, ერთი წასვლისას გაძლიძე! მასე, მასე! — ხელში ქალაღებით დატენილი ჰორტფელი აიღო და კარი გაიხურა:

სასტუმროს ეზოში მანქანა ელოდა, ადილ-ბეის დანახვაზე მძლოლი მანქანიდან გამოვიდა, მიესალმა და კარი გაუღო.

— გამარჯობა შენი, სერვეთ! როგორ ხარ? — ახედ-და-ხედა მძლოლს ადილ-ბეიმ, მანქანაში ჩაჯდა და განაგრძო: — დღესაც რა ჯანდაბამ გააწვიმა, ა? უსინდისოები, მაინცდამაინც ეს წვიმიანი ღლე შეარჩიეს. არა, რაღაც უნდა დამიჯდეს, ამ არჩევნებში დეპუტატი უნდა გავხდე. რას იტყვი შენ, წაისვლება?!

სერვეთმა მანქანის კარი მიხურა, საჭეს მიუჯდა და ჩაილაპარაკა: — წავალთ, ბატონო, ეს წვიმა ჩვენ ზელს ვერ შეგვიშლის!.. იცით, კმრეში ხიდი გაუკეთებიათ!..

ადილ-ბეი სავარძელზე გადაწვა: — ამ ხალხის დარდს მართო ეს ხიდი არ უშველის, შვილო! სადღაც ორ ხიდს ავაგებთ, სადღაც წყაროს გამოვიყვანთ და მორჩა! ეს არ შველის საჭმეს. ხალხს ტონობით დარდი აქვს დახვავებული გულზე. მათ ბეგრი რამ ესაჭიროება, შვილო!

მძლოლმა მანქანა ადგილიდან დაძრა და თქვა: — ამ ხალხს არც დარდი დაეღევა, ბატონო, და არც მოთხოვნილება. თქვენ ეს ჩემზე უფრო იცით. ჩემის აზრით, პირველ რიგში სოფლებში უცოდინარობა და ცრუმორწმუნეობა უნდა აღმოვფხვრათ. მერე სიღარიბეს უნდა ვებრძოლოთ. ამისათვის მიწებია საჭირო, იმ მიწების დასამუშავებლად სასოფლო-სამეურნეო მანქანებია საჭირო, ამისათვის კრედიტი უნდა დაუშვა. მერე კარგი ჯიშის საქონელი სჭირდება ხალხს, ფოსტატელეგრაფი, კლუბი... საცხოვრებელი ბინებიცაა საჭირო. ასე არაა ადილ-ბეი?

— შვილო, სერვეთ! მე ესენი ყველაფერი გათვალისწინებული მაქვს, ყველაფერი წინასწარ ვიცი, თუ რა არის საჭი-



რო ხალხისათვის, ჩემო კარგო! დღეს სოფელ იაქაჯიქში შენ ყველაფერ ამას ჩემს მოხსენებაში მოისმენ. ჩემი უპირატესობა მიზანი ამ არჩევნებში გამარჯვებაა, შვილო, ერთი გავიმარჯვო და მერე მე ვიცი, რასაც გავაკეთებ.

* * *

თულუქ იბრაიმის ცოლმა ბოსლის კარი გააღო, საქონელი გარეთ გამოდენა, უფროს გოგოს, თორმეტი წლის დუდუს აბგაში მჭადი და ყველი ჩაუდო და სამწყემსურში გავზავნა.

თულუქ იბრაიმი და სელამეთი კი ისევ გაკვეთილებს იმეორებდნენ.

- წმინდან მუჰამედს რა უთქვამს, შვილო?
- მუმინი მუმინის სარკეაო, ასე უთქვამს მუჰამედს, მანა!
- რას ნიშნავს ეს სიტყვები, შვილო?
- რას ნიშნავს და კარგი მუმინი ყოველთვის კარგ მუმინს მიბაძავს და კარგ საქმესაც გააკეთებს.
- მცირეწლოვანმა როდის უნდა დაიწყოს სავალდებულო ლოცვები, შვილო?
- შვიდი წლიდან, მამა!
- შენ რამდენი წლის შემდეგ უნდა დაიწყო ლოცვა, შვილო?

- ორი წლის შემდეგ, მამა!
- სწორია, ორი წლის შემდეგ!.. აბა, ახლა კი ღმერთს შესთხოვე ერთი!

— უმაღლესზე უმაღლესო ღმერთო! დედამიწის, ცის, ხალხისა და ცხოვრების გამჩენო ღმერთო, მე არ ვიყავი, შენ გამაჩინე, ენა მომეცი, ხელ-ფეხი მომეცი, შენი წყალობით ვიგრძენი სიცოცხლე, ჩვეყანა დავინახე, გზა ვნახე, შენ შემიყვარდი, შენი მორწმუნე ვარ. მაღალო ღმერთო, შენ ჰქმარიტად ერთი ხარ და ყოვლისშემძლე ხარ! შენ ჩემი სათქმელი კარგად იცი, შენ შემიწყალე, გამჩენო ღმერთო, რა ცოდვებიცა მაქვს, მაპატიე, მამაჩემს, დედაჩემსაც აპატიე და შეიწყალე! ჩემს დას, დუდუს, ჭკუა და გონება მიეცი, ჩვენს ხარს ძალა და ღონე მიეცი, ჩვენს ნათესავებს ხვავი და ბარაქა მიეცი! აბას-ალას სინდისი და ნამუსი მიეცი, ან მოკალი. ის ურჯულო ისე მოაქციე, ჩვენი მიწები უკან დაგვიბრუნოს! შეგვიწყალე; მაღალო ღმერთო!

- ამინ, შვილო, ამინ!
- ამინ!..
- ეხლა კი ახალ გაკვეთილზე გადავიდეთ, შვილო! აბა, მოსმინე, ეხლა მოგიყვები ლოცვებზე დადგომის წინ რა არის

საჭირო, შენ გაიმეორე, თუ ვერ მიხვდები, კიდევ ვეტივე
შენ კი გაიმეორე: — პირველ რიგში ხელ-პირის დაბანა
საჭირო. ხელების, მკლავების, ფეხების, ყურების დაბანა სა-
ეალღებულოა. აბა გაიმეორე!

* * *

მძლოლს მთელი სიჩქარით მიჰყავდა მანქანა. ნაწვიმარ
გზაზე ჭონჭყო იდგა. მანქანა ტორტმანებდა, აღმართზე ასე-
ლისას მოტორი ხრიალებდა, სოდანლიბელის მთის კალთებს
რომ მიაღწია, სერვეთმა ძახქანა გააჩერა, საბარგულოდან ჯა-
ჭვები გაღმოიღო და საბურავებზე დამაგრებას შეუდგა.

სავარძელზე გადაწოლილი ადილ-ბეი ვილაცებს ხმამალ-
ლა, უშვერი სიტყვებით აგინებდა: — განგებ აკეთებენ ეს უსი-
ნდისოები! — ბობოქრობდა იგი, სოფლებში, ამომრჩევლე-
ბის წინაშე არ წარდგესო და მაინცდამაინც ამ წვიმიან დღეს
ღანიშნეს შეხვედრა. მაგრამ მე მაგათ ვუჩვენებ. სერვეთ,
შენ ჭკვიანი ახალგაზრდა ხარ და ჩემი ნათქვამი კარგად დაი-
მახსოვრე: დრო მოვა და ყველას გავუხსენებ, ყველა დამნა-
შავეს თავის ჩამოსახრჩობად გავუხსნი საქმეს!

სერვეთი საქმეს მორჩა, გატალახებული ხელები მივა-
რზე შეიწმინდა, საჭეს მიუჯდა და მანქანა აამუშავა:

— ნუ სწუხართ ადილ-ბეი! ყველაფერი რიგზე იქნება,
ჩვენ ეს ტალახი ხელს ვერ შეგვიშლის, თავის დროზე მივალთ
ადგილზე. ემრეს ხიდი ხომაა გაკეთებული?

— ერთი ზიდის გაკეთებით ამ ხალხს სადარდებლი არ
მოაკლდება, სერვეთ!

* * *

თულუქ იბრაიმა სიბეჯითისათვის შვილი ერთხელ კიდევ
შეაქო და გაკვეთილებიც ამით დამთავრდა.

კოლს წვნიანი გაეკეთებინა, სუფრა გაეწყო და ახლა
ქმარ-შვილს უცდიდა.

თულუქ იბრაიმა ექვსი წლის წინათ ქალაქში ნაყიდი,
ძველა, დაკერებული კოსტიუმი ჩაიცვა, სუფრას მიუსხდნენ,
ცივი მჭადი ცხელ წვნიანში ჩაყარეს და მადიანად შეუდგნენ
ჭამას.

ამ დროს ეზოდან ვილაცის ძახილი გაისმა:

— ბიჭო, თულუქ!

— ეს ხომ ბეჭირის ხმაა? — ჩაილაპარაკა ქალმა, — აღე-
ქი. გაიხედე ერთი რა უნდა!

თულუქ იბრაიმმა ხის კოვზი სუფრაზე დადო, ადგა და კარი გამოაღო.

- ბიჭო, ბექირ, შენა ხარ?
- მე ვარ, მე!
- ხომ მშვიდობაა, ბიჭო?
- მშვიდობაა, მშვიდობა!
- შემოდი შიგ, რადგანაც ასეა!
- არა, მეჩქარება!.. იაქაჯიქში ერთი ბეგი უნდა ამოვიდეს თურმე, ადვოკატი ყოფილა. ახლა არჩევნებისათვის მოხსენება უნდა წაიკითხოს, ხასან-ეფენდი იტყობინება იაქაჯიქიდან: მთელი სოფელი უნდა შეიკრიბოს და აქ მოვიდესო. თუ მოდინხარ, მოემზადე და ერთად წავიდეთ.

- კი მაგრამ, ის ქალაქელი ბეგი აქ ვერ მოვა, ვითომ?
- ეჩქარება თურმე, ავტომანქანით ყოფილა. აბა ერთი დაფიქრდი, ჩვენი სოფლის გზაზე რომელი ავტომანქანა გაივლის? ანდა ჩვენი სოფელი რა სოფელია? რაღაც ოცდაათი მოსახლისთვის ამხელა გზაზე რატომ ივლის?
- კარგი, წავიდეთ! — დაეთანსმა თულუქ იბრაიმი.

* * *

მანქანამ სოდანლიბელის უღელტეხილი მშვიდობიანად ავლო და დაბლობზე დაეშვა. ძძლოლმა სიჩქარეს უმატა. ადილ-ბეი დაწყნარდა: სერვეთმა თუ ასე მოინდომა, შუადღეზე უკვე სოფელ იაქაჯიქში იქნებიან.

* * *

სოფელ თოზანლის მამაკაცები, სულ ორმოცი სული, იაქაჯიქში ჩავიდნენ და ხასან-ეფენდის სახლს მიადგნენ. ამდენი სულის სახლში მიღება ხასან-ეფენდის არ შეეძლო და სტუმრებს ეზოში გამოეგება. მალე სხვა სოფლების მცხოვრებლებმაც მოიყარა თავი.

— ადვოკატი ადილ-ბეი მოდის, ამხანაგებო! — განუცხადა შეკრებილთ ხასან-ეფენდიმ, — უკვე ოთხი დღეა რაც მის მოსვლას ველოდებით. ახლა დაზუსტებით ვიცით, რომ დღეს აუცილებლად ამოვა. უკვე შუადღეა და საცაა გამოჩნდება კიდევ. ამიტომ, უკეთესი იქნება სოფლის გარეთ გავეგებოთ, სტუმარია და პატივი უნდა ვცეთ.

— რადგანაც დღეს აუცილებლად უნდა ამოვიდეს, ჩავიდეთ დაბლა და ხიდთან დაველოდოთ! — ბანი დააწია მას ბექირმა.

ხასან-ეფენდი ქარვის კრიალოსნის თამაშით წინ გაუძღვნილი ხალხს. მიდიოდნენ ყაყანიტ, ხმამაღალი საუბრით, დაკმუტნილი, შინნაქსოვი ტანსაცმელი ეცვათ. თმაწვერგაბურძენილები ველურებს ჰგავდნენ. ოფლის სუნი ასდიოდათ.

ხილთან ჩავიდნენ და იქ დაელოდნენ სტუმრის გამოჩენას. ხალხი ღელავდა, ყაყახებდა, ხმაძალა გამოსთქვამდა სათქმელსა და თავ-თავის ვარაუდს.

მალე ადილ-ბეის მანქანა ხევგალმით გამოჩნდა. ხალხი აღელდა, ყაყანს უმატა.

— ადილ-ბეი ძალალი თვისებებით შემკული ადამიანია და ბრწყინვალე მომავლი მოელის. ის ამ არჩევნებშიც გაიმარჯვებს და შემდეგ მიხისტრადაც აირჩევენ! "მე"შვენდება კიდევ მინისტრობა, ღირსიც არის! — ხალხს რომ გაეგონა, ხმამაღლა განაცხადა ხასან-ეფენდიმ, — დღემდე ჩვენთან, ჩვენს სოფელში ბევრი ვინმე მოსულა და წასულა, ბევრი მოხსენება წაუკითხავს. ბევრს დაგვიბრებია, მაგრამ გაკეთებით არაფერი გაუკეთებია! ვნახოთ, ეს რას იზამს, რას გავვიკეთებ!

ადილ-ბეიმ ერთად თავშეყრილ ამდენ ხალხს რომ მოკრა თვალი, აღელდა: — შვილო, სერვეთ, შეხე. ერთი რამდენი ხალხი მოგროვილა, ჩემს შესახვედრად. მე რომ ამ ხალხის ყურადღება არ მივიპყრო, ისე როგორ წავალ აქედან? რაკი ასე დამაფასეს და ამდენმა ხალხმა მოიყარა თავი, ჩათვალე, რომ არჩევნები უკვე მოგებული მაქვს. სამაგიეროდ, ამ ხალხს იმდენ კარგ საქმეს გავუკეთებთ, რომ მათაც გაუკვირდებათ.

სერვეთმა მანქანა შეკრებილი ხალხის წინ შეაჩერა.

ხასან-ეფენდიმ მანქანასთან მოიბრძინა, დაიხარა და კარი გამოაოო.

ადილ-ბეი მედიდურად გადმოვიდა მანქანიდან, მან ჯერ ხასან-ეფენდის ჩამოართვა ხელი, მერე კი ჩამოიარა და იქ შეკრებილთ სათითაოდ მიესალმა. ეს პროცედურა ძალზე დიდხანს გაგრძელდა. მერე ყველა სოფლის ცენტრისაკენ გაემართა, სადაც ადილ-ბეის მოხსენება უნდა წაეკითხა.

სერვეთმა მანქანა სოფლის ბოლოს გააჩერა და ხალხში შეერია, რათა თავისი ბატონის სიტყვა მოესმინა. ადილ-ბეი მაღლობზე, სახელდახელოდ დადგმულ ტრიბუნაზე ავიდა, ხმის ჩასაწმენდად ერთი ჩახხველა და დაიწყო:

— ჩემო საყვარელო მეგობრებო, პატივცემულო ამომრჩევლებო! დიდ მაღლობას მოგახსენებთ იმის გამო, რომ შეწუხდით და აქ მობრძანდით. ძალიან გამიხარდა და დიდ მაღლობასაც მოგახსენებთ ამის გამო. თქვენი ასეთი გულითადი შეხვედრა უდიდეს სიამოვნებას მანიჭებს, ბედნიერად მიმაჩნია ჩემი თავი და, იმედი მაქვს, რომ შემდეგში, როცა მე ამისი სა-

შუალეზა მომეცემა, დიდ სამსახურსაც გაგიწევთ! — წამით შეი-
სვენა, ჩაახველა და ისევ განაგრძო: — პატივცემულო ამოცნე-
ვლებო! თქვენ კარგად მოგეხსენებათ, რომ მომავალ კვირას, ესე
იგი ექვსი დღის შემდეგ, არჩევნებია. ამიტომ, იმისათვის, რათა
თქვენი საქმეები მოაგვაროთ, საჭიროა აირჩიოთ სანდო, პატიო-
სანი კაცი და ანკარაში გაგზავნოთ. პატივცემულო მეგობრებო!
წინა არჩევნებში თქვენ მოგატყუეს, ახლაც თქვენს მოტყუე-
ბას ცდილობენ. ასე არ შეიძლება, ამხანაგებო! თქვენ, რო-
გორც ჩემი პატივისმცემელი ამხანაგები და მეგობრები, გირ-
ჩევთ ასეთ ხაფანგში არ ჩავარდეთ, არ მოტყუვდეთ! ეს არჩე-
ვნები ასეთ წვიმიან დღეებში იმიტომ ჩაატარეს, რომ ჩემთვის
ხელი შეეშალათ, რათა თქვენამდე ვერ მომეღწია, და ეს გუ-
ლითადი საუბარი არ მქონოდა თქვენთან. მაგრამ მე, როგორც
ხედავთ, მოვედი, მე თქვენმა სიყვარულმა მომიყვანა.

პატივცემულო ამხანაგებო! როგორც თქვენ მოგეხსენე-
ბათ, დეპუტატად გახდომის არავითარი სურვილი არა მაქვს,
და, თუკი ამას ვაკეთებ ვაკეთებ მხოლოდ იმისათ-
ვის, შეძლებისდაგვარად სამსახური გაუწიო ჩემს კუთხეს,
ხალხს, ესე იგი თქვენ გაგიწიოთ სამსახური, ჩემო მეგო-
ბრებო! ჩემი ვალია აღვწერო, დავაზუსტო ყველაფერი ის,
რაც თქვენ გჭირდებათ, რაც მოსაგვარებელია თქვენთან. წინა
არჩევნებში გამარჯვებულ დეპუტატებს ხელი არ გაუქა-
ნებიათ. რაც მათ გააკეთეს, ის იყო, რომ ორიოდ ხიდი ააგეს
და ზოგიერთ სოფელში წყარო გამოიყვანეს. ეს იყო და ეს.
ხიდის აგებითა და წყლის გამოყვანით არ წყდება თქვენი საქ-
მე, ამხანაგებო! თქვენი მთავარი საკითხი — რელიგიის საკი-
თხია მოსაგვარებელი! თუ ამ საკითხს პირველ რიგში არ მო-
ვაგვარებთ, ისე არაფერი არ გაკეთდება!

პატივცემულო თანამემამულენო, ძვირფასო, სოფლელი
ძმებო! ალბათ ყველამ იცის, რომ ჩვენი თურქეთი მუსლიმა-
ნური ქვეყანაა და მუსლიმანურადვე დარჩება. ისეთი ძალა არ
არსებობს, რომ ჩვენ რჯული და სარწმუნოება შეგვიცვა-
ლოს! მე პირველ რიგში სარწმუნოებრივი საკითხი უნდა მო-
ვაგვარო თქვენთან. საჭიროა ყოველ სკოლაში დიდი ყურად-
ღება მივაქციოთ მუსლიმანური რელიგიის შესწავლის საქ-
მეს. იმ სოფლებში, სადაც ჯამე არ არის, აუცილებელია გაიხ-
სნას ჯამე, რათა თქვენ საშუალება გექნეთ დღეში ხუთჯერ
ილოცოთ და ღმერთი ახსენოთ. ამ სოფელში ხოჯა არ არის,
დაგეხმარებით და ხოჯას გამოგიგზავნით, ამხანაგებო! მე იმა-
საც მივალწევ, რომ ხოჯებს ხელფასი სახელმწიფომ გადაუხა-
დოს და არა თქვენ!

აღილ-ბეიმ მოხსენება ჩაათავა და გაჩუმდა.



ზოგიერთ მორწმუნეს მოხსენება ისე მოეწონა, ისე ხარდა, თითქოსდა მეტი არაფერი სურდა, სხვა არაფერი ჩენი და საზრუნავი. თულუქ იბრაიმი სინარულისაგან ერთ ადრულზე ვერ ჩერდებოდა. იგი შეკრებილ ხალხში დაძვრებოდა და ხსამალა, ლოცავდა ადილ-ბეის.

— აფერუმ, მოხსენებაც ამას ქვია! შენ გენაცვალე შენა! შეკრებილთა უმრავლესობა სინარულს ვერ მალავდა. ერთადერთი მხოლოდ სერვეთი იყო გაკვირვებული: — ვაი, ვაი, ადილ-ბეი, ვაი! — ფიქრობდა იგი, — ესაა შენი სანაქებო მოხსენება? ესაა შენი ყველაფერი, თუმცა რა, ამ სულელ ხალხს უფრო უხარია!

* * *

სოფელ იაქაჯიქის ჯამე პატარა, ძველ ფიცრულ შენობაში იყო მოთავსებული. სამაგიეროდ, აქაურ ხოჯას დიდი სახელად და ავტორიტეტი ჰქონდა მოპოვებული ხალხში.

ადილ-ბეის მოხსენება ხოჯამ დიდი ინტერესით მოისმინა, მერე, საათზე დაიხედა და ჩაილაპარაკა: — ჰმ! დროა უკვე, დროა! — წავიდა, მინარეთზე ავიდა და ეხანის კითხვა დაიწყო. ამასობაში ხალხში გარეული ადილ-ბეი მხიარულად ესაუბრებოდა ხალხს. იმდენ დაპირებებს აფრქვევდა, ხალხი სინარულისაგან ფეხზე ძლივს იდგა.

ხოჯის ხმა რომ გაიგონა, ხასან-ეფენდი ადილ-ბეის მიუახლოვდა და უჩურობდა: — ადილ-ბეი, შენს თვალებს ვენაცვალე, ეხანი დაიწყო, წავიდეთ, ვილოცოთ!

ადილ-ბეის ცხოვრებაში ერთხელაც არ ულოცნია და ვერაფრით ვერ გაიგო თუ რას მოითხოვდა ხასან-ეფენდი მისგან. ბოლოს, როცა ხალხი შემოეცალა და მასთან მხოლოდ ხასან-ეფენდი, თულუქ იბრაიმი და კიდევ სამი კაცი დარჩა, თქვა: — დიდი მადლობელი ვარ თქვენი, მეგობრებო! რადგანაც ლოცვის დროა, წაბრძანდით და ილოცეთ, მე მეტს ზღარ დაგაცდენთ, სულ ერთია, მაინც დავამთავრე. სანამ თქვენ ილოცებთ, მე სოფელ იარიოქოში წავალ და იქაურ ხალხს მოხსენებას წავუკითხავ.

ხასან-ეფენდი გააოცა მისმა ნათქვამმა: — ოჰ, როგორ გეკადრებათ, ადილ-ბეი? სოფლელებმა არ გაიგონ! მაგი როგორ თქვით? ლოცვის დროს სადმე წასვლა გაგონილა? წელან რჯულზე და მუსლიმანობაზე არ ლაპარაკობდით? ამდენი ხალხის თვალწინ ულოცავად წასვლა მთელ თქვენ სიტყვას აბათილებს! რას იტყვის ხალხი!.. აბა, აბა, ადილ-ბეი, წაიკაპიწეთ მკლავები და აბდესის წესები შეასრულეთ, მერე ჯამეში შე-

დით და ილოცეთ, საჭიროა ხალხმა დაინაწოს და იფიქროს
წმინდა მუსლიმანი ყოფილაო.

— შენ გენაცვალე, მთელი ქვეყანა გენაცვალოს, ადილ-
ბეი! ასე წასვლა როგორ შეიძლება?

ადილ-ბეი მოტყდა: — კარგი, რახან წასვლა არ შეი-
ძლება, დავრჩები. თქვენ აბდესი მიიღეთ და ილოცეთ, მე მა-
ნამდე ცოტას დავისვენებ, თორემ ისე ვარ აღელვებული,
წნევა ამიწვეს და დავიღუპები კაცო.

— არა, არ შეიძლება! — შეედავა ხასან-ეფენდი, — აბ-
დესი უნდა მიიღო და უნდა ილოცო!

— კარგი, რახან ესეც არ შეიძლება... ჯერ თქვენ მიიღეთ
აბდესი, მერე მე მივიღებ... ამ არჩევნებში თუ არ გავი-
მარჯვე...

— როგორ გეკადრებათ! — ჩაერია თულუქ იბრაიმი. —
სირცხვილია! ჩვენ თქვენზე უწინ რომ აბდესი მივიღოთ, სირ-
ცხვილია, უზრდელობად ჩაგვეთვლება! აბა, დაიკოტავე მკლა-
ვეები, გენაცვალე.

ხასან-ეფენდიმ საჩქაროდ წყალი მოუბრუნინა: — აბა,
მობრძანდით, ბატონო, წყალი მოვიტანე! აბა, დაიმკლავეთ,
გენაცვალე, თვალეებში!

ადილ-ბეი შეწუხდა, უხერხულად მიმოიხედა და თქვა:—
მე თვითონ დავისხამ და დავიბან ხელ-პირსა და ფეხებს. მე
სხვას ხელზე წყალს არ დავასხმივინებ. არ შემიძლია! — ქვაზე
ჩამოჯდა, კოსტიუმი გაიხადა, ქუდი მოიხადა, ფეხსაცმელი
გაიძრო და შარვალი აიკარწახა.

სერგეთი გაფაციცებით შესცქეროდა ადილ-ბეის. მან კა-
რვად იცოდა, რომ მის ბატონს თავის სიცოცხლეში არ ულო-
ცია და არც აბდესის წესებისა გაეგებოდა რამე.

„ვაი შენს ლოცვასა და აბდესს!“ — გაიფიქრა მან.

ადილ-ბეიმ ყველაფერი აურიო, ჯერ იყო და ცხვირ-პირი
არ გამოიბანა, მერე კი მკლავების დაბანამდე ფეხები დაიბანა
და ამით აბდესის წესი მეორეჯერ დაარღვია.

— აბა, პირსახოცი მიართვიო ბატონს! — ბრძანა ხასან-
ეფენდიმ, მაგრამ ამ დროს საქმეში თულუქ იბრაიმი ჩაერია.

— ბატონო! — მიუბრუნდა იგი ადილ-ბეის, — მკლავე-
ბის დაბანა დაგავიწყდათ!

ადილ-ბეი დაიბნა.

ხასან-ეფენდიმ მწყურალად გადახედა თულუქ იბრაიმს და
გაიფიქრა: „ვაი და უი შენ, თულუქ, რაში გაინტერესებს
შენ ადილ-ბეის აბდესი? სულ ერთი არაა შენთვის, როგორ
შეასრულებს? როგორ დაიბნა კაცი, სირცხვილისაგან რა ქნას
აღარ იცის და სულ დაანება თავი.“



ადილ-ბეიმ მართლაც მიანება თავი განბანვას: — მაქვს აწეული და არ შემიძლია ლოცვა. ისეთი ძლიერი მაქვს, აბდესის წესებიც ვერ შევასრულე, ძვირფასო ამხანაგებო. დამერწმუნეთ, რას ვაკეთებ, მეც არ ვიცი. ძალიან ვბრაზობ ჩვენს მთავრობაზე, რჯული და სარწმუნოება მთლიანად მიივიწყეს!.. წნევამ და აღელვებამ აბდესის წესებიც დამარღვევინა!

— არა უშავს, ბატონო, ხელახლა დაიწყეთ! — დაამშვიდა ხასან-ეფეხდიძი.

სერვეთს მკლავები დაეკარწახებიანა და ადილ-ბეის შესცქეროდა, ცდილობდა ადილ-ბეის დაენახა ყველაფერი და მისთვის მიებაძა, რათა აბდესის წესი წესიერად შეესრულებინა და ამდენ ხალხში თავი არ მოსჭროდა.

ადილ-ბეი მიუხვდა და მიბაძა.

იმ დროს, როცა ადილ-ბეი ასე წვალობდა, მისი ცოლი სასტუმროს ლუქსში, აბაზანაში ნებივრობდა, თულუქ იბრაიმის ცოლი ბოსელს ხვეტდა, სელამეთი და დუდუ საქონელს მწყემსავდა, თულუქ იბრაიმი კი სიყვარულით შესციცინებდა თვალელებში ადილ-ბეის.

ჩვიდმეტი თებერვალი იყო

ჩვიდმეტი თებერვალი იყო... თუმცა, კაცმა რომ თქვას, რა დიდი მნიშვნელობა აქვს ამას პატარა მთის სოფელში, სადაც წლების განმავლობაში შეიძლება ყოველგვარი კალენდრისა და საათის გარეშე ცხოვრება. ჩვიდმეტი იქნება თუ ოცდაშვიდი, ამას ამ სოფლის მცხოვრებთათვის არავითარი მნიშვნელობა არა აქვს.

იმ ზამთარს, როგორც ყოველთვის დიდი თოვლი მოვიდა სოფელში. ყინვები დაიჭირა და ნახევრად ტიტველ, ფეხშიშველ ბავშვებს ყინვამ და თოვლმა ფეხები დაუღურჯა და დაუზრო.

თებერვლის დასაწყისში ყველაფერი შეიცვალა. ზამთრის მუხე იმძლავრა, დააცხუნა, ბერიკაცებს ძვლები გაუთბა, მცივანა კატებიც კი გარეთ გამოეფინენ და წკიპად, ფეხაკრეფით, კუდაპრეხილი დასეირნობდნენ აქეთ-იქით.

თებერვლის ჩვიდმეტში სამხრეთიდან თონესავით ცხელმა ქარმა დაჰბერა, სახლების სახურავებზე, ქუჩებში და მთის ფერდობებზე თოვლმა იწყოა დნობა.

ამ სოფლის მცხოვრებლები მაინც დიდი უცნაური ხალ-



ხია. არც ერთი, რაგინდარაგვარი ამინდიც არ უნდა როს, მაინც არ მოსწონთ და სულ წუწუნებენ.

— აჰ, ერთი ახლა სამხრეთის ქარი დაუბერავდეს...

მაგრამ, როგორც კი სამხრეთის ქარი წამოუქროლებს და თოვლი დნობას დაიწყებს, ისინი ისევ საყვედურობენ: — ამ სამინელ ტალახში როგორ უნდა ვიაროთ? ამას ისევ ყინვები სჯობს, ქემაინც ფეხი არ დაუსველდება კაცს.

მაგრამ ცხადია, ამინდი სოფლელებს წუწუნსა და უკმაყოფილებას არაფრად აგდებს და ყველაფერი თავისი რიგითა და წესით მიდის...

მე ქუშად-ახმედი მოვიწახსულე. იგი საქმით იყო გართული — ბაღში გასულიყო და ვაშლის ტოტებს ყინულს აცილებდა... საუცხოო ჯიშის ვაშლის ხეები უდგას ახმედს, კარგ მოსავალსაც იწევს ყოველწლიურად... საქმეს რომ მორჩა, მთხოვა, სახლში შევიდეთ, ცოტა წავისაუბროთ და დრო მთვკლათო, მაგრამ უარი ვუთხარი, ასეთ ამინდში ჩახუთულ ოთახში ჯდომა არ შემიძლია-მეთქი, გამოვემშვიდობე და წავედი.

მივდიოდი ნელა, აუჩქარებლად, მინდოდა შარტოდმართო, პირისპირ დავრჩენილიყავი საკუთარ თავთან და ფიქრებთან. მინდოდა შემომეველო სოფლის შემოგარენი, მენახა ქარისაგან გამომშრალი ფერდობები. ეს ფერდობები, თორემ სოფლის ორღობეების ტალახს აბა რომელი ქარი გააშრობს... საცოდავი სანახავია ჩვენი სოფელი — ტალახი, სიბინძურე, სიღარიბე... ქვეყნად ამდენი განათლებული, ნასწავლი ადამიანები, ამდენი წიგნი და ჟურნალ-გაზეთი იბეჭდება, აქ, ჩვენს სოფელში კი ასეთი სიდუხჭირეა... თუშცა. ვისა სცალია ჩვენი სოფლისათვის?

თომბაქ-ბებიას სავახშმოდ სამი ცალი კვერცხი გამოვართვი და სახლისაკენ გავემართე. მივდიოდი ნელა, ზოზინით, სახლისაკენ გული არ მიმიწევდა... ვინაც კი გზაზე შემხვდა, ყველას მივესალმე... კარებთან ატუზული, ფეხშიშველი, მუხლებამდე ტალახში ამოთათხნილი, ჩამოხეულ-ჩამოკონკილი ბავშვები, მკერდზე ჩამოყრილ წვრილნაწნავებიანი ქალიშვილები, წითელპერანგიანი მწყემსი ბიჭები, მოხუცი ქალები — წინდის მქსოველები, ბაწრის მგრეხავეები, ბერიკაცები... ყველას მშვიერი, საცოდავი გამომეტყველება აღბეჭდია სახეზე.

ჩემს მოსწავლეებს შორის ყველაზე სუსტი, მაგრამ ყველაზე ლამაზი, მკვირცხლი და მაყვლისთვალეა ზეკიე თავისი სახლის გამოღებულ კართან იდგა და მოწყენილი გასცქეროდა სოფლის ორღობეს.

— მამა შინაა? — ვკითხე მე.

— კი, შინაა!

მამამისი რატომღაც ძალიან დასნეულდა და მთელი მთელი
თარი იწვა.

— კიდევ შეუძლოდაა?

— არა, მოიკეთა, მაგრამ ახლა დედაა ავად!

— დედა?

— ჰო, დედა!

„რავა მორიგეობით ხდებიან ესენი ავად!“ — გავიფიქრე
მე.

— ოთახში წევს და სძინავს! — ზექიე მიდგა და გზა და-
მითმო.

ძველ, მორყეულ, ფიცრულ კიბეს ავყევი. ზექიე ჩემს
დანახვაზე აღრენილ, შიმშილისგან ფერდებჩავარდნილ ძაღლს
შეუწყრა. წელში მოხრილი შევედი დაბალ კარებში. მაშინვე
ნესტის და შმორის სუნი მეცა... ოთახში საოცრად ბნელოდა.
ჩიტის თვალივით პატარა, ერთადერთი საოცრად ძლივს ახა-
თებდა იქაურობას.

ჩემს დანახვაზე ავადმყოფი საწოლზე წამოჯდა. მივესალ-
მე, ბუხართან ჩავჯექი და იქაურობა მივათვალ-მოვათვალე-
რე. საშინელი სილატაკე იგრძნობოდა ირგვლივ. აყალო მიწით
შეთითხნილი, ქვის ოკრო-ბოკრო კედლები, ძველთაძველი
ნივთები, ფიცრული საწოლი, ჭუჭყიანი ქვეშაგებელი... კარის
მოპირდაპირე მხარეს მწილისათვის განკუთვნილი დიდი
დერგი იდგა, იქვე ეწყო წყლის ჭურჭელი, სამეურნეო იარა-
ღები — ფოცხი, ფიწალი, თოხი, ბარი...

— როგორ ბრძანდები, დაიკო? — ვკითხე ქალს.

სახე გაყვითლებოდა, ლოყები ჩაცვენოდა, ახველებდა და
ძლივს ლაპარაკობდა ჩურჩულივით წყნარი ხმით.

— ამ ავადმყოფობას ვერ გადავურჩები, ძმაო! — თქვა
და თავი დახარა.

— ნუ გეშინია, მორჩები!

— რა მომარჩენს? ფილტვებს გამიჩმობს ამდენი ხველა.

— არა, ასე რამ შეგაშინა?

— ამ ავადმყოფობას ვერ გადავიტან, ვერა! — თქვა აკვი-
რებულად, დარწმუნებით.

როგორ გაუნადგურებია ავადმყოფობას. ლოგინად ჩავა-
რდნამდე რა ლამაზი ქალი იყო — მომხიბვლელი, მაღალი,
ახოვანი, მხიარული, პირმცინარი და ენატკბილი. ხშირად შე-
ჩერებულა ჩემს ეზოსთან და გამომლაპარაკებია.

მასზე ბევრს ჭორაობდნენ ჩუმ-ჩუმად სოფელში. რას არ
ამბობდნენ, რას არ უგონებდნენ... თუმცა, მისთვის სულ ერთი
იყო, რასაც იტყოდნენ მასზე. მეზობელი მამაკაცები კაცებად
არ მიაჩნდა, არც საკუთარი ქმარი ეხატებოდა გულზე მაინცა-

დამინც და თუ იტანდა, მხოლოდ იმიტომ, რომ ქმარი საკმაოდ მოზრდილი მიწის ნაკვეთის მფლობელი იყო.

ცხრა წლის წინათ ერთი ამბავი გადახდა. სამი წლის ბეგარა ჰქონდა გადასახდელი და ქმარი ძალიან შორს, თითქმის ცხრა მთას იქით წაიყვანეს სამუშაოდ, — აი, აქ იმუშავე და ბეგარა გადაიხადეო — უთხრეს. სახლში ფეკილი გამოელიათ. ჩალმა სახედარს პურის მარცვლით სავსე ტომარა აჰკიდა და წისქვილზე წაიღო. გაზაფხული იყო. მდინარეები აღიდებულ იყო. წყალდიდობას არხი დაენგრია და წისქვილს წყალი არ ყოფნიდა. ამიტომ ერთ ტომარა საფქვავს ძლივს აღანჭალებდა რამდენიმე საათში. იმ დღეს ქალს რაღი არ მოუწია და ღამის გათევა წისქვილში მოუხდა.

სწორედ იმ ღამეს დაადგა თავზე ჯარიდან ახალდაბრუნებული მუსტაფა, რომელსაც ერთი ნაცნობი მთიელიც ახლდა და უბრძანა, გინდა თუ არა, დაგვენბდიო.

- დმერთმა ავ ბედს შეგყარათ, მე რას მთხოვთ?
- შენაც კარგად იცი, რასაც გთხოვთ! ყველას ხომ ნებდები?

- მე არავის არ ვნებდები!
- აბა, აბა, თავს ნუ იკატუნებ, ჩქარა!

ქალი მშველელს არსაით ელოდა, იმედი გადაწყვეტია და დანებებია...

ქმრის ავადმყოფობამ დიდხანს გასტანა.

— ანგელოზი არაა, უცოდველი რომ არ იყოს, ეს ახალგაზრდა ქალი როგორ ითმენსო, — ჭორობდნენ მასზე მეზობლები. არავის არ სჯეროდა, რომ ითმენდა...

ახლა, უკვე ქალი ლოგინადაა ჩავარდნილი, სუნთქვა უჭირს, ხიხინებს, ხველა ახრჩობს.

იქვე, საწოლის მახლობლად ქმარი ზის, თავი ხელისგულებში ჩაურგავს და სდუმს ჩაფიქრებული.

მყუდროება კარის ჭრიალმა დაარღვია. ოთახში მათი უმცროსი გოგო — ქოქუ შემოვიდა. ფეხშიშველა, ჩატალახული, ხელში ჟანგიანი ნალი უჭირავს. მას დედასთან უნდა მოსვლა, მაგრამ ზეჟიე არ ანებებს: — გატალახული ხარ, დასვრი აქაურობას! — ხელს კიდებს და კარისკენ მიჰყავს.

ქოქუ ეწინააღმდეგება.

ხმაურმა ავადმყოფი შეაწუხა. ფიქრებში წასულმა კაცმა თავი ასწია და უფროს გოგოს უთხრა:

- დაანებე თავი, ზეჟიე!
- არა, დასვრის აქაურობას.
- დასვაროს მერე!
- როგორ, მამი, როგორ თუ დასვაროს? ასე შეიძლება?

ერთ დღეს მაინც იყოს იატაკი სუფთა ამ ჩვენს სახლში.

მამა გაბრაზდა: — სუფთა, მუფთა!.. შენაც ქალაქელი მიხდი, რაღა!

ხეჭიეს მამის შეეშინდა და ქოქუს თავი ანიბა. ქოქუმ დრო იხელთა და ტალახიანი ფეხებით დედას შეუწვა ლოგინში.

— დედა, დედა, ნახე რა ვნახე?! — უთხრა და დიდის ამბით ანახა დაჯანგული წალი.

— კარგია, შვილო!.. ჩემი ლამაზი გოგო! ეს რა გინახავს? ჩემო უბედურო გოგო, ლამაზი ხარ, მაგრამ უბედური! ობლად რჩები, ჩემო გოგო! — თედამ გოგონას აკოცა და მერე ხველა აუტყდა. ქმარმა თუთუნი გაახვია...

— თამბაქოს ბოლი ავადმყოფს ავენებს, — ვთქვი მე, — არც შენ არ უნდა ეწიოდე!

— ძალიან მწყენს, — თქვა ქალმა, — ჩემთან რომ ეწევიან, ხველა მახრჩობს.

ქმარი გაბრაზდა, რაღაც ჩაიდუღუნა თავისთვის, მოუკიდა და გააბოლა.

— რამდენი ხანია ვწევარ, — განაგრძო ქალმა, — ცოტათი უკეთ კი ვიყავი, სარეცხი მქონდა ბევრი, წავილე მდინარეზე. ვრეცხე ცივ წყალში, ისე შემცივდა, ძლივს მოვაწიე სახლში... ახლა ისე ცუდად ვარ, მეტი რომ არ შეიძლება... გუშინ სკოლაში ექთანს ამოსულა, ვთხოვე ქმარს, წადი, მოიყვანე-მეოთხი. წავიდა, მაგრამ იქ არ დახვედრია ექთანი, მუხტართან წასულა. ჩემი ჰკვიანი ქმარი კი არ მისულა იქ, შეზარებოდა!

ქმარი ხმას არ იღებდა, ხელები მუხლებზე ეწყო და გამტერებულო უცქეროდა ცოლს.

— ჩემი ტყავი თუნდაც ჩვენი ძროხის ტყავით ხეზე ჩამოუკიდოდათ გასაშრობად, ჩემი ხორცი თუნდაც ღელეში გაათრიონ, არაფერს არ ვდარდობ. მოგკიდები და განობას, მე მხოლოდ ეს ბავშვები მეცოდებიან. ობლად რომ რჩებიან, ის მაღარდებს მე.

— ნუ გეშინია, — დავამშვიდე მე. — მოიკითებო და ფეხზე დადგები. ერთი ავად გახდომით ადამიანი არ მოკვდება. ადამიანის სული და სხეული ასე ადვილად არ სცილდებიან ერთმანეთს.

აქამდე ჩათვლემილივით მჯდომი კაცი მოულოდნელად გამოცოცხლდა და ალაპარაკდა: — ნამდვილად ასია მაგი, — თქვა მან, — სული ჩვენს სხეულში ძალადაა შეყვანილი. ღმერთმა ჯერ ადამიანის სხეული გააკეთა. ერთხანს ადამიანი ასე, სულს გარეშე იყო. მერე ომერომა უბრძანა სოლს. შედი ადამიანის სხეულშიო. სულმა იმ ცარიელ სხეულში შესვლა არ ინება. დარჩა ადამიანი უსულოდ. ხუთი მილიონი წელი

ადამიანის სხეული გაუნძრევლად იდო. მერე ღმერთმა მისი
თხოვა სულს, შედი ადამიანის სხეულშიო, სულმა არ ინება
შესვლა. მაშინ ღმერთი გაბრაზდა და ძალით შეიყვანა სული
ადამიანის უსულო სხეულში. ასე გასულიერდა ადამიანი. პი-
რველი სულიერი ადამიანი ადამი ყოფილა...

— დაანებე თავი მაგ ზღაპრებს, — ვუთხარი და წასას-
ვლელად მოვემზადე.

ავადმყოფი შეირხა, გოგონას მიუალერსა, მერე ქმარს უკ-
მაყოფილოდ გადახედა და უთხრა: — შტერი ხარ შენ, შტერი,
რას ბოდილობ, შენაც არ იცი!

კაცი გაბრაზდა, ხელი მომუშტა, მუხლზე დაირტყა და
ხმამღლა მოყვა ქალის გინებასა და ლანძღვას.

შევწუხდი. წასასვლელად გამზადებული ისევ შევჩერდი.
არ მინდოდა მარტოდ დამეტოვებინა ისინი. ადვილი შესაძლე-
ბელი იყო უჭკუო რეჟებს ეცემა ავადმყოფი ქალი.

მოულოდნელად გარეთ ხმაური ატყდა. ბავშვები გარეთ
გაცვიდნენ. სოფლის სიმყუდროვეს თანდათანობით არღვევდა
მოახლოებული თვიმფრინავის ზუზუნნი. კაცი ადვა და ისიც
გავიდა.

— კარგად იყავი, დაიკო! — დავემშვიდობე ქალს.

— ძაღლობელი ვარ, მაღლობელი! — წამოდგომა დაა-
პირა, მაგრამ ვერ შეძლო.

— იწეჟი, იწეჟი! შენი ადგომა არ შეიძლება!

თავი დააქნია, მომაჩერდა, მივხვდი, რალაცის თქმა სურ-
და, მაგრამ ვერ გადაეწყვიტა. ბაგეზე მქრქალი ღიმილი აღ-
ებეჭდა და ხელები ჩაიქსია.

კარი გამოვხსურე, სოფელი ხმაურობდა. ბავშვები ორია-
ლებდნენ, ყოჩინებდნენ, გახარებულები უქნევდნენ ხელს
თვითმფრინავს. მშიერი, ფერდჩავარდნილი ძაღლები მჭახედ
ყეფდნენ. თვითმფრინავი ისე დაბალზე მიფრინავდა, რომ
დაინტერესებულ მფრინავს შეეძლო გადმოეხედა და დაენახა:
თუ რა მდგომარეობაში ვიყავით.

მზე ჩადიოდა, ნელ-ნელა ეშვებოდა ჰორიზონტისაკენ. სა-
ქონლის ნაკვალევში ჩამდგარი წყალი ჩაშავებული მზის სხი-
ვებს ირეკლავდა...

ჩვიდმეტი თებერვალი იყო...

ქ რ თ ა მ ი

შინ მივდიოდი...

სოფლის ცენტრში, ვეება ჭადრის ქვეშ მოყრიამულე ბავ-
შვები რომ შევნიშნე, შევჩერდი, ბავშვებში ჩემი კარის მეზო-



გლის საიდის უმცროსი ბიჭი — ხასანიც იყო. როგორც კი მომკრა თვალი, ხასანი სირბილით გამოეშურა ჩემსკენ და მოსვლისთანავე დიდის ამბით გ.მაგებინა! — გაიგეთ, პატივცემულო მასწავლებლო? ჰუქუმ-ახმედმა თავისი ძალი უნდა მოკლას!

— მოკლას? რატომ? როდის? — მივყარე კითხვები.

— რატომ, არ ვიცი, მაგრამ მოკვლით ახლა უნდა მოკლას! აი, ეგერ, სახლიდან გამოჰყავს უკვე.

ხასახი ძართალს ამბობდა, გავიხედე და დავინახე: ჰუქუმ-ახმედს ძაღლისათვის ბაწარი ჩაება და მოჰყავდა. მეორე ხელში თოფი ეჭირა და სანადიროდ მიმავალ მონადირესავით მობიჯებდა. შუადღე იყო, მზე მთელი ძალით აჭერდა, დასიცხულ ძაღლს წითელი ენა გამოეგდო და ზანტად, ბედს დამორჩილებულივით მოყვებოდა პატრონს.

ჰუქუმ-ახმედი დინჯად მომიახლოვდა, შემხედა და ხმადავლა მომესალმა: — გამარჯობა, მასწავლებლო!

— გავიმარჯოს, ჰუქუმ! — გავებასუხე მე და შევათვალიერე. — გავიგე, ძაღლს კლავსო... რატომ კლავ?

ჰუქუმ-ახმედმა უშბლი შეიკრა, თვალი ამარიდა, მოიხედა გვერდზე და მოკლედ მომიჭრა: — უნდა მოვკლა! ასე მაქვს გადაწყვეტილი!

— კი მაგრამ ასე უცებ? რას ერჩი მაინც? — შევეცადე გამოვსაოჩლობოდი საცოდავ ძაღლს, — დამნაშავეს, დანაშაულზე რომ წაუსწრებენ, ჯერ გაასამართლებენ, აუხსნიან, თუ რაში სდებენ ბრალს და მერე სჯიან!..

— მე უკვე გავასამართლე! — უშბლშეკვრით ჩაილაპარაკა მან.

— კი მაგრამ, რა დააშავა ასეთი?

ჰუქუმ-ახმედი მოულოდნელად გაბრაზდა და მკვახედ მომიგო: — ჩემი საქმე მე უკეთ ვიცი და თუ ჭკუის სწავლებას მოეშვები, უკეთესი იქნება, მასწავლებლო!.. რაკი ვსჯი, არსებობს ალბათ მიზეზი...

— კი, მაგრამ, ის მიზეზი არ ითქმება? — ჩავეძიე მე.

— რაკი ძალიან გაინტერესებს, დავაკმაყოფილებ შენს ცნობისმოყვარეობას, — როგორც იყო ოდნავ მოღბა ჰუქუმ-ახმედი, — იმიტომ ვსჯი, რომ ძალზე მყრალ სუნს უშვებს უხიდახ...

— ჰა? — პირი დავადე მე.

— ასეთი ძალი მე არ მინდა! თანაც, შეხედე ერთი, როგორ გასუქდა, რამოდენა ფეხები აქვს, პირდაპირ, ფადიმალასავით დავდო ღიბი.

— მაინც ვერაფერი გავიგე! — ჩავილაპარაკე მე.

— თუ ვერაფერი გავიგე და ვერ მიხვდი, ჩანს, თავი არა

გქონია! — ჩაილაპარაკა, დაცინვით ამხედა, გამშორდა და ძალი ჭადროსავენ წაიყვანა.

ჩემს სიცოცხლეში არ მენახა, თუ როგორ კლავდნენ ძალს. არც დიდი სურვილი მქონდა ენახა. ვიდექი და რაღა მექნა არ ვიცოდი. ისიც კარგად მესმოდა, რომ მივსულიყავი და ჰუქუმ-ახმედს შევხვეწებოდი, არ მოკლა-მეთქი, სულ ერთია, მაინც არ მომისმენდა, უკვე თოფი ხელში ეჭირა და მას გაჩერებდი შენ?

ჰუქუმ-ახმედმა ძალლი მიწიდან ამოჩრილ ფესვზე მიაბა. ძალლი დაწვა, თავი ფეხზე დააყრდნო და გაირინდა. თვალებს ხან მილულავდა, ხანაც გაახელდა. თვალებში ეტყობოდა, წინასწარ ჰქონდა გააზრებული, თუ რას უმზადებდა მუხთალი ბედი. ჰუქუმ-ახმედმა ძალს მუშტი მოუქნია, შეაგინა და დიხჯად გაემართა სოფლის ყავახანისაკენ.

— შეჩერდი! — დავუძახე და ავედევენე.

შეჩერდა, მოიხედა და გაოცებული მომაჩერდა: — კიდევ რა გნებავს, მასწავლებლო? — მკითხა.

მივუახლოვდი, მივაჩერდი თვალეებში და ვკითხე: — მართლა უნდა მოკლა ძალლი?

— მე რატომ უნდა მოკლა? — გაიკვირვა მან, — მივალ ყავახანაში, გამოვაცხადებ, ასეა და ასე საქმე, ძალლი უნდა მოკლა-მეთქი!.. ვიცი მე მაგათი ამბავი, მაშინვე რიგში ჩადგებიან... იმდენი მსურველი აღმოჩნდება, რომ მოინდომო, ვერ დათვლი.

— კი მაგრამ მოკლა გადაწყვეტილი გაქვს?

— აბა რა! — თქვა მტკიცედ, ერთხელ კიდევ ამათვალ-ჩამათვალეირა და მომშორდა, თვალი გავაყოლე, მერე ძალს გავხედე. ბავშვები ძალს გარს შემოხვეოდნენ და უყიჟინებდნენ: --- ჰეი, ძალლო! თავს უშველე, გაიქეცი, თორემ მოგკლავენ, თავს ტყვიით გაგიხვრეტენ! რატომ ხარ წუწკი? რატომ შეჭამე კვრცხები?

თავი გავიქნიე, შევბრუნდი, ნაბიჯს ავუჩქარე და დაწინაურებულ ჰუქუმ-ახმედს გავყვი.

ყავახანაში იმ ღროს მევედი, როცა ჰუქუმმა დიდის ამბით განაცხადა, — ძალლი მყავს მოსაკლავი და ვინ მოკლავსო!

ამისი თქმა და ოცამდე მსურველი წამოიჭრა ფეხზე. ატყდა ერთი ყაყანი, გინება, მიწევ-მოწევა, მუშტების ქნევა. არა მე და არა მეო, ერთმანეთს ეცილებოდნენ. მერე გადაწყვიტეს, ყველას ერთდროულად დაეხვრიტა ძალლი. ახლავე თოფებს მოვიტანთ და მოვალთო, დაამედეს ჰუქუმ-ახმედი და ყავახანიდან გაცვივდნენ.

— თოფი მე მაქვს! — მიაძახა მათ ჰუქუმ-ახმედმა, მაგრამ არავის არ გაუგონია.

ყავახანის პატრონი ფადიმ-ალა წყნარად იჯდა და დედის
ლიდან ჩამოტანილ საუკეთესო ნარგილეს აყურყულავებდა.
ფადიმ-ალას ხარის რქებივით აპრეხილი დიდრონი უღვაშები
ჰქონდა, მუცელი ტიკივით გამოებერა, სქელ კისერზე ოქროს
ძეწკვი ჩამოეკიდა.

— ბიჭო, ჰუქუმ! — დინჯად მიუბრუნდა იგი ჰუქუმ-ახ-
მელს, — ერთი ძუნჯალი ძაღლის მოსაკლავად რომ მთელი
სოფელი დააყენე ფეხზე, ვეთქვა ჩემთვის, მოგცემდი ჩემს
პარაბილს და ერთი რომელიმე მათგანი მოუღებდა ბოლოს
მაგ იაღლს.

— თოფი მეც მაქვს! — გაიმეორა ჰუქუმ-ახმედმა.

ორი დღის წინ, ოთხმა ჟანდარმმა მთელი სოფელი გადა-
ჩხრიკა, სოფლელებისათვის იარაღი უნდა ჩამოერთმიათ, მაგ-
რამ ვერც ერთი თოფი, ვერც ერთი რევოლვერი ვერ აღმოაჩი-
ნეს და ხანამშრალეებმა მიატოვეს სოფელი...

ახლა კი, ძაღლის მოსაკლავად გამზადებული თოფებით
შეიარაღებული სოფლის ახალგაზრდები უკვე ჭადართან იყ-
რიდნენ თავს.

„ამ ხალხს სისხლი მოწყურებია. კაი ხანია სოფელში სიწყ-
ნარეა. თოფი არ გავარდნილა, არავინ არ დაუჭრიათ, არ მო-
უკლავთ, სისხლი არ დაღვრილა. სოფლელებს მოთმინების
ფიალა აევსოთ და შენ გააჩერებ მაგათ?“ — ვფიქრობდი ჩემ-
თვის, გარიყულივით გახმარტოებით მდგარი.

— ძაღლი ხის ფესვებზეა მიბმული. ყველა ერთად რომ
მივიდეთ და ყველამ ერთად ვესროლოთ, ცუდი როდია! —
განაცხადა ჰუქუმ-ახმედმა.

პირველი ფადიმ-ალა გაემართა ჭადრისაკენ. მას სხვებიც
მიყვნენ. დასიცხული ფადიმ-ალა კვერცხისმდებელი ბატივით
მიაბიჯებდა.

ძაღლმა რომ მისკენ დაძრული თოფებით შეიარაღებული
და აყაყანებული ბრბო დაინახა, თვალი გაახილა, გამოცოცხ-
ლდა, წამოიმართა, დაიღრინა და ფეხებით მიწას დაუწყო
თხრა:

— ახლა თუ აიშვა, ისეა გადარეული, თოფის სროლასაც
ვერ მოვასწრებთ, ისე გაგვაფუჭებს! — თქვა ვიღაცამ და
უკან დაიხია.

მართლაც, ახლა რომ აეშვა ამ ძაღლს, არ ვიცი რამდენი
გადაირბენდა ცხრა მთას და თვითონაც ცხრა მთას იქით გა-
დაიქარგებოდა.

კაცები თოფებშემართულები იდგნენ და მოუთმენლად
ელოდნენ ფადიმ-ალას ბრძანებას. ფადიმ-ალას ღიპი ხელებით
ეჭირა და საბერველივით ქშინავდა.

— აბა, დაუმიზნეთ! — მჭახე ხმით გასცა ბრძანება ფა-



დიმ-ალამ და გადამდგარ გენერალივით გაიბღინდა, — მისი ნეტ, ბიჭებო! როგორც კი ვიბოძანებო, ცეცხლი შეუქვნი, თქვენც ერთდროულად გაისროლეთ!.. იცოდეთ, ვინაც ჩემს ბრძანებას არ შეასრულებს, არ ესვრის, ანდა დააცილებს, დედას ვუტირებ!..

წამით ისევ სიჩუმე ჩამოწვა, კაცი ბუზის გაფრენის ხმაც გაიგონებდა. ამ დუმილით ვისარგებლე და უკანასკნელად შევეცადე ძაღლის გადარჩენას: — ერთი წუთით შეჩერდით! — ვიყვირე მე — რაკი მაგ ძაღლს კლავთ, მაღლი ქენით და დაბმულს ნუ მოკლავთ მაინც. აუშვით და ისე ესროლეთ, თუ გაიქცა, ზურგიდან დაახალეთ!

ფადიმ-ალა ჩაფიქრდა, მერე ფეხები გაჩაჩხა და დაშეთანხმა: — სწორი აზრია! აბა, ჰუქუმ, მიდი და აუშვი შენი ძუნკალი!

— მაგისი აშვება როგორ შეიძლება! ხომ დაგვფლითა ყველა? — იყვირა რომელიღაც მშინარამ.

ჰუქუმ-ახმედისათვის ფადიმ-ალას სიტყვა კანონი და ალაჰის ტოლფასი იყო. იგი ზოზინით მიუახლოვდა ძაღლს და აუშვა.

მშვიდად ამოვისუნთქე, მეგონა ძაღლი გაიქცეოდა, თავს უშველიდა, ამ სისხლის მოყვარულ ბრბოს პირში ჩალავამოვლებულს დატოვებდა. მაგრამ დახეთ, იმ სულელ ძაღლს გქცევა არც უფიქრია, პატრონთან მივიდა და გვერდით ამოუდგა.

— არა, ფადიმ-ალა! — მიმართა მას ჰუქუმმა, — მასწავლებელმა გაგვასულელა! უნდა დავაბათ ძაღლი!

ფადიმ-ალა მასაც დაეთანხმა. ძაღლი დააბეს. ფადიმ-ალამ, დრო რომ არ დაეკარგა, ბრძანება გასცა — ცეცხლიო!

თოფებმა ერთბაშად დაიქუხეს და ცეცხლი გადმოანთხიეს. ძაღლი წკავ-წკავით დაეცა და მიწაზე გორვას და ყმუილს მოჰყვა.

ფადიმ-ალას ბრძანებაზე, მკვლელებმა ისევ დატენეს თოფები და ისევ გაისროლეს. როცა ტყვიებისაგან დაცხრილული, სისხლში გათხვრილი ძაღლი სამუდამოდ მიჩუმდა, ფადიმ-ალა ჰუქუმ-ახმედს მიუბრუნდა და უთხრა:

— კარგია, ეს უვარგისი ძაღლი რომ მოიცილე! ათ დღეში ჩემი ძაღლი დაყრის ლეკვებს, ერთს მოგცემ, წაიყვანე და გაზარდე!

— იცოცხლე, ფადიმ-ალა! გულუხვი კაცი ხარ და იცოცხლე! — გაუხარდა ჰუქუმ-ახმედს, — აუცილებლად წაიყვან. უძალლოდ აბა როგორ იქნება?

— ჰო, მოგცემ, ახლა კი ეს მკვდარი ძაღლი გაათრიე და საღმე ხევში გადააგდე!

ჰუქუმ-ახმედმა მკვდარი ძალლი გაათრია. მკვლელები და სეირის მოყვარულები თნდათან დაიშალნენ.

ორ ღღეს პირში ლუკმა არ ჩამიდვია. სულ იმაზე ვფიქრობდი, ჰუქუმ-ახმედმა რომ მითხრა, ჩემი ძალლი ჰაერს აფუჭებსო!.. მერე ის იყო, ჩემს მეზობელ საითს ვკითხე ამის შესახებ.

— ეს როგორ ვერ მიხვდი? — გაიცინა მან, — კვერცხის-მჭამელი ძაღლები ძალიან მყრალ სუნს უშვებენ... ძალლი ძალლია და კვერცხის მჭამელი ადამიანიც რომ ასეა?

არ დავუჯერე. კვერცხის მჭამელი, წუწკი ძაღლების მეტი რაა ჩვენს სოფელში, მაგრამ ასეთი რამ არასოდეს გამიგონია, თანაც, ასეც რომ ყოფილიყო, ჰუქუმ-ახმედი თავის ძალლს მაინც ვერ გაიმეტებდა სასიკვდილოდ, რომც ეჩივლათ, მაინც ვერ გაიმეტებდა, სოფლის მუხტართან რაღაც ნათესაობა აკავშირებდა და წელი გამაგრებული ჰქონდა. იტყოდა, რა თქვენი საქმეა, ძალლი ჩემია და ხელსაც არ ვახლებო.

არა, აქ სულ სხვა ამბავთან გვექონდა საქმე. ბევრი ვიფიქრეთ ამის შესახებ ჩვენ სამმა — მე, ჩემმა ამხანაგმა ისმაილმა და ღურსუნმა, მაგრამ მაინც ვერაფერი დავადგინეთ. ისმაილმა ექვი გამოთქვა, იქნება ჰუქუმ-ახმედმა ცოლს შენიშნა რამეო, მაგრამ ჰუქუმის ცოლი რომ პატიოსანი ქალი იყო, ყველამ ვიცოდით, და ეს ვარაუდი მაშინვე გაბათილდა. ანდა, რა კავშირი ჰქონდა თუნდაც ჰუქუმ-ახმედის ცოლის უსაქციელობას ძაღლის დახვრეტასთან? აბა, რაში იყო საქმე? ვერაფერი რომ ვერ დავადგინე, ისევე ჰუქუმ-ახმედთან მისვლა გადავწყვიტე. ისინი არ წამომყენენ და მარტო წავედი.

ჰუქუმ-ახმედი ბედად სახლში დამხვდა. ეზოში საქმიანობდა, მიმჯდარიყო ჩრდგოლში და ქეციან ვირს ზურგს ფხანდა.

ჯერ აქედან მოვუარე, მერე იქიდან, რა არ ვკითხე ყასიდად, საუბარში რომ ჩავითრიე, ძაღლზე ჩამოვუგდე სიტყვა: — ძალიან მაინტერესებს, ახმედ, და მითხარი თუ კაცი ხარ, ძალლი რატომ მოკალი?

მან ვირის ფხანას თავი ანება, ჩაიცინა და ჩაილაპარაკა: — ასეა, უცოდინარსა და შეუგნებელს უნდა აუხსნა და შეაგნებინო!

— ამ სოფელში შენზე შტერი, შეუგნებელი და უცოდინარი ვინაა? — გავბრაზდი მე.

პასუხად მან რაღაც ჩაიბურღლუნა ჩემი მისამართით, გვერდზე მიიწია და ადვილი დამითმო ხის მორზე. — დაჯექი, მასწავლებლო!

გვერდით მივუჯექი და საიდუმლოს გაგების მოლოდინში მივაჩერდი.

ჰუქუმმა თავის ვირზე მანიშნა და დაიწყო: — თუ კარგად



დააკვირდი, მიხვდებოდი, რომ ეს ჩემი სახედარი ჭაკია, მუტრუკი ჰყავს მოგებულნი. გასაკვირი რაა იცი? ექვსივე მუტრუკი, ჭაკია! აქედან სამი როგორც იქნა გავყიდე, ის სამი კი ვერაფრით ვერ გავასაღე, იმ სამიდან ერთი ქოს-ალის ბოსტანში შეიპარა და თოფით მომიკლეს. დანარჩენი ორი ბოსელში მიბია!..

— მაგი გავიგე! — შევაწყვეტინე მე, — მაგრამ მე ძაღლზე გკითხე, შენ კი ჭაკ ვირზე და მუტრუკებზე ძელაპარაკები...

ჰუქუმ-ახმედმა შემაჩერა. — მისმინე და ნუ ხარ მოუთმენელი... დრო მოვა და მაგ ძაღლის ამბავსაც გეტყვი... ჰო, იმას გეუბნებოდი, ექვსივე ჭაკი დაბადა-მეთქი! ჭაკი სახედარის ყოლას, სულ რომ აო გყავდეს რომ სჯობია, ეს კარგად იცი შენ! მართალია ჭაკი სახედარი უფრო ადვილი მოსაგლეღია, მაგრამ ვინ მოგავლევინებს? ანდა ვინ მოგასვენებს? მთელი ჩვენი სოფლის ბიჭებს თვალები მაგ ჩემი ჭაკევისაკენ უჭირავთ. არც სიხდისი აწუხებთ და არც ნამუსი. ასეთი ვათახსირებულები ჩემს ცხოვრებაში არ მინახავს. სულ ჩემს ბოსელში იყრიან თავს. მოსვენება არა მაქვს იმათგან. ხშირად ღამე ვდგები და საქონელივით ვერეკები... ვისთვის უნდა მეთქვა, ვისთვის უნდა შემეჩივლა ასე მჭირს-მეთქი? ჩემი სირცხვილი და თავის მოჭრა არ იყო? მთელი სოფელი მასხრად ამიღებდა! მეტი ვერაფერი რომ ვერ მოვანერხე, ერთი ლეკვი ვიყიდე, გავზარდე. კარგი ძაღლი დადგა, სასაყვედურო არაფერი მქონდა. ერთ წელიწადს ქე ვიყავი მოსვენებული. იმისი შიშით ბიჭები სათოფეზე აღარ ეკარებოდნენ ჩემს ბოსელს...

— ჰუქუმ-ახმედმა სათქმელი აღარ დაამთავრა და გაჩუმდა.

— მერე, მერე? — შევახსენე დაინტერესებულმა.

— მერე რა, როგორც გითხარი, ისეთი ძაღლი დადგა, ეზოში ჩიტსაც არ აჭაკანებდა. მიყვარდა, პატივსაც ვცემდი, სულ ნუგბარ-ნუგბარ საჭმელებს ვაძლევდი... იმ დღეს, ის იყო ვივანშმე და ვწვებოდი, რომ ბოსლიდან ხმაური შემომესმა. ვიფიქრე, ალბათ ხარს ბაწარში ფეხები დაებორკა და იხრჩობა-მეთქი! კვარს დავავლე ხელი და გავიქეცი, უკან ცოლი და უფროსი გოგო ამედევნა... გავაღე ბოსლის კარი, კვარი მალლა ავსწიე და... რას ხედავს ჩემი თვალები... სამი ახალგაზრდა რიგში ჩამდგარიყო... კინაღამ გავგიჟდი კაცი! რომ დამინახეს, ისინიც ისე შეშინდნენ, სახეზე მკვდრის ფერი დაედოთ... ქემანც ჩემი ქალიშვილი არ ყოფილიყო იქ და ვარკვევით არ დაენახა ყველაფერი... პირველად ისე დავიბენი, ვერაფერი მოვანერხე. მერე ცოლს ვუბრძანე, კარი მაგრად ჩაკეტე-მეთქი. წამოვუსვი ნიჩაბს ხელი და დავერიე სამივეს: — თქვენ ნამუსგარეცხილებო, თქვე ძაღლის გაგდებულეზო და



ჭაკი ვირის შეილება, თქვენი ტოლა რომ ვიყო, ასეთ სიძულველად გლეს კი არ ჩავიდენდი, ავდგებოდი და ქალს მოვიტაცებდი-მეთქი, — მივდექი და ნიჩბის ტარით ცხვირ-პირი გავუსწორე სამივეს... ფეხებში ჩავგივარდნენ, გვაპატიეო, შემეხვეწნენ... ვუთხარი, თუ გინდათ ცოცხალი ვაგიშვათ აქედან, მითხარით აქ როგორ შემოძვერით-მეთქი... ჯერ არ გამოტყდნენ, მერე კი, რომ მივდექი და ვურტყი და ვურტყი, იძულებული გახდნენ ყველაფერი ეთქვათ: — თქვენი ძალი მივიჩვიეთ, საჭმელს ვაძლევდითო! — ესე იგი, დაქრთამეს! რამდენი ხანია რაც ასე უნამუსობას ჩადიხართ-მეთქი, მითხრეს, უკვე ექვსი თვეაო, მივდექი ისევ, ვდრუზე და ვდრუზე ნიჩბის ტარი და გარეთ გავყარე სამივე...

— მერე? — ჩავეძიე მე.

— მერე რა, გამოვბრუნდი დაბოღმილი. ვხედავ ძალი არხეინად წევს დერეფანში. დაქრთამულითაა გამძლარი და რა ენაღვლება მამაძალს? გაბრაზებულმა ფეხი წავკარი. არ დაკრიჭა კბილები და არ შემომიღრინა? გესმის შენ? ერთი დანაშაული არ იქმარა და მე, პატრონს, აქეთ შემომიღრინა კიდევ. რადგანაც ასეა, მე შინ გიჩვენებ სეირს-მეთქი, ვუთხარი და მერე თქვენც ქე დაინახეთ, მასწავლებლო, თუ რა დღე წავკიდე და როგორ ავასრულე ჩემი წადილი. დავხვრიტე როგორც მოღალატე! ერთი მითხარი, არ უნდა დამეხვრიტა, აბა?

— ასე თუა... — ვთქვი ორჭოფულად.

— კი, ასეა მაგი!.. ერთიც გაითვალისწინე, მასწავლებლო, როცა კაცის ნამუსზე წამოიჭრება სიტყვა, გახსოვდეს, იქ ჭაკი სახედარიც ურევია!

ავდექი, მასპინძელს გამოვემშვიდობე. ისმაილს გავუარე და ყველაფერი მოვუყვი. მან ხომ ეჭვი გამოთქვა ჰუქუმ-ახმედის ცოლზე?

კ ო მ ზ ა ი ნ ი

ავ თვალს არ დაენახებოდა შერიფ-ალის თვალუწვდენელი ჰურის ყანები. მწიფე, მომკელის მომლოდინე, ოქროსფერი და სიმძიმისაგან თავდახრილი თავთავები ნიავის დაბერვაზე ზანტად ირხეოდნენ და დასცქეროდნენ თავიანთ მასაზრდოებელ მიწას. პურის ყანა, განსაკუთრებით დილდობობით მზის ამოსვლისას იყო ლამაზი და მომხიბვლელი.

შერიფ-ალი შეძლებული, მდიდარი კაცი იყო. ყველაფერი თავზესაყრელად ჰქონდა. სოფელშიც სახლი ჰქონდა და ქალაქში. იმ ოლქის ოცდაოთხ სოფელში გაფანტულიყო შე-

რიფ-ალის პურის ყანები, ყოველი ნაკვეთი უზრუნველყოფილი სარწყავი წყლით. ამიტომაც იგი ყოველწლიურად მის დიდ მოსავალს იღებდა. ჩაჰქონდა ქალაქში, დიდი მოგებით ასაღებდა და თანდათანობით მდიდრდებოდა.

სოფლელები დიდ მემამულესა და დიდ ბატონს ეძახდნენ. ერიდებოდნენ და ეშინოდნენ მისი. შერიფ-ალის სურვილიც ეს იყო. მას უნდოდა ყოფილიყო დიდი. ყოველის შემძლე, საშიში და მოსარიდებელი კაცი, დიახ, საშიში!

„შენს დანახვაზე ხალხი შიშით უნდა კანკალებდეს და მონასავით გემსახუროსო“, — უყვარდა ხოლმე თქმა შერიფ-ალის.

ბავშვობა დიდად დალხინებული არ ჰქონია შერიფ-ალის, არც მაინცდამაინც მდიდარი მშობლები ჰყოლია. როცა მამა გაჩნდა ეცვალა და შერიფ-ალი ძმებს გამოეყო, სულ რაღაც ხუთიოდე ქცევა მიწა და ერთი გაქუცული სახლი ერგო წილად. რასაც ცხოვრებაში მიაღწია შერიფ-ალიმ, ეშმაკობითა და მოხერხებით მიაღწია, იცოცხლეთ, ეშმაკობა და მოხერხება კი გააჩნდა გვარიანი, თვით ეშმაკზე ერთი დღით ადრე იყო დაბადებული.

როცა წამოიზარდა, გამდიდრებაზე იწყო ფიქრი და სულ იმის ცდასა და კირკიტში იყო, თუ როგორ, რა გზით შეიძლება ამისათვის. ბოლოს, ეს გზა როგორც იქნა გამოიხატა.

როგორც ყველა მამაკაცს, ლამაზი ქალები ძალიან უყვარდა შერიფ-ალის, მაგრამ რავინდარა მზეთუნახავი უხდა ყოფილიყო ქალი, თუ მდიდარი და შეძლებული არ იყო, ზედაც არ შეხედავდა, ერთხელ როგორღაც სამი და გაიცნო და ცოტა ხნის შემდეგ იმ სამი დიდან ყველაზე ხნიერი, ყველაზე უშნო და ისიც ნაქმარევი შეიერთო. ბევრს, საქმეში ჩაუხედავს გაუკვირდა კიდევ მისი არჩევანი და ზოგ-ზოგი ჩუმად დასცინოდა კიდევ, გემოვნების ნატამალი არ გააჩნიაო, ამბობდნენ მასზე. ძალი ყეფდა, მაგრამ ქარავანი თავის გზაზე მიდიოდა, შერიფ-ალი ნაკლებად დაგიდევდათ სხვის ფიქრებსა და სურვილებს. მან იცოდა, რასაც აკეთებდა. საქმე იმაში იყო რომ, იმ სამ დაში ყველაზე მდიდარი და მიწების პატრონი სწორედ ის შეუხედავი, ხნიერი და ქვრივი და იყო, შერიფ-ალის კი სიმდიდრის მეტი არაფერი სურდა.

გამოხდა ხანი და შერიფ-ალი მეორეჯერ დაქორწინდა. ამჯერად უკვე უკანონოდ, მაგრამ მისთვის კანონი და სამართალი მხოლოდ და მხოლოდ თავისი სურვილი იყო. მეორე ცოლი პირველზე უფრო ავთვალა, იყო, მაგრამ მიწების პატრონი.


ასე, ასეთი მაქინაცეებით გახდა შერიფ-ალი მდიდარი და შეძლებული მემამულე. გარს მოსამსახურეები და ფარეშები ეხვია, საქმეს სხვები აკეთებდნენ, თვითონ კი მთელ დღეებს

ბანქოსა და ნარდის თამაშში ატარებდა, ანდა მხართეძობზე მოწოდებული ჩრდილში ნებივრობდა.

ასეთი შეძლებისა და სიმდიდრის პატრონი კაცი მადლიერი უნდა ყოფილიყო ბედისა, იყო კიდევ, მაგრამ სრული სიმშვიდით მაინც არ დაუფლებია მის ხარბ გულსა და სულს. ხანდახან უკმაყოფილებას გამოსთქვამდა შერიფ-ალი. კიდევ უფრო მდიდარი რატომ არა ვარო, წუწუნებდა: — „ოთხი შვილი მყავს, ოთხივეს ხომ უნდა დავუნაწილო ჩემი მიწები? ჰოდა, მე რაღა დამრჩება მერე?“ — ფიქრობდა და უკმაყოფილოდ იკმუხნიდა შუბლს ფიქრებში წასული. შერიფ-ალი დღე და ღამე სულ ერთი და იგივეს ფიქრობდა — რა ექნა, როგორ მოქცეულიყო, როგორ ჩაეგდო ახალ-ახალი მიწები ხელში, ახალი ნაკვეთის შესაძენად ფულის გამეტებაც არ უნდოდა, წუწუნობდა იყო და ფულს თავისი წარწყმედილი სულივით უფრთხილდებოდა... დროის უკმაყოფილოც იყო შერიფ-ალი, წარსულს მისტიროდა, ახალს ეჭვით შესცქეროდა და ახალი დროება მაინცადამაინც არაფრად ეპიტნავებოდა. — „რა ოქროს დრო იყო დალოცვილი?.. — იტყოდა ხშირად, — დღიურ მუშებს ჩალის ფასად იშოვიდი კაცი, რამდენიც გინდოდა იმდენს ნახავდი; ქალი გინდოდა თუ კაცი, მოხუცი თუ ახალგაზრდა. აქეთ გეხვეწებოდნენ გვამუშავეო, ორი კაპიკი გაგვაკეთებინეო!.. ახლა კი... ძალიან გაჭირდა მუშახელის შოვნა... ეს ბამბა მაინც რა ჩემდა ჭირად გამოტყვრა მაინც? რამდენი მუშახელი ჩაუღაბა ამ ბამბის პლანტაციებმა? იქ თურმე მეტს უხდია მუშებს და ამ შტერ სოფლელებსაც მეტი კი არ უხდათ. ოღონდ ორი კაპიკით მეტი აიღოხ და არას დაგიღევენ. ცხრა მთას გადაივლიან! ოჰ, ეს ძაღლების ჯოგი! თუ წავლენ და წავიდნენ, ყველანი ხომ ვერ წავლენ დედაბუდიანად? ქვას გავხეთქავ, დღიურ მუშებს მაინც ვნახავ და ზედმეტს, კაპიკი რომ კაპიკია, არ მივცემ!“

* * *

ნამდვილი პაპანაქება იყო, ირგვლივ ზაფხულის აღზობიდან, მზე მთელი ძალით აჭერდა და ნიავეც არსაიდან იძვროდა. ახლო-მახლო სოფლებში მოკრებილი იაფად ნაშონი დღიური მუშები შერიფ-ალის ყანაში პურსა მკიდნენ. სულ ოცდათერთმეტი სული იყო — ქალი და კაცი, მოხუცი და ახალგაზრდა. დასიცხულები. ერთიანად ოფლში გაღვარულები და მტვერში გაგანგლილები. ხმაამოუღებლად, მღუმარედ მუშაობდნენ, წელში წახრილები მარჯვედ უსვამდნენ ალესილ ნამგალს, მკიდნენ პურს, ძხებად კრავდნენ და იქვე აწყობ-



დნენ. მომკვლებს ახალგაზრდა გლეხი ხელმძღვანელობდა, მას მკვიდრის ხეათურს ეძახდნენ, ახოვანი, დაკუხთული, სხეული ჰქონდა, სახე გარუჯოდა, სქელი კისერი მზისა და წვიმისაგან ჩამავებოდა. დაკერებული, ძველი, რეცხვისაგან გამოხუნებული ტილოს მკერდმოღეღილი ხალათი ეცვა. ბანჯგვლიანი, განიერი მკერდი ოფლს დაეცვარა, ხალათი ოფლისაგან ერთიანად დასველებოდა, მუშაობაში ნამდვილი ცეცხლი იყო, ხალისიანი და დაუდეგარი, სხვებზე სწრაფად მუშაობდა, ყველაზე წინ იყო ძკაძი და ყველაზე მეტსაც მკიდა. პურს მკიდა, კონებად ახვევდა და აწყობდა. დროდადრო წამით შეჩერდებოდა, წელში გაიმართებოდა, ხელით მოიწრეტდა შუბლზე დაცვარულ ოფლს, ამაყი მზერით გადახედავდა მომკვლებს და ომახიანად გასძახებდა: — აბა, გაინძერით, ნუ ზოზინებთ! — და ისევ საქმეს განაგრძობდა, შრომაში ჩამორჩენა არავის სუოდა და მის გადაძახილზე უფრო მეტის მონდომებით ეკიდებოდნენ საქმეს.

საქმი წინ მიიწევდა და შერიფ-ალი კმაყოფილი და მხიარულ განწყობილებაზე ბრძანდებოდა, იგი დიხჯად დააბოტებდა მოთკილ ყანაში და ბაიათებს ღიღინებდა წყნარი, მელოდიური ხმით. ალაგ-ალაგ შემთხვევით შემორჩენილ მოუშკელ თავთავეებს შერიფ-ალი სპეციალურად არ ამკევიანებდა მომკვლებს: — ეს ჩიტებისათვისაა საჭირო, თუ უნდათ ღარიბმა სოფლელებმაც ისარგებლონ ცოტა... ლომის ნარჩენით ხანდახან ტურამაც ხომ უნდა გამოიძლოს კუჭი?

ყახის ბოლოში, სავანგებოდ მოწყობილი საჩრდილობელი იდგა. საჩრდილობელში ბაწრით ვაკეთებულ საქანელაში სამი-ოდე თვის ბაგში იწვა და მშვიდად ეძინა.

შერიფ-ალი შეფარვით გასცქეროდა მომკვლებს და თავისთვის, ბუტბუტით ანგარიშობდა: — „თუ ასე იმუშავეს ამათმა, და თუ ამინდმაც შემიწყო ხელი, სამ დღეში მოვრჩები მკას, შერე განიაგებას შევუდგებით და ის იქნება! ცოტა ხანში ურმებს გამოვგზავნი და თავთავეების კალოზე გადაზიდვას შევუდგები!“

ყახის ბოლოში, ფერდობზე ღრუბელივით შეფენილიყო ცხვრის ფარა და არხვისად ძოვდა.

იქვე, მალლობზე მარტოდმარტოდ, ეულად იდგა კომბალზე ხელისგულელებდაყრდნობილი ახალგაზრდა მწყემსი, რომელიც მოწყენილი და დაფიქრებული გადმოსცქეროდა ზემოდან მომკვლებს. ახალგაზრდა მწყემსი მათ ბედს შენატროდა ახლა. მართალია, იქ საქმეა, მაგრამ საქმისა როდი ეშინია მას, მთავარია გამოძლაპარაკებელი, დარდისა და ვარამის გამზიარებელი ეყოლებოდა გვერდით. მწყემსი კი ყოველთვის მარტოა, დადის კლდე-ღრეში, დასდევს ცხვარს, სადაც უღამდე-

მა, იქ უთენდებდა და მოწყენილობისაგან აღარ იცის, რა ქნას, ცხვარს ხომ ვერ დაელაპარაკება, აბა?

სიცხემ იძალა, უფრო ჩამოცხა და ჩამოიხუთა. მომკვლე-
ბი შრომის ეშში შევიდნენ. უკვე აღარ დაგიდევდნენ მხესა და
სიცხეს. მოულოდნელად ერთმა სიმღერა წამოიწყო. მას მეოა-
რე აპყვა, მერე მესამე და გაიმართა მხიარული ნადური.

შერიფ-ალიც გამხიარულდა და ხალისიანად შეუძახა მო-
მკვლებს: — იცოცხლეთ! იხარეთ, ლომებო, იხარეთ! ჩემი
ფულები ალალი იყოს თქვენთვის! ნაშუადღევს ერთი ფუთი
ხალვაც ალალი იყოს თქვენთვის!

ქირზის ჩექმები ეცვა შერიფ-ალის, ხელში ვერცხლისტა-
რიანი მათრახი ეჭირა. ჩექმებზე მათრახს იტყლამუნებდა,
დააბოტებდა მომკვლებს შორის და ამხნევებდა მათ. გლეხები
მთელი მონდომებით შრომობდნენ, ცდილობდნენ კარგად ეშ-
რომათ და პატრონის მადლობა დაემსახურებინათ.

მწკრივის ბოლოში ერთი ახალგაზრდა ქალი შეამჩნია
შერიფ-ალიმ და გამოცდილი მხერა მიაბჯინა: წვრილი წელი,
მალალი, მოღერებული ყელი, ეშხიანი სახე, მაყვალივით შა-
ვი თვალები... შველი იყო, ნამდვილი შველი იყო, რაღა!.. ძვე-
ლი, გახუნებული, მრავალ ალაგას დაკერებული კაბა ეცვა
ქალს. ერთგან, გამოხეული კაბიდან მაცდურად იმზირებოდა
ვარდისფერი ბაყვი...

ქალი გამალებული მუშაობდა. არაფერსა და არავის აქ-
ცევდა ყურადღებას, გამალებით კრავდა კონებად მოჭრილ
თავთავეებს. მოხიბლული ავხორცი, ნდომით ატანილი შერიფ-
ალი მონუსხული შესცქეროდა ქალს, თვალს ვეღარ აშორებ-
და და მშვიერ ტურასავით ილოკავდა სქელ, მშრალ, გადმოფ-
ლამულ ტუჩებს.

ქალმა ინსტინქტით იგრძნო ვიღაც რომ უცქეროდა თუ
შემთხვევით მოიხედა უკან, ბატონის მიშტერებულ, ავხორ-
ცულ თვალებს რომ წააწყდა, დაიბნა, კონად შეკრული თავ-
თავი ხელში გაუშეშდა და თვალი აარიდა: — რა ქნას ახლა?
ბატონი უყურებს, ვაითუ ნამუშევარი დაუწუნოს, ვაითუ არ
მოეწონოს მისი საქმიანობა! მაშინ რაღა ქნას? რა წყალს მის-
ცეს თავი? — შუბლზე დაცვარული ოფლი მოიწმინდა და კი-
დეგ უფრო მეტი მონდომებითა და ენერგიით მიეძალა საქ-
მეს.

შერიფ-ალი კი სხვაგან აღარ მიდიოდა უკვე. რომ მიასო
ფეხი, აღარ მოსცილდა იქაურობას. — აბა, იცოცხლეთ, იცო-
ცხლეთ! — გაიძახოდა ყასიდად და გულის გარეთ ამხნევებდა
სხვებს, მათრახს ჩექმის ყელზე იტყლამუნებდა და შესცქე-
როდა მუშაობაში გართულ ქალს. იგი თანდათანობით იხიბ-
ლებოდა ქალის სუსტი წელითა და განიერი თეძოებით: —



„ცოლი თუ გეყოლება კაცს, ასეთი მანიც უნდა გყავდეს, რომელიც ფიქრობდა იგი. — განიერი თეძოები და მსხვილი ბარბაქები უნდა ჰქონდეს ქალს, რომ კაცსაც ასიამოვნოს და ჯანმრთელი, ლომებივით ბავშვები შობოს!.. თუ მოუვლი და აჭმევ, ასეთს უნდა ასვა და აჭამო. ასეთი ქალი კარგ ტანსაცმელსაც კარგად შეიფერებს... ახლა ამასთან დაწოლაც რა ელირება, რა ძკლავები აქვს, რა გულმკერდი! ვინაა ხეტავი?“

მოძველებმა გაინაპირეს და თანდათანობით დაშორდნენ შერიფ-ალის. ქალიც მათ მიჰყვა. შერიფ-ალი კი ადგილზევე დარჩა. იდგა, იტყლაშუნებდა ძათრახს ჩექმის ყელზე და თვალ-მიუშორებლად გასცქეროდა ქალს, რომელიც თავდაუზოგავად შრომობდა და შეშინებული ფიქრობდა:

„როგორ მოწონს ნეტა ბატონს ჩემი ნამუშევარი? ხომ არაფერს მისაყვედურებს ნეტა? რატომ შემომყურებს ასეთი დაშტერებით?“ — მართალია, იმ ადგილს, სადაც ბატონი იდგა, საკმაოდ დაშორდა, მაგრამ ქვეცნობიერად მაინც გრძნობდა, რომ ბატონი უცქერდა.

ქალმა ქონის მაგვარ საჩრდილობელს მიაღწია, ბავშვის ტირილი მოესმა. შეცბა, შეწუხებულმა მიმოიხედა. იქ, საჩრდილობელში მისი ბავშვი ტიროდა. ბავშვს უნდა დახედოს, ძუძუ უნდა მოაწოვოს მოშვივებულსა და ამიზნებულს, მაგრამ როგორ უნდა ქნას ეს, როცა ბატონი უცქერის? — „ეჰ, რაც იქნება, იქნება, ბავშვს უნდა მივხედო. თუ გამაგდებს, ჯანდაბა ჩემს თავს, გამაგდოს!“ — გაიფიქრა და საჩრდილობელში შერგო თავი.

მშვიერი, დასიცხული, ოფლში გაღვრილი ბავშვი ტირილით იჭაჭებოდა. ბავშვი აიყვანა, თავზე გადაკრული, ოფლისაგან სველი ცახოცი მოიხსნა, დაუბორიალა, მერე საკინძე გაიხსნა, რძით გატიკნილი ძუძუ ამოიღო და პირში ჩაუღო. ბავშვმა ტირილი შეწყვიტა და კმაყოფილი კრუტუნით შეუდგა წოვას.

შერიფ-ალი ისევ იმ ადგილას იდგა, რაღაცაზე ჩაფიქრებულს უღვაშის ბოლო მოექცია პირში და იწიწკნიდა, მერე თავი აიღო და მწკრივის ხელმძღვანელი, ახალგაზრდა გლეხი თავისთან მიიხმო თითის დაქნევით.

ახალგაზრდა გლეხი მაშინვე მასთან გაჩნდა და იკითხა: — რას მიბრძანებთ, ბატონო?

— ის ბავშვიანი ქალი ვინაა, ბიჭო?

ახალგაზრდა გლეხი მიუხვდა, თუ რომელ ქალზე იყო ლაპარაკი და სხაპასუხით მიუგო: — ჩვენი სოფლის მეველის, სულეიმანის ცოლია, ბატონო! სოფლელი კაცები ყველანი ქალაქში ან ბამბის პლანტაციებში არიან წასულები სამუ-

შაოდ, მეც მეტი ვერავინ ვერ ვნახე აქ წამოსაყვანი და ვსამოვიყვანე! ბავშვიანია, მაგრამ...

შერიფ-ალიმ საჩრდილობელისაკენ გაიხედა.

— არ მინდოდა მაგისი წამოყვანა, — განაგრძო ახალგაზრდა გლეხმა, — მარა, ძალიან მეხვეწა, ბატონო. მაგისმა ქმარმა ერთი ჩვენი სოფელის ძროხას ფეხი მოამტვრია, გლეხმა იჩივლა, მუხტარმა დაიბარა მეველე და იმ გლეხის სასარგებლოდ ჯარიმის გადახდა დააკისრა. აბა რით უნდა გადაეხდა, როცა ის საცოდავი ოცდაათ ლირას დებულობს თვეში... ჰოდა, ქალაქში წაყვა მეზობლებს დღიურ სამუშაოზე... ეს ქალი ზამთარ-ზაფხულს ასე მუშაობს და ეხმარება ქმარს... მეხვეწა, მეც წამიყვანე, იქნება ორი კაპიკი ფული მეც გავაკეთო და კაბა ჩავიცვა ტანზეო. ხომ ხედავთ, სულ შემოხეული აქვს კაბა... შემეცოდა, ბატონო, გაჭირვებული რომ არ იყოს, ამ სიცხეში სამი თვის ბავშვს ამოდენა გზაზე რა წამოსაყვანიებდა?

შერიფ-ალი ჩაფიქრდა, უღვაშები გადაიგრიხა და ჰკითხა: — რა ქვია მაგ ქალს, ბიჭო?

— ფათმა! ფათმა ქვია, ბატონო!

შერიფ-ალიმ თავი დახარა. მათრახი ჩაფიქრებით დაიტყლაშუნა ჩექმასზე და თქვა: — შემებრალა სწორედ! კარგი გიქნია რომ წამოგიყვანია. იმუშავენს, ორ კაპიკს აიღებს და ტანზე ჩაიცვამს მაინც.

— მუშაობით არ მუშაობს ცუდად! — გამოესარჩლა ქალს ახალგაზრდა გლეხი.

— კი, კარგად მუშაობს. კომბაინია ნამდვილი! — ჩაილაპარაკა შერიფ-ალიმ, — წადი ახლა და მიხედე საქმეს.

გლეხმა თავი დაუქრა, გაბრუნდა და საჩრდილობელში შესულ ფათმას გასძახა: — ჩქარა გამოდი, ფათმა, ბატონი არ გაგიჯავრდეს!

ფათმა აჩქარდა, ბავშვს ძუძუ მოაწოვა, საქანელაში ჩააწვინა, საკინძე შეიქრა და საჩრდილობელიდან გამოსული ისევ მწკრივში ჩადგა.

როგორც კი ფათმა მწკრივში ჩადგა, შერიფ-ალიმ ადგილი მოინაცვლა, მწკრივს დაუახლოვდა და ფათმას შორი-ახლოს გაჩერდა: — „მეუბნებიან, კომბაინი იყიდებო, რად მინდა კომბაინი? ტყუილად გადავყარო ფულები? ეს ფათმა რომელ კომბაინს არა სჯობია?“ — ფიქრობდა იგი.

მუშაობაში გართული ფათმა კი სულ სხვა რამეს ფიქრობდა: — „ბატონი ჩემს უკან დგას და მითვალთვალებს, ვაითუ მისაყვედურებს, ბავშვი რატომ წამოიყვანეო, აბა ასეთ ბატარას ბედის ანაბარად ხომ არ დავტოვებდი სოფელში? ისიც საკმარისია, ორი ბავშვი რომ დავტოვე. ნეტავი რას შვრებიან ახლა? იქნება შიათ, იქნება წყურიათ?.. ჰკვიანი ადამიანი მე-



ველედ არ გახდება. არც მეველეს უნდა გაყვეს ჭკვიანი ქალი ცოლად. ხალხი უპატრონოდ ტოვებს საქონელს, ძროხამ ანა იცის, ღურთებს თავს და შედის ყანასა და ბაღჩაში. შენ კი, მეველე რომ ხარ, უნდა დაიჭირო და დაამწყვდიო. არ დაიჭერ, ყანის პატრონი გაჯავრდება. დაიჭერ და ძროხის პატრონი ჯავრობს, რა ქნას საწყალმა მეველემ? არის ასე ჩავარდნილი ორ ცეცხლს შუა, დარბის ენაგადმოგდებული, მეველეობაში აღებული ხელფასი ქალამნის საყიდლადაც არ ყოფნის... ერთი ეს სულეიმანიც დიდი შტერი ვინმეა. კაი, თუ ურტყამ ძროხას, ისეთ ადგილას უნდა დაარტყა, რომ არ დაემჩნეს. მაგან კი ასწია და ქვით ფეხი მოამტვრია, მიდი ახლა და იხადე ჯარიმა, ორასი ლირა! სადა გვაქვს რომ მივცეთ? მე რომ ვიყო, არ მივცემდი, მიხედოს ყველამ მის-მის ძროხას და არ იქნება მასე!.. სამი თვის ბავშვით, ამ სიცხეში რამდენი დღე უნდა ვიმუშაო ახლა, რომ ის ჯარიმის ფული გადავიხადო?.. ეს შერიფ-ალიც ხომ სულ მე მითვალთვალებს, ალბათ ფიქრობს, ეს ბავშვიანი ქალი რას გამიკეთებსო, მზემაც როგორ დააჭირა, იწვის ყველაფერი, სამინლად მტკივა ეს ოხერი წელი, ახლა ერთი დამასვენა და მეტი არაფერი მინდა!..

მზე დასავლეთისაკენ გადაიხარა, ოდნავ დაჰბერა ბორიომ. მომკვლებმა ცოტათი სული მოითქვეს, უფრო ხალისიანად ამუშავდნენ, ძნებს კრავდნენ, ურმებზე აწყობდნენ და კალოზე ავზავნიდნენ.

შერიფ-ალი ისევ მომკვლებთან ტრიალებდა, შესცქეროდა ფათმას და ვინ იცის, უკვე მერამდენედ იმეორებდა გუნებაში: — „კომბაინი იყიდეო, რათ მინდა მე კომბაინი? ეს ფათმა მაინც რა მუშა ქალია, იცოცხლე შენ, იცოცხლე... კომბაინმა მაგაზე მეტი რა უნდა გამიკეთოს? მაგაზე კარგად უნდა მომიმკას კომბაინმა ყანა?“


— არა, არა! — წამოიძახა ხმამაღლა, — ეს ფათმა ნამდვილი კომბაინია, კომბაინი!

მომკვლებმა გაიგონეს ბატონის ნათქვამი, გაიცინეს და ფათმას მაშინვე უწოდეს კომბაინი.

შერიფ-ალიმ დაპირობა შეასრულა და ხალვა მოიტანა, განაწილებითაც მანვე გაანაწილა, და იმდენი ეცადა, ფათმას ყველაზე მეტი შეახვედრა: — ბავშვიანი ქალია, ყველაზე მეტი მაგან იშრომა და ეკუთვნის, ჭამოს!

— ბატონმა კომბაინი გიწოლა, ფათმა! — ბატონის თვალში ბრწყინავხარ, უკვე! — ეუბნებოდნენ მომკვლები ფათმას და ბედნიერი, სიხარულით ატანილი ქალი ჩუმად, მოკრძალებით იღიმებოდა.

ხალვის ჭამა მოათავეს და ისევ შეუდგნენ მკას. შერიფ-ალი ისევ ფათმას მახლობლად იდგა და ისევ არ ამოიღებდა



მზერას, ისევ ილოკავდა ტუჩებს წუწკივით და ფიქრობდა: „ძალიან კარგი ქალია ეს ფათმა, მაგრამ რად გინდა მეტე, ტყიური მეველის ხელში ჩავარდნილა საწყალი, რა არის სოფლის ორკაპიკიანი მეველე? ტიტველი დაუდის ცოლი, კაბაც კი ვერ უყიდია, რომ ჩააცვას. რა ქალი ჩაუგდია ხელში იმ შობელძალს, სად ეს ქალი და სად ის ტურტლიანი მეველე? ასეთ ქალს კარგი კაბა უნდა, კარგი ჩაცმა-დახურვა უნდა... უჰ-უჰ! რა იქნება... რა ბარძაყები აქვს, რა ბარძაყები! სამოთხეა ნამდვილად, სამოთხე!“

საჩრდილობელში ისევ აჩხავლდა ბავშვი. ფათმამ ვაიგონა ბავშვის ტირილი, შეცბა, წელში აიწურა, შეწუხებული მზერა მიაპყრო საჩრდილობლის მიმართულელებით, სურდა მისულიყო ბავშვთან, დაეწყნარებინა, ძუძუ შოეწოვებინა, მაგრამ როგორ? ბატონი ედგა გვერდით, მას შესცქეროდა და მისი შიშით ადგილიდან დაძვრა ვერ გაეხედნა.

— ხომ ხედავ, ბავშვი გიტირის! წადი, მიხედე ბავშვს! — უთხრა შერიფ-ალიმ.

ფათმამ მადლიერი, მადლობით აღსავსე მზერა შეავლო ბატონს და საჩრდილობელს მიაშურა მაშინვე... მუშაობა დულდა და გადმოდულდა. მომკელები მკიდნენ და მღეროდნენ. ურმებს მომკილი პური კალოზე გადაჰქონდათ, ფერდობზე ისევ ძოვდა ცხვარი და კომბალზე დაყრდნობილი, გაუნძრევლად მდგარი მწყემსი ისევ მოწყენილი და დაფიქრებული გადმოსცქეროდა მომკელებს.

აწრიანებულმა შერიფ-ალიმ ტურასავით მიმოიხედა აქეთ-იქით, ყველა რომ თავთავიანთ საქმეში გართული დაინახა და დარწმუნდა, მისთვის სათვალთვალოდ არავის ეცალა, იმედმოცემულმა ნაბიჯს აუჩქარა და მალე საჩრდილობელში დურთა თავი.

— ფათმა! — დაუძახა შერიფ-ალიმ, როგორც კი საჩრდილობელში შევიდა.

ფათმა მობრუნდა, ბატონი რომ დაინახა, შეცბა, შეიშმუნა, ლოყები აუწითლდა, მოლიადებულ გულმკერდზე ხელისგული აიფარა და წამოდგომა დააპირა, მაგრამ შერიფ-ალიმ არ დაანება, გვერდით მიუჯდა, ბავშვს მიაჩერდა და ყასიდად თქვა: — რა კარგი ბავშვი გყოლია, ფათმა! ანგელოზია ნამდვილად!

ფათმა კიდევ უფრო გაწითლდა, უხერხულობაში ჩავარდნილმა ვერაფერი მოახერხა და, რა ვიცი, ბატონო, ჩაილაპარაკა.

— ლამაზი დედა ლამაზ შვილს შობს! ლამაზი ხარ და რა ვასაკვირია ლამაზი ბიჭი რომ გყავს! — შერიფ-ალი მოურიდებლად მიაჩერდა ფათმას.



ფათმამ თავი დახარა და მიწას დააჩერდა.

— შენ კარგი ქალი ხარ, ფათმა! — განაგრძობდა ზეზინი შესულივით შერიფ-ალი, — შენ ოქრო ქალი ხარ, ფათმა! მაგრამ ხომ იცი, ნათქვამია, ტყის კარგ მსხალს დათვი ჭამსო! მწყინს რომ ვერაფერი შვილი ქმარი შეგხვედრია და ბედი დაგწვია!

ფათმა დაიბნა, იგი ვერაფრით ვერ მიმხვდარიყო, თუ რატომ ეუბნებოდა ასეთ რამეს ბატონი, რა სურდა მისგან.

შერიფ-ალი დროს არ კარგავდა, თანდათანობით მიიწევდა ქალისაკენ და სურდა სიტყვებით გაებრუებინა იგი: — სამწუხაროა, აქამდე რომ არ გიცნობდი, ფათმა! ო, რა ცუდია, აქამდე რომ არ გიცნობდი! — დაღლილივით ქშინავდა ხმა-ათრთოლებული და თვალეხანთებული შერიფ-ალი.

ფათმამ კიდევ უფრო ჩაჰხარა თავი და მორცხვი, ძლივს-გასაგონი და ათრთოლებული ხმით იკითხა: — ჩემი გაცნობა თქვენ რაში გჭირდებათ, ბატონო?

შერიფ-ალის ცელქმა ღიმილმა გადაურბინა ტუჩებზე: — ვერ მიხვდი, ფათმა? რატომ და შენ და შენს ქმარს ჩემს მამულში გადაგიყვანდით და გაცხოვრებდით.

ფათმამ შეფარვით შეხედა და ლოყაზე ჩამოისვა ხელი: — შენს მამულს მეველე არ ყავს, ბატონო? — იკითხა მიაში-ტად.

მისმა გულუბრყვილობამ შერიფ-ალი გაამხიარულა, გაეცინა, უღვაშები გადაიგრიხა და როგორც შეეძლო, გრძნობით, გულში ჩამწვდომი ხმით უთხრა: — მე მეველე რაში მესაჭიროება, მეველეების მეტი რა მყავს, ფათმა! მე შენ, შენ შესაჭიროები, ფათმა!

მხოლოდ ახლა, ამ სიტყვების მერე, ისიც მიახლოებით გაიგო ფათმამ ბატონის გულის ნადები, შეშინდა, სველი ბარტყივით მოიბუზა, ხმა ვერ ამოიღო და თვალი ვერ გაუსწორა. ქალის ღუმილით გულმოცემულმა და გათამამებულმა შერიფ-ალიმ დრო არ დაკარგა, სანამ თონე ცხელია, ბარემ პური დროულად გამოვაცხოო, გაიფიქრა, მიიწვია ქალისაკენ, მუხლი მუხლზე მიადო, სახე ახლოს მიუტანა სახესთან და გრძნობამორევით, დაუოკებელ ვნებისაგან ათრთოლებული ხმით, ჩურჩულით უთხრა: — მე შენ მესაჭიროები, ლამაზო, შენ!

ფათმამ თვალები დახუჭა, აკანკალდა და ისე დაიბნა, ისიც კი ვერ მოახერხა გვერდზე მიწეულიყო, ანდა ამდგარიყო, სანამ დრო იყო საჩრდილობელიდან გასულიყო და თავი გადაერჩინა.

— ჩემო ლამაზო, ფათმა! — განაგრძობდა ჩურჩულს შერიფ-ალი, — შენ მე გადამრიე!

—
— ჩემო შავთვალა ფათმა!

—
— ენა ამოიღე, ქალო! — მოულოდნელად გაბრაზდა შერიფ-ალი.

ფათმა შიშისაგან აკანკალდა.

— მთებისა და ტყის ლამაზო ჩიტო, ფათმა! სოფლის ლურჯო იავ, გენაცვალე, ფათმა! — ისევ დაუყვავა შერიფ-ალიძე.

— რა გინდა ჩემგან, ბატონო? — როგორც იყო გაიღო ხმა ქალმა, — რა ვიხდა ჩემგან?

შერიფ-ალიძე ახლა კი შეიკრა შუბლი და ხმას აუწია: — რა ვიხდაო!.. შეხედე ერთი ამ უნამუსოს! — თვალეები დააბრიალა და მუშტი აღმართა, — უყურე ერთი, მე როგორ სიტყვებს ვეუბნები, ეს კი...

— უნამუსოს რატომ მეძახი, ბატონო? — ლამის ატირდა ქალი, — ჩემი უნამუსობა რაში შეამჩნიე? შენ ბატონი ხარ, სახელიანი კაცი, ავტორიტეტი გაქვს, ჰოდა, ნურც მე შემარცხვენ, ბატონო, და ნურც თავს შეირცხვენ! ცუდი ხომ არაფერი მითქვამს?

— ცუდი?! მეტი რა უნდა გეთქვა? ბატონს ასე უნდა მოეპყრა? — თვალებს აბრიალებდა შერიფ-ალი და მუშტს მუხლისთავზე ირტყამდა. მერე მოულოდნელად დაწყნარდა და საქმეს შეუდგა. ქალს ჯერ მხარზე მოუთათუნა ხელი, მერე მუხლისთავზე, მერე კი გატიკნილი ძუძუები მოუსრისა, ბოლოს გავეშებული დაეძგერა, ხელი მოხვია, ქშენით ჩაეხვია, ჩაბუბნა და მიწაზე წამოაქცია.

ფათმა წამით გააბრუა გავეშებული კაცის ტლანქმა, გამიზნულმა აღერსმა, წამით მიხებდა, მერე გამოფხიზლდა, მძლავრად გაიბრძოლა, გამოუძვრა ზემოდან მთასავით დაწოლილ ზონზროხა შერიფ-ალის, თმაგაწეწილმა და ბრაზისაგან შემოვლილმა. იქვე, კუთხეში მიგდებულ რიყის ქვას წამოუხსვა ხელი და მისკენ დახრილ შერიფ-ალის გამეტებით, მთელი ძალით მოუწაცვლა შუბლში.

შერიფ-ალი შებარბაცდა, გრძნობა დაკარგა და მიწაზე დაენარცხა. ვახეთქილი შუბლიდან სისხლი მოწანწკარებდა.

შიშისაგან მიცვალებულივით გაფითრებულმა ფათმამ უკან დაიხია და თვალეები დახუჭა.

— მე შენ გაგაფრთხილე, ბატონო, შენ კი არ მომეშვი, დასაბრმავებლო! — თქვა მან.



შერიფ-ალი თანდათან მოდიოდა გრძნობაზე, იტანდა სიბრაზე, წამოდგომა დააპირა, ძლივს აითრია წელი და ქალისაკენ წაიწია.

ფათმამ, ხელი, რომელშიაც გასისხილანებული ქვა ეჭირა, ზემოთ აღმართა და გაათრთხილა: — აბა, ერთი გაბედე და მომეკარე, ვნახავ შენს სეირს მაშინ! — ამას კი ამბობდა, მაგრამ ძალიან შეშინებული და შეცბუნებული იყო, ეს რა ჩაიდინა, ბატონს ქვა სთხლიშა, შუბლი გაუხეთქა, სისხლი აღინა.

შერიფ-ალი, ქალის ანთებული თვალები რომ დაინახა, შეჩერდა, ვერ გაბედა ნაბიჯი გადაედგა მისკენ: — აღამიანი თავის ბატონს რომ ასეთ საქმეს წაკიდებს... — ჩაილაპარაკა და სისხლი მოიწმინდა.

— ბატონი რომ ხარ, იცოდე, როგორ მოიქცე! — შიში დაძლია ფათმამ, — ცდფიანივით რას დამეტაკე?

— აღამიანი რომ თავის ბატონს... — მოშლილი პატეფონივით ხრიალებდა შერიფ-ალი და აკვიატებული იმეორებდა ერთი და იგივეს.

— შენისთანა ბატონს ქვა უხლია თავში! — მიაძახა ფათმამ, ქვა გადაადგო, თავისი ღარიბული ბარგი ფუთაში გამოკრა, ბავშვი აიყვანა, მკერდზე მიიკრა, საჩრდილობლიდან გავიდა და დაადგა მტვრიან, მზით გავარჯარებულ გზას თავისი შორეული სოფლისაკენ.

გაყინულ მჩვარივით გაშეშებული შერიფ-ალი იდგა გაოგნებული, თვალებს ახამხამებდა და ტუჩებს აცმაცუნებდა. ბოლოს ამოიქშინა, თავი ასწია, მიმოიხედა და ჩაილაპარაკა: — გლეხის ტურტლიანი, ბინძური გომბიოსავით ხელი ვერ შეგივლია კაცს. ეგაა საქმე? ეეჰ, მოკვდა, მოკვდა უკვე ბატონობა!

მოულოდნელად საჩრდილობელში ახალგაზრდა მწყემსმა შემოიხედა. მას ცხვრის ფარა ფერდობიდან დაბლა ჩამოერეკა, ნაპურალში მიეშვა, თვითონ კი ბატონის მოსაძებნად წამოსულიყო. სისხლში გაღვრილი შერიფ-ალი რომ დაინახა, გაოცებისაგან პირი დაალო და ძლივს ამოღრადნა: — რა მოგივიდა, ბატონო შერიფ-ალი?

შერიფ-ალიმ მუშტი შეკრა და თვალები დაუბრიალა: — რა უნდა მომსვლოდა, ბიჭო? რა შენი საქმეა? დაგპატიე? მოგიხმე? გკითხე? დაგვალე რამე?

გაოგნებულ მწყემსს ვერ გაეგო, რა ცოდვა ტრიალებდა ბატონის თავზე, რატომ უყვიროდა, რატომ თათხავდა ასე.

ფათმაზე დაბოღმილი შერიფ-ალი კი მწყემსზე იყრიდა ჯავრს.



ბეგი არ იყო და მემამულე. ერთი საცოდავი, ლარიანი...
ლი იყო აიშა, კალოზე სულ სამი ხვაი ჰქონდა მიტანილი გა-
საღეწად, ერთი ხვაი ქერი იყო, მეორე — ჰვაი, მესამე კი-
დეგ, -- ხორბალი.

მარტოხელა ქალი იყო აიშა. ქმარი და მარჩენალი არ
ედგა თავზე. ყველაფერი მისი საზრუნავი იყო, მისი მისახე-
დი... ჯერ იყო და, სამემოდგომო ხვნას შეუდგა. იპენი იმ-
რომა, გაწყდა ქალი წელში. როგორც იყო მორჩა, მერე კა-
ლოს მიაღდა და პირველად ჰვავის ლეწვას შეუდგა. მოგეხსე-
ნებათ, ჰვაი რა ძნელი გასაღეწია. არც ხელსაწყო ჰქონდა
ხეირიანი. კევრში ერთი ბებერი, გაქუცული, შიმშილისაგან
ფერღებჩავარდნილი ხარი ება, მეორეში კი გაძვალტყავებუ-
ლი ბებერი ძროხა. ასეთი გამწევი ძალის შემხედვარეს აბა
რა იმედი უნდა ჰქონოდა? ძალიან წუხდა და განიცდიდა აიშა
მარტოხელობას, სულ თავის უიმედო ბედზე წუწუნებდა: —
სხვებივით ხელისწამომშველბელი და დამხმარე რომ მყავ-
დეს, რა მიშავდა მაშინ მე უბედურს? ღმერთმა დასწყევლოს
ჩემი ვაჩენის საათი, ღმერთმა!

მზე მთელი ძალით აჭერდა. ენა და ბაგე ისე გაშრობოდა
ქალს, ტუჩები ლამის აწებებოდა ერთმანეთზე. კევრზე მდგარს
სიცხისა და დაღლილობისაგან მუხლები უკანკალებდა,
ოფლში გაღვრილი და ძლაგამოღეული ძლივს იკავებდა
თავს, რომ კევრიდან არ ჩამოვარდნილიყო. ხელში გრძელი
ჯოხი ეჭირა, დროდადრო ხან ხარს გადაჰკრავდა ჯოხს, ხან კი-
დეგ ძროხას და ორივეს ამხნეებდა: — ჰადი, ჰო, გასწით, ჰო!

კალოდან ამდგარი მტვერი ჰაერში ტრიალებდა, ედებოდა
სველ, გაოფლილ სხეულს და საშინელ ქავილს იწვევდა. ამ
საშინელ ბულში სუნთქვა ძალიან უჭირდა ქალს. მარტო მისი
კალოდან ამდგარ მტვერს ასე თუ ისე გაუძლებდა როგორმე...
მისი კალოს მახლობლად მოლა-ალის კალო იყო, სადაც მისი
მუშები ჰვავს ლეწავდნენ. ბედი რომ უნდა ყველაფერს: ქარს
მტვერი ზირდაპირ აიშას კალოზე მოჰქონდა.

ჩქარობდა აიშა, ჩქარობდა სხვებიც. შეშინებულები იყვ-
ნენ სოფლელები, სამი წლის წინანდელი უბედურება ახსოვ-
დათ. იმ წელიწადს მოულოდნელად მოვიდა წვიმა, წაიღო სო-
ფლის კალოები, სულ ერთიანად დახვეტა და სოფელი მშვიერი
დატოვა. ამიტომ ჩქარობდა აიშა, არ ეპუებოდა დაღლას,
მტვერსა და სიცხეს.

ბოლოს მაინც ვეღარ გაუძლო, დაღლამ თავისი გაიტანა.
მიხვდა, თუ ცოტას არ დაისვენებდა, მეტს ვეღარ გაუძლებდა,
დაეცემოდა და მოკვდებოდა.




— უნდა დავისვენო! — ჩაილაპარაკა, კევრი შეპყრობილი გაღვიძებული კვავი ერთად მოაქუჩა, — ცოტა ხარ-ძროხაც უნდა დავასვენო. ჩემს უბედურ შვილსაც დავხედო უნდა.

აიშას ავადმყოფი შვილი ისმაილი კალოს მახლობლად, ურმის ჩრდილში იწვა ჭილობზე, აიშამ პირუტყვს წყალი და-ალევიწა და მერე ფეხაკრფებით მიუახლოვდა ავადმყოფს. მუშაობაში გაერთო. შვილი სულ გადაავიწყდა და ახლა არ იცოდა, ცოცხალი დახვდებოდა თუ მკვდარი... ბიჭს ეძინა. ქვერათმა, რომელიც კულულებად ეყარა შუბლზე, ოფლს ერთიანად დაესველებინა, სახეზე პურის მარცვლებივით ეყარა ოფლის წვეთები, აიშა დაინახა, მიძინარეს ფრთხილად მოწმინდა ოფლი. — ოჰ, ჩემო ჯიგარო, ჩემო თვალო! შენს ჩემზე მჩუქებელ ღმერთს რა იქნებოდა, შენი დარდის, შენი სატკივრის წამალიც რამ მოეცა?! — თავი ასწია, ხელები აღაპყრო და ჩურჩულითვე განაგრძო: — მაღალო და ყოვლისშემძლე ღმერთო, რა იქნებოდა დაგენახვებინა ჩემთვის შენი ყოვლისშემძლე ძალე. პატრონობა გაგეწია ჩემდა და ჩემი საცოდავი შვილისათვის, დახმარებოდი ისმაილს, დაგეწყნარებინა რკვილი... ღმერთო დიდებულო, მიხედე ჩემს ისმაილს, ნუ მომიკლავ მას! — ავადმყოფს დოღბანდი გადააფარა სახეზე და მიტოვებული კევრისაკენ გასწია: — „ყოველ ღამეს დილა მოსდევსო, ნათქვამია. მაგრამ რატომ ჩემთვის არ თენდება ეს დილა? რატომაა ჩემთვის ყოველთვის ღამე და ბნელი?... ისმაილი რომ მოიკეთებს, ოთახებს დაწმენდ-დავაკრიალებ, სოფლის გზაზე ქვებს ავკრიფავ, ღმერთს მამალს დავუკლავ, ჩემზე უფრო ღარიბის ბავშვებს პერანგებს ვუყიდო!.. როგორი ღამაში ბიჭი იყო ჩემი ისმაილი, ტოლებში გამორჩეული. ახლა კი რა სანახავია, როგორ დაავლახა ავადმყოფობამ!“ — ფიქრობდა კევრისაკენ მიმავალი და მტვრიან, მზისგან გახურებულ მის ლოყებზე სველ კვალს ტოვებდა ცრემლი.

კარგა ხანს მუშაობდა აიშა და თან ტიროდა. საქმე ნელ-ნელა მიიწევდა წინ. ძაღლონეგამოლეული პირუტყვი ზანტად, ლასლასით ეწეოდა უღელს... აიშა დაიღალა, ჯანიც გამოელია, შვილის დარდმა ხომ სულ მოუთავა ხელი... პირუტყვი შეაჩერა, კევრიდან გადმოვიდა და ჩაილაპარაკა: — ფუ დარჩება და დარჩეს ჩემი კალო! წვიმა თუ მოვა, მოვიდეს, თუ ნიაღვარი მოვა, დაე წაიღოს ნიაღვარმა, თუ არ უნდა გვაჭამოს ლუკმაპურა ღმერთმა, ნუ გვაჭმევს...

— რას გაგიჩერებია საქონელი, გოგო? — მოესმა ძახილი.

გაიხედა და თავისი და — ჰაჯერი დაინახა. იგი მისკენ მოემართებოდა.



— ახლა გაჩერება შეიძლება? — უკმაყოფილოდ ჩაიხუტა პარაკა ჰაჭერმა, — ვინ იცის, როგორ ამინდს დაიჭერს... მოასწრო წვიმის დაწყებას! ამუშავე საქონელი, მორჩი საქმეს!

— თუ დაიწყებს წვიმას და დაიწყოს! — ჩაილაპარაკა აიშამ, — აღარ შემიძლია მეტი. ყველაფერი მომძულდა.

ჰაჭერი თვალელებში მიაჩერდა დას და იკითხა: — ისმაილი როგორაა, ყური როგორ აქვს?

— რას იზამს, როგორ იქნება ისმაილი? წვალობს საცოდავი, ტკივილი ტანჯავს. როგორც იქნა ჩაეძინა, მარა რად გიხდა, მალე გაიღვიძებს და ისევ დაეწყება ტკივილი. გაიტანჯა ბავშვი, ისე დასუსტდა, ლანდი გასდის ყბაში. გუშინწინ მისდალი ბიძიამ მასწავლა, ყურზე უმი ხორცი მიაღვევი, ხორცის სუნზე მატლები გარეთ გამოვლენო. ვიშოვე ხორცი და როგორც მითხრა, ისე მოვიქეცი. მაგრამ რა გინდა შენ, არც ამან მისცა შელავათი ბავშვს. მატლები გარეთ არ გამოვიდნენ... — გაჩუმიდა და თავსაფრის კილით მოიწმინდა ცრემლი.

ჰაჭერმა უმეწოდ გაშალა ხელები და იკითხა: — რა უნდა ქნა, ვოგო?

— რა ვიცი რა უნდა ვქნა! — ხელი ჩაიქნია აიშამ, — მუხტარის ცოლმა მითხრა, მეც მასე მტკიოდა ყური, ჰოდა, კამეჩის თბილი ფუნა დავიდვევი ყურზე და მოვრჩიო... ესეც ვცადე, შევედი ბოსელში, ავიღე კამეჩის ფუნა და მივაღვევი ყურზე... ამაზე სულ გაგიჟდა საცოდავი ბიჭი: — თავის ტვინს მიხრავენ მატლები, დედიო! — ასტეხა ყვირილი... ახლა ქე ჩაეძინა, მაგრამ რომ გაიღვიძებს მერე აღარ ვიცი რა იქნება!

-- ესე აგი მატლები არა და არ კვდებიან! — ჩაილაპარაკა ჩაფიქრებულმა ჰაჭერმა.


— არ ვიცი, დაიკო! რა ვიცი მე? მეშინია, ძალიან მეშინია, ასე ამბობენ, ის მატლები თუ ყურიდან არ გამოვიდნენ გარეთ, ტვინში ავლენ და ბავშვს ტვინს გამოუჭამენო!

— ხუ ტირიხარ, ტირილით მაინც ვერაფერს უშველი ისმაილს, — შეეცადა ჰაჭერი დის დამშვიდებას.

კიდევ უხდოდა რალაც ეთქვა, მაგრამ ქმრის ძახილი მოესმა. გაჩერდა და შეცბუნებულმა მიუგღო ყური: — სად გადაიკარგე შე ასეთო და ისეთის შვილო, ლაპარაკის დროა ახლა? ცოცხი, ცოცხი მოიტანე ჩქარა!

ჰაჭერმა მუხლებზე დაირტყა ხელისგულები და ფეხზე წამოხტა: — მომკლავს ჩემი კაცი. შევექეცი შენთან ლაპარაკს და სულ დამავიწყდა, რომ ცოცხის წასაღებად მოვედი! — იქვე დაგდებულ ცოცხს დაავლო ხელი და ძუნძულით გაიქცა.

აიშამ ცრემლით სავსე მზერა გააყოლა მიმავალ დას და ჩაილაპარაკა: — სანამ კევრზე შევდგებოდე, ისმაილს დავხედავ ერთს.



...აიშამ ბავშვს სველი დოღბანდი გადაადრო, ოფლი მისი სწმინდა და ის-ის იყო გაბრუნება დააპირა, რომ ბიჭმა გაიღვივება და ტირილი დაიწყო:

— ოოჰ, დედი! გამომიხრეს მატლებმა ყველაფერი, ტვინი შემიჭამეს, ტვინი!

აიშა დაიხარა და როგორც შეეძლო ისე დაამშვიდა მტირალი: — შვილო, ისმაილ, ნუ ტირი, შვილო! მალე მორჩები და მერე ისევ ძველებურად ირბენ უდარდელად აღმა-დაღმა. გაგივლის ყურის ტკივილი, მატლები გარეთ გამოვლენ და მორჩები!

— არა, დედი! — უიმედოდ გააქნია თავი ბიჭმა, — მე მოვკვდები. შენ არ იცი ტვინს როგორ მიღრღნიან, — წამოდგომა სცადა, დიდი გაჭირვებით წამოიწია. ამ დროს ყურზე მაკრული კამეჩის ფუნა ჩამოუვარდა.

აიშემ აიღო და ისე დაუპირა ყურზე მიდება: — მოიცა, შეგიხვევ ახლავე, შვილო!

— არ მომაკარო მაგი, არ მინდა, არა! — ხელები გაასავსავა ბიჭმა, — გამომიხრეს ტვინი, გამომიხრეს!

აიშამ თავი გააქანა, ქვითინი შეიკავა. ავადმყოფი მუხლებზე გადაიწვინა და ყურში ჩახედა: ყურში არაფერი სჩანდა. სჩანს მატლები უფრო ღრმად მოკალათებულიყვნენ ყურში, საიდანაც ბაღბამი სდიოდა. დედის მუხლებზე გადაწოლილი ბიჭი გულსაკლავად კრუსუნებდა.

აიშამ მოიხედა. კევრში შებმული ხარ-ძროხა სიცხეში იდგნენ და მოწყენილი, ნაღვლიანი მზერით დასჩერებოდნენ მიწას. გაჩერებული კევრი, ავადმყოფი შვილი, კიდევ უფრო უმატებდა ნაღველს აიშას.

„ეს მიწის შესაჭმელი გოგოც რომ არ მოვიდა ამდენხანს? — ფიქრობდა იგი, — ამხელა გოგოა და იმისი მოფიქრებაც არა აქვს, ჩქარა დაბრუნდეს სოფლიდან და მომეხმაროს!“

ისმაილი მეცხრე წელში იყო გადმდგარი, გოგო კი სამი წლით იყო ბიჭზე უფროსი.

„უუუუური, უგულო გოგოა, უგულო! — განაგრძობდა ფიქრს აიშა, — ისმაილი რომ კარგად ყოფილიყო, ძას გავგზავნიდი და გენახათ ერთი რა მალე მოირბენდა. სულ ჩიტვიტ მიფრინდებოდა... ის სამიწე კი... ოჰ, ჩემო შვილო ისმაილ, შარშან ამ დროს როგორ კარგად მყავდი, შენს თანატოლებში როგორ ტრიალებდი, რა მხიარული იყავი, როგორ ჯობდი ყველას. საიდან, როგორ შეგვემთხვა ასეთი ფათერაკი? რატომ გაგიჩნდა ყურებში მატლები? არა, ნამდვილად იქ, იზეთის ქორწილში ვამითვალეს ბიჭი. ვათვალუღია, აბა სხვა რა უნდა იყოს? სოფელში ბევრს ატკენია ყური, მაგრამ, როგორც კი



ჩირქი წამოუვიდოდათ, მაშინვე ურჩებოდათ. ისმაილი ავერ მეთერთმეტე თვეა, რაც ყური სტკივა, ბოლო ნახებში კი მატლებიც გაუჩნდა. მატლები პირველად იმ სამიწე გოგომ შეამჩნია და დამანახა... მაინც რატომ დაავვიანდა ამდენი იმ დასაქმებულს?“ — აიშამ მწუხარედ გადახედა შვილს, მერე მიტოვებულ კევრს და ბოლოს ისევ სოფლის გზას მიაპყრო მზერა.

ნახევარი საათის შემდეგ მოვიდა გოგო, საჭმელი მოიტანა ქილით და ურემთან მოკალათდა. აიშამ დატუქსა დაგვიანებისათვის, მერე ხარ-ძროხა გამოუშვა კევირდას და წყალზე ჩადენა, მერე ურმის ჩრდილში მოკალათდა და სადილობას შეუდგნენ.

ისმაილი არ მიეკარა საჭმელს: გაუჩერებლად ტიროდა და ტიროდა:

აიშამ ჭამა მიატოვა, წამოდგა და გოგოს დაუძახა: — მე ძისდალი ბიძიასთან უნდა გადავიდე ერთი, შენ ისმაილს მიხედე. მე მალე დავბრუნდები!

გოგომ თავი დაუქნია და არხეინად განაგრძო ჭამა.

* * *

მისდალი ბიძია კალოზე პურს ანიავებდა. აიშა რომ დაინახა, საქმეს თავი ანება და ჰკითხა: — როგორაა საქმე, აიშა?

პასუხად აიშამ ტირილი ამოუშვა: — შენ გენაცვალე, ბიძია! მატლები ირევიან ბავშვის ყურში, მატლები! ხორცი შემოვაკარი, არაფერი ეშველა. კამეჩის ფუნა შემოვაკარი, მაინც არაფერი!.. მუხტარის ცოლმა თქვა, მატლები რომ გასჩენია, კარგია, ჩირქის დენას შეუწყვეტსო.

მისდალი ბიძიამ ფიწალი პურის ხვავზე მიაგდო, შარვალი დაიფერთხა, ჩაფიქრდა და თქვა: — ისმაილი ყველასათვის საყვარელი ბიჭია! საჩქაროდ უნდა მოვიფიქროთ რაღაცა!

აიშამ ცრემლით სავსე თვალებით იმედიანად შეხედა. — შენ გენაცვალე, ბიძია, იქნება უშველო რამე!

— ნუ გეშინია! — დააბედა მისდალი ბიძიამ და ბიჭის სანახავად გაჰყვა.

* * *

ისმაილი ისევ ტიროდა და წვალობდა. მისდალი ბიძიამ მუხლებზე გადაიწვინა იგი, ყური წყლით მობანა, ჭვავის გამხმარი ღერი აიღო და ყური გამოუჩიჩქნა.



— აი, ნახე, გამოჩნდნენ მატლები! — წამოიძახა დეკანოზის ნიჟარიდან გამოცვნილი მატლები დაანახა აიშას. აიშამ ლოყაზე შემოიკრა ხელი და ავიშვიშდა.

— დანარჩენები მიიმალნენ! — ჩაილაპარაკა მისდალი ბიძიამ. — რაიმე საშუალება თუ ვერ გამოვნახეთ, გამოჭამენ მატლები ტვინს ისმაილს!

— მუხტარის ცოლს უთქვამს, ყურში მატლების გაჩენა კარგიაო! — ისევ გაიმეორა აიშამ.

— მუხტარის ცოლს რა ვაეგება ყურისა და მატლისა? — მოულოდნელად გაბრაზდა მისდალი ბიძია, — ექიმია ის უნამუსო თუ რა? არა, რაღაცა საშუალება უნდა გამოვძებნოთ, აიშა, თორემ წახდა ბავშვი და ისაა!.. შენ მე მომისმინე და ქალების ბუტბურს ნუ უგდებ ყურს... სანამ ბიჭს ყური სულ არ გაფუჭდება, რაიმე საშუალება უნდა გამოვნახოთ.

აიშან უმწეოდ გაშალა ხელები, თავი ჩაჰკიდა, დააჩერდა მიწას და ჩაილაპარაკა: — ლამისაა შევიშალო. რა ვქნა, რა მიწას მივცე თავი, აღარ ვიცი!

— რაღაცა უნდა ვუშველო ბიჭს! — დაფიქრებით, აკვიატებულად გაიმეორა მისდალი ბიძიამ.

— თქვენ უფრო იცით, ბიძია!

მისდალი ბიძია ჩაფიქრდა, სახეზე ჩამოისვა ხელისგული და წყნარად განაგრძო: — ხომ გინახავს, აიშა? ზოგჯერ ცხვარს დუმაზე გაუჩნდება მატლი. შენს ბიჭს სწორედ ისეთი მატლებითა აქვს სავსე ყური... იცი შენ რითი სპობენ იმ მატლებს მეცხვარეები?

— მაგი მე რა ვიცი, ცხვრის პატრონებმა იციან მაგი! — ჩაილაპარაკა აიშამ, — მგონი ასფინიკი ქვია მაგ წამალს, ზუსტად არ ვიცი...

— ჰოდა, ჩვენაც ასფინიკი უნდა ჩავასხათ ბიჭს ყურში! მე სხვა საშუალება არ ვიცი, ჩავასხამთ ასფინიკს და მატლები დაიხრცებიან!

— ბავშვს ყურში ასფინიკი ჩავასხათ?! — შეიცხადა აიშამ, — ეს რა სთქვი, მისდალი ბიძია?! სულ არ დავლუპოთ ბავშვი!

— ასეა, აიშა! სოფელში ცხოვრება მონობაზე უარესია. ქალაქში რომ ვყოფილიყავით, სანამ ყურში მატლები გაუჩნდებოდა, მანამდე ვუშველიდით ბიჭს, მივიყვანდით ექიმთან, მივცემდით ფულს და ისიც უმკურნალებდა, მოარჩენდა. მახსოვს, ინგლისელებს რომ ჩავუვარდი ტყვედ, იქ ერთს ასტკივდა ასე ყური. მოვიდა ექიმი და მაშინვე მოურჩინა... ეს ბავშვი რომ ქალაქში ყოფილიყო, მაშინვე მოურჩინდა ექიმი ყურს... აქ კი სხვა გამოსავალი არაა. ახლავე გააქციე ვოგო სოფელში, მივიდეს მწყემსებთან და წამალი გამოართვას.

აიშა ხმამალლა ატირდა. — ის წამალი სულ დაწვეს,
სულ მომიკლავს ბავშვს.

მისდალი ბიძია გოგოს მიუბრუნდა: — გაიქეცი, გოგო,
და იაზინების მწყემსებს ჩემი მოკითხვა გადაეცი, უთხარი ას-
ფინიკის ბოთლი გამოგატანოს.

გოგომ ჯერ დედას შეხედა, მერე მისდალი ბიძიას, მერე
მოწყდა ადგილს და თავპირისმტვრევით გაიქცა დავალების
შესასრულებლად.

მისდალი ბიძიამ თვალი გააყოლა და როცა გოგო თვალს
მიეფარა, მიუბრუნდა აიშას და უთხრა: — ბავშვის ყურში
ასფინიკი არ ჩაისხმებაო, ამბობ, არა? მეც ვიცი, რომ არაა კა-
რგი მაგი. ის შავი, თხევადი წამალი, სადაც კი დაეწვეთება,
იმ ადგილს სულ ერთიანად წვავს... მაგრამ რას იზამ, როცა
ბავშვს ყურში მატლები აქვს?

აიშამ თავი გააქნია და ცრემლი მოიწმინდა. მისდალი ბი-
ძიამ კი მცირე ფიქრის მერე განაგრძო: — ორმოცდაცამეტ
წელში საშინელი ზღერი შემეყარა. ისე მექავებოდა ტანი, სუ-
ლი მიმდიოდა პირდაპირ. ტყავი სულ ერთიანად გადამძვრა
და სისხლმა დამიწყო დენა. ვერაფერი საშუალება ვერ გამოვ-
ნახე. ბოლოს სოფელში მასწავლეს, ადამიანის განავალი უხ-
და წაისვაო. როგორი წასასმელია მაგი, ქე იცი შენ. მაგრამ
სოფელში რომ ცხოვრობ და სხვა საშუალება არაა, მეტი რა
გზა გაქვს? მეც ავდექი და წავისვი. მერე ოთხი საათი მზეზე
ვიდექი მიშველი... ახლაც ასეა, სხვა გამოსავალი არაა და უნ-
და ჩაეასხათ ასფინიკი ისმაილს ყურში. ისმაილი ვადარჩება,
გამოკეთდება, გაიზრდება, იყიდის მეორე ხარს და ქე ამოვი-
დგება მხარში.

აიშამ წამოდგომა დააპირა, მაგრამ მისდალი ბიძიამ არ
დაანება:

— დაჯექი, დაჯექი!.. ასე ნუ მოეშვები და დარდს ნუ მიე-
ციმი, შვილო! ახლა გინდა მოთმინება და გაძლება შენ... რა-
ტომაა მაინც, რომ ამ ქალებს ტირილის მეტი არაფერი შეგი-
ძლიათ! შენი ტირილით ბავშვი მორჩება თუ რაშია საქმე?

აიშა, თითქოს მისი სიტყვები არ ესმისო, ისევ იცრემლე-
ბოდა და თავისთვის იმეორებდა: — ასფინიკი... ასფინიკი,
არა?

ბიჭი კი გაუჩერებლად ტიროდა, და დროდადრო ერთსა და
იმავეს იმეორებდა: — თავის ტვინი გამომიჭამეს მატლებმა,
დედი!

მისდალი ბიძია ბიჭს თავზე უსვამდა დაკოჭრილ ხელს და
აწოშმინებდა: — ნუ სტირი, ისმაილ! დიდი ხარ უკვე და სირ-




საქართველოს
ხელნაწილების
სამეცნიერო ცენტრი

ცვილია ტირილი! ეხლა შენი და ასფინიკს მოიტანს, ვეფხვებთ ყურში, დაიხოცებიან მატლები და მორჩები!

აიშა მძიმედ, მუხლებზე ხელისგულებდაყრდნობით წამოდგა, შუბლზე ხელი მოიჩრდილა და სოფლის გზას გახედა

— რას ხედავ, აიშა, ხომ არ მოდის გოგო? — შეეკითხა მისდალი ბიძია.


— მოდის, მოდის! — წამოიძახა აიშამ, — ხელში ბოთლი უჭირავს და ქარივით მოქრის საცოდავი გოგო.



თ. ა. ავსკოვო

ქრახეხეთი №14

ჩხ. გ.



შ ი ნ ა ა რ ს ი

ჯ უ ჯ ა	3
აკ, ექიმო!	9
თოფის უმეგებთეხელი	15
მ უ ტ რ უ კ ი	21
ფადიმ-ალას წისკვილები	30
თ ა მ ა უ ი	37
შ ა კ ა ნ ი	46
ხოზიკიანი ყანა	54
მოსუტი მკაცხე	63
ბედნიერი სიკვდილი	72
მორფლიანი ქალი	81
თითო-თითოდ უმგოდით!	92
სახლის საუენი ძვა	102
რჯულის საბანი	115
ჩვიდმეტი თებერვალი იყო...	127
ქ რ თ ა მ ი	132
კ ო მ ბ ა ი ნ ი	139
უვარების ბიჭი	151

